

書叢本基學國

潛研堂文集

(下)

著大錢昕

商務印書館發行

中華民國二十五年七月初版

(83196.1)

國學基潛研堂文集二冊

本叢書每部實售國幣玖角
外埠酌加運費匯費

著作者 錢大昕

發行人 王上海河南路五

印刷所 商務印書館

發行所 商務印書館

上海及各埠

集改

平

潛研堂文集卷二十三

書一

與友人論師書

日者足下枉過僕僕以事他出未得見頃遇某舍人云足下欲以僕爲師僕弗敢聞也蓋師道之廢久矣古之所謂師者曰經師曰人師今之所謂師者曰童子之師曰鄉會試之師曰投拜之師人生五六歲始能識字稍長則習舉業之文父兄皆延師教之父兄曰汝師之吾從而師之非必道德之可師也巫醫百工之人皆有師童子之師猶巫醫百工之師稱之曰師可也鄉會試主司同考之于士子朝廷未嘗許其爲師而相沿師之者三百餘年然令甲又有外官官小者迴避之例則固明予以師之稱矣漢人於舉主有爲之制服者而門生之名唐宋以來有之語其輩行則先達也語其交誼則知己也因其一日之知而奉之以先生長者之號稱之曰師亦可也今之最無謂者其投拜之師乎外雅而內俗名公而實私師之所求于弟子者利也傳道解惑無有也束修之間朝至而夕忘之矣弟子之所藉于師者勢也質疑問難無有也今日得志而明日背其師矣是故一命以上皆可抗顏而爲師而橫目二足販脂賣漿之子皆引

而爲弟子。士習由此而媿。官方由此而隳。師道由此而壞。孟子曰。人之患在好爲人師。古之好爲師也。以名。今之好爲師也。以利。好名之心。僕少時不免。迄今方以爲戒。而惟利是視。則僕弗敢出也。足下於僕。非有一日之好。而遽欲師之。僕自量文章道德。不足以爲足下師。而勢力又不足以引拔足下。若欲藉僕以納交一二鉅公。俾少爲援手。則僕之硜硜自守。不干人以私。友朋所共知。僕固不欲自誤。而亦何忍以誤足下乎。如以僕粗通經史。可備芻蕘之詢。他日以平交往還足矣。直諒多聞。謂之三益。不識僕之憲。直得附足下益友之一否。惟足下裁察。

與戴東原書

前遇足下於曉嵐所。足下盛稱婺源江氏推步之學。不在宣城下。僕惟足下之言是信。恨不卽得其書讀之。頃下榻味經先生邸。始得盡觀所謂翼梅者。其論歲實。論定氣。大率祖歐邏巴之說。而引而伸之。其意頗不滿於宣城。而吾益以知宣城之識之高。何也。宣城能用西學。江氏則爲西人所用而已。及觀其冬至權度。益啞然失笑。夫歲實之古強而今弱也。漢以前四分而有餘。漢以後四分而不足。而自乾象以至授時。歲實大率由漸而減。此皆當時實測。非由臆斷。故以古法下推。則必後天。由於歲實強也。以今法上攷。亦必後天。由於歲實弱也。楊光輔。郭守敬輩知其然。故爲百年加減一分之率。以消息之。雖過此以往。未之或知。而以之攷古。則所失者鮮。是其術未始不善也。西人之術。止實測於今。不復遠稽於古。然其所謂

平歲實者亦復累有更易則固非以爲永遠可守之歲實也江氏乃狃爲本無消長之說極詆楊郭以傳會西人然史冊所書景長之日班班可攷難以一人手掩盡天下之目也於是爲定冬至加減之說以加之而仍後天也於是又爲本輪均輪半徑古大今小之說以加之而仍後天也詞遁而窮則直斷以爲史誤毋乃如公孫龍之言臧三耳甚難而實非乎天道至大非一時一人之術所能御日月五星之行皆有盈縮古人早知之矣各立密率以合天行郭太史之垛積新法之本輪均輪次輪皆巧算非真象也約加減之數而假象以爲立算之根合則用之小不合則增減之大不合則棄之本無輪也何有於徑本無徑也何有古大而今小且夫兩輪半徑之數之減也西人固疑其初測之未合而改之非定以爲古多今少之率也就如江說兩半徑古大而今小則仍是楊郭百年消長之法以矛盾其何說之辭夫以兩春分攷歲實較之兩冬至爲近然小餘二四二一八七五者回回之舊率而地谷所用也崇禎時嘗改爲二四二一八八六四矣今則又改爲二四二三三四四二矣只此百年之中西士已不能守其舊率而江欲以地谷所用之數上攷千載以前謂必無消長也有是理乎本輪均輪本是假象今已置之不用而別剏攢圓之率攢圓亦假象也但使躔离交食推算與測驗相準則言大小輪可言攢圓亦可然立法至今未及百年而其根已不可用近推如此遠攷可知而江氏取其已棄之筌蹄爲終古之權度其迂闊亦甚矣西士之術固有勝於中法者習其術可也習其術而爲所愚弄不可也有一定之丈尺而後可以

度物有一定之衡石而後可以權物今江所持以衡量者有一定乎無一定乎言平歲實則其數可多可少也言最卑行則其行忽遲忽疾也言輪徑差則借象而非真象也以槃爲日而詆羲和以錐指地而嗤章亥持江氏之權度以適市必爲司市所撻矣向聞循齋總憲不喜江說疑其有意抑之今讀其書乃知循齋能承家書識見非江所及當今學通天人者莫如足下而獨推江無異辭豈少習于江而特爲之延譽耶抑更有說以解僕之惑耶請再質之足下

與段若膺書

聞足下名久矣頃邵孝廉與桐以足下所撰詩經韻譜見示尋繹再三其於古人分部及音聲轉移之理何其審之細而辨之確也聲音之變由于方言始于一方而偏于天下久之遂失其最初之音如今人讀胖爲普旺切讀闊爲戶工切卽間有一方尙存古音終不能勝海內之口藉非隋唐之韻尙存豈復知有古音哉足下謂音變而義未改如印吾台予之台非不可變如哈音而三台天台古人故讀若怡真通人之論先民有作豈能易足下之言乎足下又謂聲音之理分之爲十七部合之則十七部無不互通蓋以三百篇間有歧出之音故爲此通韻之說以彌縫之愚竊未敢以爲然也古有雙聲有疊韻參差爲雙聲窈窕爲疊韻喉謳舌齒唇之聲同位者皆可相轉宗之爲尊桓之爲和是也聲轉而韻不與之俱轉一縱一橫各指所之故無不可轉之聲而有必不可通之韻不得以魚休之轉彭亨而通庚于豪無俚之轉無

聊而通之于蕭寧母之轉泥母而通齊于青也。古人之音固有若相通者。如真與清東與侵閒有數字相出入或出于方言或由于聲轉要皆有脉絡可尋非全部任意可通至如周原膴膴韓詩作牒正與飴茲韻歌以訊之王逸注楚詞引作諱正與萃韻字形相似不無轉寫之譌足下旣攷古而正經文之譌而又兼存此傳譌之音以爲通轉之例大道之多歧必自此始矣小雅谷風之末章足下讀怨如依與嵬萎爲韻此亦以意度之未有他文可證頃讀說文序視而可識察而可見以見與識韻乃悟谷風思我小怨當與德韵怨讀若抑論語以直報怨以德報德亦韻語也愚管之見未識有當否幸賜鑒察

與段若膺論尙書書

承示攷定尙書於古文今文同異之處博學而明辯之可謂聞所未聞矣唯謂史漢所引尙書皆系今文必非古文則蒙猶有未諭漢書儒林傳謂司馬遷從安國問故遷書載堯典禹貢洪範微子金縢多古文說是史公書有古文說也地理志吳山古文以爲汧山大壹山古文以爲終南是漢書有古文說也漢時立學置博士特爲入官之途其不立博士者師生自相傳授初無禁令臣民上書亦得徵引許叔重說文解字所稱書孔氏詩毛氏春秋左氏禮周官皆不立學者而其子沖上書進御不以爲嫌馬班二君又何所顧忌而必專己守殘不一徵引古文乎春秋左氏與尙書古文皆非功令所用而班氏律歷五行諸志引左氏經傳者不一而足以春秋之例推之則漢書決非專主今文矣又如漾之爲瀆問之爲繫此古文

之見於許氏書者。而史記正與之同。是又史記兼用古文之明證也。足下以漢志禹貢養水不从水旁。遂謂今文作養。史記亦當作養。淺人增加水旁。無論莫須有三字。難以服天下。恐世間如此淺人。正不易得。何也。淺人依尙書改史記。必改爲漾。其能改作濬者。必係通曉六書之人。豈有通人而肯妄改古書者。此可斷其必不然矣。說文以濬爲古文。則漾必是今文。漢書之養水。卽从古文而省水旁。決非今文別作養字。僕於經義膚淺。不敢自成一家言。聊罄狂簡。以盡同異。幸足下之教我也。

荅孫淵如書

足下研精小學。於許叔重之書。深造自得。求之今之學者。殆罕其匹。乃復虛懷若谷。欲求千慮之一。於僕中歲而讀說文。早衰善病。偶有所得。過後輒忘。坐是不能成一家言。何足以益足下乎。來教謂抒卽培之。省。檠。櫟。本一字。又謂彷彿。脾。胷。乃古通寫字。徐鉉以蟀爲俗。失之太泥。皆極精當。春秋祊。卽異文。卽彷彿相通之例。說文引詩。不敢不躋。又作疎。脊。束。亦通寫字也。足下疑。迺。仍。恩。卽存才之類。非諧聲。以僕攷之。則古文諧聲。本有二例。同音謂之諧聲。同聲亦謂之諧聲。今人所謂同母也。存取才聲。恩。取。凶聲。鳳。取。凡聲。皆聲之正轉。翬。从。軍聲。翬。轉。爲。熏也。祈。从。斤聲。祈。轉。爲。芹也。贛。卽。坎。字。坎。與。空。相。轉。故。贛。爲。贛。省。聲。乃。與。能。相。轉。故。仍。以。乃。得。聲。曾。與。重。相。轉。故。曾。以。困。得。聲。說。文。艸。鬯。聲。而。讀。若。宰。鞬。蟲。聲。而。讀。若。騁。弇。聲。而。讀。若。耿。朋。朋。聲。而。讀。若。陪。璣。壽。聲。而。讀。若。淑。諱。革。聲。而。讀。若。戒。斂。豈。聲。而。讀。

若狠蹄扁聲而讀若革。奚入聲而讀若頑。又讀若非。古音非悲。是聲而讀若瑱。榰胥聲而讀若芟。郢年聲而讀若寧。蟠命聲而讀若戾。惔炎聲而讀若導。三年導服導即禪之轉。皆聲轉之例也。大學命也之命。鄭云當作慢。

命卽慢之轉。宋儒讀爲怠者非也。唐本說文元从一兀聲。今本無聲字。元卽兀之轉。故髡从兀亦从元。車輒字說文作軛。宋人疑兀非聲而刪之亦非也。古之詁訓。音與義必相應。許氏訓春爲推攷。爲敏。警爲欸。肩爲開。爾爲滿。莫非同聲。艸根爲荄。木頂爲楨。禾芒爲秒。瓜當爲蒂。亦皆同聲。則仍有乃音。思有凶音。又何疑焉。但此義自陽冰二徐已莫能聞。夾漈陋儒。遂謂七音之學。乃自西域而來。此與窮子之舍衣珠而乞食無異。崑山顧氏之言古音善矣。而於聲音文字之本。則猶得其半而失其半也。若夫舍諧聲而言會意。二徐之後流爲介甫。大率穿鑿傳會。自通人觀之。直可覆醬瓿耳。足下旣悟同母之可諧。而又疑而不信。仍以會意求之。愚以爲聲諧而意自不悖。叔重明云。諧聲則必無出於非聲者。雙聲疊韻皆天籟也。裘从求而讀渠之切。那从林而讀諾何切。侮从每而讀文甫切。倩从青而讀倉見切。母無鄙切。而蠍𧈧與雨叶。難那千切。而隰桑與阿叶。興許應切。而小戎大明與音林叶。凡一字而兩讀者。皆聲之轉。三百篇之例具在。引而伸之。非無稽之言也。足下以爲然乎。不乎。僕前跋楊大眼造像記。未詳倣字。足下謂震懾卽振旅之異文。敬聞命矣。頃見江都汪容甫亦如足下之言。卽當刊正。以志不忘。冬寒惟自愛。不宣。

答李南澗書

尊使至知年兄于六月內奉太夫人之諱悲哀切至而僕遠在千里外無從具生芻絮酒之敬僕之抱愧甚矣來教欲僕爲表誌之文及讀年兄所撰行狀文筆古雅至性肫摯流露行墨間洵爲必傳之作昔柳州廬陵皆嘗表其先人之墓今年兄之文自能不朽其親矣曷不仿此例爲之若僕之文平淺恐未能傳世而有虛年兄之盛意也但交好有年不敢固辭謹撰尊甫太翁墓表太夫人墓誌各一道皆摭取行狀中語掠美之誚諒所不免行狀所述嘉言懿行可采者甚多因篇幅毋取太長割愛置之然即此已足不朽矣表誌旣出一手故所載三代子姓及葬地兩篇各有詳略意取互見未識於體製有合否也撰書人銜名或在文之前或在文之後古人初無一定可以不拘結銜止署本官階今人多有書賜進士及第出身者似亦無妨但宋元碑却未見恐是明人始有之惟稱呼弟姪晚侍之類起于近日最爲陋惡想好古者斷不效之耳天寒讀禮惟以道自愛不宣

與一統志館同事書

某頓首總纂執事某學殖譖劣於輿地一門尤非專家志局初開未嘗與編摹之列頃以白華侍讀出差承乏攝事於全書體例旣未甚諳瓜代之期亦不過數月惟是後進末學得追陪長者之步趨飲聞清論不勝幸甚受事以後偶檢舊稿人物一門竊有貢疑敢達之左右夫輿地之志兼及人物特以其生長是邦游釣所在俾後世聞其風者興高山景行之恩至若魏晉以降士大夫以門第相尚王必太原琅邪李

則隴西趙郡謝稱陳郡裴號河東雖去其鄉國更數十世猶必溯其本望此乃氏族之學無關於地理而後之志州郡者昧於疆域濫收以備鄉賢之數甚可笑也顏氏本琅邪臨沂人顏魯公撰先廟碑稱西平靖侯舍隨元帝過江已下七葉葬在上元幕府山西宋書州郡志晉亂琅邪國人隨元帝過江千餘戶大興三年立懷德縣成帝咸康元年桓溫領郡鎮江乘之蒲洲金城上求割丹陽之江乘縣境立郡又分江乘地立臨沂縣然則延之協晃之推諸人史書琅邪臨沂者乃江左儒置之臨沂與今沂州無涉矣逮之推遭亂由齊入周子孫留居關中爲雍州萬年人之推雖嘗名其子思魯以寓故鄉之思訖未聞還居琅邪今沂州府人物收顏師古真卿杲卿泉明等實沿襲之譌東坡居士嘗自稱趙郡蘇軾而潁濱遺老又名其集曰欒城今若以二蘇入真定之人物可乎不可乎愚意若此類者竝當博攷改正庶幾一洗向來志乘之陋又執事於韋安石舉明經調乾封尉一條疑有脫譌委令照檢元文蓋以初任之官不當言更調意其曾歷它官故爾愚攷漢書張釋之事文帝十年不得調匡衡射策甲科調補平原文學小顏注竝訓調爲選廣韻調讀去聲者訓選集韻又訓爲試乃知古人所云調者只是試選之義略舉唐史數事證之蘇弁擢進士調奉天主簿杜正倫秀才高第調武騎尉劉從一擢進士宏詞第調渭南尉徐彥伯對策高第調永壽尉狄仁傑舉明經調汴州參軍宋務光舉進士及第調洛陽尉張柬之中進士第始調清源丞劉幽求舉制科中第調閩中尉李宗閔擢進士調華州參軍事李翹中進士第始調校書郎皆初任而

云調與韋安石傳文不異桓彥範以門蔭調右翊衛則任子初選亦云調也韋澳第進士復擢宏詞十年不肯調猶今人之不赴選也宋時人謂常調官好做常調猶云常選非今之所謂調也漢薛宣爲左馮翊以頻陽多盜賊令薛恭職不辦粟邑縣小辟易治令尹賞久用事乃奏賞與恭換縣今時州縣繁簡對調之例蓋因於此而史不云調稽之字書調亦無更換之義改調降調之名明史始有之唐以前未之有也聊舉所聞以塞下詢伏希審察

與晦之論爾雅書

得晦之書知方讀爾雅從事於訓詁及蟲魚艸木之學甚慰以喜嘗病後之儒者廢訓詁而談名理目記誦爲俗生訶多聞爲喪志其持論甚高而實便于束書不觀游談無根之輩有明三百年學者往往蹈此失聖朝文教日興好古之士始知以通經博物相尚若崑山顧氏吳江陳氏長淵惠氏父子婺源江氏皆精研古訓不徒以空言說經其立論有本未嘗師心自用而亦不爲一人一家之說所囿故嘗論宋元以來言經學者未有如我朝之盛者也夫六經皆以明道未有不通訓詁而能知道者欲窮六經之旨必自爾雅始注爾雅者有舍人李巡樊光孫炎沈旋諸人今惟存郭景純一家景純有音有圖贊則今亦亡之尙書正義引景純注云恆山一名常山避漢文帝諱又云霍山今在盧江灊縣潛水出焉別名天柱山漢武帝以衡山遼曠移其神于此今其土俗人皆呼之爲南獄南獄本自以兩山爲名非從近來也而學者

多以霍山不得爲南獄。又言從漢武帝始乃名之。即如此言爲武帝在爾雅前乎。斯不然矣。今本注文。若是之詳。然則景純注亦經後人所刪。非完書矣。釋烏桑屬竊脂文。凡再見。攷春秋正義云。諸儒說竊脂。皆謂盜脂膏。卽如所言。竊元竊黃者。豈復盜竊元黃乎。若冬屬竊黃之下。果有桑屬竊脂句。則景純注明云。諸屬皆因毛色音聲以爲名。竊脂之爲淺白。義已顯然。毋庸爲此辨矣。春秋正義又云。釋烏自春屬鴟鴞至宵屬嘖嘖。凡七屬。其文相次。今本多桑屬句。則當云八屬矣。故知此句乃唐以後人竄入無疑。而邢氏不能辨也。此不精之失也。宋初古書之存者多矣。邢所徵引。不過九經義疏。經典釋文。而尙不免於遺漏。它書固未能津逮。此又不博之失也。予昔在京師。有志撰述。掇李孫之墜遺。糾郭邢之違失。至於康成之說經。叔重之解字。參互取訂。啓悟良多。嘗欲勒爲一編。以附述者之後。繼有刊定元史之舉。力未能兼。迺輟弗爲。今晦之欲從事此書。則予攷稽有年。千慮之中。或有一得。暇日出以相質。何如。來書疑舍人爲何人。攷陸氏釋文。稱犍爲郡文學卒史臣舍人。漢武帝時待詔。而廣韻亦有舍姓。是舍人乃其人姓名。非官稱也。附去政和證類本艸一部。卽檢收之。

與友人書

前晤吾兄。極稱近日古文家。以桐城方氏爲最。予常日課誦經史。於近時作者之文。無暇涉獵。因吾兄言。取方氏文讀之。其波瀾意度。頗有韓歐陽王之規橅。視世俗冗蔓複雜之作。固不可同日語。惜乎其未喻。

乎古文之義法爾。夫古文之體，奇正濃淡詳略，本無定法。要其爲文之旨，有四曰明道，曰經世，曰闡幽，曰正俗。有是四者，而後以法律約之。夫然後可以羽翼經史，而傳之天下後世。至于親戚故舊，聚散存沒之感，一時有所寄託，而宣之於文，使其姓名附見集中者，此其人事迹原無足傳，故一切闕而不載。非本有可紀而略之，以爲文之義法如此也。方氏以世人誦歐公王恭武杜祁公諸誌，不若黃夢升張子野諸誌之熟，遂謂功德之崇不若情辭之動人心目，然則使方氏援筆而爲王杜之誌，亦將舍其勳業之大者，而徒以應酬之空言了之乎。六經三史之文，世人不能盡好，閒有讀之者，僅以供場屋餽飣之用，求通其大義者罕矣。至于傳奇之演繹，優伶之賓白，情詞動人心目，雖里巷小夫婦人無不爲之歌泣者，所謂曲彌高則和，彌寡讀者之熟與不熟，非文之有優劣也。以此論文，其與孫鑛林雲銘金人瑞之徒何異。文有繁有簡，繁者不可減之，使少猶之簡者不可增之，使多。左氏之繁勝于公穀之簡，史記漢書互有繁簡，謂文未有繁而能工者，非通論也。太史公漢時官名，司馬談父子爲之，故史記自序云：談爲太史公。又云：卒三歲而遷爲太史公。報任安書亦自稱太史公。公非尊其父之稱，而方以爲稱太史公者，皆褚少孫所加。秦本紀田單傳別出它說，此史家存疑之法。漢書亦間有之，而方以爲後人所附綴，韓退之撰順宗實錄，載陸贊陽城傳，此實錄之體應爾，非退之所刲。方亦不知而妄譏之，蓋方所謂古文義法者，特世俗選本之古文，未嘗博觀而求其法也。法且不知而義於何有？昔劉原父譏歐陽公不讀書，原父博聞，誠勝於歐

陽然其言未免太過若方氏乃真不讀書之甚者吾兄特以其文之波瀾意度近于古而喜之予以爲方所得者古文之糟粕非古文之神理也王若霖言靈皋以古文爲時文却以時文爲古文方終身病之若霖可謂洞中垣一方癥結者矣泥濘不及面質聊述所見吾兄以爲然吾

如淳引漢儀注太史公武帝置位在丞相上天下計書先上太史公副上丞相序事如古春秋遷死後宣帝以其官爲令行太史公文書而已顏師古據晉灼以如說爲非謂談爲太史令耳遷尊其父故謂之爲公此不通之論也史記百三十篇惟自序前半篇稱太史公者謂其父談其它皆自稱之詞尊父可也尊己不可也未爲太史公以前稱名旣爲太史公則稱官此史家之常例史者所以傳信後世也可何私尊之有小司馬索隱引桓譚云遷所著書成以示東方朔朔皆署曰太史公以爲太史公是朔稱而又疑其未實愚謂朔所署曰太史公者題其書名曰太史公漢書藝文志太史公百三十篇馮商所續太史公七篇此卽朔所署之名非謂書中凡稱太史公者皆朔所竄入也李巨來與靈皋書言太史公曰四字皆史記本文非後人所加亦非遷之尊其父凡稱太史公曰猶後世史書稱史臣曰爾此說是矣漢儀注衛宏所撰巨來謂衛宏注卽不可信而漢儀固有是官似分漢儀與注而二之則攷之未審也


與友人書

昨偶讀足下文篇末自題太僕少卿僕以爲不當脫漏寺字足下殊不謂然足下所據者唐宋石刻僕謂惟唐宋人結銜不得有寺字自明以來官制與唐宋異不當沿唐宋之稱蓋九卿之稱秦漢以來凡三變曰太常曰太僕曰光祿勳位列九卿而官名無卿字此漢魏至宋齊之制也梁陳以後官名始綴卿字後齊始定太常太僕光祿等爲九寺而唐宋因之然當時省臺院寺之名皆不入銜如中書舍人不云中書省舍人御史大夫不云御史臺大夫翰林學士不云翰林院學士世所共知也唐人石刻如太常光祿卿之不稱寺正與此類非可書而不書也明初廢中書省而以六部爲百僚之長由是院寺司監皆以入銜與唐宋故事異矣自明中葉古文之法不講題銜多以意更易由是學士大夫之著述轉不若吏胥文移之可信足下方以古文提唱一世當起而正之勿以爲無足重輕而置之也近日古文家推秀水朱氏予觀其集中稱知府知縣必云知某府事知某縣事此宋之官制豈可施于今日亦是好古之病足下以爲然乎否

復倪敬堂書

頃從俞嘯樓舍親處接讀手教慰問并蒙厚儀感愧之私銜結肺腑皇十二子所致贍儀亦隨祇領竊念皇十二子天質淳粹至性過人不孝陪講兩年曾未效勺涓之益前夏銜恤里門艸土昏迷不敢遽通寸啓家居所見邸報並無薨逝之間直到持齋前輩南來方審其實而百日已過奔臨無自昔賈生以梁王

勝之沒哭泣自傷遂至殞生區區之忱今古同揆至此項致賻係前秋之事乃因轉展稽遲歲華再易未
減三年之字已成千古之悲挂劍有懷驂鸞永隔撫心載惄沒齒奚言惟執事察其情而哀其志焉內直
諸同好及同年諸君不及徧啓晤時乞道及無任銜感之至



潛研堂文集卷三十四

書二

荅袁簡齋書

得手教循環雒誦。懽喜無量。先生研精史學。於古今官制異同之故。燭照數計。洞見癥結。而猶虛懷若谷。示以所疑。俾馬勃牛洩。得備扁和之采。其爲榮幸。非所敢望。謹就問目。述其一二。惟先生詳察。夫檢校兼守判知之名。皆起於唐。但唐初所謂檢校者。雖非正授。卻辦本職事。如檢校侍中。檢校中書令。檢校納言。檢校左相之類。皆列於宰相表。與真授者無別。而宇文士及。檢校涼州都督。魏元忠。檢校并州長史。亦是實履其任。蓋內外各官。皆得有檢校。若今署事矣。中葉以後。諸將多以軍功得檢校官。三公三師僕射。尙書常侍。車載斗量。有名無實。故唐書宰相表。三公三師七十一人。檢校之公師不與焉。猶使相之。不列於宰相也。而自公師兩僕射。六尙書。兩散騎常侍。太子賓客。國子祭酒。而外。它官亦罕有除檢校者。宋史所列檢校官。一十有九。蓋卽沿唐末之制矣。公師之班。首太師。次太尉。次太傅。次太保。次司徒。次司空。王建。由檢校太師。纔遷司徒。曹佾以檢校太師守司徒。又數年。始除守太保。然則檢校太師。尙在真三公之下。

也。若夫行守試三者，則以官與職之高下而別。長編載元豐四年詔，自今除授職事官，並以寄祿官品高下爲法。高一品者爲行，下一品者爲守。二品以下爲試。品同者不用行守試，偶檢柳公權書苻璘碑，其題云輔國大將軍行左神策軍將軍輔國大將軍階正二品左神策將軍官從三品此高一品爲行之證也。其結銜云朝議大夫守尚書工部侍郎朝議大夫階正五品侍郎官正四品此下一品爲守之證也。五代時李琪爲宰相，所私吏當得試官。琪改試爲守，遂爲同官所糾。此試不如守之證也。判與知之分，則宋次道春明退朝錄所云品同爲知，隔品爲判者，得之。宋初曹翰以觀察使判潁州，蓋用隔品爲判之例。後來惟輔臣及官僕射以上領州府事稱判，其餘皆稱知，不稱判矣。判知之外，又有云權發遣者，則以其資輕而驟進，故於結銜稍示區別。程大昌云：以知縣資序隔二等而作州者，謂之權發遣；以通判資序隔一等而作州者，謂之權知。是也。宋制六曹尚書從二品而權尚書則正三品，侍郎從三品而權侍郎從四品，則權知與知亦大有別矣。元祐元年文彥博落致仕加太師平章軍國重事，潞公本以守太師致仕，今復召用，故有落致仕之命。同一落也，落職則爲罷免，落致仕則爲復用。其云落者，謂結銜內去此字也。元豐三年彥博落兼侍中除守太尉，蓋其時改官制以侍中中書令爲宰相職事官，非退閑者所宜授，故落侍中而進太尉以寵之，亦非罷免之謂也。富弼呂公著之守司空與蔡京之司空皆真三公也，而京不云守，則尤貴。三師三公初拜有臨軒受冊儀，宋時居此職者皆固辭而止。若檢校官固無所謂冊拜也，差遣之名。

惟宋時有之。宋時百官除授有官有職。有差遣。如東坡以學士知定州。知州事。差遣也。端明殿學士職也。朝奉郎則官也。差遣罷而官職尙存。職落而官如故。古之優禮臣工如此。非有大罪。斷無儕於編戶之理。至明而待士之禮薄矣。方密之謂古宰相無印。支俸皆借翰林院印。此特謂明之大學士耳。唐宋宰相皆有印。故有分日知印之法。其文曰中書門下印。元中書令左右丞相皆銀印。若明之大學士本無宰相之名。然亦未嘗無印。明史內閣銀印直紐方一寸七分厚六分。玉箸篆文。其文曰文淵閣印。但文移用翰林院印。不用此印。而方遂以爲無之耳。本朝大學士無印。文移用內閣典籍廳印。即明之翰林院典籍也。明之閣臣皆出翰林。故典籍卽爲內閣之屬。今改典籍隸內閣。而翰林院別設典簿。稍區而二之矣。隋書百官志。官一品每歲祿八百匹。二百匹爲一秩。雖未明言何匹。納檢下文有云。祿率一分以帛。一分以粟。一分以錢。則匹當是絹匹之匹。非馬匹也。尊集體大思精直追唐宋作者。蒙委讐校。謹就鄙見所及。證據一二。開具別紙。暑喝恐勞。起居得雨。稍涼當走謁。不宣。

再荅袁簡齋書

蒙詢秦漢賜爵。及唐同三品之稱。謹按賜爵始於商鞅。以旌首功。漢時或以軍功。或以入粟入錢得之。而賜民爵一級。或二級。三級。史不絕書。大約公乘以下。與齊民無異。五大夫以上。始得復其身。民賜爵者。至公乘而止。爵過公乘。得移與子。若同產。同產子有罪。得贖。貧者得賣與人。宣帝求漢初功臣之後。復其家。

史稱皆出庸保之中及攷之表則或云公乘簪襄或云公士上造大率皆有爵者雖擁高爵尙雜庸保爵之冗濫如此至五大夫以上則以賜中二千石至六百石之勤事者及列侯嗣子然攷之史漢自卜式桑羊而外書賜爵者寥寥非無爵也賜爵不足爲榮史家略而不書也民爵不過公乘而入粟之法行則有至大庶長者大庶長去關內侯一級耳然鬻爵而不鬻官官有員爵無員此量錯所謂出於口而無窮者也先生謂普賜天下民爵自惠帝始既云普矣將人人有爵又賣與何人愚攷之紀多云賜民爵戶一級或不云戶者史家省文師古曰賜爵者一家之長得之也一戶惟賜一人子姓昆弟皆不得與固無嫌賈用不售矣唐初以侍中中書令爲宰相此二官者皆三品也然它官亦有三品階故入相而官未至侍中中書令者必云同中書門下三品其資望稍輕者則云同中書門下平章事大歷以後升侍中中書令爲二品自後入相者但云平章事無同三品之名矣當時除三公者固不乏人未嘗以三品爲限但三公不必知政事而居宰相者不皆二品以上官中葉以降竝有除侍中中書令而不入政府者矣若謂官不得過三品唐志本無此文也區區所聞惟先生決其然否

三荅袁簡齋書

別來又逾旬日溽暑未退不得時奉誨言伏惟台候萬福昨蒙詢及史事數則謹就記憶所及略陳一二以備采擇宋時諸州設通判其結銜云通判某州軍州事元諸路總管府置同知其結銜亦云同知某路

總管府事。其稱某府同知。某府通判。則始於明時。亦猶宋之郡守。稱知某府軍府事。而明直稱某府知府也。通判在宋初。雖有監州之諺。然其權仍出知州之下。中葉以後。其選益輕。東坡通判杭州。寄子由詩。有餘杭別駕無功勞之句。則通判之稱別駕。宋時已然。若同知俗稱司馬。想是起於明時。然以唐制言之。別駕司馬。雖均爲刺史之佐。而司馬卻在別駕之下。更溯而上之。至於兩漢。則司馬乃典兵之官。本非郡僚。攷續漢書百官志。將軍之下。有司馬一人。其領軍皆有部曲。部有軍司馬一人。曲有軍候一人。又有軍假司馬。軍假候。其別營領屬。爲別部司馬。今人所得漢印。有軍司馬。軍假司馬。別部司馬。軍曲候諸稱。皆將軍之屬領兵者。若郡守之貳。爲丞。爲長史。無所謂司馬也。刺史之下。只有從事椽史。亦無司馬也。晉宋以降。除刺史者必加將軍。持節都督軍事。故刺史之屬。得置司馬。隋唐改太守爲刺史。因以司馬爲郡佐。亦習焉不察耳。漢制。刺史之屬。有治中從事。別駕從事。皆州自辟除。秩止百石。較之縣令爲卑。而魯子敬稱龐士元。非百里才。使處治中別駕之任。始當展其驥足者。蓋其時州牧專制一方。幕府元僚。得參生殺。予奪之柄。較之百里作宰者。輕重大不侔矣。元中書省有右丞相。左丞相。有平章政事。有右丞。左丞。有參知政事。皆稱宰輔。而秉政者。丞相也。皆蒙古色目世家爲之。平章閒。有用事者。右丞以下。雖曰與聞國政。其委任已輕矣。世祖之世。平章兼用漢人。成宗以後。漢人授平章。不過李孟。張珪。王毅三人。右丞以下。始參以漢人。然南人初無入中書者。順帝時。始有危素一人。亦僅得參政耳。色目三十一種。輟耕錄。具載其目。

要其最貴者回回畏吾康里唐兀欽察雍古數種而已契丹女直謂之漢人不在色目之列斡耳朵者古語猶言營盤也太祖四斡耳朵皆有皇后數人元時稱皇后者不必正宮猶之皇子皆稱太子宗女悉號公主也元時各路總管府及州縣俱置達魯花赤王折謂達魯花赤國言荷包壓口蓋取管轄之義然元人稱州達魯花赤曰監州縣達魯花赤曰監縣則又有監察之義矣遼金之世所云一字王者如秦王魏王之類皆國王也郡王則必兩字如混同郡王金源郡王是也金史百官志諸王詳穩一員在部族節度使之後諸移里董司之前則凡亦部落之稱古今字書俱無凡字記有一書讀凡作管音亦不知所據也客中未攜書籍兼之多病善忘詿漏舛錯不知所裁惟執事教之

荅大興朱侍郎書

蒙閣下垂詢以國語伶州鳩言武王克商歲在鶉火此周人述周事必無差誤而它書或云歲在己卯或云辛卯似不相應大昕嘗習劉子駿三統術於國語所云歲在鶉火日在析木之津月在天駟辰在斗柄星在天龍者推驗其時日次度無不脗合古法歲星與太歲常相應歲星自丑右行太歲自子左行歲移一次周則復始如歲星在星紀則太歲必在子歲星在鶉火則太歲必在未三統術上元起丙子歲依歲術步之則武王克商之年當直辛未孔穎達詩正義云文王受命十三年辛未之歲殷正月六日殺紂孔疏所言與國語歲在鶉火之文正相合矣自周受命以後至於秦漢皆有紀年可攷非若夏商以前之茫

味而後人譜紀年者皆以周克殷爲己卯歲相較差八年者蓋古術太歲與歲星皆有超辰之法歲星百四十四年而超一辰則太歲亦超一辰積年逾久則超年亦漸多今人以漢高帝元年爲乙未武帝太初元年爲丁丑而班孟堅於漢元年引漢志曰太歲在午於太初元年引漢志曰歲名困敦孟堅所引者西京之注記則西京猶用超辰之法而東漢臺官已鮮知之故虞恭宗訴輩言太初元年歲在丁丑又言歲無由超辰蓋太歲不用超辰昉於東漢而相沿到今以今法溯古年則武王克商固宜在己卯矣然鄭康成注馮相氏十有二歲云歲星與日常應太歲月建以見然則今術太歲非此也今之太歲異於古之太歲鄭於周禮注中已明言之非大昕臆說也呂氏春秋維秦八年歲在涒灘以今法推之秦始皇八年當爲壬戌而云涒灘相差兩年亦以太歲超辰故也超辰之法廢於東漢東漢距西漢尚在百四十四歲以內故差止一年其距秦始皇則已在百四十四歲以外故差至二年積至周初已閱千有餘歲故差至八年以今法言之則己卯歲本不誤而在古法則必爲辛未不得爲己卯若竹書辛卯皇甫謐乙酉之說則誕而不足信矣閣下謂歲星在午則太歲爲作噩此據淮南天文訓史記天官書之文然淮南言太陰史公言歲陰俱不言太歲太陰卽歲陰也亦周行十二辰而常在太歲後二位古人制攝提格以下十二名本言太陰所在而後人移屬之太歲失其舊矣何以言之淮南云太陰在酉歲名曰作鄂歲星舍柳七星張以六月與之晨出東方夫柳七星張者鶉火之次也六月日在鶉火歲星與日同出東方是月斗建未

而太歲亦在未故鄭注馮相氏謂太歲者歲星與日同次之月斗所建之辰也而歲名則曰作噩此古人以太陰紀歲不以太歲紀歲之證也推之十二月盡然淮南雖未明言太歲所在而其上文云太陰在寅寅爲建子爲開主太歲則知太歲之非太陰又知太歲常在太陰之前二辰矣以淮南史公紀歲之例推之則謂周克商之歲歲名作噩固可要是太陰所在非太歲所在也漢太初元年史記以爲閼逢攝提格之歲此以太陰言之而班史謂歲名困敦則指太歲所在讀史漢者往往於此致疑其實無可疑也東漢以後術家不用太陰但用太歲又去其超辰之法于入算雖便捷而古書之難通者多矣鄙著史記攷異曾一及之而語焉不詳茲因閣下之詢爰述所聞以對惟幸裁察

與孫淵如書

去歲兩奉手書慰問周至足下在西曹鱗劇之地而撰述甚富性情當於古人中求之謂一行作吏此事便廢者卽不作吏亦未必不廢也尊集中太陰攷一篇不信太陰與太歲爲二蓋用張揖廣雅之說愚謂古人旣以太陰紀歲天官書又謂之歲陰卽以當太歲似無不可然漢志述太初改元事旣云復得閼逢攝提格之歲又云太歲在子則當時實以太陰紀年而別有太歲昭然察矣乃自太初而後以太陰紀年者僅見於天官書甲子篇而劉歆三統術無推太陰法卽翼奉封事亦似以太陰當太歲則自太初改憲而閼逢十名攝提格十二名移於太歲相承已久稚讓魏人安得不云爾乎足下謂淮南紀歲星出月在

史漢前兩月以爲淮南之誤。按淮南太史公皆以太陰紀歲。漢志則以太歲紀歲。兩法不同。漢志依太初術。太歲在寅。則歲星在營室東壁。以正月晨出東方。所謂歲在娵訾也。太歲在卯。則歲星在奎婁。以二月晨出東方。所謂歲在降婁也。推之十二辰皆然。此真太歲所在也。淮南史公所謂攝提格歲者。太陰在寅。太歲本在子也。其歲歲星舍斗牽牛。卽星紀之次。當以十一月出東方。淮南之文本無誤。而史公云正月者。以天正言之。其實與淮南無別也。漢志與史公文同。而實異。依石氏則與史公不異。但云歲陰不當云太歲也。淮南與史公文異而實同。知太陰太歲之有別。則相說以解矣。古法太歲左行於地。歲星右行於天。其相應與月建月將之相應同。鄭康成注周禮歲謂太歲。歲星與日同次之月。其月斗建在子。吾是以知太歲之本在子也。而淮南史公宮十一月日躔星紀。是爲歲星與日同次之月。其月斗建在子。吾是以知太歲之本在子也。而淮南史公明云攝提格歲。吾是以知太陰太歲之必有別也。淮南云太陰在四仲。則歲星行三宿。在四鈞。則歲星行二宿。與天官書正合。晉灼改太陰爲太歲。遂有兩歲之差矣。淮南斗杓爲小歲。咸池爲大歲。大與小對。今本亦作太歲。此轉寫之譌。非別有太歲。如世俗所云月太歲也。漢碑歲在戊午。名曰咸池者。咸池右行四正。子午卯酉皆咸池所在也。足下所撰太歲歲星左右周天圖。依天官書次之。但可云太陰。或云歲陰。若指爲太歲。則恐未合於古。且與鄭康成亦相矛盾。歲星十二年而一周天。不過約其大率。其實歲行一次。尚有餘分。積至百四十四年。而行百四十五次。古人謂之超辰。服虔謂有事於武宮之歲。龍度天門。此超

辰之證也。足下不信歲星有跳辰，則左氏所紀歲在之文，不幾前後不相應乎？古法不獨歲星有超辰，而太歲亦有之。自後漢四分術行，而太歲無超辰之法，相沿到今。然通儒如鄭康成者，猶能言之。故有今称太歲非此之語。即如淮南元年，太一在丙子，以今法推之，當爲丁丑。漢太初元起丙子，後人亦命爲丁丑。蓋其時距後漢百有餘年，當超一辰故也。呂氏春秋維秦八年，歲在涒灘。高氏謂秦始皇卽位八年也。以今法推之，當爲壬戌。而云涒灘者，秦初距後漢二百餘年，當超兩辰，故差二年也。又溯而上之，武王克商歲在鶉火，先儒以爲辛未歲。見孔穎達疏。而今人命爲己卯。自周初至後漢，千有餘年，當超八辰。其年數固無多寡也。古人不以甲子紀歲，亦以太歲有超辰，無一定之榦枝，不如歲星之垂象，章章可稽耳。後代棄超辰之法，而歲星不與太歲相應，則用歲星誠不如用太歲之簡易。然而古書之難通者，遂多，則古法不可不講。故願與好古君子，盡其同異，唯足下幸教之。

荅盧學士書

來教謂續漢志述二十四氣中星，大寒旦中當是心半，非心二半。僕初校時，但據閩本添二字，初未布算。茲以四分術推之，果是心半，始悔向來粗心之誤。受教良非淺矣。惟是尊教云：中與節相距之度，不過十四十五之間，則恐未爲定率。卽以旦中一條言之，斗少至斗十一，斗十一至斗廿一，相距僅十度，參五至井十六，井十六至鬼三，相距且廿度。其故由於晝漏之長短不齊，非如日所在度之有當也。至心半之半。

刊本俱作大書竊謂半與少大皆不滿一度之別名當與少大強弱一例分注它如驚蟄斗少大暑尾十五半白露參五半小雪室二半大雪壁半諸少半字亦皆不應大書也上文論昏明定度一條但云其餘四之如法爲少而不言半大似亦缺漏宜依乾象術之例添二句云二爲半三爲大方與後文相應未審閣下以爲何如聞文從卽日過蘇相晤非遠天寒珍重眠食不宣

又

讀閣下所校太元經云向借得一舊本似北宋刻末署右迪功郎充兩浙東路提舉茶鹽司幹辦公事張寔校勘大昕案宋時寄祿官分左右唯東都元祐南渡紹興至乾道爲然蓋以進士出身者爲左任子爲右也而建炎初避思陵嫌名始改句當公事爲幹辦公事此結銜有幹辦字則是南宋刻非北宋刻矣宋史遇句當字多易爲幹當此南渡史臣追改非當時本文也去冬於吳門見司馬溫公集注太元六卷後附許翰解四卷舊鈔本甚完善袁上舍又愷曾借錄其副溫公書亦收於道藏許解則道藏并未收也不識閣下已見之否

與梁燿北論史記書

足下謂秦楚之際月表當稱秦漢不當以楚踞漢先儼然承周秦之統其意誠善然蒙未敢以爲然也史公著書上繼春秋予奪稱謂之間具有深意讀者可於言外得之卽舉月表一篇尋其微旨厥有三端一

曰抑秦二曰尊漢三曰紀實何謂抑秦秦之無道史公所深惡也秦雖并天下附書於六國表之後不以秦承周也及陳涉起事秦猶未亡也而卽儕諸楚齊燕趙之列則猶六國視之也雖稱皇帝者再世與楚之稱霸王等耳表曰秦楚言秦之與楚匹也何謂尊漢史公以漢繼三代不以漢繼秦若繫漢於秦之下是尊秦而貶漢也十二諸侯年表不題周而周尊秦楚之際月表不題漢而漢尊秦楚皆亡國之餘以漢承之失立言之體矣陸賈楚漢春秋其命名不如史表之正也何謂紀實楚雖先亡覆秦之社稷者楚也漢高初興親北面義帝漢王之國又項羽封之秦亡之後主天下命者非楚而何本紀既述其事而表又以秦楚之際目之言天下之大權在楚也此亦實之不可沒者也自王子師謚子長爲謗史宋元明儒者訾議尤多僕從未敢隨聲附和蓋讀古人書誠愛古人而欲尋其用意之所在不肯執單詞以周內文致也

與梁燿北論史記書二

天官書文字古奧非太史公所能自造必得於甘石之傳今世所稱甘石星經乃後人僞託多襲用晉隋二志而稍爲異同要其剽竊之迹自不能掩較之太史公書猶周鼎之與康瓠也易曰天垂象春秋傳曰天事恆象古人測星但舉其大而明者取象以擬百官庶物後世臺官增入附近微細諸星名目雖多轉不如古人之簡易且如危三星有蓋屋之象故云危爲蓋屋而後人別指旁小星以實蓋屋之名咸池本

兼五潢五車三柱而言故云天五潢又云五帝車舍其匡衛甚廣因以表西方諸宿淮南天文訓咸池者水魚之囿也又云斗杓爲小歲正月建寅月從左行十二辰咸池爲大歲二月建卯月從右行四仲終而復始蓋斗爲帝車咸池亦以五車爲匡衛皆有運行之象故指其所建以定四時天潢之義與咸池同潢卽池也後人析爲數名但以三小星當咸池失其義矣史公以紫宮房心權衡咸池虛危爲天之五官豈專指三小星而言哉足下據晉志以糾史公愚謂晉志星名係後來增加非史公之疏漏也足下又疑西宮下缺白虎兩字愚謂參爲白虎已見下文此處不當更舉史漢未嘗以四獸領四方諸宿或先書或後書於例初無嫌也

與梁燿北論史記書三

來教駁僕所論武安侯奉邑食鄃一條謂纁布所封兪乃別一地非清河之鄃且言縣侯必盡食一縣反覆援引可謂博學而明辨矣然愚意猶有未釋然者攷呂后封兪侯呂它景帝封兪侯纁布班表皆不言封國所在至蘇林酈道元司馬貞輩始以清河之鄃當之足下疑其別有一兪地固無不可至謂封國必盡食一縣不獨陳平一人則愚請以史漢正文證之樊噲初封舞陽侯其後益食邑者再後乃定食舞陽五千四百戶則樊噲初封未能盡食舞陽一縣也夏侯嬰初封汝陰侯其後益食邑者三乃定食汝陰六千九百戶則滕公初封未能盡食汝陰一縣也灌嬰初食潁陰二千五百戶已號潁陰侯其後乃定食潁

陰五千戶則灌嬰初封未能盡食潁陰一縣也蕭何封鄧本八千戶後又益二千戶及其後裔紹封戶或二千四百或止二千或並不及二千而鄧侯之名不改曹參封平陽本萬六百餘戶及其後裔紹封僅二千戶亦號平陽侯然則列侯但以封戶定其疆界而食之此外尙有餘地仍屬有司理可信矣更以後漢書證之伏湛封不其侯傳國至建安中始絕而靈帝時已封宋鄧爲不其鄉侯則不其一縣除伏侯食邑外尙有它鄉也以是推之樊布食邑僅千八百戶鄖縣戶口必不止此數其爲武安食邑亦無足異矣漢縣本有大小之分其大小以戶口而定所謂萬戶以上爲令減萬戶爲長也陳平封五千戶與曲逆見戶數適相等故得盡食其縣其餘諸公封戶雖多而其縣見戶或浮於封戶之數則不能盡食矣非平之食封勝於蕭曹也足下又謂陳平盡食曲逆乃兼指亡匿戶口言之亦恐不然夫漢之封國雖計戶口仍以疆域爲斷史公言漢初大侯不過萬家小者不過五六百戶後數世民咸歸鄉里戶益息蕭曹絳灌之屬或至四萬小侯自倍是則復業戶口在列侯封內者例得兼食之不獨曲逆爲然史何必特書於本傳耶若陸賈之說陳平云足下食三萬戶侯乃據秦時版籍言之平旣全食此縣故舉全盛之數以誇其富耳若云當時復業真有此數則十數年之間斷不能頓增五倍而休養百餘載至元光之世乃轉耗其半尤無此理矣僕於讀史擇善而從非敢固執己見但以史漢參攷封君之盡食一縣者自曲逆而外旣不多見而樊布之封鄃其說始於蘇林林去漢不遠或有所據故復申其義唯足下幸教之

潛研堂文集卷三十五

書三

與徐仲圃書

僕於輿地之學留心廿餘年嘗恨東晉南北朝僑立州郡歲增月易名目叢複雖以杜佑李吉甫樂史之淹博猶且十闕其六七不揣椎魯思欲理而董之而疑義紛挾無從質正近年始交陽湖洪孝廉稚存今又得交足下皆確精地理卓然成家而足下譏次年表經緯分明於南北交爭疆易陷復之迹瞭如視掌洵足補前人之闕而爲後學之指南矣其中尙有一二疑不能釋請疏其大略以備採擇晉志元帝渡江之後徐州所失過半乃僑置淮陽陽平濟陰北濟陰四郡初不言置於何地而足下以歷陽實之徧檢晉宋齊志歷陽竝無置四郡之事未知足下何所據也且晉志述渡江州郡多不可信卽以此條論之上文云永嘉之亂臨淮淮陵淪沒石氏則是淮北旣失之後所置其地當在淮南而安帝紀義熙五年慕容超將慕容興宗寇宿豫陽平太守劉千載爲賊所執是陽平在淮北不在淮南其難信者一宋志淮陽陽平濟陰北濟陰竝在徐州部內宋之徐州在淮北不在淮南其淮陽郡領甬城宿豫等縣去京都水七百陸

五百五十以道里準之正在舊臨淮郡界其難信者二宋志淮陽晉安帝義熙中土斷立不言元帝置北濟陰則宋孝建元年立並非晉所置其難信者三宋志於陽平濟陰二郡雖不言何時置然於陽平云故屬司州流寓來配於濟陰云屬兗州流寓徐土因割地爲境若渡江之初僑人未有土斷之令不當云割配其難信者四宋末失淮北始僑立陽平於山陽北淮陽北濟陰於廣陵永初以前淮南尚無此四郡況於元帝渡江之初乎其難信者五夫南渡初尙未有此四僑郡則歷陽之無此郡益可信矣宋志稱安帝改堂邑爲秦郡晉志則以爲元帝渡江所改并僑立尉氏縣屬焉足下謂元帝改堂邑爲秦郡而堂邑縣如故安帝改堂邑縣亦爲秦縣欲以彌縫二志之說僕以晉宋二史參互攷之王國寶毛泰劉穆之爲堂邑太守皆在安帝之世是安帝時尙有堂邑郡及劉裕當國以後向彌檀韶檀祇虞邱進相繼爲秦郡太守可知秦郡改名必在義熙中不在元帝渡江之時矣且向彌檀韶檀祇皆以秦郡太守兼北陳留內史則北陳留與秦郡同寄治堂邑而尉氏卽陳留屬縣晉末尙有陳留郡其并入秦郡或在義熙土斷以後而晉志謂元帝卽以尉氏屬秦郡豈其然乎晉世僑立州郡皆不係以南名義熙恢復故土乃有北徐州北青州北彭城北琅邪北東海北東莞北潁川諸名而在南州郡猶仍故名至永初受禪後始詔去北加南而晉志往往稱南徐南兗南豫南青又謂元帝置南東海南琅邪等郡明帝立南沛南清河等郡蓋唐人不學誤切宋志追稱之詞以爲晉時已有此名耳沿襲千有餘年至僕始悟其失頃見足下州郡表中

頗有承用晉志者似宜訂正以破後來之惑故敢獻其狂狷惟足下裁之

答談階平書

得足下書道及姚禮部駁僕漢書攷異中說秦三十六郡一條僕所據者班孟堅志本文以志解志非敢臆造禮部執史記分郡在始皇二十六年而略取南海諸郡乃在三十三年不當列於三十六郡之數似矣僕試卽以史記質之則三十六郡之分本非一年中事如東郡則始皇五年置矣潁川則十七年置矣會稽則二十五年置矣豈皆在二十六年乎不特此也巴蜀置於惠文南郡南陽隴西北地置於昭襄三川太原置於莊襄則并非始皇時矣上郡魏所置雲中鴈門代郡趙所置上谷漁陽右北平遼東遼西燕所置漢中楚所置則并非秦置矣而史皆繫之二十六年者以是歲爲兼并天下之始封建變爲郡縣至是遂一成而不可易故特記之前所置之二十餘郡與後所增之三郡總以三十六該之而前後復隨文別見古人敘事參差不若後人之泥也且南海三郡不必定在三十三年攷南越尉佗列傳秦已并天下略定揚越置桂林南海象郡以謫徙民與越雜處十三歲其云十三歲者據秦并天下至二世元年數之也王翦傳亦先言平荆地爲郡縣因南征百越之君而後言二十六年盡平天下依此二文則二十六年分三十六郡正當有南海三郡矣均是史公之書禮部援本紀以證其說僕即可援二傳以伸僕之說矣史公但云分三十六郡初未實指某某郡班志則明言之矣其敘漢郡國以秦三十六郡并高文景武昭

所增正合百有三之數非猶有未備也司馬彪志郡國亦云漢承秦三十六郡皇甫謐帝王世紀云秦兼諸侯置三十六郡蓋漢魏以前未有別南海諸郡於三十六之外者別之自裴駟始唐人修晉書祖述裴說因有四十郡之目相沿到今僕謂不如班史之可信也馬班二史述漢初事郡名固有出於三十六郡之外者此則諸侯私置或二世增設要非始皇三十六郡之舊且亦隨置隨廢故班志略而不言以其不足言也非有所缺漏也裴駟之說不知所本恐是誤會始皇本紀之文若以前後文互證則是年實止置齊琅邪兩郡耳并前後通計之班志豈真與太史公相矛盾哉僕非護前而憚改顧吏漢正文具在難以裴氏單詞遽詆班志爲未備故稍申愚管以備折衷足下試復於禮部不識更有以啓僕之惑否

再與談階平書

僕前札中言及秦三十六郡鄙意但謂史公於始皇二十六年書分天下爲三十六郡兼南海三郡在內合前後所置言之班志所云與史公本非抵牾耳又引王翦南越兩傳以證略定揚越時已置此三郡弟爲存疑之詞初非因此并疑三十三年不當有略取陸梁地之事也足下謂王翦南征百越之君卽指會稽一郡然賈生過秦云南取百越之地以爲桂林象郡則百越與會稽究非一地王翦傳先言竟平荆地爲郡縣而後言南征百越之君可驗百越在會稽郡之外矣而南越傳實有與越雜處十三歲之語足下雖善辯但以本不可曉置之愚謂此語非甚難曉也當秦初并天下時王翦南征百越已有三郡之名但

因其君長俾自治之。如後世羈縻之州。其後使尉屠睢略取其地。黜其君長。置官吏如內郡。則在三十三年。故本紀特書之。傳與紀互見。而兩不相妨。徐野民未悟及此。是以存疑到今。僕又讀東越列傳云。秦已并天下。皆廢爲君長。以其地爲閩中郡。與南越傳文略同。而本紀不載置閩中郡。其所以有載有不載者。閩中雖有郡名。仍以其君長治之。秦未嘗別置守尉也。南海三郡。其初置蓋與閩中同。厥後乃有任囂趙佗輩。則等於內地郡縣矣。此所以不書於二十六年以前。而特書於三十三年也。足下以爲然乎否乎。卽使僕所引南越王翦兩傳。果如足下說。而秦之但有三十六郡。別無四十郡。則兩漢書有明文。不可據。裴駟說以汨之。更不必因裴說之未的。而別求它郡以實之。此僕之本意也。惟足下詳察。

與姚姬傳書

昨於新城陳公子碩士所讀。所著廬江九江二郡沿革攷。以今縣推見漢置域。所謂君子之言。信而有徵者矣。惟以廬江爲衡山改名。則猶有未慊於心者。夫淮南之分爲三。在文帝十有六年。曰淮南。曰廬江。曰衡山。皆秦九江郡地。在戰國則皆楚地也。秦之九江郡。跨江南北。楚漢之際。以江南地析置豫章郡。而鯨布封淮南兼得之。淮南厲王因布故封。文帝封厲王諸子。盡以故地還之。故廬江國兼有豫章郡。得與楚交通也。景帝平吳楚。徙廬江王賜於衡山。而廬江豫章俱爲漢郡。其衡山之爲王國如故也。武帝元狩元年。王賜以謀反誅。而國除爲衡山郡。其三年。以衡山地置六安國。自後遂無衡山之名。景十三王傳封膠東王寄少子慶爲

六安王王漢志敘衡山沿革於六安下不系於廬江下明乎衡山之與廬江無涉也廬江之爲郡在孝景初自後別無廢省之人伍被說淮南王安云南收衡山以擊廬江是衡山與廬江絕非一地今欲并而合之難矣鯨布初封史稱九江廬江衡山豫章郡皆屬焉攷其時吳芮徙封長沙以其地益布而芮故都郴則當兼得江夏地厲王子勃封衡山亦當兼有邾軒霸春諸縣至武帝建六安國分土始狹非復衡山之舊光武初因省六安入廬江若西京則衡山自衡山廬江自廬江未嘗合而爲一也讀史之病在乎不信正史而求之過深測之太密班孟堅志郡國沿革精矣間有未備以紀傳攷之無不合也孟堅所不能言後儒闕其疑可矣謂漢初之廬江在江南武帝時已罷昭宣之間改衡山爲廬江皆孟堅所未嘗言所據者僅廬江出陵陽一語然陵陽乃鄣郡之屬縣非淮南故地恐難執彼單辭以爲定案也先生當代宗師一言之出當爲後世徵信敢獻所疑幸明以示我

與孫鳳陽書

承示所撰鳳陽志簡而有要可稱佳桀但中有存疑者數事其一以唐分十道皆因山川形便鍾離在淮南而隸於河南爲不可解予案唐六典淮南道十有四州濠居其一元和郡縣志稱濠州本屬淮南與壽陽阻淮帶山爲淮南之險貞元中竇參爲相據淮割地隸屬徐州及張建封死子愔爲本軍所立常挫王師其時朝廷幾失淮南之地是濠之改隸淮南實始於竇參然吉甫已譏其不學昧於量理之制矣唐志

所據者貞元以後之制非十道之舊也。足下試采吉甫志之文編入沿革門則原委瞭然可免後來之疑矣。足下又疑河南按察司行臺不當在縣境。攷明時南北直隸不設布按二司而有巡守諸道巡守道銜皆假鄰省布按之名。此行臺蓋巡道之行署鳳陽與河南接壤故寄銜於河南非真河南按察也。

鄞縣志局與同事書

史家之例以列傳爲重其列於儒林文苑者皆其次焉者也。元人不通史法乃特剏道學之名欲以尊異程朱諸人後來無可充道學者而無識之輩競以儒林爲榮今志局所擬入儒林者未必悉孚公議且如王厚齋四明文獻之宗而不列之儒林豈厚齋之學行不如高閔黃宗明乎若謂厚齋以官高當入列傳則高閔袁燮父子班秩不在厚齋之下何以仍入儒林也袁桷張時徹沈一貫之入文苑似有意抑之然列傳諸人豈皆粹然無瑕者魏收所謂揚之升天按之入地此淺夫所爲昔人所譏其穢者而躬自蹈之吾不解也寶慶延祐兩志皆不立儒林文苑諸目羅願之志新安施宿之志會稽潛說友之志臨安亦無此名也嘉靖志於儒林文苑外更增淳德雋異之名尤爲冗設愚意當循胡袁二志之例總題之曰人物但以時代爲次不分優劣旣遵古式又息爭端有尙友古人之識者自能別其孰爲大賢孰爲小賢也。

荅王西莊書

得手教以所撰述於崑山顧氏秀水朱氏德清胡氏長洲何氏間有駁正恐觀者以試訶前哲爲咎愚以

爲學問乃千秋事。訂譌規過。非以訾毀前人。實以嘉惠後學。但議論須平允。詞氣須謙和。一事之失。無妨全體之善。不可效宋儒所云。一有差失。則餘無足觀耳。鄭康成以祭公爲葉公。不害其爲大儒。司馬子長以子產爲鄭公子。不害其爲良史。言之不足傳者。其得失固不足辯。旣自命爲立言矣。千慮容有一失。後人或因其言而信之。其貽累於古人者不少。去其一非。成其百是。古人可作。當樂有諍友。不樂有佞臣也。且其言而誠誤耶。吾雖不言。後必有言之者。雖欲掩之。惡得而掩之所慮者。古人本不誤。而吾從而誤駁之。此則無損於古人。而適以成吾之妄。王介甫。鄭漁仲輩。皆坐此病。而後來宜引以爲戒者也。十七史商榷。聞已刊成。或有譌字。且未便刷印。乞將樣本寄下。

與洪稚存書

足下札言國語。日月會于龍。穢。已攷一字當之。予幼讀東京賦。卽疑穢與疚。協韻。未得其義。後讀廣韻。四覺部。犯訓龍尾。又與豚同。乃悟穢爲犯之譌。廣雅云。豚。臀也。故龍尾亦有龍犯之稱。然犯豚皆漢人俗字。依說文。當爲涿。涿者。流下滴。與臀義相近。蜀先主戲張裕云。諸毛繞涿居。而裕以潞涿應之。明乎。涿卽豚也。古音涿如篤。故轉爲鬪。音。東方朔傳。鶴。俛啄。與竇。駁爲韻。易良馬逐。釋文亦有胄音。是其證也。足下所攷之字。未審與僕有異同否。願明以教我。

與洪稚存書二

僕留意三國畺域有年常欲作志以補承祚之闕蜀吳屬橐粗具將次弟魏事今讀尊製體大思精勝僕數倍已輟所業讓足下獨步矣其中有數事或可備葑菲之采敢略陳之歷陽有當利浦謂因王濬書有風利不得泊之語以爲名此說本於樂史寰宇記攷其實殊未然孫討逆傳稱劉繇遣張英屯當利口周瑜傳亦云將兵迎策從攻橫江當利皆拔之則當利之名漢末已有之豈待王濬平吳乃得名乎酒泉之福祿縣漢時本名祿福班史及石刻曹全碑皆其明證至三國猶然龐淯傳及皇甫謐列女傳竝云祿福長尹嘉續漢志偶儻到二字而晉志因之又敦煌之淵泉淵譌爲拌涪陵之漢葭葭譌爲髮此皆不可不正者也漢陽之爲天水蓋魏初所改魏明帝紀張郃楊阜鄧艾諸葛亮姜維諸傳無稱天水爲漢陽者艾傳又有天水太守王頤豈皆史臣追改乎晉志謂晉始復名天水者殆未可信惟足下進而教之

荅洪稚存書

得執事書知頃承恩命入直三天當今經師人師孰有先於執事者深爲吾道之幸又述親藩時復記憶賤名然僕病廢已久近則耳目益聵眊舉動須人掖持鈞天舊游茫如隔世徒增不能奮飛之歎耳僕所攷秦三十六郡竝據漢志本文而姬傳輔之諸君皆不謂然今執事亦有是言蓋據晉志秦四十郡之文於裴駟所說三十六郡雖斥其妄而實取之唯易內史爲郡而已僕攷魏晉以前言秦地理者但言三十六郡未有言四十者史記秦始皇二十六年秦始并天下分天下爲三十六郡謂廢封建立郡縣始於

此非謂三十六郡皆是年所分也。若細攷之。則是年平齊所置。祇齊與琅邪兩郡耳。并前置之三十郡。後置之三郡總計之。故云三十六也。史公但言分三十六郡而不列其目。孟堅則明言某郡秦置。某爲秦某郡合之。正得三十六。其末云。本秦京師爲內史。分天下作三十六郡。漢興以其郡太大。稍復開置。又立諸侯王國。武帝開廣二邊。故自高祖增二十六。文景各六。武帝二十八。昭帝一訖於孝平凡郡國一百三志所稱增者。增於三十六之外。非增於四十之外也。史公言三十六郡。孟堅亦言三十六郡。許慎說文。高誘淮南注。應劭風俗通。皇甫謐帝王世紀。司馬彪郡國志。皆言秦三十六郡。是秦未始有四十郡也。言四十郡者。始於唐人修晉書。其實本於裴駟。駟據始皇取陸梁地。在三十三年。故不數南海三郡。而別求它郡以實之。後人又取閩中郡以足四十之數。遞相祖述。牢不可破者。千有餘年矣。執事欲以鄭郡當三十六郡之一。然孟堅明言東海郡高帝置矣。信它書不如信孟堅也。漢志於武陵郡云。高帝置。不云故秦黔中於丹陽郡云。故鄣郡不言秦。是駟所增。無一可信。不獨內史之爲妄。劉原父刊誤。雖多違失。其云秦三十六郡無鄣郡。則合於漢志。恐未可斥爲邪說也。執事又謂閩中一郡不宜遺漏。此亦不然。攷史記南越閩越二傳。置閩中及南海三郡。竝在秦初并天下之日。王翦傳。平荆地爲郡縣。因南征百越之君。卽謂置四郡事。其時雖有郡名。仍不廢其君長。其後遣尉屠睢取陸梁地。誅其君。設南海守尉等治之。比於內郡。故得列於三十六郡之數。若閩中則仍無諸搖分治之。竊意黔中亦當類是。孟堅所以不取也。其它紀傳述漢初事。所舉郡名。若鄣若

鄭若吳若東陽之類皆楚漢之際增置非復始皇之舊且不久即廢故漢志略而不書唯鄣郡至武帝始改名丹陽故志稱故鄣郡明乎非秦亦非漢也陳項初起之日漢未興而秦二世猶在故亦可稱秦置要在三十六郡之內苟知秦本無四十郡則裴駟之謬不辨自明而諸家紛紛補湊皆可以不必矣執事以爲然乎否乎幸詳示之

又

宋志南梁郡睢陽縣所治卽二漢晉壽春縣後省僕向疑太元收復以後僕立梁郡不更立淮南郡與壽春縣執事以爲淮南南梁二郡晉末當竝立其并合實在永初以後今檢劉敬宣傳義熙五年出督淮西其結銜云淮南安豐二郡太守梁國內史則其時尙有淮南郡有郡則必有所領之縣僕向所疑今乃豁然執事之益我良多矣至謂二郡之合在宋永初以後則恐不然攷義熙八年土斷揚豫見謝晦傳是年向靖成壽陽傳稱安豐汝陰二郡太守梁國內史不云淮南太守是淮南已并入梁郡不待永初也蓋其時割丹陽之于湖縣爲淮南郡境義熙八年也因割壽陽縣爲梁郡實土而淮南郡移於江南壽陽不復爲縣矣晉宋時刺史鎮戍之地若姑孰懸瓠碭礧滑臺之類皆非縣名但言鎮壽陽不足以爲置縣之證

潛研堂文集卷二十六

書四

與戴東原書

孫愐唐韻序稱前後總加四萬二千三百八十三言今檢廣韻卷首云凡二萬六千一百九十四言廣韻本於唐韻不應廣韻所收之字轉倍於唐韻若然則雍熙之所修者當云刪韻不當云廣韻矣意孫愐序所云增加者兼注中字而言邵長蘅遽謂孫愐增字至四萬有奇似可未信惟高明示之

與謝方伯論平水韻書

某向有所疑茲願聞於典謁者近儒論韻學者皆謂今韻二百六部併爲一百七部始於平水劉淵今案劉淵壬子新刊禮部韻略不見於欽定四庫書目惟邵長蘅古今韻略卷首歷敘所見韻書曾載之然某五十年來徧訪南北藏書家俱無有著錄者獨吳門黃孝廉家有平水新刊韻略五卷係元刊本前載河間許古序乃知爲平水王文郁所撰序末題正大六年己丑則金哀宗年號也於宋爲紹定二年其時金猶未亡至淳祐壬子則金亡已久矣己丑在壬子前二十四年淵所刊者殆卽文郁之本或失其序文而

讀者誤以爲淵所作耳。黃公紹韻會敘例並舉江南毛晃江北劉淵兩家而每部增字於毛則云毛氏韻增於劉則云平水韻增然則劉淵乃刊平水韻之人而後人乃以平水屬之劉淵毋乃誤耶且使淵而果宋人也在稍通古今者豈有慕於元海之名而效之耶惟坊賈鐫工未嘗學問乃無足怪耳然某究以未見劉書不敢決其然否浙中博洽之彥多在閣下幕府試一爲咨訪順風之呼或可得此書下落以訂向來沿習之謬幸閣下留意焉。

與談階平書

昨見足下讀論語一篇引釋文屢空力從反疑空有龍音予按廣韻集韻三鍾部俱不收空字古書亦無讀空爲龍者此必傳寫之謬檢毛詩釋文屢盟削屢婁豐皆音力住反乃悟力從本力住之謬陸氏爲屢音不爲空音也屢空之空古人皆讀平聲李頤詩數年作吏家屢空誰道黑頭成老翁王安石詩五噫尚與時多忤一笑兼忘我屢空此其明證李壁注介甫詩引論語屢空注空匱也空苦縱切今作平聲用季章未攷唐人詩故疑介甫誤讀然亦可證宋時讀論語屢空字爲去聲矣空讀去聲當爲苦貢切而李云苦縱切則又昧於東冬送用之別胡炳文四書通音空爲力縱切尤謬蓋惑於釋文誤本又泥於當讀去聲輒改從爲縱而不知力與空非雙聲不能成切也孟子空乏其身孫宣公無音則孫亦不讀爲去聲朱文公於論語屢空孟子空乏俱未有音則亦讀平聲文公與季章同時猶能守古音勝於季章多矣。

荅孫淵如觀察書

得四月六日手教，并示荅江處士書稿。所云西法每事必與古聖相反，誠切中歐遷巴之病。至論中星斗柄之同異，則僕非專門，不敢措一詞。僕近日好言輿地，不言象緯，以目眊夜不能見星，知於此事無緣耳。史記十二諸侯年表始共和元年，終敬王四十三年。今刊本有庚申及甲子字，足下斷以爲史遷正文，詆古人不以甲子紀元之說，僕思之恐有未安。古術百四十四年而超一辰，則共和元年必不直庚申。東漢以後術家不用超辰，徐廣晉人，以共和之初爲庚申，固無足怪。但不可以誣史公耳。太陰太歲之辨，尊見旣與鄙意不合。僕今亦不復言，各尊所聞聽後，賢決其然否，獨於此猶復饒舌者，則以六國表、周元王元年、徐廣曰乙丑、秦楚之際月表、秦二世元年、徐廣曰壬辰，後兩表之干支皆徐所注，則此表之干支必出於徐無疑也。其最上列干支一格，殆宋以後校刊者妄增，後兩表亦無之。攷徐注之例，惟於每王元年紀干支，此表弟第一格，每十年輒書甲戌、甲申、甲午、甲辰、甲寅、甲子字，顯係後人所爲，意在便於尋檢，不特非史公本文，並非徐意也。足下所言，將以取信士林，不當留此罅隙，故復陳芻言，以備采擇。

與馮星實鴻臚書

執事注蘇文忠公詩，正王施查三家之誤，而補其漏略，可謂豪髮無遺憾矣。施氏元本春帖子在端午帖子之後，查本始易其次，以僕攷之，兩帖子皆元祐三年所進，是年閏在十二月。諺所云一歲兩頭春者也。

其正月己酉朔據子由元日宿齋詩今歲初辛日正三明朝風氣漸東南還家強作銀幡會雪底蒿芹欲滿籃是正月三日辛亥祈穀四日壬子立春也公於時已差禮部知貢舉例當鎮院故不及供帖子其閏十二月十五日丁巳爲己巳歲之立春節公次韻劉貢父春日賜幡勝詩有臘雪強飛纔到地之句此立春在臘月之證也任注元祐三年戊辰作正謂此詩作於戊辰臘月非謂戊辰之春也施氏編此詩於戊辰歲木無差誤查氏強作解事移此詩於己巳卷首并將春帖子移於端午之前則真誤矣劉貢父集中題云呈子瞻沖元內翰子開器資舍人執事據許將傳知成都府元祐三年再爲翰林學士謂將於三年方旋京未必立春時卽在朝疑任注有誤僕攷東坡內制集有元祐三年四月十九日宣詔許內翰入院口宣是則正月立春許固未在朝列若閏十二月立春正與坡公同直任注本無誤也年譜先生生於景祐丙子十二月十九日不見干支執事亦疑而未決僕以遼志朔攷證之是年十二月實乙巳朔則公生日當爲癸亥施元之以爲壬戌者殊未足信伏惟詳察

與邱艸心書

讀所作周因於殷禮二句題文後大結有後世得天下必以征誅爲正之語此本諸宜興儲中子文僕初亦甚以爲然今乃知其不可爲訓殆明時士大夫欲尊崇其太祖駕乎唐宋開叔諸君之上故有是論儲氏習聞而不加察爾攷唐虞三代皆封建之世其土地人民天子與諸侯共之天子不甚尊諸侯不甚卑

處茅茨土階食土簋土鉶而以匹夫匹婦之飢溺爲已患固未知有天下之足樂也唐虞得舜禹而行禪讓殷周遇桀紂而行征誅當時皆知其非富天下故不特舜禹爲聖人卽湯武亦不可謂之非聖人也自秦人廢封建爲郡縣遂以天下爲天子私有竭四海以奉一人盡改古昔淳朴之俗欲爲子孫萬世之利迨其後嗣不肖天怒人怨豪傑之士桀其亂而攘取之其起于編戶者則託征誅之名其起于權臣者則託禪讓之名要其初皆因利桀便尙詐力而違仁義非有除暴安民之心也其傳世短促者姑置勿論若漢唐宋明開國以後規模整肅粲然可觀雖無濬哲欽明之德實有安民和衆之功則推之爲三代之下之賢君可也奚必較量其起事之正否而上下其手乎世徒見禪讓者之悖于舜禹遂疑征誅者之近于湯武曾不思率土之濱莫非王臣以甕牖棬樞之子而輒生覬覦神器之思此王法之必不容者而覩然自謂得其正乎彼右漢明而左唐宋者其亦昧于理矣且卽以漢明兩代較之秦楚仇敵之國秦之滅楚距陳勝起事僅十有三年沛公世爲楚人背秦未爲不義若明太祖則自祖父以來久入元版圖矣不得以漢相例就令有以解之而與漢起事者有陳勝項籍諸人與明起事者有韓林兒徐壽輝諸人衆人逐鹿而一人得之將以一人爲正衆人爲僞乎抑并此衆人而皆得爲正乎昔南巢塉野之役未聞有與湯武爭王者故婁敬張良謂陛下得天下與周異漢祖未嘗以爲忤也漢明之與唐宋相去直伯仲間耳何得正不得正之別哉孔子言雖百世可知蓋主三綱五常而言至于易姓改物變態非一端聖人固不能

預知要亦不外此兩種窠臼。聖人雖惡曹馬之妄學舜禹，斷不喜張獻忠李自成之妄學湯武也。儒者立言當爲萬世生民慮。吾恐征誅之慘更甚于禪讓，故不可以不辨。

荅嚴久能書

來教以漢書銅陽縣孟康音紂。不當有紅反字。引盧校經典釋文爲左證。旣明白矣。僕少壯時聞故友吳山夫戴東原之言。謂孟康本音紂紅切。小顏謂音紂非是。及校漢書。卽用兩君緒論。晚歲讀抱經先生校本。其時攷異久經刊刻。是兩說者。疑未敢決。故不復訂正。非有意護前也。足下引吾家廣伯說。謂東與尤侯聲近通用。則愚以爲未必然。古書一字可兼數音。未聞彼韻可合此韻。漢儒云某與某聲相近。特就一字之聲言之。卽六朝所謂雙聲也。雙聲與疊韻判然不同。奈何因一兩字聲偶相近。輒欲并其韻而通之乎。聲音本於文字。文相從者。謂之正音。聲相借者。謂之轉音。正音一而已。轉音則字或數音。正音如宗族昭穆雖遠。而實出一本。則引而同之。故喉舌唇齒音不同。而合爲一部。轉音如婚姻。夫之與婦。至親也。而婦之族不可以混夫之族。故音之轉必清濁舒斂。同位同等。乃可假借。其它同部之字。仍風馬牛不相及也。顧亭林論古音分部最有倫理。而毛大可妄爲通韻之說。以攻之。夫使韻而可通。則亦不必言韻矣。卽以東鍾一類言之。東冬江也。陽庚也。清青也。蒸也。顧氏析爲四類。而毛通爲一部。旣泛濫而不可訓矣。依廣伯所舉。則與尤侯又聲近可通也。試引廣伯之例而通之。番禺之禺。轉爲魚容切。鬼容區卽鬼央區也。

從史卽慾惠戎讀如汝是魚虞亦相近也。左傳晉伯宗二傳作伯尊莊子導大綱向秀讀綱爲空是真文至元先亦相近也。書夔夔齊栗卽史記之翶翶封龍山亦作飛龍山。般讀若宰是支微灰亦相近也。以一二字之聲近而引以爲通用之例古今尙有正韻乎古音直如特直九反當讀如投之上聲而紂紅反亦讀如同卽謂孟康音紂亦取同之轉音而非如廣伯聲近之例也。僕與廣伯素無一面恨生前未與盡其同異故敢復于足下唯足下審之。

荅周松靄同年書

久未奉書左右伏想撰述日富道遠不獲追隨講席聞所未聞良深悵罔大製十三經音略於聲音清濁開合之理剖析入微。唯是方音師授各殊足下所指誤讀之字敝鄉卽有未誤者尺素不能翻縷也。前聞足下深詆亭林顧氏古音而以吳才老叶韻爲善私憚足下尊崇考亭不欲立異耳。今讀毛詩叶音補正一篇於朱傳駁辨極多卽以服叶蒲北反言之扶服讀匍匐經典既有明證轉輕唇爲重唇於字母亦無觸背再以有狐候人六月諸篇證之服與職德同韻亦復何疑而足下必改符弗反以從本母夫三十六母出于唐末又在陸法言孫愐之後足下旣知六朝後出之書不可以繩三百篇又何必以晚出之字母繩三百篇耶足下所譏于亭林者特謂其不講字母今才老與朱子已不能免於訾議則又何責乎亭林此僕之所以不敢附和也承索拙序自愧才非元晏不足以增太沖聲價故遲回久之無以下筆伏唯垂

宥。

與程秀才誓

承以所著易源待正稟相示。僕於經義素非專門。先天無極之旨尤所不解。今讀足下書。所謂欽其寶。莫能名其器者也。竊嘗思之。宣尼學易。但云可以無大過。其贊顏氏子曰有不善。未嘗不知。知之未嘗復行。聖賢學易。不過欲保此身。使無大過而已。小過雖聖人未敢自信爲必無也。故曰震无咎者存乎悔。又曰无咎者善補過也。聖人唯自覺其有過而悔之。卽已不覺而人告之。亦忧然爲戒。卽悔卽改。此不遠復无祇悔之所以元吉也。若夫亢而有悔。迷而終凶。雖聖人亦未如之何也矣。古之聖賢。求易于人事。故多憂患。戒懼之詞。後之儒者。求易于空虛。故多高深窈妙之論。聖人觀易。不過辭變象占四者。今舍象占而求卦畫。又舍卦畫而求畫前之易。欲以駕文王孔子之上。自謂得千聖不傳之祕。由是自處至高。自信至深。謂已之必無過。且患人之言其過。辯論滋多。義理益昧。豈易之教固若是乎。此僕之所以不敢言易也。

潛研堂文集卷三十七

傳一

內大臣一等公謚忠勇佟公傳

史館作

佟國綱滿洲鑲黃旗人祖養正太祖天命四年由撫順來歸六年從征遼陽以功授遊擊世襲駐朝鮮界之鎮江城其年七月中軍陳萬策潛通明將毛文龍令別堡民詐稱兵至大躁城中驚擾萬策乘亂執養正殺其子豐年及從者六十人以叛養正不屈被害雍正元年贈太師追封一等公謚忠烈父圖賴一名盛年襲遊擊以軍功累加世職至三等精奇尼哈番官至兵部承政定南將軍固山額真以太子太保致仕卒謚勤襄圖賴生孝康章皇后康熙十六年推恩外戚追封一等公雍正元年贈太師國綱其長子也狀魁梧善騎射初任一等侍衛襲三等精奇尼哈番擢正藍旗漢軍都統襲父爵一等公授內大臣都統如故吳三桂之謀逆也其子應雄在都下立紅巾爲號約日起事爲內應事覺命國綱統禁軍捕之應雄伏誅康熙十四年察哈爾布爾尼叛山西駐防蒙古多叛逃出口者以國綱爲安北將軍鎮宣府旣至鎮宣布聖諭整飭邊防人心帖然恃以爲安察哈爾平召還京仍以內大臣兼鑲黃旗漢軍都統時議設漢

軍火器營復命統之因定連環本柵之法以教練焉二十七年五月與領侍衛內大臣索額圖理藩院尙書阿爾尼等使俄羅斯議立畺界事軍出瀚海會厄魯特與喀爾喀構兵道阻乃召還明年春復出塞抵色冷江秋七月及俄羅斯使臣費陶多爾等會于牙克薩城下遣人往返議久不決國綱語同事者曰彼倚長江之險且秋艸易枯我軍難留故遲時日以要我也如示遠人以誠身履其地彼計沮矣卽日屯諸軍山上從輕騎渡江以要之使臣色動猶以未請命爲辭國綱從容示之曰我皇上體天地好生之心懷及爾國息兵便民俾各安業汝國亦仰體聖意乃乞重望大臣能任事者分立畺界爲萬世永安計今彈丸黑子之地不敢自專必待請而後行是萬里奔命窮年無已時也使臣見其詞嚴正不可奪卒如命立畺界振旅而還二十九年厄魯特犯邊上命和碩裕親王福全爲撫遠大將軍國綱以內大臣參贊軍務率火器營爲前鋒厄魯特聞大軍至遣人詭稱議和潛偵虛實國綱詣中軍曰彼以款我也兵法無約而請和者謂之謀賊情叵信必速戰遂定戰期八月己未朔大軍列陣而前賊于烏蘭布通縛駝結陣以待國綱謂其部下曰今日正男子報國揚名之秋我與若父子兄弟也我不敢愛身而先之爾曹其勉旃遂先登摧其駝陣賊逃入林中國綱麾兵獨進大破其衆國綱中烏鎗歿于陣是夕厄魯特不能軍翼日遁去聖祖聞國綱薨震悼輟朝遣內大臣賜金五千兩贊鞍馬櫬還之日敕諸皇子郊迎復諭曰舅舅社稷重臣爲國捐軀朕甚愍焉將親臨弔奠國綱子孫族人詣闈固辭乃止賜祭四壇謚曰忠勇御製碑文立

于墓道其略曰爾賦性貞純秉心淵塞親居元舅而敬以持身位列上公而謙能服物入則虔共宿衛出則筦領禁軍迺者小醜構爭近逼邊圉三軍聲討簡佐元戎屬賊鋒之旣挫將棄壘以潛奔爾猶擐甲直前提戈獨進銳志彌堅金石壯氣逾薄虹霓誓掃陸梁永清朔漠豈期上將遽殞師中夫爾以肺腑之親心膂之寄秩崇望峻勞久勳高假令偕衆旋軍亦可從容奏愷而乃義存奮激甘蹈艱危人盡如斯寇奚足殄惟忠生勇爾實兼之其見褒美如此長子鄂倫岱襲一等公詔別賜拜他拉布勒哈番加一拖沙喇哈番令其第三子夸岱襲焉雍正元年敕立家廟加贈國綱太傅鄂倫岱仕至領侍衛內大臣緣事正法以夸岱襲一等公卒子那謨圖襲鄂倫岱子補熙漕運總督介福經筵講官禮部左侍郎兼翰林院掌院學士初養正之來歸也列入漢軍康熙二十七年國綱上疏言臣家本係滿洲臣高祖達爾哈齊貿易邊境明人誘入開原比太祖高皇帝遣使入明臣叔祖佟養性備述家世求使者代奏卽蒙太祖諭云朕福金佟佳氏塔本巴顏之女爾佟姓兄弟分散入漢之故朕知之久矣及大兵克撫順將臣族人居佛阿拉之地不加差使臣叔祖得尙宗女賜號施武里額駙令與佟佳氏之巴都里孟阿圖諸大臣考訂支派敘爲兄弟臣家族籍旣明請賜改隸滿洲而同時正白旗漢軍內大臣和碩額駙華善亦疏言臣高祖布哈原姓瓜爾佳氏明成化閒授建州左衛都指揮僉事臣曾祖阿爾松阿嘉靖閒襲父職臣祖石翰移居遼東臨卒遺命諸子立功以歸本國及太祖高皇帝兵取廣寧臣父石廷柱開城門歸順太祖見而喜曰此

我國人也。特賜御用鞍馬。太宗文皇帝知臣父本係滿洲。故命爲滿洲甲兵額。眞。後又命爲統領漢軍額。真。累擢至一等伯。臣家世實係滿洲。事並下戶部。戶部議將國綱華善及族人改歸滿洲。仍留於漢軍旗下。佟氏石氏二族文武官俱留見任。其編審冊內改稱滿洲。詔從之。其後敕修三朝國史。聖祖仁皇帝親定滿洲功臣百一十五人。國綱父圖賴及石廷柱並與焉。

都統贈一等伯傅公傳

史館作

傅清。滿洲鑲黃旗人。姓富察氏。父李榮保。內務府總管。追封一等公。傅清初由藍翎侍衛遷三等侍衛。除鑾儀衛雲麾使。乾隆元年遷鑾儀使。二年除正黃旗滿洲副都統。五年出爲鎮守天津總兵官。未幾仍授副都統。命駐西藏辦事。還京復爲天津總兵官。十三年遷古北口提督。十四年二月調固原提督。十月改授都統。與左都御史拉布敦同駐西藏。時西藏郡王朱爾墨特那木札爾潛蓄異志。與準噶爾相結而謀害諸喇嘛。欲獨據其地。傅清密以狀陳奏。十五年十月遂與拉布敦定計。誘朱爾墨特那木札爾至通司岡。稱奉上命數其罪。誅之。逆黨羅卜藏札什等聞之。率衆數千突入署內。放鎗礮。達賴喇嘛遣番僧救護。不得入。傅清中鎗創甚。卽自盡。事聞。上召王公滿漢大臣諭之曰。從前頗羅鼐恭順料理藏中事務。一切安帖。皇考加恩。由台吉封爲貝勒。伊感激我朝恩厚。彌益恪誠。朕卽位以後。封爲郡王。後因年力就衰。朕詢以孰堪爲嗣。伊奏稱長子輕弱。又已出家。次子朱爾墨特那木札爾人尙強幹。能勝彈壓。因令其承襲。

迨伊奏事一二次以後朕於其詞意之間知非伊父居心可比日後必生事端諭駐藏大臣留心體察傳清前經駐藏爲伊等所敬服遂令前往且慮其勢孤益以拉布敦乃朱爾墨特那木札爾心益狂悖將伊長兄車布登圖害誣以叛逆又與達賴喇嘛素有仇釁旣戕其兄遂欲害藏中不順伊之班第達等其勢將延及達賴喇嘛獨居其地雄長一方近遂將塘汛文書禁絕不通悖逆益著傳清拉布敦稔知其姦摺請便宜從事以絕後患於十月初八日奏到朕以僅二大臣孤懸絕域未可輕舉批令俟班第更換拉布敦到藏日會同達賴喇嘛及藏中大格隆等明正其罪以申國法乃傳清等未及接到諭旨卽于十月十三日傳朱爾墨特那木札爾到通司岡加以誅戮而傳清拉布敦旋爲伊屬下卓呢羅卜藏札什所害總督策楞奏到朕深爲憫惻不覺涕零因思傳清拉布敦若靜侯諭旨遵行或不至是但朱爾墨特那木札爾反形已露倘不先加誅戮傳清等亦必遭其荼毒則傳清拉布敦之先幾籌畫殲厥渠魁實屬可嘉非如霍光之誘致樓蘭而斬之也夫臨陣捐軀雖奮不顧身然尙迫以勢所不得不然如傳清拉布敦揆幾審勢決計定謀其心較苦而其功爲尤大以如此實心爲國之大臣不保其命終安得不倍加軫惜邪傳清拉布敦著加恩追贈爲三等伯入賢良祠昭忠祠春秋致祭伊等子孫給與一等子爵世襲罔替以示朕褒忠錄庸之至意竝將伊二人爲國捐軀之大節明白宣示使天下共知其不得已之苦心否則好事喜功者借此二人爲口實而事外無知之人又有議其擅開邊釁而仍邀國家如此厚恩者朕豈肯令是

非倒置若此哉。十六年四月復諭內閣曰：前駐藏都統傅清、左都御史拉布敦，因朱爾墨特那木札爾逆謀顯著，先事翦除，奮不顧身，忠誠卓越，俱已加恩贈卹，入祀賢良祠昭忠祠。不知者或訾二人冒險邀功，且議朕爲酬庸過厚也。今據策楞班第等奏，朱爾墨特那木札爾自立名號，潛遣其心腹堅參札錫等通款準噶爾，稱策旺多爾濟那木札爾爲汗，且求其發兵至拉達克地方，以爲聲援。幸值準夷內潰，所遣使人回藏被獲，得其逆書，并餽獻諸物，是其陰蓄異志，勾結準夷，罪不容誅。設非二臣協力同心，決計先發，則其貽害藏地，將不可言。是二臣之心甚苦，而有功于國家甚大，應特建雙忠祠，合祀二人，春秋致祭，丕昭勸忠之典。

陳忠愍公家傳

公諱福，字箕演，其先江寧人。父尙智，明末官榆林副總兵官，以拒李自成戰歿，葬於寧夏衛，因占籍延綏。公少倜儻，有謀略。國初以武舉從寧夏總兵官劉芳名麾下，勦香山賊有功，授守備，隸鑲藍旗都統李國翰麾下，攻階州蒲城諸路皆有功，加游擊銜，尋授四川遵義鎮游擊，駐兵順慶。順治十五年，大兵入川，公以所部從斬獲甚衆，加參將銜。康熙二年，巨盜劉二虎、郝搖旗、李來亨等出沒楚蜀間，蹂躪居民，總督李國英請會兵討之，公得檄以次年春從西安將軍傅哈禪出征，手斬劉二虎於天池寨，攻郝搖旗於黃艸坪，禽之。其秋八月，又從靖西將軍穆里瑪追擊李來亨於茅麓山，來亨自燒死，餘黨殲焉。論偏裨功，公居

第一授三等輕車都尉世職遷四川成都城守副將會打箭爐苗寇警總督蔡毓榮奏改夔州協副將討平之十年攝重慶鎮總兵官事十二年擢陝西寧夏鎮總兵官公入覲請訓卽赴鎮任事家屬尙留重慶明年逆藩吳三桂據滇南叛四川亦應賊吳逆素知公曉勇遣使好言誘公公斬其使以聞賊乃劫公家百口爲質遣使誣公曰不從者一門無噍類矣公慷慨謂僚友曰吾志吞逆賊豈爲妻子計耶立斬之遣弟壽賚書入奏天子嘉公忠亮知大義擢陝西提督仍領寧夏鎮事授其弟奇參將壽以廩膳生特授寶應縣知縣王輔臣者平涼大帥潛與賊應據城以叛攻陷定邊城十四年春詔公與總督哈占合兵取之先是寧夏兵被調征蜀去者十六七其留者多怯懦莫敢前公諭以忠義申令將士有不進者斬卽日上馬啓行三月至靈武分遣部下復惠安韋州安定三堡親統兵與蒙古索諾木台吉軍合圍花馬池別遣兵略定遠皆多所斬獲賊朱龍以衆援花馬池我軍邀擊之賊以奇兵出我後腹背受賊我軍益奮斬僞都司王一龍於陣朱龍不能支遁走花馬池賊勢孤乃下六月進復輒井安邊諸砦七月揚威將軍阿彌達奏言逆賊王輔臣率精銳與秦州逃寇屯聚平涼慶陽依山爲固請遣大將軍貝勒董鄂等會平涼而遣提督陳福速取定邊固原以斷其援詔從之公自花馬池進圍定邊鑿濠四面以困賊朱龍復自綏德來援公遣將掩擊於沙家澗生得朱龍父子而定邊僞副將倪光德亦爲其黨脅擁乞降卽斬光德與龍父子軍前王輔臣旣失定邊乃乞撫以緩我師朝廷察其詐立遣將軍張勇赴秦州會大將軍貝勒董鄂

入平涼而命公出固原夾擊之。八月公進兵平遠禽斬僞官二十有二人。捕首虜二千餘級。獲輜重器械無算。再進斬僞參將陳啓元。遂奪其城。是月又以舉王屏藩逆書進公爵三等男。公謝乞上提督印。專領寧夏鎮事。詔不允。九月進兵固原中衛副將賈從哲游擊張元經臨陣先退。公劾其罪。斬以徇於軍。議者或言公所部宜并力赴平涼。詔以問公。公奏言。若先趨平涼。則固原賊必乘閒斷我糧道。非萬全之計。莫如先攻固原。挫其鋒銳。俾賊自顧不暇。然後留兵守固原。臣自以精兵會平涼。報可。公遂督師西進。屬歲暮大雨雪。公督進益急。暮抵惠安堡下。令五鼓會食。急趨固原城下。後者斬。是時賊將來降者多在軍中。潛誘軍士爲亂。夜半鼓譟入營門。衛士皆解散。公倉卒未持兵刃。遂薨於軍。時十二月二十二日也。事聞。天子震悼。命總督趙良棟按亂首得參將熊虎等四人。皆斬以徇。追贈公爵。謚曰忠愍。賜檀香木爲首。以葬。加祭二壇。御製詩一軸。建祠寧夏。賜祀田十頃。俾家焉。賜世襲三等子。以公弟壽子世怡襲。超擢公弟奇爲天津總兵官。十八年冬。奇上疏言。臣兄福捐命疆場。妻子留蜀。生死未卜。乞詔征蜀諸將蹤跡。之後肯仍告以故。乃大哭呼其子世琳出。與壽相抱哭。左右輿隸無不灑涕。壽還都。請以襲爵還世琳。上召見世琳。問以母子流離狀。世琳言。吳逆怨臣父。斬其使。殺臣家數十口。然終欲招致之。故繫臣母子重慶獄。重慶守鄭某知臣父必不附賊。陰釋之。臣出山後。聞鄭闔門自縊矣。臣母子潛伏山谷。草衣木食。經七八

年乃得復見天日。因免冠扣頭。泣下嗚咽不成聲。上憫歎久之。卽除直隸三屯協副將。歷古北口總兵官。鑾儀使。卒子益嗣。三十六年上西巡駐蹕寧夏。遣大臣索常泰奠公墓。雍正八年詔入祀昭忠祠。益由三等侍衛出爲直隸固關參將官。至雲南楚姚蒙景總兵官。卒子大用嗣。今爲江南提督。論曰。昔新城王文簡公。典試入蜀。與公交稱。公爲儒將。越三年而公以死節聞。夫儒者明於大義之謂。雅歌投壺。輕裘緩帶。儒之末節耳。公身經百戰。所向無前。有英衛之風。及滇逆侏張全蜀失守。平涼固原皆爲賊巢。公以孤軍介其閒。謀國忘家。累斬賊使。忠義之忱炳如皦日。天子委以心膂。倚爲長城。費禕未備乎郭循。桓侯竟隕乎張達。哲人云亡。痛矣悲哉。然而恩賚重泉。賞延奕世。姓氏入名臣之傳。俎豆永昭忠之祠。生榮死哀。公實兼之。夫衛霍功高一再傳而失侯。而公之後嗣皆能以功名自奮。豈非忠孝之門必有餘慶。天道固昭昭可信邪。大昕與公曾孫樹齋先生善。敬讀公家傳。爲敘次之。以志景仰之忱。俾百世之下。聞者興起焉。

文淵閣大學士兼禮部尚書王公傳

公諱掞。字藻儒。號顥庵。太倉州人。明建極殿大學士文肅公錫爵之曾孫。翰林院編修衡之孫。太常寺少卿時敏之第八子也。年十七補博士弟子。康熙丙午舉于鄉。庚戌成進士。選庶吉士。孝感熊文端公爲館師。特器重。公與歸安孫編修在豐有雙珠之目。散館授翰林院編修。乞假歸省。丁生母沈太夫人憂。服闋還朝。主乙卯山東鄉試。遷左春坊左贊善。乞假歸。居太常憂喪。葬如禮。服闋。補右贊善。充日講起居注官。

上以江浙人文之地提學道不得人改用翰林官令九鄉會舉由是吉水李公振裕被命視學江南而公得浙江取士公明浙人有窮通翁之謠言所取皆寒士宿學而能文者也報滿擢翰林院侍講三轉至侍讀學士庚午主順天鄉試超遷內閣學士甲戌殿試充讀卷官音吐闊朗上傾聽不倦及館選日上御保和殿故事惟大學士侍殿上餘皆立階下特命公與同直學士三人入侍諮詢人才後遂以爲例遷戶部侍郎充經筵講官時西安大同開捐例因緣爲姦者多公防檢有方胥蠹斂手筦寶泉局不名一錢轉吏部侍郎首禁臨選駁查臨掣買籤之弊某織造之弟以賄得南海令公扣其缺曰法自近始吾不能骯法徇勢要也江南十府糧道缺出有候補監司武國檻者欲得之議官時人多屬意于武公曰此陞缺非選缺也班次一紊後即爲例繫一人者小繫銓政者大力持不可抵暮武以千金餽公且訂後效麾而去之故香山令張令憲父子死賊難朝廷追卹予蔭承蔭者其長孫進也年滿咨部部議歷年太久恐有假冒格不行公昌言曰令憲父子以兩命博一蔭今以年久黜之教忠之謂何乃與尙書澤州陳公侍郎崑山徐公別議以上卒從公等議御史鄭惟孜以科場浮議多出太學疏請監生就試本省毋留京師九鄉初不然其說惟孜再疏堅執衆無以難公曰太學之設三代以來未之或廢柰何以一時流弊舉興賢育才之地而空之乎鄭議竟寢遷刑部尙書先是各司定讞不錄漢供公言本朝官制兼設滿漢欲其彼此參酌今供詞俱非漢語是非曲直漢司官何由知之若隨聲畫諾漢官便爲虛設矣令嗣後錄供兼滿漢稿

永爲例。是時州縣奸民多撫細事。赴部控訴。公言朝廷設官有體。惟元惡大憝。司寇行法其餘皆有司之事。非可越俎而代也。或虞旗人。非州縣能制。則現設理事官。上之督撫監司亦足彈壓。何至千百里外拘繫對簿。大者淹斃牢狴。小者失業破家。而所爭止于薄物細故。非欽恤制刑之意也。乃請禁止。改工部尙書。轉兵部。又轉禮部。公任事日久。徧歷六曹。每蒞官必告同事曰。某於公事知無不言。言無不盡。言之而聽。固善。不聽。必愚見之誤也。亦不敢固執。然此爲事介兩可者言也。若確見其失。萬不可假借者。諸公自爲之。某不能唯唯聽命也。同列皆敬重公。事有不決。俟公一言乃定。是時士子以上六十萬壽。請開恩科。事下禮部。同列以舊例所無。難之。公曰。以萬年之聖主。當六旬之大慶。此豈有成例可援乎。若以糜費爲嫌。則民間家長生日。子孫僮僕。尙不惜出所有。招集賓客。矧富有四海。而區區計及於此。遂如所請。以上立命舉行。公在翰林。已負公輔之望。及爲六卿。眷注益渥。天下皆謂公且暮入相。而公回翔喉舌之地。垂二十年。淡泊恬退。夷險一節。上益以賢。公康熙五十一年。拜文淵閣大學士兼禮部尙書。仍兼經筵講官。閣臣例不兼經筵。公奏請開捐下內閣九卿議。公與安溪李文貞公。皆不畫題。而極陳捐納之弊云。臣每見鄉里童駢。一旦捐資儼然民上。或分一縣之符。或擁一道之節。朝章國故。從未經心。官箴民隱。何曾注念。不惟濫觴名器。亦且爲累地方。宜禁止以塞僥倖之路。杜言利之門。特諭所奏深合朕心。飭九卿再議。

明年八月主禮部會試其冬以疾請解閣務御批卿但安心調養朕同事老臣漸少實不忍言明年春病稍愈卽入直得旨再加調養不必每日到閣五十七年孝惠皇太后升祔議者以孝康皇太后升祔已久欲位其次公曰皇上聖孝格天曩者太皇太后祔廟時不以躋孝端之上今肯以孝康躋孝惠之上乎議者不從公言上果以爲非是令改正焉五十八年元旦日食詔停止朝賀廷臣以交食一定之數不足爲災欲固請受賀公言聖人敬天無微不謹仰成君德正在此等乃止六十年三月以陳請建儲忤旨率長子奕清伏闕待罪凡五日詔奕清赴軍前效力而公仍留內閣公自以待罪之身不敢起視事其冬車駕自熱河回鑾公迎至石槽上遣內監慰問甚至明年元日諸大臣具摺上壽公亦未敢列名上還其摺令列公名乃奏翼日賜宴太和殿宴畢召入西煖閣賜坐慰勞尋詔視事如故公之忠直無它腸至是乃大白及聖祖升遐公宿閣中朝夕哭臨悲哀逾節病日劇輿歸第世宗御極之元年正月上疏乞休詔以原官致仕仍留京備顧問其禮遇如此公嘗言黃霸爲丞相勳名減於治郡時論者惜之吾受恩至深非奉行文書可以塞責故於預建國本陳奏至再至三觸冒九死而不悔又嘗密奏請減蘇松浮賦御史張建議請於浙江開礦公密疏乞禁止皆未嘗告人也及被譴日詔出公摺付內閣衆始知之素有人倫之鑒文臣如范時崇陳璣朱軾李陳常武臣如穆廷栻杜呈泗皆公所薦舉後多知名楊編修繩武者公門下士也其言曰公風度端凝儀觀外朗左目有痣赤如丹砂由詞臣登宰輔皆出特簡不由援引外溫和而

內剛正單寒後進以文求謁接之謙如而要人炙手可熱者屏勿與交退食之暇不廢絲竹一面之知或推食解衣予之而脂膏之地未嘗染指世固有色厲內荏言清行濁寒士不能登其堂而不免屈節于貴倖故人不能分其惠而不免受金于莫夜者此公之罪人也世以爲知言公兩子長奕清詹事府詹事次奕鴻河南按察僉事

內閣侍讀嚴道甫傳

嚴長明字冬友號道甫江寧人幼讀書十行竝下年十一臨川李閣學紱典試江南聞其早慧欲見之因介熊編修本往謁李隨舉子夏二字令對卽應聲曰亥唐李大奇之謂方侍郎苞楊編脩繩武曰此將來國器也公等善視之遂執經二人之門及補縣學生學使夢侍郎以國士目之侍郎知其貧問所需長明曰貧乃士之常聞廣陵馬氏多藏書願得一席爲讀書計耳因薦之盧運使見曾立延致之是時東南名士多假館馬氏齋長明虛心質難相與上下其議論遂博極羣書乾隆二十七年天子巡幸江南長明以獻賦召試特賜舉人授內閣中書甫任事卽奏充方略館纂脩官以書局在內廷許懸數珠中書在書局得懸數珠自此始也一日戶部奏賦役全書所載雜項錢糧名目煩多請并入地丁項下內閣已票擬依議矣長明言於劉文正公統勳曰雜項旣經折色卽爲正供若并去其名目異日如薪紅茶藥之類更有需用必復加徵是重困民也劉公曰不圖後生有此讜論卽令駁止之因薦入軍機處行走傅文忠公恆

亦器重之。樞廷有重難事，輒委決焉。嘗扈蹕木蘭，大雪中失橐駝，并所裝物求之不獲。越一日，一人牽駝而至，且謝罪。問之，乃故軍機蘇拉緣事遣配者。問何以知爲吾物？曰：軍機官披羊裘者，獨公一人。今篋無它裘，非公而誰？問既竊何以復還？曰：恐公寒耳。勞以錢而遣之上。嘗問軍機章京中人才可用者，傅公對曰：人才可用者多，若有守有爲，可繼胡寶瑔者，嚴長明一人耳。長明內直日久，諳悉典故，尤務持平允。雲南糧儲道羅源浩虧銅廠銀萬一千兩，又分賠屬員汪大鏞銀一千兩，有旨加罰十倍，以一年爲限。逾限卽正法。羅已納正項十有一萬矣，仍有分賠六萬未完，而限垂滿。羅呈乞展限，詔下軍機大臣與刑部查辦。時劉文正公掌刑部方主會試，入闈諸公相視莫能決。適有行在宣諭軍機大臣事長明，卽詣貢院，搘鼓求見。劉公宣諭畢，因從容曰：「羅觀察之限已迫，俟公出闈，恐無及矣。其所欠者，分賠屬員之項，昨見吏部檔，汪大鏞捐復赴補直隸屬員，既邀寬釋，且得官，而上司乃坐極刑，可乎？」卽於袖中出請寬限稿，求畫押。劉公義而許之。長明出以示諸公，列銜會奏果奉愈旨。令汪大鏞分繳欠項，而羅得出獄矣。擢內閣侍讀，歷充通鑑輯覽一統志、熱河志纂脩官。長明於蒙古托忒唐古特文字，一見便能通曉。嘗奉命直經呪館，更正繙釋名義。蒙古源流諸書，書成輒進秩焉。以父憂去官，尋丁母憂，哀毀過禮，免喪後，引疾不出。築室三楹，顏曰「歸求艸堂」。藏書三萬卷，金石文字三千卷。日吟咏其中，海內求詩文者，踵相接。從容應之，無倦色。嘗語學者曰：「士不周覽古今載籍，不偏交海內賢俊，不知當代典章，遽欲握筆撰述，縱使信今，亦

難傳後其自命如此畢中丞沅巡撫陝西招至官齋爲文字交因得游太華終南之勝詩文益奇縱所得
金石刻益富在秦中十載撰次西安府志八十卷漢中府志四十卷皆詳贍有法晚歲爲廬江書院院長
卒年五十七生平著述有歸求艸堂詩文集西清備對毛詩地理疏證五經算術補正三經答問三史荅
問淮南天文太陰解文選課讀文選聲類尊聞錄獻徵餘錄知白齋金石類籤金石文字跋尾石經攷異
漢金石例五岳貞珉攷五陵金石志平原石蹟表吳興石蹟表素靈發伏墨緣小錄南宋文鑑奇觚類聚
八表停雲錄養生家言懷袖集吳諧志凡二十餘種子觀晉皆以讀書世其家論曰予友曹學士仁虎有
言政事可以文飾惟文學不可假借風節或激於一時而成惟文學非積久不能致予與侍讀交廿餘年
聽其議論經緯古今混混不竭可謂閥覽博物文學之宗矣同歲召詔得官者欵程晉芳魚門上海趙文
哲損之長洲吳泰來企晉上海陸錫熊健男彬彬爾雅皆述作之選盛矣哉

潛研堂文集卷二十八

傳二

嚴先生衍傳

嚴先生衍字永思嘉定人明萬歷中補縣學生與李流芳龔方中友善時邑中諸名宿皆以詩文自名先生獨專心古學恥以詞華炫世年四十有一讀司馬溫公資治通鑑而好之晨夕探索至忘寢食又以溫公著書意在資治故朝章國政述之獨詳而家乘世譜紀之或略其於人也顯榮者多而遺逸則略方正者多而節俠則略丈夫者多而婦女則略乃援引正史及它書以補之或補爲正文或補爲分注其補正文之例有二有通鑑所已載而事或闕而不周文或簡而不暢則逐節補之有通鑑所未載而事有關於家國言有係於勸懲則特筆補之其補分注之例有三一曰附錄事雖可采而或涉於瑣或近於幻故不以入正文一曰備攷通鑑之所載如此它書之所載如彼雖兩不相合而事屬可疑故兩存之一曰補注胡身之注所未備或有譌舛則以己意釋之其所取材則十七史居十之九稗官野史居十之一而要以法戒爲主其有關勸懲雖小史必錄苟無所取義雖正史亦刪要使學者欲攷興亡則觀政於朝欲知淳

薄則觀風於野。欲樹宏猷。則法古人之大道。欲修細行。則拾往哲之餘芳。人無隱顯。道在者爲師。行無平奇。濟物者爲尙。蓋其自序如此。又謂周社雖滅。秦命未膺。昭襄雖強。不當遽以紀年。朱梁石晉之惡浮於黃巢。周雖彼善於此。然北漢未亡。柴氏豈得臣之。故於周赧入秦之後。改稱前列國。五季迭興之世。改稱後列國。進蜀漢於正統。黜武氏爲附載。此又取紫陽綱目之義。以彌縫本書之闕者也。當時無通史學者。咸笑以爲迂。唯黃淳耀歎以爲絕倫。而談允厚爲之參校史傳。攷訂遺漏。先生嘗謂允厚曰。人之聰明百倍於我者有之。才學千倍於我者有之。而不能成此書者。不如我之一也。子之一不如我。而聰明過我。我所以不可無子也。書成。允厚爲之序。且擿通鑑違失若干事。謂日食。地震。水旱。蝗饑。郊天祀廟。行幸。還宮。命相。封王。皆通鑑所慎重而書者也。而漢以前缺者十之一。漢以後缺者十之三。宋孝武大明五年初立馳道。自閭闔門至朱雀門。又自承明門至元武門。所謂南北兩馳道也。及孝武崩。乃罷之。而通鑑但書罷。不書立。是爲無首。李憲據淮南稱帝。光武遣揚武將軍馬成擊之。圍憲於舒。建武六年。馬成拔舒。憲亡走。其軍士帛意斬憲而降。封帛意爲漁浦侯。通鑑於馬成拔舒。帛意斬憲事。闕而不書。是爲無尾。禿髮傉檀爲乞伏熾磐所滅。虜其太子虎臺。以虎臺妹爲后。其後熾磐后與虎臺謀殺熾磐。事露皆見殺。通鑑於晉義熙十年。已預書熾磐殺虎臺。至宋景平元年。又詳書之。豆盧欽望爲文昌右相。本在聖歷二年八月。而通鑑於神功元年八月。聖歷二年八月兩書之。其罷爲太子賓客。本在久視元年二月。而通鑑於聖歷元

年二月久視元年二月兩書之聖歷元年十一月始置控鶴監吉頃與張易之張昌宗皆爲控鶴監供奉而通鑑於是年三月便書頃與二張同爲控鶴監供奉失其序矣晉永和三年趙麻秋攻枹罕寧戎校尉張璩固守大城太元元年苻堅伐涼州張天錫遣征東將軍掌據率衆三萬軍於洪池攷十六國春秋與晉書載記此二事本是一人之事但載記作張璩十六國春秋作常據通鑑先書張璩後書常據而又譌常爲掌名與姓俱歧矣毛寶子穆之小字虎生而通鑑於建元二年書穆之寶之子於太和四年書虎生寶之子前稱名後稱字宋武陵王贊小字智隨而通鑑於泰始六年書智隨其後又書贊名與字相歧矣晉咸和八年書慕容皝遣庶弟建武將軍幼稚討母弟仁於平郭兵敗幼稚爲仁所獲至咸康二年仁敗則云慕容幼慕容稚皆東走幼中道而還是分一人爲二人晉元興二年姚興遣使者梁斐張構使沮渠蒙遜而通鑑書秦遣使梁構至張掖是合二人爲一人宋元嘉七年魏人攻拔虎牢司州刺史尹沖死之而通鑑謂沖與滎陽太守崔模降魏且爲攷異以申之謂崔模仕魏爲武陵男宋書謂抗節者誤夫宋書以模爲抗節誠誤至尹沖之死則宋魏史有同辭奈何因模而併誣冲乎唐中宗崩遺詔使相王旦輔政韋溫與宗楚客欲韋后臨朝議削相王輔政之語蘇瓌正色拒之曰遺詔是先帝意安可更改溫楚客大怒竟削之瓌遂稱疾不朝故睿宗卽位下詔褒稱之曰頃者遺恩顧託先意昭明姦回動搖內外危逼獨申讒議實挫邪謀此瓌不從韋宗之證也通鑑削去稱疾不朝四字改云懼而從之何其冤也又如張

紘還吳迎家道病卒。當在建安十七年孫權徙治建業以後而通鑑系於黃龍元年徙都建業之下亦爲失次。梁大寶元年二月至四月紀日干支顛倒且有一月而再書丙午者是不若紫陽氏盡去之之爲愈矣。其譏胡注之誤如晉孝武嗜酒流連內殿醒日既少通鑑譌作醒治而注卽云醒而治事之日少是不考晉本紀也。北齊幼主禪位於任城王湝自稱守國天王通鑑譌守國爲宋國而注云齊猶未亡不應遽改國號宋當是宗國是不考北齊書也。周宣帝問鄭譯曰我脚杖痕誰所爲也。譯曰事由烏丸軌宇文孝伯因言軌捋鬚事胡誤以事由烏丸軌爲句宇文孝伯屬下讀因注云孝伯何出此言是誣孝伯也。先生與允厚於史學皆實事求是不肯妄下雌黃其所辯正皆確乎不可易。宋季元明儒家好讀綱目如尹起莘劉友益王幼學徐昭文輩皆淺陋迂腐雖附綱目以傳轉爲本書之累其有功於通鑑者胡身之而後僅見此書耳。

閻先生若璩傳

先生諱若璩字百詩先世居太原縣西塞邨五世祖始居淮安。祖世科萬歷甲辰進士布政司參議父修齡郡學生先生少口吃入小學讀書千遍猶未熟同輩咸歎其鈍年十五冬夜讀書有所礙憤悱不肯寐漏四下寒甚堅臥沈思心忽開朗自是穎悟異常是歲補學官弟子一時名士如李太虛方爾止王于一杜于皇輩皆折輩行與交摯究經史深造自得嘗集陶貞白皇甫士安語題其柱云一物不知以爲深恥。

遭人而問少有寧日其立志如此年二十讀尙書至古文二十五篇卽疑其僞沈潛三十餘年乃盡得其癥結所在作尙書古文疏證八卷其最精者謂漢藝文志言魯共王壞孔子宅得古文尙書孔安國以考二十九篇得多十六篇楚元王傳亦云逸書十六篇天漢之後孔安國獻之古文篇數之見於西漢者如此而梅賾所上乃增多二十五篇此篇數之不合也杜林馬鄭皆傳古文者據鄭氏說則增多者舜典汨作九共大禹謨益稷五子之歌胤征典寶湯誥咸有一德伊訓肆命原命武成旅獒問命凡十六篇而九共有九篇故亦稱二十四篇今晚出書無汨作九共典寶等此篇名之不合也鄭康成注書序於仲虺之誥太甲說命微子之命蔡仲之命周官君陳畢命君牙皆注曰亡而於汨作九共典寶肆命等皆注曰逸逸者卽孔壁書也康成雖云受書於張恭祖然其書贊曰我先師棘下生子安國亦好此學則其淵源於安國明矣今晚出書與鄭名目互異其果安國之舊耶又云古文傳自孔氏後惟鄭康成所注者得其真今文傳自伏生後惟蔡邕石經所勒者得其正今晚出書昧谷鄭作柳谷心腹腎腸鄭作憂腎陽劓刑剗剗鄭作臠宮劓割頭庶剗與真古文旣不同矣石經殘碑遺字見於洪造隸釋者五百四十七字以今孔書校之不同者甚多碑云高宗之饗國百年與今書之五十有九年異孔敍三宗以年多少爲先後碑則以傳序爲次則與今文又不同然後知晚出之書蓋不古不今非伏非孔而欲別爲一家之學者也班孟堅言司馬遷從安國問故堯典禹貢洪範微子金縢諸篇多古文說許慎說文解字亦云其稱書孔氏

今以史記說文與晚出書相校又甚不合安國注論語子小子履以爲墨子引湯誓其辭若此不云此出湯誥亦不云與湯誥小異然則予小子履云云非真古文湯誥蓋斷斷也其注雖有周親不如仁人句於論語則云親而不賢不忠則誅之管蔡是也仁人謂箕子微子來則用之於尙書則云周至也言紂至親雖多不如周家之少仁人其詮釋相懸絕如此此豈一人之手筆乎又云古未有夷族之刑卽苗民之虐亦祇肉刑止爾有之自秦文公始僞作古文者偶見荀子有亂世以族論罪以世舉賢之語遂竄之泰誓篇中無論紂惡不如是甚而輕加三代以上以慘酷不德之刑何其不仁也荀卿曰誥誓不及五帝司馬法言有虞氏戒於國中夏后氏誓於軍中殷誓於軍門之外周將交刃而誓之當虞舜在上禹縱征有苗安得有會羣后誓師之事此亦不足信也司馬法曰入罪人之地見其老弱奉歸無傷雖遇壯者不校勿敵敵若傷之藥醫歸之三代之用兵以仁爲本如此安得有火炎崑崙玉石俱焚之事旣讀陳琳檄吳文云大兵一放玉石俱碎鍾會檄蜀文云大兵一發玉石俱碎乃知其時自有此等語則此書之出魏晉間又一佐也又云武成篇先書一月壬辰次癸巳又次戊午已是月之二十八日復繼以癸亥甲子是爲二月之四日五日而不冠以二月非今文書法也洛誥稱乙卯費誓兩稱甲戌此周公伯禽口中之詞指此日有此事云爾豈史家紀事之例乎又云書序益稷本名棄稷馬鄭王三家本皆然蓋別是一篇中多載后稷與契之言揚子雲法言孝至篇云言合稷契之謂忠謨合臯陶之謂嘉子雲親見古文故有此言晚

出書析臯陶謨之半爲益稷則稷與契初無一言子雲豈鑿空者邪其辯孔傳之僞云三江入海未嘗入震澤孔謂江自彭蠡分而爲三共入震澤者謬也金城郡昭帝所置安國卒於武帝時而傳稱積石山在金城西南豈非後人作僞之證乎傳義多與王肅注同乃孔竊王非先有孔說而王取之也漢儒說六宗者人人各異魏明帝詔令王肅議肅乃取家語孔子曰所宗者六以對肅以前未聞也而僞傳已有之非孔竊王而何康熙元年始游京師尙書龔公鼎孳爲之延譽由是知名旋改歸太原故籍爲諸生祭酒崑山顧先生炎武游太原以所撰日知錄相質卽爲改訂數條顧虛心從之十七年應博學宏詞科試不第在都門與汪編修琬交汪著五服考異成先生糾其謬數條汪意不懌謂人曰百詩有親在而喋喋言喪禮可乎先生應之曰王伯厚嘗云夏侯勝善說禮服謂禮之喪服也蕭何之以禮服授皇太子則漢世不以喪服爲諱也唐之姦臣以凶事非臣子所宜言去國恤一篇識者非之講經之家豈可拾其餘唾乎徐尚書乾學因問於經亦有徵乎先生曰按雜記曾申問於曾子曰哭父母有常聲乎申曾子次子也檀弓子張死曾子有母之喪齊衰而往哭之夫孔子歿子張尙存見於孟子子張死而曾子方喪母則孔子時曾子母在可知記所載曾子問一篇正其親在時也徐大歎服卽邀至邸延爲上客每詩文成必屬裁定曰閻先生學有師法非吳志伊輩可望合肥李公天馥亦言詩文不經百詩勘定未可輕易示人及徐公奉敕修一統志開局洞庭山旣又移嘉善復歸崑山先生皆預其事先生於地理尤精審凡山川形勢州

郡沿革瞭若指掌。嘗曰：孟子言讀書當論其世。予謂并當論其地。少讀孟子書，疑滕定公薨使然，友之鄒問孟子何緩不及事，及長大親歷其地，乃知故滕國城，在今縣西南十五里。故邾城，在今鄒縣東南二十六里，相去僅百里。故朝發而夕至，朝見孟子而暮卽反命也。因撰四書釋地四卷，釋地餘論若干篇，又據孟子七篇參以史記諸書，作孟子生卒年月考一卷。嘗言孔門從祀顏曾之外，當廣爲十二哲德行三人。閔子騫、冉伯牛、仲弓言語三人，宰我、子貢有若政事三人，冉有、季路、公西華文學三人，子游、子夏、子張以論語孟子證之，確不可易。又謂先儒以大學傳文出於曾氏門人之手，但見誠意章引曾子說，謂古者弟子謂其師，若謂大學止一引與它篇屢引者不同，則禮器內則亦止一引，豈二篇亦曾子門人作乎？孟子七篇於孔門高弟或名之，或字之，或子之，而稱曾子者二十二，益驗其爲通稱也。又言檀弓載季武子之喪，曾點倚其門而歌一事，爲記者之妄。春秋昭公七年，季孫宿卒，孔子年十七，曾點少孔子若干歲，雖不可知。然論語叙其侍坐次于子路，則必少於子路矣。孔子年十七時，子路甫八歲，點不過六七歲童子。烏有倚國相之門，臨喪而歌之事乎？又嘗舉朱氏論語孟子集注之誤，如季文子始專魯政，不待武子，子糾兄而非弟，曾西子而非孫，武丁至紂凡九世，而非七世。昭陽敗魏，取八邑而非七邑。不衣冠而處見說苑，非家語。農家者流見漢書，非史遷去魯司寇，則適衛而非適齊，滅夏后相，則寒浞而非羿。敬叔弟也，非懿。

子之兄顥曳近也。非遠人之謂。魯有少施氏。則孟施當亦其氏。不當以施爲語聲。聞者歎其精確。世宗皇帝在潛邸。聞其名。手書延至京師。握手賜坐。呼先生而不名。日索觀所著書。每進一篇。未嘗不稱善。疾革。請移就外。留之不可。乃以大牀爲輿。上施青紗帳。二十人舁之出。安穩如牀簧。不覺其行也。卒年六十有九。時康熙四十三年六月八日。世宗遣使經紀其喪。親製挽詩四章。復爲文祭之。有云。讀書等身。一字無假。孔思周情。旨深言大。僉謂非先生不能當也。平生長於考證。遇有疑義。反覆窮究。必得其解乃已。嘗語弟子曰。曩在徐尙書邸。夜飲公云。今晨直起居。注上問古人言。使功不如使過。此語自有出處。當時不能答。予舉宋陳良時有使功不如使過論。篇中言秦伯用孟明事。但不知此語出何書耳。越十五年。讀唐書李靖傳。高祖以靖逗留詔斬之。許紹爲請而免。後率兵破開州蠻。俘禽五千。帝謂左右曰。使功不如使過。果然。謂卽出此。又越五年。讀後漢書。獨行傳。索盧放諫。更始使者勿斬大守曰。夫使功者不如使過。章懷注。若秦穆公赦孟明而用之。霸西戎。乃知全出於此。甚矣。學問之無窮。而人尤不可以無年也。子詠亦能文。

胡先生渭傳

先生諱渭。初名渭生。字朏明。世爲德清人。曾祖友信。明隆慶戊辰進士。廣東順德縣知縣。所謂思泉先生也。父公角。天啓甲子舉人。先生年十二而孤。母沈攜之避寇山谷間。十五爲縣學生。試高等。充增廣額。屢

赴行省試不得售乃入太學嘗館益都馮相國邸篤志經義尤精於輿地之學崑山徐尙書乾學奉詔修一統志開局洞庭山延請常熟黃儀子鴻無錫顧祖禹景范山陽閻若璩百詩及先生分纂因同縱觀天下郡國之書先生素習禹貢謂漢唐二孔氏宋蔡氏於地理多疏舛如三江當主鄭康成說庾仲初之言不可以釋禹貢浮于淮泗達于河河當从說文作澣滎波既豬波當从鄭康成本作播梁州之黑水與導川之黑水不可溷而爲一乃博稽載籍及古今經解考其同異而折衷之依經爲訓章別句從名曰禹貢錐指凡二十卷爲圖四十七篇於九州山川形勢及古今郡國分合同異道里遠近夷險犖然若聚米而畫沙也漢唐以來河道遷徙雖非禹貢之舊要爲民生國計所繫故於導河一章備考歷代決溢改流之跡且爲圖以表之其留心經濟異於迂儒不通時務者遠矣嘗謂詩書禮春秋皆不可無圖惟易無所用圖六十四卦二體六爻之畫卽其圖也八卦之次序方位則乾坤三索出震齊巽二章盡之矣安得有先天後天之別河圖之象自古無傳何從擬議洛書之文見於洪範五行九宮初不爲易而設作易圖明辨十卷又言洪範古聖所傳漢儒專主災異以瞽史矯誣之說亂彝倫攸敍之經害一洛書之本文具在洪範宋儒狃爲黑白之點方員之體九十之位且謂範之理通於易劉牧以九爲河圖十爲洛書蔡元定兩易其名害二洪範元無錯簡後儒任意改竄移庶徵王省惟歲以下爲五紀之傳移皇極斂時五福至作汝用咎及三德惟辟作福以下爲五福六極之傳害三作洪範正論五卷又作大學翼真七卷言格物致知

之義釋在邦畿章內本無闕文無待於補皆卓然有得非異趣以爲高者康熙四十三年聖祖仁皇帝南巡先生撰平成頌一篇并禹貢錐指獻諸行在有詔嘉獎召至南書房直廬賜饌御書耆年篤學四大字賜之儒者咸以爲榮甲午歲正月九日卒於家年八十有二從子會恩從先生學由進士及第官至刑部尚書孫彥穎翰林院編修

萬先生斯同傳

萬先生斯同字季野鄞人高祖表明都督同知父泰明崇禎丙子舉人鼎革後以經史分授諸子各名家先生其少子也生而異敏讀書過目不忘八歲在客座中背誦揚子法言終篇不失一字年十四五取家所藏書偏讀之皆得其大意餘姚黃太沖寓甬上先生與兄斯大皆師事之得聞蕺山劉氏之學以慎獨爲主以聖賢爲必可及是時甬上有五經會先生年最少遇有疑義輒片言析之束髮未嘗爲時文專意古學博通諸史尤熟於明代掌故自洪武至天啓實錄督能闡誦尚書徐公乾學聞其名招致之其撰讀禮通考先生預參定焉會詔修明史大學士徐公元文爲總裁欲薦入史局先生力辭乃延主其家以刊修委之元文罷繼之者大學士張公玉書陳公廷敬尚書王公鴻緒皆延請先生有加禮先生素以明史自任又病唐以後設局分修之失嘗曰昔遷固才旣傑出又承父學故事信而言文其後專家之書才雖不逮猶未至如官修者之雜亂也譬如入人之室始而周其堂寢匱匱繼而知其蓄產禮俗久之其男

女少長性質剛柔重賢愚無不督察然後可制其家之事若官修之史倉卒而成於衆人不暇擇其材之宜與事之習是猶招市人而與謀室中之事也吾所以辭史局而就館總裁所者惟恐衆人分操割裂使一代治亂賢姦之迹暗昧而不明耳又曰史之難言久矣非事信而言文其傳不顯李翺曾鞏所譏魏晉以後賢姦事迹暗昧而不明由無遷固之文是也而在今則事之信尤難蓋俗之偷久矣好惡因心而毀譽隨之一家之事言者三人而其傳各異矣況數百年之久乎言語可曲附而成事迹可鑿空而構其傳而播之者未必皆直道之行也其聞而書之者未心有裁別之識也非論其世知其人而具見其表裏則吾以爲信而人受其枉者多矣吾少館於某氏其家有列朝實錄吾讀而詳識之長游四方就故家長老求遺書考問往事旁及郡志邑乘雜家誌傳之文靡不網羅參伍而要以實錄爲指歸蓋實錄者直載其事與言而無所增飾者也因其世以考其事覈其言而平心察之則其人之本末十得其八九矣然言之發或有所由事之端或有所起而其流或有所激則非它書不能具也凡實錄之難詳者吾以它書證之它書之誣且濫者吾以所得於實錄者裁之雖不敢謂具可信而是非之枉于人者鮮矣昔人于宋史已病其繁蕪而吾所述將倍焉非不知簡之爲貴也吾恐後之人務博而不知所裁故先爲之極使知吾所取者有可損而所不取者必非其事與言之眞而不可益也建文一朝無實錄野史因有遜國出亡之說後人多信之先生直斷之曰紫禁城無水關無可出之理鬼門亦無其地成祖實錄稱建文闔宮自焚

上望見宮中煙起急遣中使往救至已不及中使出其屍于火中還白上所謂中使者乃成祖之內監也安肯以后屍誑其主而清宮之日中涓嬪御爲建文所屬意者逐一毒考苟無自焚實據豈肯不行大索之令耶且建文登極二三年削奪親藩曾無寬假以至燕王稱兵犯闕逼迫自殞即使出亡亦是勢窮力盡謂之遜國可乎由是建文之書法遂定在都門十餘年士大夫就問無虛日每月兩三會聽講者常數十人於前史體例貫穿精熟指陳得失皆中肯綮劉知幾鄭樵諸人不能及也馬班史皆有表而後漢三國以下無之劉知幾謂得之不爲益失之不爲損先生則曰史之有表所以通紀傳之窮有其人已入紀傳而表之者有未入紀傳而牽連以表之者表立而後紀傳之文可省故表不可廢讀史而不讀表非深于史者也康熙壬午四月卒年六十所著歷代史表六十卷紀元彙考四卷廟制圖考四卷儒林宗派八卷石經考二卷皆刊行又有周正彙考八卷歷代宰輔彙考八卷宋季忠義錄十六卷六陵遺事一卷庚申君遺事一卷羣書疑辨十二卷書學彙編二十二卷崑崙河源考二卷河渠考十二卷石園詩文集二十卷予皆未見也乾隆初大學士張公廷玉等奉詔刊定明史以王公鴻緒史稿爲本而增損之王氏稿大半出先生手也

陳先生祖范傳

陳先生祖范字亦韓自號見復常熟人少習舉業有師法年廿三補縣學生歲科試輒占高等弟子著錄

者日衆。雍正元年黃侍郎叔琳典試江南中式皆一時名士。先生與嘉定張公鵬翀宜興任公啓運當塗徐公文靖才尤高試文傳誦徧海內其秋試禮部中式鄉先達有欲翼而起之者忽足蹇不得預殿試歸里明年補行正科當赴廷對親朋皆力勸之先生曰吾少無溫飽之心徒勞苦笑爲者及今尙可止過此則義不當止勢又不得自止矣於是僦廬華匯之濱棟戶讀書生徒裹糧相從與吟社諸老倡和月一讌集居數年有詔天下設書院以教士諸大吏聞先生通儒爭先延請爲師先生勉應之在蘇州紫陽書院三年訓課有法士子至今思之又主徐州之雲龍安慶之敬敷揚州之安定或一年或二年輒辭去曰士習難醇師道難立且此席似宋時祠祿仕而不遂者處焉吾不求仕而久與其列爲汗顏耳乾隆十五年天子崇尚經術特詔內外大臣薦舉經明行修之士於是雅知先生者交章列薦明年上命閣部大臣於所舉中核其名實允孚者得四人先生襯然居首其三人則無錫顧棟高金匱吳鼎介休梁錫璵也得旨皆授國子監司業先生與顧公以年老不任職卽家拜受新命朝野咸以爲異數云又三年卒於家年七十有九所撰述有經咫一卷文集四卷詩集四卷掌錄二卷先生於學務求心得不喜馳騁其說與古人爭勝尤恥勦襲成言以爲已有蓋合於論語之君子儒焉其論易不取先天之學謂易本隱以之顯學易者務含顯而求隱未求文字先觀圖象且帝出乎震一節方位顯然以數往知來爲先天圖之注脚未免牽合儒者於經所無則信之於經所明言則疑之何也論詩謂朱子不信小序是其謹慎處亦卽其師心

自用處詩之體格古今不同作詩之故亦古今不同古時君民朝野不若後代之闊絕指陳時事譏切宮闈不若後代之忌諱朱子以後代詩人之習上觀三百篇故於小序覺其迂闊牽強而難信也謂論語賢賢易色主夫婦而言賢賢如關雎之窈窕淑女君子好逑車轣之辰彼碩女令德來教好德非好色故云易色也造端夫婦道理甚大若賢人之賢交友一倫已包之矣又言世俗有非禮之禮三承重也繼嗣也葬服也古者人子有爲父後不爲父後之分漢時詔令尚云賜爲父後者爵一級爲後者承爵祿奉宗祀而傳之以重者也應爲後之子亡則適孫承之而謂之承重今士大夫不世爵旣無重可傳而漫於喪訃立長孫承重之條遂駕名諸父之前禮果然乎哉古之爲人後者後其繼別之宗耳宗不可絕是以後之若餘人無子不皆立後其資財入宗子之家以宗子祭無後故也自宗法廢而收族之道亡資財無所入勢必立其近屬以奉祭祀然風俗澆薄無資財者委而去之稍有絲粟之貽卽攘臂而爭此禮所稱與爲人後者與資軍之將亡國之大夫同其可恥者也古之葬有常期過期而不能葬則主喪者不除唯改葬則總者不可以無服送至親也今葬無常期遠者至一二十年爲子者不能守未葬不除之禮卽吉已久忽焉返其初喪之服而葬是以僞事其親也喪事有進無退而如此不亦舛乎必不得已假用改葬之總事畢而除之或亦亡於禮者之禮也或問祖父母之喪父爲長子旣服之矣未及葬而父死及其葬也嫡孫承重可乎先生曰古無除喪而後葬者故有改葬之服而無葬服無葬服又安得有爲葬而承重之服

且承重云者承先祖之重而爲之重服也假使前已承重於居喪之時今沿承重之名以葬可也若未承重於居喪之日忽承重於除喪後之葬於實既不符且沒其父之曾居父母喪也尤不可也又問甲爲庶出旣貴封其母後甲而亡甲之子議所服或曰宜如父在爲祖父母期或曰宜如父歿嫡長孫爲祖父母服重二者安從答曰禮時爲大古人嚴厭降之義生母服最輕禮失而母以子貴遂僭而並嫡至明太祖之制極矣然至今承用之此時也若論禮之大常雖服期已失厭降之義若論居喪者之自處則有因時爲宜稱者矣父而存爲其母斬衰三年明以來之時制也父歿而用適長孫爲祖父母服重之制於律雖無明文亦無明禁體其父之隱而爲之服重於心亦甚安觀過知仁君子當憐而予之必格以嫡庶之分斥爲不諱試思身爲庶子旣不可卑其母身爲庶子之子又可卑其父之母乎又與人論史記謂班孟堅譏子長先黃老而後六經此子長述其父說則然其所撰五帝本紀贊首推尚書列傳開端云載籍極博猶考信于六藝可謂之後六經乎列老子於申韓而進孔子爲世家稱老子不過云古之隱者而於孔子曰可謂至聖矣至聖之稱至今用爲廟號匹夫而躋世家卽世世襲封之兆也弟子七十餘人合爲一傳卽堂廡從祀之端也以孟荀表諸子又隱然以孟子爲主韓退之荀孟醇疵之辯子長已有先覺竊謂孔氏之道得子長而始定一尊雖從祀廟庭亦不爲過而班氏譏之雖代父受過子長不辭然不能不爲之表白也同縣王侍御峻顧主事鎮孫主事夢達湯進士愈先後游其門皆知名

惠先生士奇傳

惠先生士奇字天牧一字仲孺世居吳縣東渚邨祖有聲明末以諸生貢入太學里居著書以九經訓子弟父周惕始遷居葑門之香水溪登康熙辛未進士選翰林院庶吉士改密雲縣知縣先生之生也父夢貴人來謁視其刺乃東里楊文貞公遂以文貞名之年十二能詩有柳未成陰夕照多之句大爲先輩激賞弱冠爲諸生不就省試或問之則曰胸中無書焉用試爲於是奮志讀書晨夕不輟遂博通六藝九經經文國語戰國策楚辭史記漢書三國志皆能闡誦嘗與名流會坐中有客前請曰聞君熟于史漢試爲誦封禪書先生朗誦終篇不失一字合坐皆歎服戊子舉鄉試第一明年成進士選庶吉士散館授翰林院編修癸巳乙未會試再充同考官聖祖嘗問廷臣誰工作賦者閣學蔣公廷錫以華亭王公頊齡仁和湯公右曾及先生三人名對其後湯公掌翰林事詞臣擬撰文字皆送先生改定然後進呈己亥正月太皇太后升祔禮成特命祭告炎帝陵舜陵故事祭告使臣學士以上乃得開列先生以編修與焉洵異數也庚子秋主湖廣鄉試得夏力恕等九十九人多知名士其冬復奉督學廣東之命下車日焚香設誓不妄取一文不妄徇一情頒條教以通經爲先士子能背誦五經背寫三禮左傳者諸生食廩餼童子青其衿嘗言漢時蜀郡僻陋有蠻夷風文翁爲蜀守選子弟就學遣雋士張寬等東受七經還以教授其後司馬相如王褒嚴遵揚雄相繼而起文章冠天下漢之蜀猶今之粵也於是毅然以經學倡三年之後通

經者漸多文體爲之一變。世宗御極復命留任三年。粵士皆鳬踊雀躍爭棄免園冊專事經籍而通經者愈多。其爲文章郁郁莘莘比於江浙矣。又謂今之校官古博士也。博士明於古今通達國體。今校官無博士之才。弟子何所效法。訪諸輿論得海陽進士翁廷資者。卽其疏題補韶州府教授。將以誘進多士。吏部以學臣向無題補官員之例。格不行奉旨。惠士奇居官聲名好。所舉之人諒非徇私。著照所請補授。後不爲例。在任遷右春坊右中允。超擢侍講學士。轉侍讀學士。任滿還都。送行者如堵牆。旣去。粵人尸祝之。設木主配食先賢。潮州于昌黎祠。惠州于東坡祠。廣州于三賢祠。每元旦及生辰。諸生成肅衣冠入拜。其得士心如此。丙午冬還朝。丁未五月奉旨修理鎮江城。卽束裝赴工所。棄產興役。所修不及二十分之一。以產盡停工罷官。今天子卽位。有旨調取來京。引見以講讀用。所欠修城銀兩得寬免。丁巳六月補侍讀時已垂老耳。漸聾。己未春以病告歸。辛酉三月卒。年七十有一。先生盛年兼治經史。晚歲尤邃於經學。撰易說六卷。禮說十四卷。春秋說十五卷。其論易曰。易始于伏羲。盛于文王。大備於孔子。而其說猶存於漢。不明孔子之易。不足與言。文王之易不足與言。伏羲舍文王孔子之易。而遠問庖犧。吾不知之矣。漢儒言易。孟喜以卦氣。京房以適變。荀爽以升降。鄭康成以爻辰。虞翻以納甲。其說不同。而指歸則一。皆不可廢。今所傳之易。出自費直。費氏本古文。王弼盡改爲俗書。又創爲虛象之說。遂舉漢易而空之。而古學亡矣。易者象也。聖人觀象而繫辭。君子觀象而玩辭。六十四卦皆實象。安得虛哉。其論春秋曰。春秋三

傳事莫詳於左氏。論莫正於穀梁。韓宣子見魯春秋曰：周禮盡在魯矣。然則春秋本周禮以記事也。左氏褒貶皆春秋諸儒之論。故紀事皆實而論或未公。公羊不信國史。惟篤信其師說。師所未言。則以意逆之。故所失常多。要之左氏得諸國史。公穀得之師承。雖互有得失。不可偏廢。後世有王通者。好爲大言。以欺人。乃曰三傳作而春秋散。於是啖助趙匡之徒。爭攻三傳。以伸其異說。夫春秋無左傳。則二百四十年。盲焉如坐闇室之中矣。公穀二家。卽七十子之徒。所傳之大義也。後之學者。當信而好之。擇其善而從之。若徒據孟子盡信書。則不如無書之說。力排而痛詆之。吾恐三傳廢。而春秋亦隨之而亡也。左氏最有功於春秋。公穀有功兼有過。學者信其所必不可信。疑其所必無可疑。惑之甚者也。其論周禮曰：禮經出於屋壁。多古字古音。經之義存乎訓。識字審音。乃知其義。故古訓不可改也。康成注經。皆從古讀。蓋字有音義。相近而譌者。故讀從之後世不學。遂謂康成好改字。豈其然乎。康成三禮。何休公羊。多引漢法。以其去古未遠。故借以爲況。賈公彥於鄭注。如飛矛扶蘇薄借綦之類。皆不能疏。所讀之字。亦不能疏。輒曰從俗讀。甚違不知蓋闕之義。夫漢遠於周。而唐又遠於漢。宜其說之不能盡通也。況宋以後乎。周秦諸子。其文雖不盡雅馴。然皆可引爲禮經之證。以其近古也。幼時讀廿一史。於天文樂律二志。未盡通曉。及官翰林。因新法究推步之原。著交食舉隅二卷。言測日食者。先求食限。食限必在兩交。去交近則食遠。則否。有入食限而不食者。未有不入食限而食者也。古法不能定朔。故日食或在晦。說者謂日之食晦朔之間。月之食。

惟在望此知二五而不知十也。日月有平行有實行有視行。日月之食亦有實食有視食。實食者日月在天相掩之實度。視食者人在地所見之初虧食甚復圓也。古術或知求實行莫知求視行。皆知求平朔莫知求實朔。故不能定朔者以此。七政有高卑。故有恆星天。有五星天。有日天。有月天。古人以恆星最高。遂指恆星爲天體。新法於恆星天之外。又有宗動天。合於九重之數。宗動者七政之所同宗也。沈括謂日月星辰之行不相觸者氣而已。此不知歷象者也。如日月有氣而無體。則月焉能掩日哉。日高而月下。五星亦有高下。高下既殊。又焉能相觸乎。春秋日有食之既。既者有繼之辭。非盡也。新法謂之金錢食。日大月小。月不能盡掩日光。故全食之時。其中闕然而光溢於外。狀若金錢也。又撰琴鑑理數考四卷。其略云。十二律黃鐘至小呂爲陽。蕤賓至應鐘爲陰。陽用正而陰用倍。蕤賓長小呂短。黃鐘中自古相傳之舊法也。晉永嘉之亂。有司失傳。梁武帝始改舊法。黃鐘長應鐘短。小呂中。由是陽正陰倍之法絕。漢魏律鑑小呂一均之下。徵調黃鐘爲宮。有小呂無蕤賓。故假用小呂爲變徵。黃鐘鑑之黃鐘宮爲正宮。小呂鑑之黃鐘宮爲下宮。徵最小而以爲宮。故爲下宮。隋鄭譯遂以黃鐘正宮當之。擅去小呂。用蕤賓以附會先儒宮濁羽清之說。夫宮濁羽清者。指下徵調而言。譯改爲正宮。是以歷代之樂。皆患聲高。隋唐以來。惟奏黃鐘一均。而旋宮之法廢矣。古法盡亡。獨存于琴鑑孔疏密取則琴暉。琴之十二律。起於中暉。鑑之七音。生於宮孔。黃鐘鑑從宮孔。黃鐘始一上一下。終於蕤賓。琴自中暉黃鐘始一左一右。終於十暉。小呂餘鑑及琴。

放此書成。惟嘉定王進士恪見而喜之。餘皆莫能解也。所著詩有紅豆齋小草。詠史樂府及南中采蓴歸耕人海諸集。晚年自號半農居士。鄉人因其齋名稱紅豆先生。子七人。棟最知名。

王先生懋竑傳

王先生懋竑字與中。寶應人。世爲儒家。叔父式丹以詩文知名海內。宋尙書瑩巡撫江南。選刻江左十五子詩。以式丹爲首。康熙四十二年登進士第一人。授翰林院修撰。世所稱樓村先生者也。先生少從叔父學。卽自刻厲篤志經史。恥爲標榜聲譽。康熙戊子舉鄉試。又十年成進士。年已五十一矣。在吏部乞就教職。授安慶府學教授。雍正元年秋。以薦被召引見。特授翰林院編修。在上書房行走。時同直者滿洲福公敏。徐公元夢。高安朱公軾。漳浦蔡公世遠。皆負一時重望。而先生尤邃於經術。元元本本。有扣卽應。明年春。以母憂去官。特賜內府白金爲喪葬之費。諭以治喪畢。卽來京不必俟三年服滿。先生素善病。居喪哀毀踰禮。明年入都謝恩畢。遂以老病辭歸。時年未六十也。性耿介恬淡。少時嘗謂友人曰。老屋三間。破書萬卷。平生志願於斯足矣。歸田後。杜門著書。當路要人。雖素親厚。未嘗以竿牘及之。同年生高星源嘗謂之曰。君無過人處。但本色耳。晚年較定朱文公年譜。於文集語類考訂尤詳。謂易本義前九圖筮儀及家禮。皆後人依託。非文公所作。其略云。朱子於易有本義。有啓蒙。與門人講論甚詳。而此九圖曾無一語及之。九圖之不合於本義啓蒙者多矣。門人何以絕不致疑也。本義之敘畫卦云。自下而上。再倍而三。以成

八卦八卦之上各加八卦以成六十四卦初不敢參以邵子之說至啓蒙則一本邵子而邵子所傳止有先天圖即六十四卦方圓圖其伏羲八卦圖文王八卦圖則以經世演易圖推而得之同州王氏漢上朱氏易皆有此二圖而啓蒙因之至朱子所自作橫圖六則注大傳及邵子語於下而不敢題云伏羲六十四卦圖其慎重如此今乃直云伏羲八卦次序圖伏羲八卦方位圖伏羲六十四卦次序圖伏羲六十四卦方位圖是孰受而孰傳之耶乃云伏羲四圖其說皆出邵氏按邵氏止有先天一圖其八卦圖後來所推六橫圖朱子所作而以爲皆出邵氏是誣邵氏也又云邵氏得之李之才李得之穆修穆得之希夷先生此明道叙康節學問源流如此漢上朱氏以先天圖屬之已無所據今乃移之四圖若希夷已有此四圖者是并誣希夷也文王八卦說卦明言之本義以爲未詳啓蒙別爲之說而不以入於本義至於乾天也故稱乎父一節本義以爲揲蓍以求爻啓蒙以爲乾求於坤坤求於乾與乾爲首兩節皆文王觀於已成之卦而推其未明之象與本義不同今乃以爲文王八卦次序圖又孰受而孰傳之耶卦變圖啓蒙詳之蓋一卦可變爲六十四卦彖傳卦變偶舉十九卦以爲說爾今圖卦變皆自十二辟卦而來以本義考之惟訟晉二卦爲合餘十七卦皆不合其非朱子之書明矣筮儀之文亦不類朱子士冠禮特牲饋食少牢饋食禮筮者皆西面惟士喪禮筮宅以不在廟故筮者北面今直云筮者北面見儀禮朱子豈不見儀禮者而疏謬若是耶自直齋陳氏謂本義首列九圖末著揲法疑即筮儀學者遂以九圖揲法爲本義原本所有而不知

其爲後人依託也。家禮載於行狀。其序載於文集。其成書之歲月。載於年譜。其亡而復得之由。載於家禮附錄似無可疑者。李公晦叙年譜。謂家禮成於庚寅。居祝孺人喪時。乃文集答汪尚書與張敬夫呂伯恭書。論祭儀祭說。往復甚詳。汪呂書在壬辰癸巳。距庚寅僅二三年。家禮旣有成書。何爲絕不之及也。陳安卿錄云。向作祭儀祭說。甚簡而易曉。今已亡之矣。則是所亡者。乃祭儀祭說。而非家禮明矣。文集語錄。自家禮序外。無一語及家禮者。惟與蔡季通書。有已取家禮四卷納一哥之語。此儀禮經傳通解中家禮六卷之四。非今所傳之家禮也。勉齋作行狀。在朱子沒後二十餘年。其時家禮已盛行。又爲敬之所傳錄。故不欲公言其非。但其詞略而不盡。其書家禮後。謂經傳通解未成爲百世之遺恨。則其微意亦可見矣。後人雖云尊用其書。實未有能行者。故其中謬誤多不及察。今按家禮云。非嫡長子則不敢祭其父。若與嫡長同居。則死而後其子孫爲立祠堂於私室。且隨所繼世數爲龕。俟其出而異居。乃備其制。此據禮支子不祭之說。然死而立祠私室。勢有難行。假令支子有四五人而同居。則將立四五祠堂。不知何地可以容之。又云生而異居。則預於其地立齋以居。如祠堂之制。死則以爲祠堂。此於古無所據。生而自爲祠堂。已非人情。子爲父立。則尤不可。紫陽所定之書。恐必不爾也。士冠禮鄭注云。廣謂祔廟主人。將冠者之父兄也。賈疏云。家事統于尊祖。在則祖爲冠主。蓋以父言。則祖爲祔廟。以祖言。則曾祖爲祔廟也。家禮改以繼高祖之宗子爲主。其非宗子之子。則冠不於祔之祠堂。而於高祖之祠堂。而主人亦非將冠者之親父兄。

不亦遠於禮乎。後世封建既廢。無別子爲祖。繼別爲宗之例。凡爲大宗者。其始皆繼高祖之宗也。然傳之六世以後。則當云大宗。而不得僅云繼高祖之宗。其二世以下。繼高祖之宗。五世則遷。故曰小宗。今家禮一以繼高祖之宗爲主人。以大小宗論。則去大宗而就小宗。以遠近論。則舍同父之兄弟。而就同高祖之三從兄弟。進退皆不可矣。告遷于祠堂一條云。族人有親未盡者。遷于最長之房。尤爲無義。夫支子不祭。禮也。今使最長之房主高祖之祭。其爲繼曾祖之宗。則向不得祭高祖者。而今反得祭。其爲繼祖之宗。則曾祖且不得祭。其爲繼禰之宗。則祖且不得祭。其爲繼禰之宗之支庶。則禰并不得祭。而今反得祭。其高祖。此說之不可通者也。且繼曾祖之宗以下。本無高祖之龕。將別爲龕以祭之乎。抑竟置於所虛之龕乎。若繼禰之支庶。則並無祠堂。其將祭於寢乎。況高祖而下。必不止一房。最長之房既卒。又有一次長之房。是使高祖之主流轉於支庶之家。而遷徒莫知所定。豈敬宗收族之義乎。語類沈僪錄云。或問嫡孫主祭。則須祧五世六世祖廟主。若叔祖尚在。乃是祧其高曾於心安乎。曰。只得如此。古人立法。一定而不可易。以是推之。則謂遷於最長之房者。必非朱子之書也。同邑朱澤澐。潛心朱學。據答南軒書云。敬貫動靜。而論其循環。則有互根之妙。論其時節。則有各致之功。朱子已發未發說。作於己丑。有以靜爲本之語。甲午乙未以後。不復主此說矣。主靜之指出於濂溪。而朱子丙申作濂溪書堂記。己亥作隆興祠記。癸卯作詔。

州祠記癸丑作邵州祠記俱不一言主靜蓋敬可以貫動靜而靜不可以該動專言靜則偏矣先生於諸史皆有考證實事求是不爲抑揚過當之論其考孟子書齊人伐燕事謂通鑑據孟子以伐燕爲齊宣王而宣王卒於周顯王之四十五年又三年慎靚王元年燕王噲始立又七年齊人伐燕則不可以爲宣王事也於是上增威王之十年下減湣王之十年以就伐燕之歲其增減皆未有據而仍以燕人畔爲湣王時則與孟子亦不合不知孟子七篇所言齊王皆湣王非宣王也湣王初年兵強天下與秦爲東西帝其所以治國者亦必有異矣孟子謂以齊王由反手王由足用爲善皆道其實而其好勇好貨好色不能自克末年之禍亦基於此後來傳孟子者改湣王爲宣王以爲孟子諱蓋未識此意耳孟子去齊當在湣王之十三四年下距湣王之歿更廿五年孟子必不及見公孫丑兩篇皆稱王而不稱謚乃其元本而梁惠王兩篇稱宣王其爲後人所增無疑矣先生撰述已刻者白田艸堂集廿四卷朱子年譜若干卷讀史記疑則予嘗於金陵嚴氏齋見之

大明書

蟲

潛研堂文集卷三十九

傳二

惠先生棟傳

惠先生棟字定宇號松厓侍讀學士士奇之次子初爲吳江學生員復改歸元和籍自幼篤志向學家多藏書日夜講誦自經史諸子百家雜說釋道二藏靡不津逮父友臨川李公紱一見奇之曰仲孺有子矣學士視學粵東先生從之任所粵中高才生蘇珥羅天尺何夢瑤陳海六時稱惠門四子常入署講論文藝與先生爲莫逆交至於學問該洽則四子皆自以遠不逮也及學士毀家修城先生往來京口飢寒困頓甚於寒素遭兩喪不以貧廢禮中年課徒自給陋巷屢空處之坦如雅愛典籍得一善本傾囊弗惜或借讀手鈔校勘精審於古書之真僞瞭然若辨黑白乾隆十五年詔舉經明行修之士總督尹文端公黃文襄公交章論薦有博通經史學有淵源之稱然先生於兩公非有半面識也年五十後專心經術尤邃於易謂宣尼作十翼其微言大義七十子之徒相傳至漢猶有存者自王弼興而漢學亡幸存其略于李氏集解中精繆三十年引伸觸類始得貫通其旨乃撰次周易述一編專宗虞仲翔參以荀鄭諸家之義

約其旨爲注演其說爲疏漢學之絕者千有五百餘年至是而粲然復章矣書垂成而疾革遂闕革至未濟十五卦及序卦雜卦二篇然先生之緒言具在好學深思之士因其義例推而演之闕者尙可補也孔氏正義據馬融陸續說以爻辭爲周公所作與鄭學異其所執者明夷六五云箕子升六四云王用享岐山皆文王後事也先生獨能辨之於明夷之五曰箕子當從古文作其子其古音亥亦作箕劉向云今易箕子作荄茲苟爽據以爲說讀箕子爲荄茲其與亥子與茲文異而音義同三統術云該閔于亥孳萌于子該荄亦同物也五本坤也坤終於亥乾出於子用晦而明明不可息故云其子之明夷馬融俗儒不識七十子傳易之大義讀其爲箕蓋涉彖傳而譌五爲天位箕子臣也而當君位乖於易例甚矣謬種流傳兆於西漢博士施讎讀其爲箕蜀人趙賓述孟氏之學以爲箕子明夷陰陽氣無箕子箕子者萬物方荄茲也賓據古義以難諸儒諸儒皆屈於是施讎梁邱賀皆嫉之孟喜與讎賀同事田王孫喜未貴而學獨高喜所傳易家候陰陽災變書得自王孫而賀惡之謂無此事語聞於上宣帝遂以喜爲改師法中梁邱之譖也讎賀嫉喜而并及賓班固作喜傳亦用讎賀之單詞皆非實錄劉向別錄猶循孟學故馬融俗說苟爽獨知其非復用賓古義而晉人鄒湛以漫衍无經譏之蓋魏晉以後經師道喪王肅詆鄭氏而補郊之義乖袁準毀蔡服而明堂之制亡鄒湛譏苟謂而周易之學晦郢書燕說一倡百和何尤乎後世之紛紜也於升之四曰文王爻辭皆據夏商之制春秋傳引夏書惟彼陶唐帥彼天常有此冀方服虔云堯居

冀州虞夏因之禹貢冀州治梁及岐爾雅云梁山晉望也諸侯三望天子四望梁山爲晉望明梁岐皆冀州之望此王謂夏后氏受命告祭非文王也其說乾之四德曰元者天地之始說文元从一道立於一造分天地化生萬物乾之初九積善在下陽氣始生東方爲仁故云善之長陰陽交而後亨乾之九二當上升坤五爲天子故文言再言君德經凡言亨者皆謂乾坤交也乾六爻二四上匪正坤六爻初三五匪正乾變坤化六爻皆正成兩既濟故云各正性命保合太和和卽利正卽貞也經凡言利貞者皆爻當位或變之正或剛柔相易惟既濟一卦六爻皆正故云剛柔正而位當雜卦篇所謂既濟定也卦具四德者七乾坤變化而成兩既濟屯三爻變革四爻變皆成既濟隨三四易位成既濟无妄三四易位上爻又變而成旣濟臨二升居五位三爻又變而成旣濟故皆言元亨利貞也其論占筮之法曰易稱天下之動貞夫一故卦爻之動一則正兩則惑京氏筮法一爻變者爲九六二爻以上變爲八晉公子得貞屯悔豫皆八乃二爻變不稱屯之豫而稱八穆姜遇艮之八乃五爻變不稱艮之隨而稱八所謂貞夫一也七者著之數八者卦之數著圓而神卦方以知神以知來知以藏往知來爲卦之未成者藏往爲卦之已成者故不曰七而曰八春秋內外傳無筮得某卦之七者以七爲著之數未成卦也又因學易而悟明堂之法撰明堂大道錄八卷禱說二卷大略謂說卦帝出乎震帝者五帝也在太微之中五德相次以成四時聖人法之立明堂爲治天下之大法明堂有五室四堂室以祭天堂以布政王者承天統物各於其方以聽事謂

之明堂月令今所傳月令是也古之聖人生有配天之德沒有配天之祭故太皞以下歷代所禘太皞以木德炎帝以火德黃帝以土德少皞以金德顓頊以水德王者行大享之禮於明堂謂之禘祖宗其郊則行之南郊禘郊祖宗四大祭而總謂之禘者禘其祖之所自出故也鄭注大傳不王不禘及詩長發大禘箋皆云郊祀天是郊稱禘也周頌諧序云禘太祖也鄭箋云太祖謂文王是祖稱禘也劉歆云大禘則終王是宗稱禘也董子曰天地者先祖之所出也禘者禘其祖之所自出故四大祭皆蒙禘名禘禮上遡遠祖旁及毀廟下逮功臣聖人居天子之位行配天之祭推人道以接天而天神降地示出人鬼格夫然而陰陽和風雨時五穀熟草木茂羣生成遂物無疵厲所謂既濟定也先儒皆以明堂上有靈臺下有辟雍四門有太學穎容春秋釋例云太廟有八名肅然清靜謂之清廟行禘祫序昭穆謂之太廟告朔行政謂之明堂行饗射養國老謂之辟雍占雲物望氣祥謂之靈臺其四門之學謂之太學其中室謂之太室總謂之宮盧植注禮記亦云明堂卽太廟與靈臺辟雍古法皆同一處近世殊異分爲三耳而晉時袁準著論非之昧于古制矣王者觀諸侯或巡守四岳則有方明方明者放乎明堂之制也亦謂之明堂荀子所謂筭明堂於塞外以朝諸侯戰國時齊有泰山明堂卽方明也周書朝諸侯則于明堂儀禮觀諸侯則設方明故虞禋六宗而觀四岳羣牧周禮方明而觀公侯伯子男六宗方明卽明堂六天之神鄭氏謂天之司盟非也自明堂之制不詳而禘禮亦廢鄭氏知圜丘方澤之爲禘而不知爲明堂六帝王肅又誤據魯

禱改禱爲宗廟之祭無配天之事故魏明帝謂漢氏四百餘年廢無禱祀也禱行於明堂明堂之法本於易中庸言至誠可以贊化育與天地參此明堂配天之義也又有易漢學七卷易例二卷皆推演古義鍼砭俗說有益於學者於書有古文尙書考二卷謂孔壁中古文得多十六篇內有九共九篇析之爲二十四鄭康成所傳之二十四篇卽孔壁真古文東晉晚出之二十五篇與漢書不合可決其僞唐人詆鄭所傳爲張霸僞造者妄也今文太誓三篇其略見於太史公書史公從安國問故其載當可信唐人尊信晚出之太誓而以今文太誓爲僞亦非也於春秋有左傳補注六卷自序云嘗見鄭康成之周禮韋宏嗣之國語純采先儒之說末乃下以己意令學者審其異同杜元凱春秋集解雖根本前修而不著其說又其持論閒與諸儒相違於是樂遜序義劉炫規過之書出焉今刺取經傳附以先世遺聞宗韋鄭之遺前修不揜效樂劉之意有失必規而於古今文之同異辨之尤悉云其注秦穆姬屬賈君用唐尙書說以賈君爲申生妃令尹鶯艾獵用世木說爲叔敖之兄同盟於亳城北用服虔本證毫爲京之譌塹防門而守之廣里用續漢書及京相璠說以防門廣里爲地名吳句餘用服虔說以爲吳子餘祭萬者二人用吳仁傑說二人當爲二八臧文仲廢六關訓廢爲置讀如公羊廢其有聲者之廢皆前人所未及道也又言公羊有嚴顏二家蔡邕石經所定者嚴氏春秋也何邵公所注者顏氏春秋也石經公羊末云桓公二年顏氏有所見異辭云云僖公三十年顏氏言君出則已入今何本皆有之又云顏氏無伐而不言圍者非取邑

之辭也。今何本亦無之。以此知何所注者顏氏本也。鄭康成注三禮引隱二年放於此乎。隱三年登戾之桓十一年遷鄭焉而鄙留皆與何氏異。與石經同。蓋鄭所據者嚴氏本也。又云應邵風俗通稱穀梁爲子夏門人。楊士助謂受經于子夏案桓譚新論云左氏傳世遭戰國寢藏後百餘年魯穀梁亦爲春秋殘略多所違失。然則穀梁子非親受經于子夏矣。古人親受業者稱弟子轉相授者稱門人。則穀梁于子夏猶孟子之于子思故魏糜信注穀梁以爲與秦孝公同時也。楊士助言穀梁作傳傳孫卿卿傳魯人申公申公傳博士江翁案孫卿齊潛襄時人當秦之惠王則在其後卿所著書言天子廟數及賄贈襚舍之義述春秋善胥命而言盟詛不及三王諸侯相見仁者居守皆本穀梁說其言傳孫卿信矣。隱元年傳成人之美不成人之惡僖廿二年傳過而不改是謂之過廿三年傳以不教民戰則是棄其師今皆在論語中傳所載與儀禮二記合者尤多故鄭康成云穀梁善於經也。其論論語曰宣尼言述而不作於魯論見之鄉黨一書半是禮經堯曰數章全書訓典論君臣則人言不廢譏無恆則南國有言於善人爲邦則曰誠哉是言於隱居行義則曰吾聞其語素絢唐棣逸詩可頌百官冢宰古典可稽出門如見大賓使民如承大祭此胥臣多聞之所述也視其所以觀其所由察其所安此文王官人之所記也克己復禮左氏以爲古志己所不欲勿施於人管子以爲古語見小問篇參分天下而有其二周志之遺文也今逸周書卽周志也在程典篇陳力就列不能者止周任之遺言也推此言之聖人豈空作哉其論爾雅曰釋詁釋訓乃周公所作以教成王故

詩稱古訓是式漢時謂之故訓又謂之詁訓詁訓者雅言也周之古訓仲山式之子之雅言門人記之爾雅以觀于古故又謂之爾雅俗儒不信爾雅而仲山之古訓夫子之雅言皆不存矣又撰九經古義十六卷討論古字古言以博異聞正俗學益都李進士文藻見其書而善之爲鋟板粵中李與先生亦素不相識也予嘗論宋元以來說經之書盈屋充棟高者蔑棄古訓自誇心得下者勦襲人言以爲已有儒林之名徒爲空疏藏拙之地獨惠氏世守古學而先生所得尤深擬諸漢儒當在何邵公服子慎之閒馬融趙岐輩不能及也先生少時已好撰述有王文簡公精華錄訓纂二十四卷盛行於世論者以爲過於任淵之注山谷李壁之注荆公焉有太上感應篇注二卷證其爲魏晉人所作亦經好事刊刻又有後漢書補注十五卷九曜齋筆記二卷松厓筆記二卷予皆見之其周易本義辯證五卷松厓文鈔二卷及諸史會最竹南漫錄則未之見也其弟子知名者江聲余蕭客皆布衣通經學江於尙書用功尤專云先生卒於戊寅五月年六十有二

江先生永傳

江先生永字慎修婺源人少就外傳與里中兒治世俗學一日見邱濬大學衍義補書中多徵引周禮奇之求諸積書家得寫周禮正文晨夕諷誦爲諸生數十年撻戶授徒束修所入盡以購書遂博通古今尤專心於十三經注疏自壯至老丹黃不去手嘗一游京師同郡程編修恂延主其邸桐城方侍郎苞素以

三禮自負聞先生名願一見見則以所疑士冠禮士昏禮中數事爲問先生從容置答乃大折服荆溪吳編修紱於儀禮功深及交先生質以三禮中疑義往復辯難歎曰先生非常人也休寧戴震少不譽於鄉曲先生獨重之引爲忘年交震之學得諸先生爲多乾隆壬午歲三月十三日卒年八十有二所著有周禮疑義舉要六卷禮記訓義擇言六卷深衣考誤一卷禮經綱目八十八卷律呂闡微十一卷春秋地理考實四卷鄉黨圖考十一卷讀書隨筆十二卷古韻標準六卷四聲切韻表四卷音學辯微一卷推步法解五卷七政衍金水二星發微冬至權度恆氣注歷辨歲實消長辯歷學補論中西合法擬草各一卷近思錄集注十四卷讀書好深思長於比勘於步算鍾律聲韻尤明其論歲實消長曰日平行於黃道是爲恆氣恆歲實因有本輪均輪高衝之差而生盈縮謂之視行視行者日之實體所至而平行者本輪之心也以視行加減平行故定氣時刻多寡不同高衝爲縮末盈初之端歲有推移故定氣時刻之多寡且歲歲不同而恆氣恆歲實終古無增損也當以恆者爲率隨其時之高衝以算定氣而歲實消長可勿論猶之步月行者先有平朔平望之策以求定朔定策而此月與彼月多於朔策幾何少於朔策幾何不必計也其論黃鍾之宮曰呂氏春秋稱伶倫作律先爲黃鍾之宮次制十二筒以別十二律黃鍾之宮者黃鍾半律後世所謂黃鍾清聲也唐時風雅十二詩譜以清黃起調畢曲琴家正宮調黃鍾不在大絃而在第三絃合于古者黃鍾宮爲律本之意聲律自然古今不異也國語伶州鳩論七律而及武王之四樂夷則

無射曰上宮黃鍾太簇曰下宮蓋律長者用其清聲律短者用其濁聲古樂用均之法雖亡而因端可推。韓子外儲篇曰瑟以小絃爲大聲大絃爲小聲雖詭辭以諷然因是知古者調瑟之法黃鍾大呂太簇夾鍾姑洗仲呂蕤賓用半而居小絃林鐘夷則南呂無射應鍾用全而居大絃也管子書五聲徵羽宮商角之序亦如此其論古韻曰考古音者昉于吳才老崑山顧氏援證益精博然顧氏考古之功多審音之功淺顧氏分古音爲十部猶未密也真諄以下十四韻當析爲二部而先韻半屬真諄半屬元寒考之三百篇用韻畫然侯之正音近幽當別爲一部虞模部之隅渝驅婁等字蕭豪部之蕭寥魚好等字皆侯幽之類與本部源流各別三百篇亦畫然侵覃以下九韻亦當以侈斂分爲二部而覃鹽半屬侵半屬嚴添蓋平上去三聲皆當爲十三部入聲當爲八部而三代以上之音始有條不紊也論今韻曰平上去三聲多者六十部少亦五十餘部惟入聲祇三十四部或謂支至咍蕭至麻尤至幽無入聲崑山顧氏古音表又反其說於是舊有者無舊無者有皆拘于一偏蓋入聲有二三韻而同一入者如東尤侯同以屋爲入真脂同以質爲入文微同以物爲入寒桓歌戈同以曷未爲入之類按其呼等察其偏旁參以古音乃無憾也其說易卦變曰卦變之義言人人殊當于反卦取之否反爲泰泰反爲否故曰小往大來曰大往小來是其例也彖傳言來言下言反者自反卦之外卦來居內卦也言往言上言進言升者自反卦之內卦往居外卦也其論春秋軍制云儒者多稱井田廢而兵農始分考春秋之世兵農固已分矣管仲參國伍鄙

之法齊三軍出之士鄉十有五公與國子高子分率之而鄙處之農不與也爲農者治田供稅不以隸于師旅也鄉田但有兵賦無田稅始後世之軍田屯田此外更無養兵之費昔之始惟一軍既而作二軍作三軍作五軍旣舍二軍旋作六軍後爲四軍以新軍無帥而復三軍其旣增又損也蓋除其軍籍使之歸農若軍盡出于農則農民固在安用屢易軍制乎隨武子曰楚國荆尸而舉商農工賈不敗其業此農不從軍之證也魯之作三軍也季氏取其乘之父兄子弟盡征之孟氏取半焉以其半歸公叔孫氏臣其子弟而以其父兄歸公所謂子弟者兵之壯者也父兄兵之老者也皆其素在軍籍隸之卒乘者非通國之父兄子弟也其後舍中軍季氏擇二二子各一皆盡征之而貢之于公若民之爲農者出田稅自仍然歸之君故哀公曰二吾猶不足三家雖專亦惟食其采邑豈嘗使通國之農盡屬已哉陽虎壬辰戒都車令癸巳至此近都之民爲兵之證其野處之農固不爲兵也其論深衣之制曰後儒爲深衣圖考者數十家大率踵裳交解十二幅之譌而續衽鉤邊致滋異說考玉藻篇言衽當旁則非前後之正幅矣鄭氏注云衽謂裳幅所交裂也則在旁名衽者交裂而餘幅不交裂也續衽者裳之左旁連合其衽鉤邊者裳之右旁別用布一幅斜裁之綴于後衽之上使鉤曲而前以揜裳際漢時謂之曲裾故鄭注云鉤邊若今曲裾也其解論語攝齊升堂曰古者諸侯三朝外朝治朝皆有位而無堂古之朝儀甚簡日出視朝君與卿大夫士相揖而朝事畢君反乎路寢卿以下各就治事之所君召與圖事乃入內朝內朝有堂有寢孔子攝

齊升堂謂內朝非治朝也路門爲君乘車出入之地故考工記云路門不容乘車之五个治朝在路門外若治朝有堂礙於車行矣禮記言雨霑服失容則廢朝此亦治朝無堂之證先生於經傳制度名物考稽精審多類此歿後一年詔修音韻述微尙書奏文恭公請於朝令江南督臣檄取先生所著韻書三種進呈貯館以備采擇丙午江南鄉試以鄉黨篇命題士子主先生說者皆得中式由是海內益重其學

戴先生震傳

戴先生震字東原休寧人少從婺源江慎修游講貫禮經制度名物及推步天象皆洞徹其原本旣乃研精漢儒傳注及方言說文諸書由聲音文字以求訓詁由訓詁以尋義理實事求是不偏主一家亦不過騁其辯以排擊前賢嘗謂今人讀書尙未識字輒薄訓詁之學夫文字之未能通妄謂通其語言語言之未能通妄謂通其心志此惑之甚者也論者又曰有漢儒之經學有宋儒之經學一主於訓詁一主於義理此愚之大不解者夫使義理可以舍經而求將人人鑿空得之奚取乎經學惟空凭胸臆之無當於義理然後求之古經求之古經而遺文垂絕今古懸隔然後求之詁訓訓詁明則古經明而我心所同然之義理乃因之而明古聖賢之義理非他存乎典章制度者是也昧者乃岐訓詁義理而二之是訓詁非以明義理而訓詁胡爲義理不存乎典章制度勢必流入於異端曲說而不自知矣又嘗與友人書云僕數十年來得於行事者立身則曰不苟待人則曰無憾事事不苟猶未能遠恥辱也念念求無憾猶未能免

怨尤也。其得於學者不以人蔽已。不以己自蔽。不爲一時之名。亦不期後世之名。凡求名之弊有二。非掊擊前人。以自表襮。即依傍昔儒。以附驩尾。二者不同。而鄙吝之心同。是以君子務在聞道也。今之博雅能文章。善考核者。徒株守先儒而篤信之。如唐人所譏寧言周孔誤。不道鄭服非。此非志乎聞道者也。其私智穿鑿者。卽不自表襮。而學不師古。積非成是。惑以終身。無鄙吝之心。而失與之等。其於道亦遠矣。講明正道。修辭立誠。以俟後學。其或聽或否。或傳或墜。或尊信或非。議所不計也。性介特。多與物忤。落落不自得。年三十餘。策蹇至京師。困於逆旅。饋粥幾不繼。人皆目爲狂生。一日攜其所著書過予齋。談論竟日。旣去。予目送之歎曰。天下奇才也。時金匱秦文恭公蕙田。兼理算學。求精於推步者。予輒舉先生名。秦公大喜。卽日命駕訪之。延主其邸。與講觀象授時之旨。以爲聞所未聞。秦公撰五禮通考。往往采其說焉。高郵王文肅公安國。亦延致先生家塾。令其子念孫師之一。時館閣通人。河間紀太史。昀嘉定王。編修鳴盛。青浦王舍人昶。大興朱太史筠。先後與先生定交。於是海內皆知有戴先生矣。乾隆壬午中江南鄉試。明年。試禮部不第。薄游汾晉間。會汾州修郡志。朱方伯珪請先生任其事。乃博稽史籍。駁正舊志之譌。謂汾陽於漢爲茲氏縣。戰國時屬趙。不屬魏。漢時屬太原郡。不屬西河郡。後魏太和八年改六壁鎮置西河郡。治茲氏城。而西河之名移於此。酈道元注水經。以武侯浮西河事繫之夏陽。子夏陵及廟室。繫之邵陽。而於謁泉山及文水。絕不涉及。子夏設教事。張守節李吉甫輩始指爲魏之西河。子夏退老居此。皆非其實吉。

甫又謂黃初二年於漢茲氏縣置西河郡卽今州理不知魏晉之西河皆治離石非茲氏吉甫又謂周宣帝於此置汾州大業三年廢汾州不知周隋之汾州皆非西河郡境吉甫元和郡縣志敘述最有法而猶有舛謬甚矣地理之不易言也癸巳歲天子開四庫館妙選校讐之職總裁諸公疏薦先生以鄉貢士入館充纂修官特命與會試中式者同赴廷對乙未夏授翰林院庶吉士先生起自單寒獨以文學爲天子所知出入著作之庭館中有奇文疑義輒就咨訪先生爲考究顛末各得其意以去先生亦思勤修其職以稱塞明詔經進圖籍論次精審晨夕披檢靡間寒暑竟以積勞致疾丁酉夏卒於官年五十有五平生無他嗜好惟專於讀書雖詞義鉤棘難曉者一再讀之輒已渙然冰解旁觀皆驚爲宿悟要由精誠所致其學長於考辯每立一義初若叛獲及參互考之果不可易後儒多言易亂於費直先生以漢書證之曰藝文志易經十二篇施孟梁邱三家十二篇者經上下二篇十翼十篇此三家所同也儒林傳云費直易無章句徒以彖象繫辭十篇之言解說上下經蓋費氏不自立章句其解說經卽用十篇之言而十二篇之目未嘗改也劉向以中古文易校施孟梁邱經或脫去无咎悔亡惟費氏經與古文同初不言篇題與諸家異後人誤讀儒林傳輒咎費氏改經不察之甚也周禮大馭右祭兩軺祭軺注云故書軺爲軺杜子春云軺當爲軺軺謂兩轄或讀軺爲簪笄之笄先生辨之曰軺當從或讀如笄杜君改爲軺與轄內之軺二名混淆非也以轄釋轂端之軺亦非也軺者車轄軺者轂末轄者軸末後代字書并軺字無之矣祭軺

字刊本多譌爲軌。毛公釋濟盈不濡軌云：自軺以上爲軌。陸德明依說文別之，以軌从九車轍也。軌从凡車式前也。依傳意宜音犯。若音犯，則字當作軌。以韻考之，又不合。疑漢時軌、軋二字相溷。毛君殆誤併二字爲一。其述明堂之制曰：明堂五室十二堂，故曰明堂。月令中央曰太室，正室也。一室而四堂。東堂曰青陽，太廟。南堂曰明堂，太廟。西堂曰總章，太廟。北堂曰元堂，太廟。四隅之室，夾室也。四室而八堂。東北隅之室，元堂之右夾。青陽之左夾也。其北堂曰元堂，右个。東堂曰青陽，左个。東南隅之室，青陽之右夾。明堂之左夾也。其東堂曰青陽，右个。南堂曰明堂，左个。西南隅之室，明堂之右夾。總章之左夾也。其南堂曰明堂，右个。西堂曰總章，左个。西北隅之室，總章之右夾。元堂之左夾也。其西堂曰總章，右个。北堂曰元堂，左个。凡夾室，前堂或謂之箱，或謂之个。左氏傳：寘饋於个。杜云：个，東西箱是也。个者，兩旁之名也。古者宮室之制：前堂後室，有夾有个。有房，惟南嚮一面。明堂四面闔達，亦前堂後室，有夾有个，而無房。禮婦人在房。明堂非婦人所得至也。四正之堂，皆曰太廟。四正之室，共一太室。故曰太廟太室。世之言明堂者，有室無堂，不分个夾，失其傳矣。春秋昭二十二年十月，王子猛卒，而其夏秋已兩書王猛。說者莫得其解。先生曰：王猛與鄭忽，皆以國氏者也。王者諸侯曰王，畿之辭，非天王之號。春秋凡書王，獨列國之書，其國書天王。猶列國之書爵。故王人與列國書人同爲微者。王猛與鄭忽同爲以國氏，忽未卽位而出奔歸，不得書爵。書世子，正其復國也。王子猛未卽位稱王，故卒稱王子。若先正其號曰王，不得復稱王子矣。周髀言北極。

璿璣四游。又言正北極樞璿璣之中。後人多疑其說。先生解之曰。正北極者。魯論之北辰。今人所謂赤道極也。北極璿璣者。今人所謂黃道極也。正北極者。左旋之樞北極璿璣。每晝夜環之而成規。冬至夜半。在正北極下。是爲北游所極。日加卯之時。在正北極右。是爲西游所極。此璿璣之一日四游所極也。冬至夜半。起正北子位。晝夜所極。日加酉之時。在正北極左。是爲東游所極。日加午之時。在正北極上。是爲南游所極。日加西之時。在正北極右。是爲西游所極。此璿璣之一日四游所極也。冬至夜半。起正北子位。晝夜左旋一周。而又過一度。漸進至四分周之一。則春分夜半爲東游所極。又進至夏至夜半爲南游所極。又進至秋分夜半爲西游所極。此璿璣之一歲四游所極也。虞夏書在璿璣玉衡。以齊七政。蓋設璿璣以擬黃道極。後世失其傳也。今人所用三角八線之法。本出於句股。而尊信西術者。輒云句股不能御三角。先生折之曰。周髀云。圓出於方。方出於矩。矩出於九九八十一。三角中無直角。則不應乎矩。無例可比矣。必以法御之。使成句股而止。八線比例之術。皆句股法也。嘗謂儒者治經。宜自爾雅始。世所傳郭注。已刪節不全。邢疏又多疏漏。如釋言。桄充也。六經無桄字。鄭注樂記。孔子閒居。皆訓橫爲充。橫桄古通用。書光被醜條。卽詩蠶月條桑之條。莊子云。已而爲之者。已而不知其然。當從釋詁解已爲此。其考證通悟多如此。水經注譌舛久矣。王伯厚引經文四事。其三事皆注之溷於經者。則經注之淆。南宋時已然。先生獨尋其義。例區而別之。云經文每一水云。某水出某郡縣。此下不更舉水名。注則兼及所納羣川。故須重舉。經云。

過某縣者統一縣而言注則詳言所巡委曲故有一縣而再三見者經據當時縣治善長作注時縣邑流移是以多稱故城經無言故城者也經例云過注例云巡以是推之經注之淆者可正也閩百詩顧景范胡朏明雖善讀古書猶未悟斯失先生始釐正之同時頗有狂而不信者予深贊成其說今武英殿所刊用先生校本海內始復見此書之真面目焉先生在書局校定五經算術海島算經孫子算經等書皆官爲板行其所撰述有毛鄭詩考正四卷考工記圖二卷孟子字義說三卷方言疏證十三卷原善三卷原象一卷句股割圓記三卷策算一卷聲韻考四卷聲類表九卷屈原賦注九卷文集十卷則曲阜孔戶部繼涵爲刊行之。

溉亭別傳

溉亭姓錢氏名塘字學淵一字禹美世居嘉定之望仙橋曾大父惟亮廩膳生與先奉政公爲從祖昆弟生太學生衡臣有三子彥昭早卒彥輝永輝皆太學生溉亭爲永輝長子甫在抱而彥輝撫以爲後始就傅習舉業出語便不凡旣補博士弟子與諸灤輪汪紹青王鶴谿王耿仲唱和爲古今體詩卽爲王西莊光祿王蘭泉侍郎激賞然溉亭意慊然猶未足不欲以詞人自命及選拔入成均試闕下歸益肆力於經史之學乾隆四十五年舉江南鄉試對策爲通場第一明年成進士需次當得縣宰而溉亭自以不習吏事呈吏部願就教職選授江寧府學教授公務多暇益刻苦撰述於聲音文字律呂推步之學尤有神解

體素羸弱夏月常畏寒擁絮而考辯精到議論風生不假公明三斗酒也春秋五十有六終於江寧官廨溉亭著律呂古義六卷自序云古之律傳而尺不傳律法待尺以爲用尺不傳則律不傳矣自荀勗以劉歆銅斛尺爲周尺載於史志莫有知其非者予得盧俛尺知勗所謂周尺之卽漢尺復得周尺知漢尺之非周尺因周尺以求律尺得今車工尺之八寸一分蓋周本八寸尺不可以制律律必用十寸尺卽昔人所云夏尺者然則周不能自用其尺制律後人顧必曰周尺哉古律當無異度周必因乎夏商商必因唐虞十寸尺之爲二帝三王時律尺明矣周尺傳而律尺傳律尺傳而古律已無不傳其愈於用漢尺也不遠乎然予之爲此書非徒傳古尺而已兼以明律法焉夫累黍尺之千二百不能實八百十分之管也考律之不必千二百黍也徑三分之積不盈八百十分也周臚之非兼用八寸十寸尺也後周玉律至隋而失其本數也雅樂燕樂之調法不同也中管調器之非律呂元聲也校律之用尺積也今權之用何度也皆律家所當知者也不知實管之宜異黍則容受必不符不知考律之用方龠則黃鐘必非八百十分不知徑三分之積六百四十分則必以方徑爲員徑不知周臚止用十寸尺則聲不能中黃鐘之宮不知玉律之積數增多則隋志錯誤之故不明不知雅樂燕樂異調則郊廟與房中無別不知中管之非元聲則八音俱乖本律不知校律用尺再乘方則得數必舛不知今權所應之度則不能審古物之應律與否如是而律不可通矣夫言律必求其實用律之數寓於度量權衡而其聲應乎金石絲竹律本無不通故

以是數物爲其用通則有法焉卽黃鐘之律是也故曰爲萬事根本其明算篇曰算莫難於算圓圓周者圓幕之本也以方容圓徑同而周異圓周之有圓幕若方周之有方幕故周異則幕亦異倍其徑者四其幕則初以爲周者繼以爲幕矣以方周除圓周而十之亦卽圓之幕也由是定爲方圓之率任所得之爲方爲圓無不可以推知其所未得而術有古今疏密之不同古術方周四則圓周三是幕亦方四而圓三也至劉徽注九章推得圓周三一四有奇而去其餘數故徽術算幕亦方四而圓三一四也後人知古術之疏以徽術爲密依而用之雖間有修改要不離此率自予觀之亦未見其密也試度取一物之徑命之爲一則周且至三一六以上矣夫古術泥於陽奇陰偶之說其疏固宜徽術則本之割圓割圓之術有觚有弧矢其算之也有半徑與弦半徑常爲大弦而迭爲句股以求其小弦半徑爲小弦所截成弧矢有弧矢則半徑不盡半徑不盡則小弦不盡而割圓之以爲弧者卽小弦也弦直而弧曲合之以爲周非其類矣周之爲物如環無端割而爲觚必且無盡而割圓不能無盡也斯則名爲周而實非周也而又不能無所棄始之開方以求大股也可開而至於無盡也旣以其不能盡而棄之後之開方以求小弦也亦可開而至於無盡也復以其不能盡而棄之有所棄則非全數矣徽之割圓也止於九十六觚其於股於矢於小弦固皆曰餘分棄之是以二尺爲方之圓周尙以六分半有奇爲小弦夫以如環之圓而以六分以上之小弦九十六之以爲周謂其與圓合體也其孰能信之是故求圓周者可無割圓也度之亦略近矣度

法絲毫以下常無象而不可以名則有一術焉更密於度周而可以相代者曰十倍其徑幕以爲周幕而已我蓋得之於方方之徑幕卽圓之徑幕也方之周幕猶圓之周幕也唯以十六爲十是已數皆以十成而權衡獨以十六卽其理也是故徑幕一則方周幕十六而圓周幕十徑幕十則方周幕百六十而圓周幕百是爲周徑之幕異位而同名夫如是則圓幕至十倍卽周爲徑而十倍其徑以爲周矣是反覆不衰之術也舊術周幕不足徑幕之十倍故反覆之則必衰衰不衰何足深論顧如方之容圓有舒促何容圓無舒促則無如此術矣是術也可不用比例而得周徑與方圓不出乎乘除進退以開方而已矣求周徑者徑自乘而十乘之卽周之自乘周自乘而十除之卽徑之自乘求方圓者方自乘而十六除之復十乘之卽圓之自乘圓自乘而十六乘之復十除之卽方之自乘所得皆平方開之也舊唯周徑有幕今則方圓之幕又有幕然皆因數以立術非爲術以設數也然則其數幾何曰術在數可不言也以徑一爲例則徑幕百周幕千而方幕之幕十萬圓幕之幕六千二百五十是爲徑一則周三一六有奇而方百者圓七九零也立圓立方何如曰亦不過三一六爲圓則六爲方而已矣其較度篇曰晉志列十五等尺以晉前尺爲主謂之周尺玉海列六等尺以司馬公所摹高若訥漢泉尺爲主謂之周尺其時漢尺之外實未見周尺也今曲阜孔氏所藏漢慮俛銅尺建初六年八月造當今工匠尺七寸四分與晉志云晉前尺卽劉歆鍾律尺建武銅尺者正同卽司馬公家周尺亦無不同也周尺今藏曲阜顏氏以今匠尺校之長六寸

四分八釐。昔人以漢尺爲周尺者非也。周有八寸十寸尺。以顏氏尺四分加一得今匠尺之八寸一分。是爲古十寸尺。昔人謂之夏尺。別於周也。商尺。蔡邕言長九寸。鄭樵言長一尺二寸半。按考工記。夏后氏世室度以步。殷人重屋度以尋。步長六尺十寸尺也。尋長八尺八寸尺也。殷制用尋明別無殷尺矣。蓋二尺三代同用也。蔡說出自臆撰。鄭樵則據三司尺言之。三司尺范景仁謂之黃帝時尺。雖未可信。要非宋始有之。以漢尺推算。當長一尺三寸五分。卽今匠尺也。三司尺之八寸一分。卽古十寸尺。十寸尺制律。三代當同。愈於用漢尺遠矣。又著史記三書釋疑於律科天官家言。皆究其原本而以它書疏通證明之。律書上九商八羽七角六宮五徵九數語。注家皆不能曉。小司馬疑其數錯。溉亭據淮南子太元經證之。始信其確不可易。又以淮南天文訓一篇多周官鴻相保章遺法。高氏注頗闕略。罕所證明。作補注三卷。以闡其旨。晚年讀春秋左氏經傳。精心有得。作古義若干卷。以補杜氏之闕。且糾其謬。其所作古文曰述古編。四卷詩曰□□齋吟稿。皆刊刻行世。溉亭少時執經於先君子。予長於溉亭七歲。相與共學。予入都以後。溉亭與其弟玷及子弟大昭相切磋。爲實事求是之學。蘄至於古人而止。比予歸田。而溉亭學已大成。每相見。輒互證其所得。吾邑言好學者。稱錢氏。而溉亭尤羣從之白眉也。惜其未及中壽。而撰述或不盡傳。因仿魏晉人別傳之例。述其事目如右。

潛研堂文集卷四十

傳四

汪南有傳

孔子傳恆之六五曰。婦人貞吉。從一而終也。夫子制義。從婦凶也。男帥女。女從男。夫尊妻卑。禮之大經。乃一介之士。束修自好。名湮沒不彰。何可勝算。獨爲節婦之夫者。言行無所表見。而史家傳列女。牽連得書。以制義之夫子。轉賴從一之婦以傳。此又理之變也。蕭山汪進士輝祖之繼母王氏。生母徐氏。以雙節旌門。予旣爲銘。刻之石柱矣。已乃出其所述先人登仕君事狀。讀之悚然曰。世安得此長者乎。輝祖賢而有文。且誠孝人也。其言故可信。登仕諱楷。字南有一字皆木。先世自婺源遷鄞。又遷蕭山之大義村。君少從蔣季眉先生學舉子業。試不利。棄去。習法家言。旣而曰。刻深者不祥。懇損吾福。又棄去。爲賈。以羨置薄田百畝。屬弟收租入養父母。而納貲爲官。選得河南淇縣典史。典史主縣獄。故時囚之繫者。獄卒奴使之。食常不飽。衣垢不得滌。有病不及時療。官數日一至。檢獄具。它弗問。君在縣日省囚。而問其疾苦。獄卒不得苛虐。囚無瘐死者。丞簿以下。例不受民詞。黠者藉事恐喝。取其酬。上官以其俸薄。而所取少。不禁也。君自

廉俸外無所取。常屑蕎麥和米爲飯。佐以豆腐羹。妻妾親紉箴以給。僚友多嗤之曰。我輩佐雜。欲入循吏傳耶。家中豈少麥飯豆羹作官如此。不如早歸。君乾笑而已。亦不與辨。在職八年。以親老引疾歸。歸則弟私鬻所置田垂盡。或言受產者率以博鑿句致告之。官可復。君終不言。父歿。罄所有營喪葬。又爲弟償所負惡少錢。生計大窘。乃跳身遊嶺南。無所遇。益鬱鬱。遂病死番禺。年四十有六。乾隆五年十二月十五日也。輝祖早慧。能讀書。君隨事啓牖之。嘗問兒讀書何爲。曰。欲爲官。即正色曰。兒誤矣。爲官不如爲人。作人好。雖不官不失爲人。卽得官。必不爲人詬詈。一日。兩窯器墮地。薄者毀。乃取完者示其子。曰。若彼厚如此。則亦完矣。君之立心如此。蓋幾於古之不言而躬行者。昔漢文稱絳侯。東陽侯爲長者。周嘉郡功曹耳。光武亦稱爲長者。行誼是。取尊卑奚分子。特表而出之。其與曹世叔劉長卿之流。僅以妻傳者異矣。

李靜叔傳

李文淵字靜叔。益都人生九月而能言。蚤孤。嘗詈其師母邢笞之數十。乃折節讀書。以古人爲師。視流輩鮮當其意者。補縣學生有名。靜叔事母孝。就養左右。非應試未嘗一日宿于外。母多疾。而靜叔知醫。故母尤倚之。歲丙戌。靜叔病。母持其手泣曰。爾死。吾何生爲。靜叔亦泣對曰。兒無患也。靜叔夢雨雹及己。身覺以語妻。妻曰。聞姑言夢雹者喪父母。非吉徵也。未十日。母果病。靜叔強起視藥。目不交睫者數日。母歿。靜叔委頓苦惄。間哭無時。病遂劇。自爲文誌其墓。又月餘。死旣含而蘇。然毀瘠日甚。明年春。卜葬其母。有日

矣。先期靜叔復病，自度不能送葬，日夕哭至嘔血不止。比葬，舉家扶柩出，惟一醫者守之。靜叔不食亦不語，閱三日卒。以衰絰斂，年止二十有六。靜叔之兄素伯工古文詞，故靜叔亦好爲古文。所著論辨說凡二十餘篇，嘗言呂黎韓氏之說後人陰祖而陽繼之，如云性有三品，而後云所以爲性者五，曰仁禮信義智蓋已分氣質理義而二之矣。後人謂分氣質理義而言性，自宋儒始，何也？呂東萊疑西銘爲兼愛，以其言一視同仁，而未及篤近舉遠也。然則原人一篇兼西銘之旨而過之矣。後人尊西銘，而不及原人，又何也？又言唐詩于本朝事，每無所忌諱，猶變雅之遺也。忠厚如宋而蘇子瞻，猶以詩下獄，至白樂天爲樂府，諷時政，遂召入翰林。唐詩所以不可及者，豈獨字句之工哉？其議論有根據而不苟同，多類此。靜叔旣沒，同學私謚之曰孝悼子。

論曰：禮言毀不滅性，懼人之過情而忘其身也。雖然，古之執喪，水漿不入口者三日，撻踊無數杖，而後能起。其守禮而不勝喪者，固宜有之矣。孝子之事親也，知盡禮而已，生死非所計也。予旣嘉靜叔之孝，又悲其有志於古人之學，而天不假年，遂以毀死，乃爲敍其事，毋使無述於後云。

奚孝子傳

予嘗讀南史，載會稽郭世通仁孝之風，行於鄉鄙，鄰村大小莫有呼其名者。而其子原平，又稟至行。宋元嘉中，勅改所居獨楓里爲孝行里。及游浙東，訪永興之故址，未嘗不想見其人。羅店在吾邑之東偏，今析

屬寶山縣故民奚士本秀林以孝行族門閭自其未旌之先鄉里無不知有奚孝子者秀林歿而其子緝營又以孝稱鄉里稱奚孝子與昔無異也吾鄉有郭原平而不爲表而出之可乎緝營字聖輝幼入塾從師受業講論語至父母之年不可不知輒簌簌隕涕師大奇之曰非是父不生是子成童時母沈遘疾醫云難治緝營潛剗臍肉作湯以進母果瘳及授室後母病革夜偕其妻朱向北斗稽額乞減算以代母旣歿緝營常宿父所秀林年七十餘冬月惡寒緝營夜抱父足達旦父歿或勸以入粟求仕則曰吾父以貧廢學布衣終身吾敢納粟希頂帶乎兩弟早歿撫遺孤如所生女兄嫁某氏貧不克自存同堂妹適某氏早寡皆依緝營以活分宅居之而婚嫁其子女皆承秀林之志也其它刲義學平糶施櫓多可紀者寶令李公元奮田公聯芳皆嘗題扁贈之子增慶亦能亢其宗昔原平爲郡守蔡興宗所敬欲舉其次息爲望孝史家以爲美談今緝營老矣當事有舉會稽故事求望孝於奚氏其必在增慶矣夫

周山人傳

山人姓周氏諱顥字晉瞻芷巖其自號也世居嘉定城南性磊落不羈而未嘗與物忤家無儋石儲而未嘗以衣食累人讀書不應科舉而於畫獨有神解仿古賢山水人物皆精妙尤好畫竹興酣落筆風枝雨葉無不曲肖吾邑自朱松隣父子以畫法刻竹厥後有沈兼吳之璠周乃始諸人皆精其藝山人更出新意作山水樹石叢竹用刀如用筆不假稿本自成邱壑其皴法濃淡坳突生動渾成畫手所不能到者能

以寸鐵寫之。當時以爲絕品。山人亦雅自負。其運刀時。若絲髮未稱意。雖垂成亦斧以斯之。山人多鬚而善飲。自號髯癡。富人慕其畫。或致金幣。不卽得。偶然欲畫。畫成隨手乞人。無矜色。人有延致之者。或留半年數月。或到卽辭去。嘗游齊魯間。與單朱翁交。相得。朱將往江南。山人附其舟歸。朱之兄方令嘉定。山人不知也。抵吳門。始知之。不告而歸。朱令異而訪之。避不見。逮朱去任。卒於蘇。乃幅巾往弔而哭之。其介特多此類。少時嘗病瘡。一夜醉歸。逢老叟衣冠甚異。出一丸藥啖之。五藏皆煖。忽失叟所在。經昔猶有異香。自是宿疾盡去。終身無纖介之疾。年八十餘善飯健步。不異少年。乾隆三十八年卒。年八十九。族子笠字牧山。亦工畫山水。晚以藝事游淮揚間。諸公爭出重價購之。吾鄉近日言畫者。稱大小周云。

方節婦傳

方節婦毛氏。常熟方炳先之妻。炳先死。節婦慟絕。意若不欲生者。舅姑止之曰。若死。奈兩老人與弱子何。節婦乃不敢言。比葬。將奠於墓所。家貧。僅以一筐載兩肴。而無執筐者。計莫出。或欲試節婦志。謂曰。若能守邪。若卽執筐行。不能守。毋徒自苦爲節婦。卽執筐涕泣之墓上。立雨中。向墓呼號。誓終身爲方氏婦。觀者咸太息。有泣下者。其事舅姑有禮。終身無詬諐聲。所事姑炳先之後母也。以哭子失明。節婦晝夜舐之。數月。一日復明。子曰。恆益。少時節婦教之極嚴。嘗曰。人謂孤子當姑息。吾意殊不然。子不才而貽先人羞。乃不如無子也。節婦年二十九而寡。至九十七乃終。子孫遂昌大矣。雍正元年。有司上其事於朝。有詔

旌表建坊於皇城門外乾隆二十二年節婦之孫春熙以進士官吏部請假省父母拜節婦於堂上時年九十餘視聽猶不衰僉曰節孝之報也以孫貴推恩累贈宜人論曰予聞常熟梅李鄉有方孝子煥先嘗刲股醫其父問之吏部乃知卽炳先弟也夫子事後母能得其歡者尠方氏之後母哭子至於失明知炳先之善事其親矣節婦能成其夫之志事尊章撫藐孤支持數十年以昌其後其高行安可及哉

夏烈女傳

烈女夏氏吳縣廩貢生開鸞之孫儒士汧之女世居太湖濱之金墅鎮幼有至性父母甚愛之許字長洲王本石未昏而本石夭烈女聞之卽不飲食母令之食以不飢對母察其舉動如當時弗之防也其夜母已就寢烈女易衣裳縫紉上下連屬訖擎母帳視之母問兒何不睡曰欲再看吾母耳又至弟妹所泣下若將別者歸至房自經家人莫之知也詰旦戶未啓母呼之不應排闥視之大駭比斂顏色如生衣領間微露紅紙出之則王氏聘帖也時乾隆十四年四月廿六日年二十有六又六年本石兄衣言迎其柩合葬烏龍山之南麓癸丑秋顧子禮璜爲予述其事去烈女之歿四十餘年矣

論曰女子之義從一而終女而未嫁聖人固不以從一之義責之也而或終其身不肯字甚且甘以身殉彼其誠一之至視死如歸務求乎心之所安是亦巾幘中之夷齊矣夫孝與節一也女之孝者莫烈於曹娥先絡是兩女者豈非可以無死者哉君子不強人以所難而尤樂道人之善此予所以賢烈女而樂爲

之傳也。

施節婦傳

節婦朱氏，人處士企汾之女。年十五嫁國學生施鎬元。鎬元長節婦五歲。幼有羸瘵疾。數咯血。久之。疾且殆。節婦手自調藥。焚香願以身代。終不起。節婦痛夫不年且無子。泣不食。舅姑撫之曰。汝夫冢嗣也。異時聲洪有子。當以後汝。汝其勿悲。聲洪生子克仁。既咳而名。卽養於節婦。所克仁稍長就傳。還必問晝所讀何書。燈下課之。覆誦節婦紡棉花遲之。書聲與轆轤聲常相答也。其事舅姑甚謹。姑疾侍左右不解帶者三年。及卒。號泣曰。吾早寡。依姑以活。姑死。何以生爲。每朝夕奠。輒嗚咽失聲。族鄉咸哀異之。節婦今年四十有六歲。守節者三十年。

論曰。古之稱婦德者。曰德言容功。而節義不與焉。不得已而以節義稱。非女士之所樂聞也。雖然。共姜之詩。列於經。班昭之誠。著於史。以閨閣之賢。而令所天姓氏。藉以不朽。其榮多矣。施上舍聲洪。博聞耆古。與予善爲述節婦事。甚備。故采而著之。施氏世居吳縣之洞庭山。今爲嘉定人。

節行錢孺人傳

孺人姓錢氏。嘉定縣外岡里人。歲貢生巢縣訓導麟之曾孫。太學生衍之孫。太學生楷之女。而寶山學附貢生朱鐘勳之元配也。幼而端靜。不苟言笑。祖母曹太孺人。特所鍾愛。八九歲通孝經及女誡。稍長習鍼

菴不假女師。自然精妙。其歸於朱也。事尊章以禮。親鄖咸稱爲賢婦。鐘勳著古能文。有聲庠序。讀書率至夜分。孺人親縫紉。或紡木棉。篝燈相助。未嘗有勸色。洎夫亡。孺人方娠。慟哭誓以身殉。姑王太孺人力止之。越三月。免身泣謂姑曰。吾事畢矣。撫棺一慟。氣息垂盡。亟延醫診之。曰。心脈絕矣。遂卒。年□十□子淮太學生。


太史氏曰。孺人於予爲族姊。予幼時隨侍先奉政公館族父家。孺人尙在室。所居甚幅仄。言笑之聲。未嘗聞於外。足跡未嘗一踰闈也。古者嫠婦稱未亡人。蓋同穴之誼。勇於速死。孺人方盛年。家計饒裕。而志在從夫地下之死靡悔。其節行有足多者。紀之形管。何謝古人哉。

吳孝婦傳

吳孝婦徐孺人。先世自錢塘遷於吳。祖大晟。誥授中憲大夫。父宗潮。早世。孺人幼習詩禮。有識度。大父欲試之。召諸女及女孫輩。陳珠珥於几。令各自擇取。孺人最後取其下者。年十九。歸同邑國學生吳廷鍾。事舅姑如父母。姑嘗遘危疾。閱數醫不能治。孺人潛取金刀。剜臂上肉二片。急投湯劑中。血流霑袖。姑服之得瘥。孺人初不自言也。及姑歿。哀戚盡禮。率娣婦持門戶。壹遵先姑遺規。兩小姑在室。撫視教導。以至遣嫁。雖慈母弗是過焉。敬事夫子。內政嚴飭。所生子女。雖甚愛。有小過。未嘗假以詞色。每諫諸子曰。汝曹讀聖賢書。勿視爲口頭語。出言毋誑。坐立勿跛倚。小節不謹。即下流之漸也。性寬厚。善遇婢使。壺外不聞鞭

答聲於乳媼之子必時其飲食曰若舍若子而食吾子吾忍飢若子乎年三十有二卒時乾隆四十四年四月二日也有子三人嘉泰長洲縣學生嘉濟嘉源國學生季子嘉洽側室所生也

論曰自唐陳藏器本艸拾遺言人肉可療瘻而刲股者遂不絕於史冊獨昌黎韓氏排之以爲毀支體非聖賢所爲是大不然夫忠孝一理也納肝漆身之事聖人未嘗爲而後世罕有議其非忠者何獨於親而惜其肌膚況肌膚本受於親者乎自古求忠臣必於孝子之門重責人以忠而斬予人以孝非持平之論也昌黎之論特謂朝廷不當旌門以表異之耳匹夫匹婦行孝於家豈冀異日之褒揚而爲之雖不旌其門其孝自不可沒也嘉泰從予游有志讀書想其母懿行弗彰請予爲之傳予故題之曰孝婦亦遵前史之例云爾



潛研堂文集卷四十一

碑

紀王廟碑

由嘉定城而南五十里。吳松江之陰。有紀王廟者。祀漢紀將軍。村人奉以爲土地之神。吳俗祀土地神多稱爲王。曰紀王者。從毗俗之稱也。謹按王以身死事。免漢高帝于大難。智勇忠義。赫赫在人耳目。滎陽立廟祀之。世世血食。若大江以南。疑王生平足跡所未至者。予讀陸務觀渭南集。載乾道元年直敷文閣知鎮江府方滋言。府故時祀紀侯爲城隍神。莫知其所由始。然實有靈德。以芘其邦人。願有以褒顯之。有詔賜廟額曰忠祐。則王之廟食江南。由來舊矣。紀出自姜姓。子孫以國爲氏。漢初有紀成者。與王並爲將軍。一死好時。一死滎陽。史漢皆不爲立傳。莫詳其里居世系。成子通。以父死事侯襄城。而王之後嗣無聞。意者史家表次功臣。猶有漏落歟。抑以無後而賞不及歟。將漢誠少恩。妨功害能之臣。抑其賞而不行歟。然傅斯蒯成之傳具在。讀史者罕能誦其全文。獨王之事。閭巷皆能言之。可知垂名之遠。不在乎列傳與否。襄城之侯。閱四世以無後。國除而王廟食百世。始自滎陽。逮于江左。又知食報之長。不在乎得侯與否也。

然則天之所以待忠義者固不厚乎予少時授徒塢城東顧氏往來過斯廟拜謁神像肅然起敬屈指垂三十年矣乾隆甲午夏村中耆老寓書京師令予文其麗牲之石因作神絃曲俾春秋歌以侑祀其辭曰神之來兮雲間風颯颯兮晝寒黃屋兮左纛呼万歲兮前導憤王兮重瞳玩之兮掌中身雖焚兮不朽立廟食兮長久江之南兮東海涯魂魄游兮無不之聰明兮正直尸而祝兮社而稷神具醉兮福我民俾孝弟兮睦姻不鬪兮不訟朝出耕兮夜誦木棉黃兮藍艸青嘉穀蕃兮蟲不螟操豚蹄兮報祀歲其有兮自今始

甘肅提刑按察使司按察使宋公神道碑

公諱弼字仲良別字蒙泉山東德州人先世有諱性者仕明至刑部右侍郎佐夏原吉治浙西水利有功曾祖炳肅州兵備按察司僉事祖兆李鄰城縣教諭贈儒林郎父來會贈奉政大夫公少而英特補博士弟子歲科試恆屈其儕故事學使者間歲拔諸生之秀者州縣學各一人貢成均自鄰城至公三世皆登斯選士林榮之乾隆三年舉順天鄉試十年成進士改庶吉士散館授翰林院編修未逾月御試乾清宮入高等方擬擢用以父憂去職服闋還朝充武英殿提調續文獻通考纂修官以省母請假家居數年事生送死以禮還朝署日講起居注官扈從南巡宣示御製詩輒與賡和再充續文獻通考纂修官同事十數人皆公後進徵文獻者咸以公爲歸性勁直不隨人俛仰酒酣縱談古今意氣豪邁然非先哲法言不

道也。錢塘梁文莊公總裁書局論議或與公不合。公往復辨證必盡其說。文莊始雖愠而卒推服之。二十八年御試正大光明殿引見有旨令以原官休致而總裁諸公合詞奏公學問篤實著述專勤請留之書局由是供職如故三十年遷右春坊右贊善其秋授分巡鞏秦階道陞辭召見奉事大稱旨到官卽往伏羌徵禮諸縣察地震民被災者振之明年調整飭甘肅道所治在嘉峪關內七十里當西域孔道使者往來無虛日公訪問西域風土物產古人所未紀者各綴以詩凡百篇募民願徙烏魯木齊者得三百戶公親勞而遣之出關無一人滋事者盜匿高臺山詭云采金旬日聚三百餘人公聞之親率兵仗捕其魁置之法雪山文殊口水暴至注肅州南郭壞民廬舍公登城具牲牢爲文祭之水果止玉門之牛尾山出硫磺朝議令肅州募民采煉以供巴里坤軍用初未有定數也州募商煉得三十萬斤報布政司司移問安西提督則荅以歲需不及二千斤而州續得磺又三十五萬斤有奇布政司以州擅動庫銀所貯磺無所售日久且徵敗將責償于官吏公檢州庫舊磺經三十餘年無徵敗者乃上議制府曰安西重鎮也儲火藥宜多提標諸營歲取磺巴里坤哈密二庫儲之可補官庫之乏頃聞烏魯木齊遣人購磺肅州是安西歲需不止二千宜於玉門縣貯三十萬斤以待安西各標及烏魯木齊之用甘肅提鎮兩標歲取磺肅州州見貯僅支三四歲宜分二十萬斤貯之州庫又甘肅所屬諸鎮皆于蘭州買磺州存磺亦少若令赴買玉門而減直以予之則餘十五萬斤亦可分銷議上事得行果便公之通達政體多此類三十三年三月

擢甘肅按察使下車益以廉公自持與僚屬言必咨民生利病課政之勤惰爲殿最而痛抑其奔競者治案牘恆至夜分不假手賓友嘗行金縣有司供張甚盛笞其僕而撤之公具奏請陞見既得旨以九月上道行至洛陽遘疾十月二十九日卒于寓舍春秋六十有六啓其橐無餘財故人子知洛陽縣張君映台實經紀其喪云公少以才名雄齊魯間登館閣二十年優游著作之林若將終身及聖天子付以方岳之任正身率下事有利于官民者排羣議爲之一矯俗吏媿娶骯靡之習天奪之年未竟其用要古所稱有守有爲者公實兼之世多訾儒生迂闊不通世務豈不謬哉公之學博而醇詩文皆有法度所著詩集八卷思永堂文稿四卷撰集山左詩百餘卷廣川詩鈔二十卷州乘餘聞二卷家故貧教授生徒自給旣貴弟子著錄益衆分教庶吉士凡三科恆以師道自尊少所假借家居時巡撫白公鍾山延主灤源書院遠近負笈從之公教人爲文尙先正程式勿逐時好而取科第者轉多歲已卯大昕典試山左榜出書院生中式者十有八人公喜甚貽以詩有云伊予久伏處馮軾觀羣閨決勝卜其長億占每幸中亦一時美譚也夫人劉氏賢而能治家先一歲卒子二人荔藻女三人以三十五年三月戊寅朔合葬于馮家砦祖塋之次先期公之長婿張子治致書乞銘公墓道之石大昕於公爲後進同在書局又同直講筵與公爲文字交有年故不敢辭銘曰

猗宋氏哲人繼漢司空唐太尉公之先潞長子徙安德今幾世學早成五經笥少所可寡所嗜老著作師

後輩文章醇。經濟備。秦隴西國右臂。撫吏民布威惠。古爲徒宦亦遂生也。直視松檜鬱佳城。長河裔其人。存百千歲。

鎮守江南狼山總兵官左都督前提督廣西全省軍務總兵官許公神道碑

鎮守江南狼山總兵官前廣西提督易州許公之葬。其孤子宏猷。清猷。宣猷等。旣請禮部侍郎倪公承寬爲銘。納隧中。復踵予門。泣請文其神道之石。予以內直無暇。久不克爲。而清猷等請益勤。乃列公生平言行尤著者。俾歸勒石。以慰孝子之思。公歛人也。自曾祖榮祿公始徙保定之滿城。後又徙易。三世皆以公貴。封贈階至一品。公以乾隆元年登進士。授御前侍衛。歷江西贛州左營遊擊。廣信營參將。廣東督標左營參將。肇慶協城守副將。調廣東督標中軍副將。以太夫人憂去官服除補湖北黃州協副將。擢鎮守江南壽春總兵官。調江西南贛總兵官。遷提督廣西全省總兵官。以公事詰吏議當鐫級。仍授江南狼山總兵官。積階至榮祿大夫。春秋六十有一。終於通州官舍。公歟歷中外三十餘年。精勤如一日。文武僚屬皆推誠相與。終始無間言。視兵民一體。未嘗以刻覈從事。其在廣信遇歲旱。米價翔踊。民待賑者十室而九。郡守適以事它出。知縣不敢任其事。公遽以狀白行省。出積穀數千斛。減價糶之。民乃得安。在肇慶日增城民王亮臣等聚衆謀逆。公奉制府檄入藍分華峯諸山場。搜洗巢穴。皆駢首就擒。無一漏網者。公初莅贛州。有威惠及總戎南贛。兵伍聞公至。皆相戒曰。勿欺許公。粵西左控交趾。右界滇黔。蠻獠錯居。瘴癘

時作公巡歷兩鎮七協及諸土司關隘率兩歲而徧輕裝減從未嘗以供億滋累柳州駐節之所秋冬恆多火災公閱城廂內外多艸舍而兵士所處什居六七卽奏請支公庫生息銀假與兵士令各以陶瓦覆屋行之數年火患遂止公又以效力武舉難以得缺因與制府議計通省千把出五缺之後補用武舉一人又以粵西距京遼遠部推武職到任動輒經年事多稽閼奏請照它省預保之例得旨允行大兵之征緬甸也詔粵西協濟戰馬先後凡二千餘匹公督率所屬具芻茭以次遞送又致火藥數萬斤並如期而至公又陳請赴永昌軍營自效上以粵西要地資公彈壓優詔不許公在狼山夏旱率屬步禱烈日中已而得雨盛暑親至海口呂四場閱水師戰船教以陣法竟以積勞成疾至不起嗚呼可謂勤于王事也已公事親孝方在宿衛聞父榮祿公之訃一晝夜馳三百餘里至家號慄欲絕季弟蚤卒撫其孤如己出居鄉恭儉退讓嘗訪友郊外乘一騎一童子自隨見者不知爲貴人也其它敦交好義多有可稱述者不具書公諱成麟字瑞符號慶堂考存智祖考天霖曾祖考有倉皆未仕夫人同里崔氏生子二人國學生宏猷附貢生清猷側室畢孺人生子二人國學生宣猷徵猷女四人皆適士族孫二人元會保定府學生元愷曾孫一人其葬以某年月日銘曰

桓桓許公萬人俊敦詩說禮學自奮胸藏六韜演八陣對策大廷科第進宿衛三殿恭以慎進止位不失尺寸宣力江右初啓輶分閩嶺外益有聞帝眷優渥擢方鎮肘後常繫斗大印令肅千軍整轡勦惠孚百

城頌韶巒灘江清深狼山峻紀公威德磨不磷服官千載篤忠蓋甲子甫周數何靳佳城鬱鬱松柏隱我文紀實可傳信

封資政大夫大理寺卿加十四級王公神道碑

大昕弱冠後卽從當代賢士大夫游竊取其緒論得粗知古人立言之旨其交最久而莫逆於心者則今大理寺卿王公祀也所居相距不百里嘗扁舟往訪升堂拜母修子姓禮大理嘗語予曰吾先子志希古人不求聞譽于世每言孔門四科言語政事文學皆在德行之次顏子居陋巷終日不違如愚孔子獨贊其賢謂羣弟子莫能及漢黃叔度徐孺子管幼安皆終身隱約而行誼在三公之上蓋行之修者於人世文章功業有弗藉焉而富貴利祿更無足言矣大理又言某就傳後每夕先子輒授以通鑑事十數條次夕令覆講必精熟乃已又取古來名臣碩儒自屈子而下訖于明季凡百有二十人手錄其本傳俾誦習之題曰百世師錄某謹藏篋中月讀一過手澤尙如新也大昕旣重大理之賢因是知其淵源有自大理以進士召試入官典司樞要出參演蜀軍事飛書艸檄出入矢石間者十載及愷旋敍功進登九列以文臣賜戴孔雀翎恭遇孝聖憲皇后升祔禮成覃恩誥贈其考資政大夫大理寺卿加十四級今春從駕有事泰東陵還朝乃上書陳情請假歸治先人窀穸事天子嘉許卽於二月奉太夫人還里門卜以七月壬辰葬資政公于岷山縣之雪葭灣以元配陸夫人祔從先人之兆也先期具書狀請大昕爲文表於神道

昔歐陽子瀧岡之表自爲之文大理今之歐陽子也乃不自爲而求之友者謙也中朝鉅公之能文者多矣獨求之家居退閒之故交欲其可信也大昕雖不文其何可辭謹按資政公諱士毅字鴻遠曾祖懋忠自浙江之蘭溪遷於青浦城西十八里珠家角蓋在泖水之陽祖之輔考璵皆以大理貴累贈至資政大夫公九歲而孤奉母沈太夫人日必具酒肉自奉則取其最穀者伯兄出爲人後而貧不自給常分錢米遺之仲兄沒無後公歲時設主祭必泫然流涕其治家有法婢子年十四五以上不令侍左右既長貧不克贖者還其券而遣之里中無賴子挾小嫌過門戟手罵遣人謝之弗與校好行善或授以功過格守之數年忽曰此道家言也儒者自有法乃擇六經語類而列之以爲謹身寡過之方其目十有二自是動中規矩行無瑕尤幾于古之不言而躬行者公卒於乾隆九年八月二十二日春秋六十四初贈文林郎內閣中書舍人加一級再贈奉直大夫吏部考功司主事加一級三贈至今官娶陸夫人後公口年歿春秋口十有口初贈孺人再贈安人三贈夫人側室錢氏初封太孺人再封太安人三封太夫人有子一人即大理公也孫女一適吳縣監生嚴榮銘曰

圓泖之水黝而深清冲然善下潤物無形允矣君子如水不竭潔匪近名虛能容物以古爲師與天爲徒環堵蕭然樂亦在吾德修于身克昌厥後綸誥宦章襄及祖考井樟旣卜樂哉斯邱鄉里聚觀車前八騶富貴匪榮文行是尙飲水知源百世是仰

詹事府詹事盧公神道碑

詹事盧公之葬也。其孤孫達蔚不遠三千里踵予門求文志其墓。又請爲文刻諸墓道之石。某舉禮部試謬爲公所薦及登館職。公又爲教習。旣而同直講筵。同列學士。公嘗舉歐公與王禹玉事作詩見贈。又嘗置酒召門下士從容言身後之文。當屬之錢生。荏苒二十年。公久歸道山。而某亦衰病。脫朝籍者數年矣。言猶在耳。其敢忘諸。謹按公諱明楷。字端臣。晚年以鈍齋自號。世居贛州之寧都縣。今縣升爲州。直隸江西行省。故公爲州人。由選拔貢生。中順天鄉試。授翰林院待詔。登進士第。改庶吉士。授編修。遷侍讀。又遷侍講學士。復左轉侍讀。進右春坊右庶子。復爲侍講學士。此公之資歷也。初入武英殿充校對。後由纂修提調而至總裁官。初入詞館協修記注。尋爲日講起居注官。由署而充。在講幄十有四年。嘗預刊修經史。及律呂正義。續文獻通考。昭忠列傳。皆爲纂修官。主陝西河南兩省鄉試。及順天武鄉試。及同考會試。總裁武會試。教習庶吉士。稽察右翼覺羅官學。提督河南學政。此公之差遣也。諸館纂修官皆詞臣久次者爲之。公以貢生。校刊經史。特與纂修諸公一體列名。公爲庶常日遇慶典。推封祖父同輩。屢得從六品階。公獨以前修書議敍加級。得五品誥樂部向。以諸王部院大臣兼領。公在侍讀奉旨撰擬樂章。特兼樂部行走。其爲學士也。適閣學多奉使在外。卽命公直內閣代閣學批本。此公之榮遇也。公少而孤露。苦志植學。以成其名。博習經史。蘊釀爲文詞法度。必準先民。相國蔣文恪公慕其名。延致之。凡經進賡和之作。多

屬公點定在詞館遇大典禮進賦頌輒爲諸公傳誦尤精於律呂清濁高下審辨不失繁委所撰樂章播之管絃列於法部此公之文藝也公於制義鑒裁精審每入棘闈焚膏校閱惟恐不及故所甄拔號稱得人在中州視學抑浮競崇實學所選拔士皆擇其名實相副者此公之鑒識也公和平樂易善戲不虐雖家人未嘗見其疾言遽色狀審于義利之辨苞苴之餽不至其門梯媒之語不入于耳家無長物而口不言貧尊師重友久要不忘旣沒而故交知舊多行哭失聲者此公之厚德也公生于康熙四十一年九月八日終于乾隆三十一年八月十五日春秋六十有五其葬以乾隆四十七年十月二十六日夫人曹氏祔焉其世系子姓之詳則於墓志見之故不復書銘曰

金精翠微峨峨百丈是生偉人儀觀儻朗囊括百氏攝其菁華大放厥詞而法而葩有司拔尤升之太學遂直內殿經史分校律呂之編公與考稽荀阮房范宿悟與齊迺舉京兆待詔禁苑擢第南宮載登三館螭頭侍直職在記言曲江風度中朝聚觀再踐學士論思清切出持冰鑑入趨瑣闈天子有命汝長宮僚文學侍從班資最高公今已逝公名不沒茶山之詩容齋之筆陽都城南鬱狀新阡達者有後相爾嗣孫

宗人府丞曹公神道碑

宗人府府丞汾陽曹公學閔之葬禮部侍郎朱公珪旣爲銘其藏而公子錫齡祝齡復遺書請予文其麗牲之石予與公同登進士久而以道義相取譬諸艸木臭味無差池也公又嘗稱予文以爲有法述德感

舊後死者之責其何敢辭謹按公字孝如號慕堂曾大父復琦大父應璽父曰英皆以公貴贈中議大夫太僕寺少卿加一級公幼孤勤苦自立舉辛酉科鄉試甲戌成進士改翰林院庶吉士在館六年授檢討卽充武英殿纂修官以院長奏入院辦事改補河南道監察御史是時準噶爾回部初入版圖公奏請增修大清一統志以昭本朝畏懷之盛有詔允行轉刑科給事中又轉吏科掌印給事中會三輔亢旱公奏請清理刑獄將朝審三次緩決人犯減等發落卽日召見下詔施行公在臺垣八年所陳奏皆有關朝廷掌故及於民生吏治有裨益者累擢鴻臚寺少卿光祿寺少卿通政司參議太僕寺少卿初公在給事言會試舉人宜徑由州縣出結送部以防展轉需索事下禮部議格及是復奏申前說上以卿寺無言事之責且近明季爭辯陋習下部議降三級用頃之復補鴻臚寺少卿扈蹕熱河召見詢歷官本末甚悉尋遷內閣侍讀學士會天子册建辟雍告成將行臨雍禮而公昔於御史時曾以此事入告上憶公前奏特旨嘉獎令吏部於應陞缺出請旨擢用明年正月詔於乾清宮賜千叟宴公年六十有七得預有御製詩刻及鳩杖文綺之賜尋擢宗人府府丞稽察覺羅右翼宗學九寺列卿惟宗丞班次最高公由學士踰次得之實異數也公體素羸弱中歲得導養術神氣完固而素不耐寒嗽逆時作遂有止足之志是歲十月陳請解任詔以元官致仕公性耽山水未第時往來吳越縱游東南諸名勝及登仕籍三十餘年公事之暇輒與三四知己出國門游賞如潭柘戒壇祕魔厓香界寺往往流連信宿或策蹇行冰雪中觀者以爲神

仙中人治家質素金玉玩好之具不陳于側午後輒埽地焚香觀心調息超然有塵外之想生平不臧否人物而胸中界限分明嘗曰人各有所偏但當棄短取長否則無一人可交矣詩文皆據寫性情不事藻飾晚年課子讀書尤以浮華馳逐爲戒故諸子咸以文學自奮公雖移疾脫朝簿而長子方官詞垣侍養如意公旣樂而安之因令次子旋里營菟裘爲終老計旣而喘嗽加劇以乾隆五十有二年十二月八日終於京邸春秋六十有九夫人任氏丁酉科武舉宗讚之女長子錫齡乙未進士翰林院編修次祝齡己酉恩科進士戶部額外主事孫八人汝淳汝瀾汝淵汝沆汝洵汝涵汝藻汝淳孫女五人公學行誠篤未嘗邀訐求名而居家莅職清慎無玷當代名流咸慕與之交而介然不可干以私在都下時正陽門外失火延燒數千百間鄰里焦燬殆盡獨公屋歸然無恙人以爲厚德之報云銘曰

宗正之司總以維藩丞哉其貳三品崇班堂堂曹公樂易坦白木天瀛州柏臺梧掖歟歷五寺遂陟宗卿介不絕俗直非近名公有封事天子嘉只公旋引疾天子愈只知止不殆老氏所云葆真恬惔以養谷神憶同唱第二百四十唯公與我氣同志合聞義相告有過亦規四海元伯千秋鍾期恆齡雖辭令譽長在馬鬣是封過者下拜

潛研堂文集卷四十二

墓誌銘一

巡撫福建兵部右侍郎都察院右副都御史前太子少保協辦大學士刑部尙書莊公墓志銘

上御極之四年詔以廷試進士撰擬頌聯獻諛非體且啓請託之弊命大臣集議制策當取通達治體以漢鼃錯董仲舒唐劉蕡宋蘇軾爲式於是番禺莊公以第一甲第一人登第讀卷日拆號得公名天顏喜甚引見授翰林院修撰入直南書房越三年公弟有信成進士引見公適以起居注官侍直上顧問公遂得選庶吉士其冬兄弟同請告歸省海內傳爲盛事假滿還朝遷右春坊右中允進翰林院侍講遷侍講學士擢光祿寺卿丁資政公憂卽家拜內閣學士服闋入都遷兵部右侍郎提督江蘇學政轉戶部右侍郎召還供職尋充江南正考官再視學江蘇卽除江蘇巡撫莅事六載丁太夫人艱扶柩南行有詔擢江南河道總督以居憂未之任坐在蘇日罰贖事失當逮繫法司論如律詔特貰罪令護喪還籍後赴軍臺自効方詣謫所中途卽授湖北巡撫歲餘仍調江蘇巡撫未行復調浙江巡撫莅事四載復調江蘇加太子少保逾年擢刑部尙書協辦大學士仍留辦巡撫事乙酉冬入都供職未幾坐劾段成功事逮問頒繫

半載有餘復授福建巡撫乾隆三十二年七月二日寢疾終於福州官署享年五十有五公以文學侍從之臣荷聖天子深知出膺節鎮誓以清勤自勵初在江蘇晝接見僚屬夜治文書或至漏盡不少休癸酉夏秋之交淮揚諸郡水公親往察勘撫卹得旨截漕百二十萬石出帑銀五百萬兩以備振濟民乃得蘇乙亥大江南北復以災告公草奏自言奉職無狀數千天和并陳諸採荒之策上皆允行所費內府白金凡千餘萬督率屬吏檢視給散胥役不得侵漁明年夏民多病疫公首捐俸錢令有司察民病者予藥死者予棺并檄管內推其法行之湖北督撫並駐武昌公事往往齟齬公在楚歲餘與總督碩公和衷共濟始終無間人以爲難及撫浙之始浙西三郡以風雨蟲傷米價騰踊而江南亦歉商販不至公奏請動司庫銀三十六萬委官往湖廣採買有旨命留湖南漕米十五萬石并碾倉米五萬石運浙糶濟富戶知楚米將至價不得踊米亦漸出而自冬徂春米之來自楚者舳艤相望分撥諸郡減直以售歲雖儉而民不饑矣錢唐江入海之處有三亹曰南大亹曰中小亹曰北大亹乙丑以後水行中亹者十餘年己卯歲改趨北大亹公承詔抵海寧閱柴石塘登尖山渡江周遭履勘首以購芻薪加築土堰添建坦水爲請旣而水勢直齧塘根以預備得無患又奏復海塘兵專司負薪運土甃石下椿設守備一員千把外委十二員分界防守省民夫無算海寧之老鹽倉向以土活沙浮祇立柴塘壬午歲聖駕南巡議改石塘命相國劉文正公統勳今相國高公晉與公先往察勘果以活沙不能立椿上復親歷隄上指示形勢令修柴塘增

坦水加薪價公承命鳩工庀材尅期蕩事又用前人竹絡之法編竹爲篋寔以巨石鱗次櫛比以衛塘根其秋風潮大作石塘間有崩裂而柴塘獨無恙公之力也是時秋霖之後水漲久不退公親往嘉湖兩郡察勘知水歸太湖之道多淤而太湖下流亦多壅閼因請浚烏程長興境內七十二灘并遣官至江南按行三江故道疏入尋有改撫江蘇之命公遂親往探尋脈絡得其要領建議大修三江水利具摺入告其略云太湖北受荆溪百瀆南受天目諸山之水爲吳中巨浸而分疏之大幹則以三江爲要三江者吳淞江婁江東江也東江自宋已湮明永樂間別開黃浦寬廣足當三江之一今亦謂之東江三江分流經吳江震澤吳元和崑山新陽青浦華亭上海太倉鎮洋嘉定十二州縣之境其間港浦縱橫湖蕩參錯大概觀之無處不可分洩似亦可安於無事然百節之通不敵一節之塞數港之洩不及一江之壅其勢必有所阻查太湖出水之口不特寶帶橋一處如吳江之十八港十七橋吳縣之鮎魚口大缺口爲湖水穿運河入江之要道今亦不無淺阻又如入吳淞之龐山湖大斜港九里湖澱山湖激浦向稱寬深足資宣洩者爾來小民貪利偏植茭蘆圈築魚蕩亦多侵占劉河古之婁江也今河形大非昔比舟楫來往必艤舟待潮岷山外濠爲婁江正道淺狹特甚蘇州之婁門外江面僅寬四五丈偶遇秋霖衆水匯集江身淺窄先爲潦水所占俟其消退然後湖水得出爲之傳送而上游已漫淹矣東南財賦重地水利民生大計若及早治之事半而功實倍今籌所以治之之法當於運河以西凡太湖出水之口皆爲清釐占塞俾分流

無阻其運河以東三江故道惟黃浦見在深通但於泖口挑去新漲蘆墩三處足資宣洩其吳淞江自龐山湖以下婁江自婁門以下凡有淺狹阻滯之處宜濬治寬深令上源所洩之數足相容納其江身所有植蘆插簖及冒占之區盡數剷除嗣後仍嚴爲之禁則水之停蓄有所傳送以時並即以挑河之土加培圩岸見有牕座去海太近難於啓閉者酌量改移庶渾潮不入清水盛強而海口之淤亦將不挑而自去總計所需雖覺浩繁然散在十二州縣通力合作實亦無多民間聞有此舉咸樂趨事願以民力爲之但分段督修仍須官董其成且工費繁多若待鳩集財力而後興工不無稍稽時日仰懇聖恩准于公項內先行動支興工仍於各州縣分年按畝徵還則民力旣紓工可速集奏入報可於是選紳耆賦工役先疏橋港次及河身茭蘆魚蕩之圈占者除之城市民居之不可毀者別開月河以導之工始于癸未之十二月至甲申三月告成几用白金二十二萬有奇公再撫蘇有旨仍兼管浙江海塘先後增築魚鱗石塘凡若干丈松江太倉沿海亦有石塘而土塘居什之八九公請如浙塘之法編竹簍實石護塘根以禦海潮公之盡心于水利海塘其大者如此其撫福建也預識族人居晉江者勿至省卽至遺門者謝之曰我爲封疆大臣嫌疑當避且俟去此之日再相見今則不敢也洎公之薨晉江宗人始來會哭咸稱公之公正爲不可及維公奮跡嶺海以文學登巍科不及十年而躋九列貳六卿皆聖明親擢不由薦援天子察公識度閑遠材任公輔東南重地膺委寄者十有餘年入領尚書遂參大政中間兩遭顛躓賴天子仁聖終

保全之重建節旄恩禮罔替天不假年未臻中壽然海內士夫識與不識聞公名靡不歎羨謂科目得人之盛也嗚呼休哉公生而穎異少爲諸生試輒冠其曹偶好吟詠日有程課書法圓勁出入顏平原趙吳興之間片楮隻字人爭藏弆以爲榮在禁林日經進詩文數被獎賞及車駕省方公以方岳大臣扈從輒命廣和御製詩篇上幸嘉興之煙雨樓特召公至行營給札聯句詩成書以勒石羣臣莫及焉公諱有恭字容可號滋圃先世爲晉江望族父資政公始徙居粵今爲番禺縣人曾祖某祖某父奕仁皆以公貴贈資政大夫江蘇巡撫夫人楊氏某公之女子一士斌國子監生女二附貢生何文通壬午舉人龍川縣教諭羅永楠其婿也公沒後九年公子士斌卜窀穸於某鄉之原以某月日葬先期屬大昕爲銘大昕久從公遊今奉使嶺南又得會公之葬奚敢以不文辭銘曰

九曜降精生傑人驛鷗得路鸞鳳騫讀書百篇筆有神大廷對策陳萬言龍頭首擢侍從班文章經濟夙抱全手持玉尺分剖均三吳善類推獎勤帝曰汝諧撫吾民百城保障氣若春水旱拯恤無因循清波可活涸轍鱗築塘捍海土石堅或編竹絡楗茭薪震澤底定三江分原委脈絡細討論尾閭勿壅流沄沄惠流越角兼吳根出乘八騶擁節幡入長六曹參絲綸平生溫飽志不紛盤錯歷盡能自完封川莫南海倫瓊山邱江門陳科名事功相後先惟公兼之在一身崇岡鬱鬱宰木繁千秋萬歲名不湮

光祿大夫經筵講官太子太保刑部尙書秦文恭公墓志銘

太子太保尙書秦公以經術篤行知名海內。起家詞苑官登極品歲甲申四月以疾請解任溫旨不許八月復具疏乞回籍調治詔允所請仍懸缺以待公既受命買舟南下疾遂革以九月九日己時薨于滄州訃聞天子軫惻賜白金千兩彔喪具令有司議卹典祭葬如制謚曰文恭明年春車駕南巡至無錫幸寄暢園御製詩有養疴旋里人何在撫景愀然是此間之句寄暢園者公家別業也上追念舊臣形于翰墨如此公可以不朽矣其九月孤子編修泰鈞等將葬公于某原先期遣一介走京師述公遺言請大昕爲文誌其墓大昕于公爲年家子又嘗主公邸第日月不居知己云逝文雖不工其何敢辭謹按公諱蕙田字樹峯號味經宋贈龍圖閣直學士觀之二十六世孫世居無錫爲右族雍正初析無錫置金匱縣故公爲金匱人曾祖考德澄祖考松齡順治乙未進士日講官起居注左春坊左諭德考易然常州府學生妣顧氏本生考道然康熙己丑進士日講官起居注翰林院編修改禮科給事中妣徐氏胡氏生母浦氏三世皆以公貴贈光祿大夫刑部尙書妣皆一品太夫人公以乾隆元年賜進士第三人及第授翰林院編修入直南書房丁浦太夫人憂服闋補原官教讀上書房遷侍講進右春坊右庶子改通政使司右通政擢內閣學士遷禮部右侍郎丁給諫公憂服闋補禮部左侍郎調刑部右侍郎轉左侍郎兼理國子監算學充經筵講官擢工部尙書兼理樂部調刑部尙書加太子太保累階至光祿大夫公至性過人方未遇時給諫公以藩邸事牽連頑繫十餘年間檻車南北炎雨悲風吏卒雜前公隨侍膝下百方營護夜分就

寢流涕交頤然不令給諫公知之及通籍之始朝廷赦書屢下給諫公猶不得援例寬釋公以新進詞臣輒伏闕陳情乞以身贖其略云臣本生父某身罹重罪已荷天恩曲宥祇因催追銀兩力不能完仍行圈禁迄今九載年已八十衰朽不堪本年五六月內侵染暑濕瘧癥時作寒熱交攻奄奄一息幾至瘐斃羈所情關骨肉痛楚難忍臣雖備員禁近而還顧臣父老病拘幽旣無完解之期更無久存之望方寸昏迷不能自主誠不忍昧心竊祿內慙名教伏惟皇上矜慎庶獄有一線可原者概予寬釋當此聖明孝治之朝更逢薄海祝網之日惟有籲懇鴻慈格外鑒宥丐臣父八旬垂死之年得以終老牖下臣願革去職銜効力犇走以贖父罪奏入天語嘉歎遂有寬釋之詔而未完之銀亦併豁免由是給諫公優游林下者又十年公受詔感泣誓以身許國而上亦鑒公忠孝有大用公之志矣公在學士時陳科舉學校六事在禮部練習掌故夙夜匪懈在刑部執法平允尤爲上所倚重同僚或持異議公援引律例必如所擬乃已遇司屬嘵笑不苟其以才能見者則薦引之不遺餘力衆莫不憚其嚴而服其公也公歿之後部中讞獄偶不當上輒舉公名歎惜不置以是知公之盡心于職矣公立朝三十年治事以勤奉上以敬剛介自守不曲意徇物公退則杜門謝賓客著書不異爲諸生時後進有通經嗜古者獎借不去口蓋天性然也公幼而穎悟及長從給諫公于京邸何屺瞻王若林徐壇長諸先生咸折輩行與之交中歲居里門與蔡宸錫吳大年尊彝龔繩中爲讀經之會嘗慨禮經名物制度諸儒詮解互異鮮能會通其說故于郊社宗廟宮

室衣服之類尤究心焉上御極之初江陰楊文定公領國子監事薦公篤志經術可佐教成均既而直內廷課皇子講讀益以經術爲後學宗嘗言儒者舍經以談道非道也離經以求學非學也故以窮經爲主而不居講學之名生平所爲文號味經窩類稿者凡若干卷而說經之文居其大半公夙精三禮之學及佐秩宗考古今禮制因革以爲禮自秦火而後漢儒保殘守缺什瘞存一朱子生于南宋嘗有志編次朝廷公卿大夫士民禮爲當代之典而所撰儀禮經傳通解體例未備喪祭禮又續自黃氏楊氏未克竟朱子之志迺按周官吉凶軍賓嘉之目撰爲五禮通考二百六十二卷先經後史各以類別凡先儒所聚訟者一一疏其脈絡破其癥結上探古人制作之原下不違當代之法殫思二十餘年藁易三四而後定自言生平精力盡于是焉少喜談易謂易者象也先儒詳于言理略于言象故撰周易象義日箋若干卷又謂詩三百篇古人皆被之管絃漢魏以降始失其傳然天籟之發今猶古也因與同志講求欲以今曲歌古詩庶協詩樂合一之旨又以近代聲韻之書未有善本奏請刊正上命公與武進劉公任其事公建議言古韻二百六部今併爲一百七韻如元與魂痕當析爲二般韻宜併入真韻不當入文韻上聲拯韻去聲證韻宜分出各自爲韻又考定四聲表兼采岷山顧氏婺源江氏之說欲通古音于等韻時公已遘疾而往復辨論猶斷斷不置也公之著述其大者如此若夫律呂算數以及醫方堪輿星命家言皆泝流窮源得其要領雖專門名家者亦歎以爲莫及嗚呼可謂有體有用者已公生于康熙壬午十月十九日歿

時年六十有三夫人侯氏太學生某之女封一品夫人子四人長泰鈞乾隆甲戌進士翰林院編修次復鈞長殤次鼎鈞太學生次上鈞女二人長適雲南劍川州知州嵇承豫孫男二人沐日沐恩孫女六人銘曰

西神峨峨二泉粼造物鍾英生偉人雙孝之澤流十世啓佑祖考清華繼惟公至行爲士宗歷艱而亨純孝通明刑十載邦憲司三刺三宥公無私斯人一去難再得同朝盡傷至尊惜政事文學一身兼沒而言立公何慙城西新阡卜云吉千秋識之字不滅

詹事府詹事盧公墓誌銘

詹事府詹事兼翰林院侍讀學士寧都盧公以乾隆三十一年八月十五日終于京邸春秋六十有五子立瀛立淇扶櫬歸里越十有七年兩公子亦先後下世矣諸孫等始卜十月二十六日葬公於州城南第一橋之新阡公嘗買彭氏故園爲讀書之館至是撤其館而爲兆域焉以公之樂斯邱也先期次孫達蔚踵門來求文志公墓大昕公門下士知公最深其何忍辭乃泣而序之曰昔錢文僖公言朝廷之官雖宰相之重皆可雜以它才惟翰林學士非文章不可歐陽文忠公嘗亟稱之公以閑覽博物起家翰林待詔由館職登學士陟宮尹立朝二十餘年無一日離文字之職入侍講幄出司文衡朝廷大著作輒預撰述非老子文學安能上結主知若此哉公初以諸生選拔入成均選充武英殿校對會詔刊正十三經二十

二史諸總裁言公學問周洽。讐勘精審。遂得與纂修之列。纂修官皆詞臣爲之。公以貢生預焉。蓋異數也。和碩莊親王尙書張文敏公受詔編次律呂正義。又薦公爲纂修官。張公嘗語人曰。盧君妙解律呂。當今之蔡中郎阮仲容也。尋舉順天鄉試。試授翰林院待詔。辛未歲成進士。改庶吉士。卽充武英殿纂修官。明年散館。授編修。又明年典陝西鄉試。又明年充會試同考官。分教庶吉士。轉武英殿提調官。充日講起居注官。又明年遷侍讀。又明年擢侍講學士。又明年協辦內閣學士批本事務。充武會試副總裁官。遂爲武英殿總裁官。又明年左遷侍讀。又明年典河南鄉試。時同受命者侍讀學士朱公珪。階資皆在公前。而轉爲公副。其冬和碩莊親王等奏公兼樂部行走。撰擬樂章。樂部皆部院大臣兼之。公以五品詞臣廁其間。尤異數也。又明年遷右春坊右庶子。典順天武鄉試。又明年復爲侍講學士。又明年提督河南學政。閱三載。任滿還朝。其明年三月擢詹事。公年五十始登第。登第後無歲不霑恩渥。位躋三品。駿駿柄用。而遽以積勞致不起。悲夫。詹事古稱宮相。今則職務清簡。而特爲詞臣最高之班。由侍從擢卿貳者。往往踐歷此職。不久卽遷去。其文學尤異。上意方鄉用。而旋終于此者。三十年間。惟嘉定張公鵬翀。及公兩人。此海內所深惜也。公博涉羣書。不名一家。詩文春容和雅。無粗厲抑塞之習。屢主文柄。抑奔競。崇實學。所甄拔多知名之士。於樂律易卜。尤極敏悟。嘗依焦氏易林。言人休咎。多奇中。雖專門弗逮。公接物甚和。而持身嚴正。輕財尚義。不爲家人生計。初入都。張文敏公。蔣文恪公。皆器重公。引爲上客。終未嘗少干以私。同邑宋

嗣南公受業師也。旣歿數分金遺其孤。及視學河南。廨內猶爲宋設位。朝夕拜之。王進士龍篆客死都下。葬西便門外。公爲立享堂祭產。每寒食輒往拜其墓。其篤于故舊多此類。公諱明楷。字端臣。號鈍齋。世居江西寧都州。大父不瑕公。贈奉直大夫。父式夏公。贈中憲大夫。夫人曹氏。榮祿大夫。左都督。廣東三江協副將凱伯公之女。生于貴家。而能屏華綺。事親相夫。皆中禮法。先公八年卒。誥贈恭人子。立瀛壬午舉人。立淇丙子舉人。江蘇布政司庫大使。立沅有至行。母沒。慟哭九十五日。不食而死。州人所稱盧孝子也。女二人。孫男五人。達荀州學生。達蔚今更名嗣智。國子監生。達蓮。達燕。達口。孫女若干人。曾孫若干人。銘曰。德可以潤身。文足以經世。其鼓篋橋門也。祭酒詫爲異人。其簪筆內殿也。至尊許爲才子。登記言之內史。兼批勅之學士。詹事之長。視古承旨方。謂陟八座而贊黃扉兮。胡爲夢陰堂之講。而遽止此也。日涉之園。先生藏焉。千秋而後。想見其軼鄒枚而追虞揭也。

工部左侍郎汪公墓誌銘

乾隆四十有八年夏六月十有九日。工部左侍郎持齋汪公卒。春秋六十有六。公素康強無疾。是日黎明。猶偕諸大臣入朝。啓事畢。入署釐務如常。還寓。猶手一編。初昏就寢。少選呼之。不應。則已逝矣。公之將誕也。祖榮祿公。夢紫衣僧持錫杖求宿。及生。狀貌如夢。觀其怛化之際。豈所謂夙根不昧。得大自在者耶。孤子編修學金扶櫬南旋。以明年某月日葬公於州城北二十四都琅港之原。屬大昕爲文。誌公之墓。大昕

初入館公已爲學士公忘分引進之嗣後講筵書幄皆獲隨公步武又同居西苑賜園有年知公行事爲詳謹案公諱廷璵字衡玉別號持齋世爲新安右族四世祖始徙太倉後析州爲縣始占籍鎮洋焉曾祖壽堯祖溥父之恆種德蘊素積厚而光以公貴累贈榮祿大夫妣皆一品夫人幼而穎悟初補博士弟子員學使桐城張公廷璐奇其文曰它日名位不在吾下公初名璿張公易以今名且加廷字欲引爲昆弟行也辛酉舉鄉試丁卯考充咸安宮教習試卷進呈欽定第一人並諭閱卷大臣曰來科會元得如此文可矣戊辰會試中式殿試讀卷日公名在第五天子親擢第三人及第授翰林院編修卽充會典續文獻通考兩館纂修官庚午充河南鄉試正考官辛未散館御試一等壬申春特開鄉會恩科充湖南正考官復命甫踰月御試翰詹諸臣于正大光明殿以納涼賦爲題作者多規撫上林子虛鋪陳宮殿苑囿公獨以宵旰憂勤民事立言特擢一等一名超授侍講學士充日講起居注官又充會試同考官又充武會試副總裁官一歲之中恩命頻仍而公益以銳進爲懇持重謙抑無幾微矜炫意癸酉充福建正考官事畢請假歸省二親尋奉命督學福建公訪知閩省多頂冒之弊由於童生衆多一縣或考數場遂有一人重疊與考以啓弊端公檄令每郡添建考棚併爲一場考之夜分卽起點名稽察嚴密此弊遂革丙子丁艱講學之右惟見任得轉補公以候缺得之亦異數也時功令初用詩帖生童狃于土音謔諧律度公親爲

講究聲病。由是能詩者漸衆。壬午冬任滿還朝。癸未御試翰詹公列二等一名。特賜文綺二端。尋擢少詹事。甲申入直上書房侍皇六子講席。公謹慎嚴肅。非禮不動。開陳經義。詞達意周。是冬賜紫貂裘一襲。每歲終賜御書福字及鹿尾黃羊冰魚文雉諸物。首歲曲宴重華宮。賡和天章。則有如意端硯之賜。端午則有紗葛宮扇香囊。立春進帖子。則有絹紙湖筆硃墨錫賚。使蕃歲以爲例。乙酉充湖北正考官。丙戌遷詹事。再遷內閣學士兼禮部侍郎。戊子奉命督學江西。辛卯還朝。壬辰充會試副總裁官。放榜後復局門閱墨。卷備取中書學正若干名。所甄拔率多績學之士。甲午教習庶吉士。丙申以金川平定。奉命之山東江南浙江祭告嶽鎮。及先代陵寢。禮成請假歸省。時胡太夫人年逾八十。神明不衰。公衣錦稱觴。門外列八騶。鄉間稱爲盛事。丁酉充江西正考官。未撤闈。又奉督學順天之命。三輔密邇輦下。歲時得與朝賀。公屢蒙召對。暇日仍至上書房。戊戌擢工部右侍郎。仍留學政之任。時承德府初建文廟。兼設考棚。公於大駕避暑前。趨往考試畢。率生徒迎駕翼日隨駕詣文廟行釋奠禮。特被宮紗文綺之賜。熱河士子鄉試另編字號自此始。其冬丁胡太夫人艱。戴星南奔喪。葬盡禮。辛丑公子編修君登進士。與公甲第恰同。稽諸故。事四百年來。惟王文肅公與子緜山兩世皆第二人登第。科名盛事。均在吾州。海內所未有。公在里門對賀客。不色喜。寓書編修。勸以敦品飭行。無忝科名。未嘗稍有夸耀也。壬寅入都。仍署工部左侍郎。直上書房。兼四庫全書總閱。癸卯奉命如盛京。恭送冊寶。方諏吉啓行。而公已長逝矣。公平生持躬以謙。接物以

誠治家以儉服官以勤無輿馬服玩之好無絲竹識遊之樂風度凝重言笑不苟自登上第歷官卿貳皆九重親擢不由援引向來翰詹御試首選不三四年已陟八座公爲學士十餘年再試優等始得序遷其安於平進如此久直禁近小心慎密退食之暇校勘圖史蕭然如諸生時性不妄交卽素相知形迹亦落落嘗曰聖人稱善交必曰久敬燕昵謔浪交道之媿也爲文以典重條暢爲主不蹈纖穠艱澀之習主持文柄幾無虛歲同朝莫能及焉公初娶凌夫人文學□□之女繼娶王夫人壬戌進士兵部郎中廬州府知府歲之女賢明善治家公得一心奉公無內顧憂者累夫人之力子一人卽編修君由庚寅恩科舉人授內閣中書協辦侍讀事辛丑進士及第授翰林院編修充四庫全書分校議敍遇缺開列先用女三人長許字項佾族早卒次適顧增光季適錢東璧大昕長男也孫二人彥博甲辰召試欽賜舉人內閣中書彥國縣學生孫女一適陸受秩銘曰

泰山北斗衆所尊景星卿雲爲世珍維公巨手燕許倫胸羅三倉二酉文筆落堯典生民篇巍科直上鰲峯顛讀書中祕譽益振九天給札集衆仙揮灑千言日未曛御筆親擢第一人嘉爾規頌思不羣學士峻擢異命巾紱文棘闈玉尺掄先民圭臬分別循其於視學尤精勤三物六行誨之諄屏除譁囂還樸淳虎闢入直尊所聞規行矩步禮法遵經師人師并一身桓榮稽古榮則均宮端進秩參閣綸四庫甲乙預討論三館吉士教育殷冬官作貳卿月新程功執度法不愆廿載內直溫樹春一條冰樣頭銜勻玉堂才子

宮花鮮科名接武嘉話傳年過六十髮未宣忽焉解脫返自然不朽何必非千年琅港之水九曲蟠宰木鬱然吉且安昔聞下馬董相墳誰其嗣之平陽阡

太子太保兵部尙書湖廣總督世襲二等輕車都尉畢公墓誌銘

嘉慶二年秋七月庚午兵部尙書湖廣總督世襲輕車都尉鎮洋畢公以疾終於辰陽行館公久在行間勛勞懋著及移駐楚南籌畫善後之策苗境敉寧上聞公積勞遘疾手足不仁卽馳賜上藥諭以安心調攝公自念受恩深重且當三楚多事不敢以私誤公力疾視事有加無瘳遂致不起遺疏入告九重軫恤加贈太子太保諭祭如禮文通武達生榮死哀可謂令德考終也已諸孤奉公匱歸吳門里第越明年三月十有八日卜新阡於吳縣靈巖鄉上沙里以元配汪夫人祔禮也大昕與公同里閈先後入館閣論文道古數共晨夕晚歲雖雲泥分隔而公不忘久要書問屢至每有撰述必先寄示茲諸孤述遺言請文刻諸貞石大昕泣然不敢辭按狀公諱沅字纓衡一字秋帆自號靈巖山人先世居徽之休寧明季避地蘇之岷山又徙太倉州後析置鎮洋縣遂占籍焉曾大父泰來公大父見峯公父素庵公皆厚德敦行識者謂其後必大公自少穎悟甫六歲母張太夫人手授毛詩離騷過目卽成誦十歲審聲韻十二習制舉義十五能詩稍長讀書靈巖山從沈文憲公德潛惠徵君棟游學業益邃弱冠後游京師乾隆十八年中順天鄉試又四年授內閣中書大學士傅文忠公一見器重卽令入直軍機處公練習掌故治事識大體樞

庭諸公咸以公輔期之二十五年會試中式名在第二及廷對纏綿數千言議論剴切上親擢第一是歲始定新進士前十名於讀卷日引見公儀觀秀偉進止有度天顏甚喜臚唱授翰林院修撰館中經進文字多出公手皆典雅重有體遷右春坊右中允再遷翰林院侍讀充日講起居注官轉左春坊左庶子三十二年上親耕耤田御觀稼臺公侍直奏對稱旨宣示御製詩給筆札令賡和詩成進覽稱善是冬授甘肅鞏秦階道召見諭曰汝軍機舊屬達於政治不徒文學優長也到官卽留辦新疆經費局又從總督出嘉峪關察勘屯田自木壘河至吉木薩往返數萬里途中多紀行詠古之篇尋調安肅道三十六年擢陝西按察使入覲具言甘肅頻年苦旱狀有旨諭督臣加意賑卹并免積欠四百萬兩尋擢陝西布政使兼護巡撫印務時大兵征金川由陝入蜀公督理臺站饋餉充足三十八年河渭洛三水溢入朝邑界公馳往分別賑卹全活甚衆擢陝西巡撫歲旱禱太白山得甘雨清理八旗及提標馬廠空地募民開墾納賦爲賞卹之用又奏修西嶽廟及元聖周公墓訪其後裔置五經博士一人以奉祀事濬涇陽龍洞渠在陝六載兼署西安將軍者再署陝甘總督者一特賜戴孔雀翎恩遇之隆漢大臣莫及焉丁張太夫人艱甫及一年上以陝西任重復起公署巡撫事會甘肅回賊陷河州逼蘭州城公檄調滿漢兵先後赴援又請簡八旗勁旅令大臣總統援應及事平上曰畢某在陝西聞甘省逆賊滋事卽能悉心調度事事妥協並有先辦而與朕旨相合者實屬可嘉著賞給一品頂帶其後平涼逆回復倡亂攻掠通渭靜寧驛道梗塞公

復調兵助勦。又分兵出間道。繞其後。俾不得他竄。公之盡心國事。不分畛域。多此類也。五十年。調河南巡撫。是時河南北頻年苦旱。而河水泛溢。壞民田廬舍。公既受命。卽奏請截留漕運。以平市價。諸州縣被災戶。展賑兩月。其徵收未完銀米。視被災分數。或全免。或緩徵。俱得允行。自後積水漸消。禱雨輒應。歲獲豐稔。又奉命詣桐柏山求淮源。躬履蘄嵒。尋其脈絡。繪圖以進。特蒙嘉獎。御製淮源記述其事。尋賞穿黃馬褂。擢湖廣總督。未行。以伊陽拒捕案被議。仍留巡撫任。五十二年。河決睢州。溢寧陵。商邱。永城。鹿邑。柘城諸縣。詔大學士阿文成公臨視。會同籌畫。自夏迄冬。凡五閱月。而藏事撫卹災黎。蠲緩借種。全活無算。明年。河北三郡旱。遵旨撥運米麥。減價平糶。又濬治百泉丹河九道堰。引水溉田。尋授湖廣總督。時江水異漲。溢入荊州城。下游州縣亦多淹沒。訪得江心有窖金洲。阻塞水道。爲上游之害。亟命拔去。蘆葦居民毋得占據。仍於北岸築壩。逼溜南趨。以資保護。賑卹被淹人戶。城垣堤岸。衙署兵房。次第修葺。又革除鹽課陋規。禁絕私販。每歲溢銷十數萬引。五十九年。入觀天津行在。賜御製詩。隨於幄次賡和。自陳早衰多病。乞京職自效。溫諭不允。是秋。以湖北姦民傳教案。左遷山東巡撫。臨清館陶諸州縣被水。遵旨加兩倍賑卹。豁免秋糧。及本年漕米委員於豐收處糴糧食存貯。以備來歲平糶。六十年春。恩詔普免各省民欠公查出東省節年所欠。正耗銀四百八十七萬有奇。常平社倉米穀五十萬有奇。咸奏除之。時已得再任湖督之命。拜奏而後行。其勇於任事。無遷延顧望如此。初入楚境。聞苗疆有警。卽馳赴常德。籌畫轉餉。旣

而大學士嘉勇公福公四川總督和公先後到楚檄調六省兵會剿供支日不下數萬公移駐辰州督運軍儲輸將相繼大兵旣擒首逆吳半生等乾州永順永綏保靖諸苗五百餘寨先後詣辰乞降公承詔撫諭咸感泣叩頭而去嘉慶元年春湖北枝江賊起詭稱白蓮教而宜都長陽長樂教匪一時應和四出焚掠公馳赴枝江與巡撫惠公調兵進剿連破蕭家巖栗子山長嶺沖諸寨時北省標營兵皆調赴苗疆姦民乘虛誘集匪徒分擾諸縣當陽保康來鳳竹山相繼失陷詔諸大帥分路攻剿而公與將軍舒公攻當陽即選驍勇扼山隘殲其外援三千人賊悉力死守公親督將士以火箭火彈射入城中燒其礮臺及蓄聚七月克東門賊退守西北復擊殺殲二千餘人擒其僞帥縣境悉平事聞賜賚優渥賞輕車都尉世職復馳至襄陽督同鎮道邀擊賊於青河口破之時征苗大學士貝子福公總督和公相繼殂謝公密奏乾州已復首逆就擒惟石柳鄧未獲而以十萬之衆駐守蠻瘴苗人見有重兵生計無資石逆轉得從中煽誘不若因其窮困許以自新酌節裁撤苗寨官兵而於四面設兵防守其有出外滋事及同類讐殺者用以苗攻苗之法可不再煩兵力詔下其章於軍中議之未幾大兵破平隴斬石柳鄧等遂詔公馳往湖南籌議善後及撤兵事二年春抵乾州周歷三廳撫諭苗寨清釐民苗地畝給還耕種咸伏地感泣各歸生業各省兵亦次第撤回公遵旨留駐辰州與巡撫姜公提督鄂公會奏請移提督駐辰州而以辰州協駐乾州洞庭協駐常德又於花園汎添設一鎮以永綏協保靖營隸之它要隘之處撥兵屯守聯絡控制其

苗寨酌設土弁以資約束又估修城堡營房賑撫難民卹贈殉難官弁及紳士婦女皆得旨勑部議行而公以炎瘴致疾食少事煩未極大年此海內識與不識靡不驚怛墮淚者也公識量閑遠喜慍不形於色遇僚屬以禮議事不執已見人人皆得盡其言若大疑難事衆莫識所措者公沈機立斷雖萬口不能奪久莅方面職事修舉不以察察爲明亦不以煦煦要譽所薦拔多至大僚或在同列亦未嘗引爲己功公天性純孝旣貴自傷祿不逮養賴母氏教誨成立迎養官齋修潔白之膳及張太夫人棄世遇諱日哀慕出涕嘗陳情上前御賜經訓克家四大字隨於靈巖南麓築樓以奉御書旁建張太夫人祠堂俾子孫毋忘所自與竹癡梅泉兩弟友愛無間視諸姪如己子兩妹早寡爲置產贍其孤甥俾克有成生平篤於故舊尤好汲引後進一時名儒才士多招致幕府公務之暇詩酒唱酬登其門者以爲榮性好著書雖官至極品鉛槧未嘗去手謂經義當宗漢儒故有傳經表之作謂文字當宗許氏故有經典文字辨正書及音同義異辨之作謂編年之史莫善於涑水續之者有薛王徐三家徐雖優於薛王而所見書籍猶未備且不無詳南略北之病乃博稽羣書考證正史手自裁定始宋訖元爲續資治通鑑二百二十卷別爲考異附於本條之下凡四易稿而成謂史學當究流別故有史籍考之作謂史學必通地理故於山海經晉書地理志皆有校注又有關中勝蹟圖記西安府志之作謂金石可證經史宦跡所至搜羅尤博有關中中州山左金石記詩文下筆立成不拘一格要自運性靈不違大雅之旨有靈巖山人詩集四十卷文集八

卷公生於雍正八年八月十八日。春秋六十有八。汪夫人淑慎有壺德。候補知府□□女先公三十年卒。子三人。念曾候補員外郎。早沒。次嵩珠。一品廕生。候補員外郎。次鄂珠。候選員外郎。女四人。長適陳暉。次許字秦□□。次許字孔慶鎔。次未許字孫二人。蘭慶。承襲二等輕車都尉芝祥。候選員外郎。曾孫二人銘曰。

咨牧命虞。分陝翼周。十連有帥。統小諸侯。魏晉暨唐。職均名別。都督總管。節度觀察。峴首羊杜。秦塞范韓。先後禦侮。爲國屏垣。猗與畢公。懋德之裔。文章潤身。溫飽非志。南宮首選。北闕臚傳。風度凝重。儼若神仙。智方行圓。明體達用。三館楷模。中朝梁棟。帝曰汝諧。試之監司。盤根錯節。利器無虧。乃撫三秦。冰澄月朗。籌邊餉軍。萬里指掌。乃撫汴洛。載修河渠。荒政具舉。黔首以蘇。乃撫齊魯。正躬率下。廣宣皇仁。民抃而舞。江漢之滌。控扼蠻荆。公督餽餉。士飽馬騰。潢池偶警。親提桴鼓。胸有甲兵。人百其武。負嵎猶鬪。一鼓而殲。露布星馳。錫命用占。苗逆已擒。苗民來格。公承廟謨。爲永久策。出入叢箐。涉歷瘴雲。遮道羅拜。共戴尊親。迺撤貔貅。迺設屯戍。燐燧罔驚。籬藩孔固。大星忽隕。梁木其傾。楓宸悼惜。崇班晉膺。公之恩榮。勳名終始。頌祭尙方。澤及孫子。硯山之陽。水木明瑟。某水某邱。舊游髣髴。井樟是卜。公其樂茲。我文紀實。或無媿詞。

潛研堂文集卷四十三

墓誌銘二

江西道監察御史王先生墓誌銘

先生姓王氏。諱峻。字次山。號艮齋。蘇州常熟縣人。大父應祥。父志學。俱以先生貴。贈文林郎。翰林院編修。先生少敏慧。讀書數行俱下。年十八。補博士弟子。才名籍甚。同里宋君玉才與先生最相善。並受業於陳見復先生。一時稱爲王宋。旣而入都。以國學生應京兆試。中雍正元年恩科舉人。明年試授內閣中書。尋登進士第。改翰林院庶吉士。充一統志纂修官。五年散館。授編修。七年典浙江鄉試。十年典貴州鄉試。乾隆元年典雲南鄉試。先後甄拔。號稱得人。明年詔開言路。遜朝官有清望者。俾居臺諫之職。而先生以名史官。改授江西道監察御史。拜命三日。卽抗章劾臺長官。素行不叶人望。罷之。當是時。先生直聲震都下。先生感上知遇。能用言方。具疏艸累數千言。未及上。而太夫人之訃至。遂戴星而歸。杜門養疴者十餘年。學益富。品益高。弟子著錄者日益衆。當事爭延先生爲士子師。於揚主安定書院。於徐主雲龍書院。而於蘇之紫陽書院尤久。以古學提唱後進。所賞識後多知名。性剛褊。視時俗。依阿齷齪畏葸者流。不欲姑與。

爲伍而人有一事一節之長則稱賞不置有三代直道之遺焉尤精地理之學談九州山川形勢曲折向背雖足跡所未到咸瞭如指掌嘗謂水經正文與注混淆欲一一釐正之而唐以後水道之變遷地名之同異酈注所未及者則撫正史及傳記小說近代志乘以補之名曰水經廣注手自屬藁未暇成也詩古文直抒性靈不加雕琢書法初宗北海後師東坡晚年自謂窺古人用筆之意所書碑碣盛行吳下片楮隻字人知珍之先生壯年崇尚氣節慨然欲有爲于世既以病廢不欲出山則思見之著述而天不假年未竟其業旣沒之後有與先生善者刻其所著艮齋詩文集若干卷行于世雖未足以盡先生亦略見先生之概已先生久登清要不名一錢歸田後猶以教授自給清風特操當於古人中求之春秋五十有八乾隆十六年二月十七日終於里第家貧子弱久未克葬頃歲季子淮安府桃源河務同知本智乞歸養母乃卜辛亥歲臘月十四日葬先生於某鄉之原距先考塋若干步遵遺命也配焉宜人教子有法今壽躋百齡康強逢吉大吏入告行有旌門之榮子二人禮縣學生先卒本智由盱眙知縣遷今官女一人壻朱聲孫口人口某官大昕少而鈍拙無鄉曲譽先生聞其可與道古也薦之使學於紫陽書院先生於諸生中最賞者廩三數人顧獨稱大昕不去口先生歿垂四十年而大昕來主紫陽遵守先生教規罔敢有懈先生之葬與執绋焉東漢墓銘多由門生刊述俛仰今昔音容如存而衰老無成孤負知己援筆泫然情見乎詞銘曰

尚湖之水清且直兮。誰其似之。夫子之德兮。少可于俗多師于古。有所不爲。合乎狷者。孔翠以文。鷹隼以威。位未酬德沒而名垂。退之諛墓。古人所譏。先生之銘。斯無媿詞。

翰林院侍讀邵先生墓誌銘

歲丙戌之秋。翰林院侍讀太倉邵先生請告歸。將出都門。諸與先生善者。咸至其邸敍別。先生素清羸善病。年未及耆。輒有懸車之思。嘗屬工畫者。畫已小像。取陰鏗釣晚。欲收綸之句。題曰收綸圖。乞一時名流賦詩。其高致如此。乃歸未及一載。嬰疾遂不起。嗚呼。世方競于功名。而獨尙恬退。其所取者廉矣。宜不爲造物者之所忌。而亦歛之。不得如志。此又理之不可知者也。先生諱嗣宗。字鴻歲。別號蔚田。先世居休寧。號東門邵氏。祖光龍始遷於太倉。以潛德篤行稱。考學詩。本生考學易。並以先生貴。誥贈奉直大夫。翰林院編修。加三級。先生幼穎異。在傅不勤。年十八。補博士弟子。歲科兩試。輒屈其儕輩。時同里毛先生宣。變亦以文名。州人稱能文者。必首毛邵。歲辛酉。以選拔貢生舉。本省鄉試壬申。聖母皇太后萬壽。特詔開科。以秋八月會試。主司海寧陳文勤公。於闈中得先生卷。大賞異之。手定第一。及程墨出。淳厚典重。海內翕然。奉爲圭臬。吾州自建治以來。試禮部第一者。明代則陸太常銳。王相國錫爵。吳祭酒偉業。本朝百餘年間。惟先生而已。廷試賜進士出身。改庶吉士。散館授翰林院編修。充咸安宮官學總裁。以病乞假。假滿。補原官。擢右春坊右中允。轉左春坊左中允。進翰林院侍讀。先生在詞垣十有餘年。朝章典故。咸所諳習。分

修續文獻通考。用力尤勤。及詔修宗室王公勳績表。大學士劉公統勳委先生專司其事。舉凡起例較若列眉。書成進御。深蒙嘉獎。僉謂先生不去駿駿乎向用。而先生以積勞致疾。賦遂初矣。性耿介。僦居宣武門外。公退却掃。終日門無雜賓。分校鄉會試各一分教。庶吉士者三。獎成後學。循循不勸。自爲諸生。常授徒自給。旣貴門弟子著錄益衆。大都皆束修自好之士。或藉以標榜干進者。則拒勿通也。其教子弟。則曰。君子持身無過廉儉二字。不儉則不廉。不廉則無恥。聞者以爲篤論。所著詩曰。一枝菴吟稿。養餘齋吟稿。皆藏于家。先生生於康熙四十九年八月二十六日。卒於乾隆三十二年閏月三日。春秋五十有八。配趙宜人。先卒子二人。士潔士洙。皆太學生。女一人。適乙酉科副榜貢生王璇。孫三人。先生旣沒之明年八月。孤士潔等奉匱葬於新塘之原。以趙宜人祔禮也。大昕以同郡後進。與先生同在書局有年。知先生之生平爲詳。乃敍而銘之曰。

行修而文腴。志芳而貌臞。清而不絕乎俗。貴而不易其初。知止知足。亦元亦儒。貞石可泐。嘉名弗渝。

虛亭先生墓誌銘

外舅虛亭先生之葬。以乾隆四十四年十一月二十一日。先期西莊鶴溪使來告曰。先文毅公墓志。其女夫周益公實爲之文。今先君子井樽旣卜。援吾家故事。屬銘於子。大昕曰。以益公之文。猶不自名。而託張真甫名。況庸下如大昕者。夫何敢頓首固辭。不獲已。乃泫然出涕敍之曰。先生諱爾達。字通侯。號虛亭。姓

王氏先世與宋太尉魏國文正公旦同出。文正從子元始居峴山縣之新漕里。數傳至左朝請大夫崇政殿說書葆，卽文毅公。文毅九傳至明監察御史遜，遜子復亦官監察御史。小御史之曾孫國子監司業同祖司業生處士逢年，並知名前代。先生曾祖在畿縣學生，是惟處士之孫祖鎮圭。皇贈修職郎考焜。康熙丙子舉人丹徒縣儒學教諭贈通議大夫。通議始卜居嘉定而先生猶以新陽籍應試。新陽本峴山析置。示不忘本也。先生同產四人，齒最居少。事通議孝謹無違。通議官丹徒獨攜先生自隨。依倚如左右手。伯兄蚤歿。與邱嫂同居。終身無間言。叔兄素失愛於通議。衡憾數加陵侮。先生受之無忤色。鄉黨稱道焉。性疎直易怒。亦易解。嘗面斥人過。頰項皆赤。少選復與响好語。忘其人之蓄怨也。先生不善治產。往往益無斗儲。然吟詠未嘗輟。遇極作惡事。姑置之。或隱几坐。須臾熟寐。醒後便不復記矣。讀書好瀏覽。不爲章句學。弱冠後補博士員。試輒冠其等。食廩餼爲諸生祭酒。屢試行省。不見黜。中歲以後。乃專意於教子。以爲文章者不朽之盛事。科舉之學非可以傳後也。故導之以詩古文。又以爲詞章之學可以潤身。未可以言道。故進之以經學。近三十年來東南士大夫言古學多推嘉定而嘉定之好古學自王氏始。西莊旣貴。先生優游林園。日手一編不置。或招朋舊爲真率會。斗酒脫粟。無異老儒。好作詩。以放翁後山爲師。寓意目前。多自得之趣。書法險勁。不肯作圓軟態。春秋七十有六。以乾隆三十三年五月二十八日捐館。諱封通議大夫光祿寺卿。加一級。夫人朱氏江寧府儒學訓導金銓之女。諡封淑人。先五年卒。事尊章甚孝。處

約而好施。先生之家事治。繫淑人是賴。先生有賢子二人。長鳴盛。甲戌進士第二人。及第官至內閣學士。兼禮部侍郎。左遷光祿寺卿。學者稱西莊先生。次鳴韶。新陽縣學生。號鶴溪子。女子二人。長適縣學生顧我澍。季卽大昕妻。孫男女若干人。大昕年十五。應童子試。先生亟賞其文。西莊亦謂子可與共學。因許以愛女。招爲館甥。嘗言李彥平范致能周子充。皆吾先世門壻。所以期許甚厚。先生好譽兒。又兼譽予。人或笑之。則曰。久當信我言。今往再四十年。文稍有名。而德不加修。九原可作。媿其曷勝銘曰。

學不必用。蘊而益純。古訓是式。以遺後人。豈惟後人。邑中之彥。聞其風者。古學大闡。夏駕之西。車塘之原。宰木鬱狀。四尺新阡。太邱壇耶。老翁泉耶。君子之澤。終勿譖耶。

中書舍人吳君墓誌銘

乾隆十有六年春。車駕巡幸江浙。觀民設教。典禮畢舉。士大夫作爲歌頌。獻之行在。天子命江浙學政選其優者召試。而親甲乙之。於浙江得士三人。曰嘉善謝墉。城錢塘陳鴻寶。位人秀水王又曾穀。原於江南得士六人。曰懷寧蔣雍植。秦樹全。椒吳烺荀叔。長洲褚寅亮。擢升休寧吳志鴻。沁可常熟孫夢達。中伯而予以謙劣。亦與數中。有詔之九人者。皆授以內閣中書舍人之職。中書故稱清望官。亞於詞林。非由科甲出身者。不得與。九人之中。惟中伯已登進士。其八人皆諸生也。特賜之舉人。俾得應禮部試。天下莫不榮此九人者。謂制科以來。未有此曠典也。諸人旣受命。以是歲先後入京。僕直內閣。獨予與擢升沁可以。

明歲始至而沁可之至又在後與之言端重而愿慤介然有所守君子人也其六月置酒於岷城寓邸九人者皆至痛飲甚樂嗣後或一月或半月輒小集中書舍人例閒三日一入直閱十日則持被宿于直廬它日無事則相從談詩文雜以詼嘲泥酒取飲蓋無日無之也旣而岷城以進士入翰林中伯遷宗人府主事兩人蹤跡少疎又二年予與穀原同登進士予承乏詞館穀原改官禮部未幾乞假去而荀叔亦移疾去偶以公暇過諸君談諧泥飲如平時然較之往日差希矣又三年沁可歿于京邸予入哭盡哀九人之中遽摧其一痛逝者之不可作蓋慨然有聚散之感也又五年穀原訃至遙設位哭之又一年復哭中伯于京邸同時來唁者惟岷城秦樹及予三人而已嗟呼彈指十餘年間聚首歡宴歷歷如昨日而死者三之一其他或聚或散如風中萍來去靡定欲求曩者高會之盛邈如隔世悲夫悲夫沁可休寧人僑居蕪湖生於康熙五十七年某月日歿於乾隆二十二年某月日春秋四十配某氏沁可未歿之前十日予過其寓齋沁可課幼女讀唐人絕句詩略能上口令拜予作男子揖世俗言以此厭無子也沁可長于小篆工刻私印好作詩嘗與予在圓明園直廬聯句賦冰茶數十韻頗爲好事者所傳云銘曰古今才人患不達一經皓首困帖括省方召試求真才親收九人君其一文苑傳選舉志君之名垂奕世

翰林院檢討毛君墓誌銘

君諱式玉字伊人乾隆六年以諸生舉于鄉又十一年試禮部中式又二年廷試賜同進士出身改庶吉

士又三年授翰林院檢討。又一年御試詞臣君名入三等以本官致仕。又三年天子幸五臺山君獻詩行在稱旨仍以本官召是歲某月某日卒於官年口十有口惟毛氏世占籍萊州府之掖縣自明以來世爲簪纓甲族父貢官潁州知州祖霽曾祖偉皆以潁州貴贈如其官階奉直大夫妻李孺人繼妻單孺人子某君貌哲而羸望之如不勝衣叩其學淵然不竭家無甌石儲而聚書多善本好爲古文嗜金石刻以翰林歸田日嘗騎驢裹糧入天柱山徧拓元魏高齊碑道旁觀者不知其爲貴人也初入詞垣讀國書不數月悉究其旨強記絕人同輩就君質所疑各如其意以去少詹事德爾泰公分教國書歎曰今之巴克什也居京師不與要人往來閉門却掃人莫窺其際葬以某年月日同年生嘉定錢大昕爲之銘銘曰
稷下談士急功喜夸君獨恂恂與古爲徒再入承明不爲數奇文而不年天乎何尤

封榮祿大夫內閣學士兼禮部侍郎加二級前翰林院庶吉士內閣典籍尹公墓誌銘

乾隆五十年正月天子詔舉聖祖皇帝宴千叟故事集王大臣官員士民年六十以上者錫宴乾清宮於時誥封榮祿大夫前內閣典籍蒙自尹公以就養京邸特准入宴與一品大臣列坐丹墀東天顏咫尺仰瞻溫霽禮畢捧所賜杯盤以出復賜靈壽杖如意數珠貂皮文綺諸物異數優渥朝野歎羨公籍隸滇南距京師萬里又久辭朝簿得預嘉會洵千載一時也越二年九月乙丑朔終於京邸春秋七十有三長子內閣學士壯圖扶櫬南歸縗絰踵門述公遺言屬予文其誌石嗚呼公予同年友也俯仰三十餘年升沈

零落觸緒增感。公與予皆寡交而獨以行誼相取。予歸田十載朋舊多不通尺牘。惟公與曹宗丞慕堂穢問不絕。自公云亡慕堂繼逝而予益無賴矣。彙德之詞其何敢辭。公諱均字佐平先世河南懷慶人明兵科給事中草以言事謫雲南太和縣丞因占籍蒙自曾祖父若時明季諸生大父文熾康熙丁卯舉人兵部主事父宗梁康熙丁酉舉人廣西桂林府同知兩世皆誥贈榮祿大夫妣皆一品夫人公幼入小學卽不逐童兒嬉戲每家慶徵歌演劇常挾冊獨坐一室中年十九補縣學生歲科試輒冠其偶癸酉秋鄉試主司於遺卷中得公卷大奇之遂與鄉薦明年成進士選翰林院庶吉士又三年散館仍歸進士班乃援河工例改選內閣中書未及補而丁內艱服闋入都又久之始得缺在職九載執事勤恪以俸次轉典籍記名以主事用丁酉歲京察以年老去職時閣學已官御史就養子舍灑然自得初封朝議大夫江南道御史加二級再封通議大夫太僕寺少卿加二級三封榮祿大夫內閣學士加二級公之初登第也向例釋褐進士先由王大臣揀選以備館職是科雲南入選僅建水倪君高甲一人及引見上顧閣臣曰尹某勝於倪多矣何以不在選中遂得預館選旣而倪君由吏部擢監司公尙蹭蹬仕路人咸以爲數奇及晚年階封一品康強逢吉乃信聖天子鑒賞自有眞也公事親孝父殯松皋去城六七里公結廬殯側三載晝歸侍太夫人暮則返倚廬雖寒暑雨雪無閒因自號松皋居士及奉太夫人合葬適大雷雨匠役皆走避公撫棺危立不逡寸步羣從子弟亦罔敢離次踰時雨止遂克成禮昆弟五人門無異財視昆弟之子

如已出節縮俸入以葺宗祠經畫井井可垂永久生平最惜物力自奉極淡泊而篤於故舊慷慨無少吝爲諸生時應秋試中途遇故人物故卽解囊爲治殯斂留一日乃行官京師日鄉前輩通政楊公如松病革適其子以事被逮其子婦扣門告以急難公亟偕醫往楊已不起卽爲理喪具并轉屬刑部保釋其子俾就苦次楚雄王貢生鎬臥病逆旅已劇公往視之泣以後事相託公令遂至己寓延醫治之數月而痊鎬感泣請受業爲弟子鄉人落魄無所依及旅櫬未返者輒爲區畫得生還歸葬者甚多好飲豆湯每月必命數設呼子若孫共啖曰此吾鄉味若曹卽富貴慎勿忘也公與閣學同官京師父子入直常共載一車諸城劉文正公聞而歎曰尹舍人可謂以清白遺子孫矣夫人伍氏戶部員外郎士祺之孫女貢生正期之女淑慎明達白首相敬累封一品夫人子五人壯圖乾隆丙戌進士今爲內閣學士兼禮部侍郎會圖增廣生全圖廩貢生慶圖健圖皆國學生女二人壻曰楊雲官曰伍東垣孫男十四人孫女九人銘曰易稱積善家慶有餘黃金盈簾不如詩書於維榮祿如漢萬石不言躬行德隅抑抑文章派別一家所師科第拾芥爲國羽儀清華之選世重館閣公皆履之依然瓠落南山有橋本固枝繁過庭貽訓爰大其門承歡廿載就養左右熙熙怡怡齊眉皓首紫泥申錫一品班崇考甫是則三命滋恭帝有恩言錫宴千叟公預其閒稽首拜手手捧上尊徐步天衢又何錫之鳩杖數珠囊鑠斯翁觀者屬目何以致之義方之勗人生三寶曰儉與慈不爲物先公實兼持易簣之辰神明未昧屈指舊游尙及吾輩素車萬里歸于松楸

諸孤攀號泣血紛流深谷有遷令聞難沫同心之言俾勒幽室

日講起居注官翰林院侍講學士曹君墓誌銘

翰林院侍講學士曹君習菴予同里總角交也君之高祖母予曾祖姑而予曾祖母則君高祖姑君之尊人檀濟公爲先大父入室弟子予又受業於檀濟公君少於予三歲相視若昆弟然已而同客吳門先後以召試通籍又同在詞館應制詩文互相商榷游覽宴集出入必偕者蓋四十年予視學東粵僅半載奉諱歸里遂不復出又十餘年習菴亦視學於粵臨行貽書告予謂任滿日當乞養南歸相從尋山水之盟乃到任僅半載奉太夫人之諱馴至不起嗚呼當代失一大手筆聞者無不盡傷況交親至厚如予者乎德幼孤依母氏居外家子孫因以曹爲氏五世祖元嘏移居城西之外岡高祖國正贈武德將軍曾祖錫命康熙壬戌武進士湖廣撫標中營游擊祖源歲貢生以君貴累贈中憲大夫始移居縣城父檀濟公文行爲士林推重弟子著錄最盛歲貢生候選訓導以君貴誥封奉直大夫晉贈中憲大夫母程氏累封太恭人君少而好學沈靜不妄出一語而於所讀書悉能貫串同邑王君鳴盛少負才俯視儕輩獨稱君與予爲二友年十六補博士弟子學使蒲州崔公紀有奇才之目中丞覺羅雅公樗亭選高才入紫陽書院肄業州縣以君名應時青浦王君昶與予亦同入院三人者食則同爨夜則聯牀而長洲吳君泰來上海

趙君文哲及王君鳴盛數過從相與鍛厲爲古學。君在院尤久。院長沈文慤公數稱其詩學。使寧化雷公鑑舉君優行。乾隆二十二年聖駕南巡。君獻賦行在召試列一等。特賜舉人。授內閣中書。儀直之暇。刻意吟咏。未嘗造請貴游。二十六年成進士。改翰林院庶吉士。散館授編修。君詞賦久爲海內傳誦。及在禁林。每遇大禮。高文典冊多出其手。館閣代言之文。院長輒委屬艸。皆典重清切。宜古宜今。擢右春坊右中允。充日講起居注官。扈蹕盤山有奉敕賡和諸作。遷翰林院侍講。轉侍讀。進右春坊右庶子。擢侍講學士。五十一年奉命視學廣東。與平少詹恕交代。少詹爲諸生時。嘗受業於君。粵人傳爲美談。明年程太恭人終於官署。君方按試連州。不及視。含殮聞訃。晝夜號泣。甫而月竟以毀卒。時乾隆五十二年八月八日。距生於雍正九年五月五日。春秋五十有七。娶陸氏。繼娶申氏。董氏。皆前卒。子臣晟。女二人。君起家儒素。以文字受主知。久列承明著作之廷。京察常居一等。兩遇大考。皆列二等。教習庶吉士。凡七科。前後典鄉試者。二分校順天鄉試者。一分校會試者。三總裁武會試者。一後進得其品題。便成佳士。舟車所至。乞詩文者屢滿戶外。博極羣書。精於證據。詩宗三唐。而神明變化。一洗粗率佻巧之陋。格律醇雅。醞釀深厚。卓然爲一時宗。少時與王吳趙諸君唱酬。彙刻其詩。流傳海舶。日本國相以餅金購之。在京華與館閣諸同好。及同年友爲詩社。率旬日一集。或分題。或聯句。或分體。每一篇出。傳誦日下。今所傳刻燭炙硯二集是也。其事二親孝。所得俸錢。分寄諸弟。無私藏焉。所著詩有宛委山房春槃瑤華倡和秦中雜稿。轅韶鳴春諸集。

又有蓉鏡堂文稿二十四氣七十二候考轉注古音考學士在唐宋時預聞機密今則專以文字爲職然亦惟鴻筆麗藻斯與職稱學優如君其不謂之真學士也夫銘曰

威鳳五采鳴于朝陽詞臣報國厥惟文章漢廷枚馬鄴下陳王詩歌元白制誥常楊慶歷歐梅元祐蘇黃虞楊范揭高楊徐張淵哉若人文苑之英名位未極令聞不忘誰其銘之疇昔鴈行竹林路杳懸河淚滂

李南澗墓誌銘

己卯之秋予奉命主山東鄉試得益都李子南澗天下才也填榜日按察沈公廷芳在座起揖賀予得人越三日南澗投刺請見與語竟日所見益奇於所聞南澗與人交有終始雖交滿天下獨喜就予在京都日相過從其歸里也每越月逾時手書必至得古書碑刻或訪一奇士必以告及出宰劇縣在七千里之外奔走瘴癘簿書填委而書問未嘗輟纏縷千百言從不假手幕客予嘗夢遊南澗官齋覺而書至意甚異之殆所謂同氣相求者去歲南澗自粵西貽予書言生癱於尻甚劇自後久不得音問又數感惡夢今冬其弟文濤使來告曰吾兄以去年八月四日病癱終於官舍遺命不作行狀以自編年譜乞先生銘其墓嗚呼南澗果死矣世豈復有此才哉南澗諱文藻字素伯一字茝畹晚又號南澗先世自棗強遷益都之春牛街祖元盛父遠皆以南澗貴贈如其官南澗天姿俊朗年十三從父遊曹家亭子作一記倣赤壁賦已有思致十五學爲詩二十一補縣學生好博覽今古不爲世俗之學所至必交其賢豪長者旣以第

二人舉鄉薦。明年會試中式。又明年成進士。廷對策博贍爲進士最。以補試例不與。進呈之列。然讀卷官交口歎賞無異詞。久之謁選得廣東恩平縣知縣。到任後奉檄署新安縣。又奏調潮陽縣知縣。以海疆三年俸滿保薦擢廣西桂林府同知。未及一年而沒。其居官以清白強幹稱。嶺南俗多竊牛。牛皮色相似。雖獲盜多不承。有司無如之何。南澗始至。令有牛之家各於牛角印烙私記。凡赴墟賣牛者。牙僧以印烙登簿。以印付買主。如告失牛。先以印呈官。官遣役持印驗墟簿。無得隱者。大府善其法。下所部行之。陽江民劉維邦。以母病延道士作法。借鄰人刀十柄。縛梯上以驅祟。吏索錢不遂。取刀送縣。誣以不軌。南澗奉檄往勘。廉得其實。白於上官。釋之。未幾。陽江令以它事被劾。銜南澗甚。遣親信僕潛至恩平。欲探陰事。中傷之。居兩月。無所得。乃已。潮陽民好械鬪。往往殺傷多人。南澗至。則懸鉦於堂上。有將鬪者。令地保馳入城。擊鉦以告。立往拘治。衆則散矣。自是械鬪稍息。縣故有東山書院。延進士鄭安道爲師。購經史子集數十種。以教學者。潮陽與海陽揭陽俗稱三陽。仕其地者多致富。南澗去官之日。囊橐蕭然。還至番禺。命工摹光孝寺貫休畫羅漢四軸以歸。曰。此吾廣南宦橐也。性好聚書。每入肆見異書。輒典衣取債致之。又從友朋借鈔。藏弆數萬卷。皆手自讐校。無輓近俚俗之本。於金石刻搜羅尤富。所過學宮寺觀巖洞崖壁。必停駿周覽。有僕劉福者。善椎拓。攜紙墨以從。有所得。則盡揭之。嘗乘舟出迎總督小憩南海廟。命僕拓碑。秉燭竟夜。比曉問總督舟已過矣。其詩古文皆自據所見。不傍人門戶。視近代模擬膚淺以爲大家蔑如也。

然口不道前輩之短以爲非盛德事過嶺後治公事日不暇給而詩益工郵亭僧院信筆留題雖與隸皆知爲才子也生平樂道人之善鄉先正詩文可傳者必撰次表章之元和惠定宇婺源江慎修皆素未相識訪其遺書刊行之德州梁鴻翥窮老而篤學月必誦九經一過鄉里咸目爲癡南澗一見奇之爲之延譽遂知名於世其在嶺表士子以文就質無虛日獨稱欽州馮敏昌順德胡亦常張錦芳作嶺南三子歌其獎借後進誠有味乎言之也予嘗戲論南澗有三反長身多髯赳赳如千夫長而胸有萬卷書一也生長於北海官於南海二也湛思著書欲以文學顯而世稱其政事三也嗟呼以南澗居家之孝友當官之廉幹與友之誠信固已加人一等乃其所篤嗜者文章也文人之病恆在驕與吝而南澗獨否使其得志必能使古之文士有以永其傳今之文士不致失其所而竟不遂此吾所以爲斯世惜也悲夫悲夫南澗娶邢氏先卒繼室周氏生子三人章郵章棉章姚俱幼女子三人銘曰

偉哉李生文中之雄兮四部七略羅心胸兮名登甲科官至五品不爲不庸兮胡爲不與石渠蘭臺之選以昌其文乃以能吏終兮昔裴幾原自占死期不過戊戌歲任彥升常恐不過五十果四十九而云逝嗟哉李生年壽適與同兮恆幹不可留修名永無窮兮廣固之里宰木翳如千秋萬歲過者下馬曰才子之

幽宮兮

日講起居注官翰林院侍講學士邵君墓誌銘

嘉慶紀元之春餘姚邵君二雲自左庶子擢翰林院侍講學士兼文淵閣直閣事君以懿文碩學知名海內及被召入四庫館總裁倚爲左右手朝廷大著作咸預討論每經進書籍九重未嘗不稱善迴翔清署二十有餘年至是始轉四品乃以編書積勞成疾疾且愈矣醫者誤投藥遂不起實六月十五日春秋五十有四訃至吳下予爲位哭之慟因憶乙酉秋予奉命典試浙右斬取奇士不爲俗學者君名在第四五策博洽冠場僉謂非老宿不辨及來謁纔逾弱冠叩其學淵乎不竭予拊掌曰不負此行矣越六年禮部會試第一賜進士出身乾隆三十八年有詔編次四庫書思得如劉向揚雄者用之宰相首以君名入告召赴闕除翰林院庶吉士充纂修官逾年授編修久之御試翰詹諸臣君名列二等遷右中允四轉而至今職嘗預修國史萬壽盛典八旗通志校勘石經春秋三傳由文淵閣校理進直閣事充日講起居注官總裁咸安宮官學提調國史典鄉試者一教習庶吉士者再階由儒林郎至中議大夫君少多病左目微眚清羸如不勝衣而獨善讀書數行俱下寒暑舟車未嘗頃刻輟業於四部七錄無不研究而非法之書弗陳于側嘗謂爾雅者六藝之津梁而邢叔明疏淺陋不稱乃別爲正義以郭景純爲宗而兼采舍人樊劉李孫諸家郭有未詳者摭它書補之凡三四易稿而始定今承學之士多舍邢而從邵矣自歐陽公五代史出而薛氏舊史廢獨永樂大典采此書君在館會粹編次其闕者采冊府元龜諸書補之由是薛史復傳人間予嘗論宋史紀傳南渡不如東都之有法寧宗以後又不如前三朝之粗備微特事迹不完卽

褒貶亦失實。君聞而善之。乃撰南都事略。以續王偁之書。詞簡事增。過正史遠甚。畢尙書沅續宋元通鑑。常就君商榷。輒歎曰。今之道原貢甫也。君生長浙東。習聞蕺山南雷諸先生緒論。於明季朋黨。奄寺亂政。及唐魯二王起兵本末。口講手畫。往往出于正史之外。自君謝世。而南江文獻無可徵矣。君所著又有孟子述義。穀梁正義。韓詩內傳考。皇朝大臣謚迹錄。輜軒日記。皆實事求是。有益于學者。君至性過人。事親喪葬盡禮。篤于故舊。久要不忘。性狷介。不踏權要之門。以教授生徒自給。退食之暇。執經者環侍左右。君隨問曲諭。人人皆得其意。君亦以師道自任。莫敢以非義干者。詩文操筆立就。淵博奧衍。自成門戶。有南江詩文稿。君諱晉涵。字與桐。二雲其號。大父向榮。康熙壬辰進士。父佳銳。增廣生。皆以君貴。贈中憲大夫。元配□恭人子秉恆。秉華。卜葬君于某鄉某原。先期來請銘於戲。自四庫館開。而士大夫始重經史之學。言經學則推戴吉士。震言史學則推君。君於國史。當在儒林文苑之列。朝野無閒言。而知之最先者。予也。予比歲衰病。嘗預戒兒輩。必求二雲銘我。孰意天寔祝予。轉以才盡之筆。納君穿中也。此所以泫然而失聲也。銘曰。

浩浩南江。導源岷山。厥生名儒。特立絕羣。陽明以功。梨洲以文。誰與參之。其在二雲。名冠南宮。書校東觀。爲真學士。爲良史官。槐鼎何慕。竹帛常尊。著書滿家。自信千年。古三不朽。言其一焉。溝澗易涸。視此原泉。

潛研堂文集卷四十四

墓誌銘三

山東曹州府桃源同知彭君墓志銘

致政兵部尙書長洲彭公之冢嗣。山東曹州府桃源同知諱紹謙。乾隆三十六年請假省覲。以公年高假滿。遂不出。越四年。以疾終於葑門里第。尙書公諸子皆賢而文。而桃源於家爲令子。於官爲循吏。德優而未盡施。其歿也。公哭之慟。而親故僚友靡不盡傷。越丁酉歲十一月丁丑。卜葬於吳縣十二都下六圖雅宜山下。卽元配繆宜人之塋而合祔焉。先期。嗣子希韓述事狀。乞大昕爲之銘曰。

彭氏之先。實始江西。明初徙吳。科第蟬聯。維高大父。皇朝進士。作宰長寧。文與行備。生子修撰。首舉南宮。廷對第一。以侍講終。侍講之子。鄉飲大賓。光祿大夫。錫封紫宸。實生尙書。會狀兩元。踵乃祖躅。近古罕倫。官躋一品。未耄歸田。詔列九老。賜遊香山。五丈夫子。君爲長兄。厥諱紹謙。字之濟。光幼順乎親。左右就養。讀書萬卷。瞭若指掌。丁卯鄉舉。仲弟同登。再黜禮部。乃就銓衡。詔往試哉。作令於東。初攝陽穀。秋漲暴衝。親往督振。以蘇乏窮。里正地方。按戶籍充吏。不假手民。以爲公後失其法。乃至訟囚。假牧平度。移攝茌平。

奄邁內憂，犇號戴星。中月禫除，起知新城。湖壩窪下，地棄不畊。假民子種，秔稻是勦。計頃百餘，灌漑用利。
青沙之泊，設隄爲防。曰彭公堤，民永不忘。在官三載，改治汶上。鑾輶時巡，供頓無曠。南旺之西，有宋家窪。
水潦所滌，廢爲汙萊。久議宣洩，恐妨下游。羣口附和，築舍道謀。君規隄南，故河可疏折而南出。微山諸湖，
以鋪水法，廣深積算。下游所受，長不盈寸。繪圖上府，大吏允諾。六旬畢工，厥利溥哉。成賦之地，三千頃餘。
昔委巨浸，今稱上腴。丙戌秋霖，水溢禾稼。申請振卹，民無饑者。大府考績，以卓異舉。保甲令行，姦無容所。
他盜入境，詰而擒之。詔特引見，擢遷同知。曹州桃源，毗連宋魯。以君分治，爲劇郡輔。姻親引嫌，循例改補。
乞假覲省，一堂春煦。晨昏子舍，養日方長。五十而慕樂未渠央，五十有一百歲甫半。孟冬下旬，遘疾捐館。
伯子希韓，次曰希曾，希彥，希仲，叔季相承。伯也舉鄉，校書武英。女子子六，咸締簪纓。夫人繆氏，庶常之子。
洗馬之孫，相敬以禮。善事君姑，宜於築里。螽斯繩繩，戚䣊稱美。先歿八載，卜葬斯阡。今開厥兆，合祔宜焉。
疆圉作誥，歲十一月丁丑既望。筮云其吉，惟君孝友，施於有政。敦族全交，言必顧行。閑家一編，以代庭誥。
非苟知之，亦已允蹈。帝眷吏治，謂宜顯揚。才而不年，未旣所藏。贏博之葬，誰能忘情。述銘慰公，百世有徵。

湖北荆宜施道前翰林院修撰陳公墓志銘

乾隆五十有二年六月二十七日，湖北荆宜施道前翰林院修撰陳公永齋卒於里第。春秋五十有一越三年，將卜葬於吳縣某鄉。九世祖僖敏公賜塋之旁。先期，公之仲弟中書舍人希哲屬予志其墓石。蔣上

舍業咸亦爲之請乃按故兵部侍郎蔣公元益所述家傳敍次之公諱初哲字在初別號永齋世居蘇州之吳縣自僖敏公以文學經濟歷官都察院左都御史爲明正統中名臣厥後代有文學隱而未曜曾大父元揚好善能教其子大父震品學醇厚從故學士何義門先生游號爲入室弟子贈中憲大夫父樹勳博通古今沈毅闢達以國學生游秦閩間公卿皆折節延爲上客相國尹文端公總督兩江尤器重之嘗語人曰立巖有體有用人也以公貴封中憲大夫公幼有異稟弱冠已負文譽補元和縣學生乾隆二十五年舉鄉試益潛修古學與仲弟希哲以詞賦相淬厲吳中有二陳之目三十年聖駕南巡昆弟竝以賦賦召試行在仲弟名列高等授內閣中書而公以論誤寫一字置乙等亦得文綺之賜二十四年會試中式廷試條對詳贍纏繩千餘言而書法尤端重不苟讀卷大臣擬列第二上嘉其切直特擢第一元和分縣以來登狀元者自公始而封君與王太恭人具慶在堂年未及耆鄉間誇爲盛事授翰林院修撰分習國書公一過目卽曉其竅要閱二年散館復列第一上喜曰漢人中不易有此尋充方略館纂修官入直武英殿兼協修起居注益以勤慎稱三十八年詔開四庫館公復與修纂每校一書畢卽條其撰述本旨評論當否悉中肯綮時館臣例得薦謄錄生數人公所舉皆寒素士總裁諸城劉文正公新建裘文達公咸歎其公正尋充文淵閣校理再充會試同考官一充陝西鄉試正考官兩遇京察俱列一等四十三年特授湖北荆宜施道甫莅任遇歲歉卽捐廉以振饑者明年江水暴漲溢沙市隄公令吏民載土囊權塞

之親履隄上督視七晝夜水漸退民居得無恙又明年出俸錢加築隄隄益以固歲旱依春秋繁露祈雨法又步禱龍神廟雨應時降荊州向有權關使者歲一更易稅額屢缺上令裁去以大吏兼轄督撫奏公領其事檢束吏役勿分外需索稅額既足商民亦無怨言四十八年丁王太恭人憂奔喪旋里越二年又丁封君憂殯斂之禮壹遵古法故宅在城東隅公與仲弟各拓數楹以爲封君娛老之地至是遵遺命悉以讓季弟同哲而各買新宅公所居在古雪街於屋旁築樓三間擬奉先人栗主爲家祠而庭中稍置坡石顏曰小蓬瀛有栖心物外之志工垂成而奄忽下世悲夫國初詞臣沿明舊制凡進士第一人無外用者今天子慎重吏治內外一體遂有以大魁而授監司者自會稽梁公國治鎮洋畢公沅及公而三然兩公皆曾轉坊局公直以修撰得之以是知上之將大用公而銜恤痛深旋復摧折此朝野所深惜者也公初娶張恭人壬申舉人鵬之女早卒繼娶蔣恭人例贈奉政大夫仙根之女善文翰尤內外事甚飭人以爲得賢內助子兆雄早卒次兆炎孫若芝俱幼公以儒學登上第而內行淳備孝友任卹人無閒言家居不喜與長吏還往亦不臧否人物遇故舊謙抑自下識度宏遠人莫窺其際詩文冲和恬雅似其爲人書法似顏魯公晚年不輕下筆友朋得其寸楮爭藏弆之銘曰

鳳翔千仞鵬搏九霄毛羽旣成攬身最高木天芸閣珠玉揮豪匪惟文章經濟克劭盤根錯節小試孟勞霖雨一滴膏澤崇朝溫飽匪志行誼足式歷試無玷斯爲全德天不假年中道而息大名旣成遑爭晷刻

鬱鬱佳城.僖敏之側.青松白雲.垂聲無極.

贈儒林郎刑部雲南司小京官加一級補瓢韓先生墓志銘

吳中文獻之家首推雲東韓氏.二百年來文采風流照映蔚林.振振公姓人各有集.非徒以膏梁華腴炫世俗也.補瓢先生諱駢.字其武.實文懿公之從子.被服儒素.學有師法.五歲能辨四聲.始入塾.聽伯姊誦唐人詩.默記不失一字.師大驚曰.異日風雅材也.長而記誦閑博.爲文下筆立成.顧俠君太史一見奇之.呼爲小友.巡撫儀封張清恪公.課士紫陽書院.擢寘第一.在庠序名稱籍甚.狀淡于榮利.恥爲俗學.好吟咏.恬淡真率.一以陶謝爲師.春秋佳日.招朋舊賦詩飲酒戶外.之履恆滿.晚歲學益純邃.嘗製補瓢歌云.志士勤補拙.學人善補過.老夫志短學亦荒.但補山瓢惜瓢破.亦近于有道之言矣.其事親有禮.居父憂年已五十一矣.三年處外過時而哀.從子暢蚤失怙恃.親撫育之.以至成立.治家嚴肅.博奕之具不陳於側.乾隆十九年九月下旬捐館.春秋六十有一.初娶王安人.再娶顧安人.皆早卒.三娶陳安人.後二十七年乃卒.教子孫必登于禮法.鄉黨稱賢母焉.子二人.鍵歲貢生.議敍通判.是升附監生.敕封儒林郎.女三人.壻程遵義.畢楚玉.蔣曾熥.孫男濤.附監生.崧.廩膳生.崶.丁酉選拔貢生.特授刑部雲南司七品官.峯巖俱幼.先生歿之二年.卜葬吳縣香山祖塋之右.又二十四年.以孫崶貴.贈儒林郎.又三年.將奉陳安人之匱.啓先生窆而祔焉.先期是升屬其子崧乞予銘.予少從先生游.得與忘年交之列.先生儀觀豐偉.多

識掌故與談鄉先哲軼事娓娓不勦羣從多以科第得官獨蹭蹬無所遇狀身歿而名益彰詩文流播人口且有文孫登朝綸章寵錫賚及重泉古人云第五之名何減驃騎由今觀之蓋有過之無不及也銘曰吳之巨族雲和韓濟生種德啓後人後先宗伯名大振公之王父廚俊倫祇排馬阮幾達屯鄉人表德稱貞文厥考樂志大蓋臻鄉飲五豆領衆賓先生早充博士員晚乃循例貢成均孝乎惟孝溫清勤頤神典索栖衡門詩詞脫手無垢氛石田磬室堪比肩辭世卅載名未湮江湖有集萬口傳有子若孫才軼羣贈階六品官白雲松楸鬱鬱香山原如防如屋四尺墳文苑耆舊其人存

內閣中書舍人邵君松阿墓志銘

常熟邵氏當高宗朝昆弟四人先後入館閣並以才名傾動日下論者比諸唐京兆竇氏宋鄱陽洪氏明吳郡皇甫氏焉而子姓相繼登科文采勿替較之昔賢殆有過之君諱齊熊初名炳字方虎號耐亭晚歲又自號松阿誥封奉直大夫晉贈朝議大夫韓之子贈奉直大夫晉贈朝議大夫甲臨之孫封儒林郎可佳之曾孫君幼有識鑒弱冠喜從鄉先生游尤爲陶太常晚聞汪贊善杜林所器重贊善遂以孫女妻焉年十九入縣庠乾隆十二年中江南鄉試是時兩兄屺園叔六皆先入翰林明年弟闇谷亦館選君三試禮部不見售十九年御試內閣中書君名入選所賦紅藥當階翻詩傳誦都下君長身玉立儀觀秀偉而志趣高簡入直之暇研窮經史鍵戶如儒生所與往還皆一時名宿以文章氣節相砥礪貴游夸毗子弟

或慕與交。竟日不交一語也。在綸閣時。朝廷大典禮例得進呈詩冊。君所製歌頌博大淵雅。尤得頌揚之體。丁外艱旋里尋遇生母時。太恭人憂執喪累年。哀戚如禮。服闋後。以程太恭人年高樂與昆弟奉侍。遂不入都供職。趨承晨昏者幾二十年。君昆弟皆治古文。而君好之尤專。謂文必本于學與行。然後爲有物之言。古人立言。皆有益於人心風俗。否則諫言長語。祇足以長浮華。用以阿世則可用。以經世則未也。嘗選唐宋以來古文十八家。名曰文繫。於唐得三家。退之。子厚。習之。於宋取七家。永叔。明允。子瞻。子由。固同甫。晦庵。於元取一家。伯生。於明取四家。景濂。正學。伯安。熙甫。而以國朝汪若文。方靈皋。陶晚聞。三家繼焉。獨惡王安石之文。謂其意主爭勝。言涉矜夸。觀其文知其人之悖可戒不可法也。所著隱几山房稿十六卷。禮記考義十六卷。隱几山房七錄若干卷。生平敦孝友以型家。明義利以正俗。一言一動必依於法度。春秋七十有七。終於里第。實嘉慶五年八月十有七日。配汪孺人。左春坊左贊善應銓孫女。雍正己酉副貢某之女。明慧有婦道。前卒子聖珪。乾隆戊子舉人。女適同邑張培俱。早卒。嗣孫廣融。乾隆乙卯舉人。曾孫淵耀。淵獻。淵穎銘曰。

邵望出歛。乃遷海虞。四傳而後。枝葉紛敷。君與昆季。式大其閭。木天薇省。棣萼聯翩。趨青紫匪戀。循陔孔愉。年周甲子。猶奉板輿。品以行邃。文與道符。著書滿家。質而不夸。疇昔定交。冊載有餘。我神久瘁。君顏尙腴。今春訪我。攜曾孫俱。託其蚤慧。可慰桑榆。玉棺俄降。執紼在途。納銘幽室。終古弗渝。

顧桐井墓志銘

吳縣顧文學純，砥行立品，爲文不隨逐時好。蓋儒而君子者也。其父國學生桐井君，旣沒將葬，持事狀請予爲之銘。純肄業紫陽，在弟子行以予言爲信義，不可辭也。按狀君諱應昌，殿舍字也。桐井號也。行第五，又自號五癡也。先世自金陵遷吳，五傳至國本。明季貢生。祀鄉賢私謚貞孝先生者，君之高祖父也。長洲縣學生竑，其曾祖父也。考授州同漸，其大父也。國學生階升，其考也。君性孝友，父病延醫，百方療治，用一劑必辨論至當，而後進自是，遂精于醫。常有奇效，處方不用難得藥，懼以僞亂真也。有弟患漏經年，君親爲敷藥，日四五次，雖臭腐弗憚也。弟死，遺孤尚幼，一日旁舍失火，舉家驚惶，君抱姪置妻懷中，曰：「善視之，勿令怖。」子女雖環泣弗顧也。姻黨有以爭嗣訟者，縣令偏袒，欲以立愛爲名，諮詢諸預議者，衆莫能對。君正色曰：「生前或有立愛，死後知誰愛邪？」令以其言直，遂弗能奪也。君幼羸弱，術者皆謂不壽。初就傅，母夫人戒勿多讀，傷氣。其師獨異之，曰：「此子雖多病，然甚孝，必能延年，勿慮也。」君生于雍正乙卯，卒于嘉慶丙辰，行年六十有二也。夫人汪氏，候選詹事府主簿，大經之女，亦名族也。有子二人，長純而繁季也。女四人，嚴秉芝、汪超倫、毛採、施光璧，其壻也。郡城之某鄉某原君所藏也。某年月日葬之期也。銘曰：

維士有志，重義輕利。君雖不試，孝友自厲。維蓄之深，維守之欽。楹書貽後，以俟天謹。

潛研堂文集卷四十五

墓誌銘四

封通議大夫日講起居注官文淵閣直閣事翰林院侍讀學士加三級陸公墓誌銘

文淵閣直閣事大理寺卿陸公錫熊以博洽通儒承天子知遇由郎官入詞垣領袖四庫書局淳登學士遂列九卿逢國大慶推恩三世尊人通議公方就養京邸踰七望八神明不衰大理嘗被召預重華宮聯句賜御題楊基淞南小隱畫卷公以里居在淞江南因自號淞南老人以識君恩閱數載大理復蒙上賜御題老少年詩卷公賦詩恭紀有淞南小隱成佳話更喜新題老少年之句朝野莫不榮之公性耽山水不耐拘束在都下未久輒策蹇南歸所居日涉園本明陳太僕所蘊別業清曠饒水石之趣公更治數椽顏曰傳經書屋日焚香宴坐其中春秋佳日招一二親串賦詩談讌不異少壯時乾隆四十八年十二月十四日無疾而逝春秋七十有八大理奉諱奔喪哀戚盡禮卜吉於次年十二月丁酉葬公上海縣西南二十七保鳳皇橋之新阡以張曹兩淑人祔焉禮也先期踵門乞大昕爲文銘其墓大昕與大理托道義交廿餘年於公修猶子之敬其敢以不文辭謹按公諱秉笏字長卿一字葵露世爲華亭望族元末有承事

郎子順者始析居上海之馬橋五傳至文裕公以文章翰墨知名海內文裕之從曾孫曰起鳳明天啓辛酉副榜皇朝贈中議大夫布政司參議即公曾大父也大父鳴球廩監生累贈中議大夫翰林院侍讀學士加二級父瀛齡雍正癸卯拔貢生石埭縣儒學教諭累贈通議大夫翰林院侍讀學士加三級陸氏文獻舊門石埭公學行尤高公幼承庭訓年七八歲已知作文嘗製詩賦雜禮文各數篇裝小冊置懷袖中署曰陸某稿親舊見者以爲非常兒弱冠補縣學生辛酉歲援列入成均中式順天鄉試公所作制義高古有法度聲名籍甚七上春官不遇然未肯稍降其格最後應丙戌會試時大理方直樞廷先已典試山西公猶低頭聽唱名引試揮灑千言不見老人衰憊之氣平生雖澹於榮利而文字結習志不少衰如此公博涉經史不名一家尤惡俗學專已守殘之陋故大理承公緒論益自殖學以大其門公事親以禮與人交有信貴而能謙持躬治家皆可爲世法以大理貴誥封奉政大夫刑部直隸司員外郎加一級進封中議大夫翰林院侍讀學士加二級再晉通議大夫翰林院侍讀學士加三級初娶張淑人縣學生大本之女卒於雍正十年八月三日春秋二十有五繼娶曹淑人工科給事中諱一士之女工吟咏與公拈題唱酬無虛日有晚晴樓詩稿行世卒於乾隆八年八月廿日春秋三十有五再娶曹淑人即給事季女三淑人皆有禮法鄉鄰稱女宗子一人卽大理也女五人壻曰凌松心王時夏張坤孫朱文炯趙熾孫男五人慶循慶堯慶勤慶均孫女二曾孫女二銘曰

公生名門。績學有聲。誦芬詠烈。若士衡兮。克敦孝行。肇精經旨。模楷人倫。若公紀兮。江湖泊宅。文史跌宕。手定叢書。若魯望兮。內助之懿。雖穆有禮。比肩唱酬。若東美兮。公有賢子。領大著作。并判廷尉。若伯玉兮。鶴髮未皤。鸞諾疊封。壽考康寧。若放翁兮。鳳皇之橋。佳城若防。耆舊名德。久而不忘。季寧有墓。近在雲間。誰其踵之。夫子之阡兮。

贈儒林郎翰林院編修加一級晉贈奉政大夫刑部河南司主事加二級馮君墓誌銘

古聖之言孝也。曰揚名於後世。以顯父母。夫揚名者。一己之事。而其父母之賢。亦因有賢子而益顯。此孝所以居六行之首也。若夫由父而推之。以及其祖。則禮傳所謂大夫以上。則知尊祖者。而世遂以後有達人。知其積善之有自。昔東坡爲大父廷評行狀。稱其制行甚高。後世信之無異詞。藉非有賢子孫。則廷評之行。或未必大顯於後。先聖垂教。豈欺我哉。刑部河南司主事前翰林院編修欽州馮敏昌。今之有道而文者也。今春奉父諱。奔喪南旋。道出吳門。素衣冠踵予門。告曰。吾父之墓。學士大興翁公已爲之銘。唯先大父潛德未曜。茲以某列官於朝。貽贈五品將勒石墓道。以斬不朽。謹譏次行狀。請吾子一言表之。案狀君諱經邦。字憲萬。姓馮氏。世籍廣東廉州府之欽州。國初大兵平嶺嶠。而海氛尙未靖。君之曾大父仁溥。大父日明。避寇轉徙。父子相失。祖妣彭拮据奉姑。拾木實自茹。而以糗糒進姑。鄉里稱曰孝婦。大父負遺骸。間道歷叢山中。未至家。過一嶺。假寐道旁。夢神告之曰。此地可葬。遂權厝焉。負土成墳。人以爲孝感。父

應祥以勤儉起家爲太學生時州中有所謂大役者凡州官公私支應皆責里長取辦大約如宋之衙前當是役無不破家者太學慨然率同志訴諸大吏其弊遂革而家因以落君工於制藝爲博士弟子與兩弟相切磋文日益有名及兩親沒後絕意進取或勸之輒泣然曰求祿以養親也親歿矣何役役爲乃卜築於州西九十里天馬山之南雅邨顏其室曰半畝居闢城趣軒環植花竹屋後倚山高松數十株深林掩映不見赤日暇則招二三知己吟詠風月盡醉乃已有陶靖節王無功之風春秋五十有九無疾而逝夫人李氏生子達文由歲貢生候補訓導歷署閩建臨高花縣教諭事側室黃生達忠達元孫十人曾孫十三人刑部在諸孫中最長且賢髫齡時君尤鍾愛親自課讀擇古人嘉言懿行可師法者俾誦習之以故刑部學有原本年十二而游庠弱冠而名滿海內刑部工古文詞讀其狀質直有先民規矩援坡公之例自足以壽世而猶假手於予刑部之謙也抑以予不善諛墓中人言之而人或見信故轉有取於老鈍之筆邪然則刑部尊祖之意尤可感矣

贈奉政大夫黃松石先生墓誌銘

予少時卽聞錢唐黃松石先生名又見所作篆隸淳厚有古法益欣慕之晚乃得交其子小松郡丞始知淵源所自今夏小松奉梁太宜人之諱扶楓將歸里先遣其兄子元鼎踵門來告曰先君及陳太宜人以乾隆二十二年葬本縣上泥橋之阡某方憧憬誌石未備今吾母不幸棄養謹卜日啓先兆而合葬焉敢

勾文納諸穿中。予受其事狀。讀之喟然曰。此孝義獨行傳人物也。按狀先生諱樹穀。松石其字。晚歲游孔林。得楷木之癯。攜歸名其齋。亦以自號。世居杭州之錢唐。六世祖汝亨。明江西提學參議。學者稱寓林先生。大父佑銓。縣學生。父兆泰。贈徵仕郎。先生性敏慧。童時賦綠牡丹詩。卽爲士林傳誦。家貧。隨北游侍起居。惟謹比壯。以筆耕自給。奔波南北。爲甘旨之計。父歿於保定旅邸。先生自里門衰絰。經沂江渡河。至棗林。遇大水泛溢。行旅斷絕。跣足行泥淖中。沙石所觸。血常濡踝。至河間。覓舟不可得。附蟹舟行。遭大風。幾覆溺者。再始達保定。訪瘞棺所在。水囁露前和。起之已朽。乃號泣。函骨以歸。冒雨買三尺竹。自扶跣行。七晝夜抵德州。始得附舟南返。繪涉水負骸圖以志痛。王虛舟吏部題其卷。比於古之虞趙焉。參議公寓林講堂久圮。卽其地葺爲廣仁義學。聚書數萬卷。以資學者。先世手澤散落。遇片紙隻字。必質衣購之。少耽經史。於六書尤有神悟。篆隸用筆渾古。婁張文敏公推爲第一手。詩文詞翰。名重公卿。有欲以經明行修薦者。辭不應。其於友誼尤篤。以緩急告者。傾囊無吝色。視其家無擔石儲也。母喪過時。猶哭竟以得病。春秋五十有一。以乾隆十六年九月二十七日卒。以子貴累贈奉政大夫。所著有格物考。河防私議。百衲琴清華錄。楷瘦齋集。初娶陳宜人。諱蘇。字若蘭。國學生某之女。幼事母以孝聞。合巹之夕。雙燭忽燼其一心。知不祥。未及四月而卒。年一十有八。時康熙五十九年四月二日也。繼娶梁氏。諱瑛。字梅君。處士師燧之女。賢而有文。事兩世姑。能得其歡。課諸子萬卷樓中。一燈熒熒。輒至達旦。好吟詠。而集句詩尤工。曾刻入。

大雅集先生之捐館也。宜人手撰行狀數千言委曲真摯門生故友見者咸閣筆晚歲就養山左官舍年逾八秩神明不衰曩時所誦習者默記不失一字仁恕好施予冬月常製衣以待凍者恭遇覃恩誥封太宜人嘗語郡丞曰吾家自少參公後筮仕者唯汝一人此汝父積善所致慎無忘清白家風也乾隆六十一年閏二月五日卒年八十有九長子庭國學生坐累謫塞外卒次經早卒次易今官兗州府運河同知卽小松也次童國學生孫男三人元鼎元長元禮孫女五人銘曰

蓼莪之思兮銜恤靡至萬里負骸兮瀕險而濟匪文繡而富兮匪軒冕而榮端孝之謚兮孚於鄉評有子亢宗兮唯慈訓是謹畫荻諄諄兮曰惟崇公之訓贈秩五品兮賚重泉畔合良兮吉且安千秋萬歲兮比於瀧岡之阡

何桐蓀墓誌銘

錢唐何元錫夢華與余交十年矣今冬卜塋其尊人明經君於西湖普福嶺之陽啓元配陸孺人之窆而合祔焉先期至吳踵門屬銘其藏夢華篤志古學尤嗜金石刻當援瀧岡西山阡表之例自爲之文而偏有取於衰鈍之詞豈以予性朴直不苟訛人文雖未工詞或可信乎按狀君諱紀堂字山甫一字桐蓀先世自上虞遷於杭曾祖喬雲康熙丙辰進士嘗作令湖南糾議免四十二州縣無名稅失大吏意然楚人至今戶祝之秩滿行取當授主事卽請告歸以著書終其身祖玉梁雍正癸卯進士翰林院編修文章爲

一時宗仰世所稱樟亭先生也。父熊雍正乙卯鄉薦知廣西之宜山湖南之祁陽二縣皆有治聲。君少而明悟爲大父鍾愛長從吳雲巖修撰學爲詩文才思清贍學使長洲彭公啓豐取入郡庠援例貢成均應南北鄉試屢薦輒不售。內行淳摯孝事祖母及二親禮無違者。及父官粵西祖母以道遠不欲就養君在家侍奉溫清晨夕甘旨無闕。何氏宗枝蕃衍多貧不能葬者計七十餘匱君聞而惻然請於父擇地序昭穆葬之性忼慨勇於赴人之急而不責其償其客山左也有馬別駕登鰲者假貸數千金卽傾囊予之無幾何別駕歿遺孤貧不能自存君卽焚其券雖以此致困終不悔也。君精於醫術候三部脈處方劑應手輒愈愈後亦弗求報春秋六十以乾隆五十九年六月二十八日卒有詩稿二卷道樞書屋隨筆十卷又有續活溪志四卷則侍親祁陽所葺也娶陸孺人淑懿有賢德以乾隆三十九年五月十八日卒春秋四十陸孺人生四子元銓府學生元錫元鼎皆候選縣主簿元昌國學生蚤卒側室王氏生元鉅元符皆幼孫一人瀛銘曰。

綬之若若沒則已焉抱璞在躬久而道尊南陽伯求廬江子季第五之名何減驃騎淵哉若人詩禮舊門文不偶俗德以潤身族屬雖分皆吾一脈掩七十棺歸於窀穸良友告匱傾貲貸之友死子弱折券置之李錄厚德歐表一行以今況古方策同炳澄湖汪汪宰木蒼蒼有子而賢積善其昌

布衣臧君墓誌銘

臧氏望出東莞。其後遷浙之長興。又自長興遷江南之武進。國朝有諱琳者。以名諸生。精研經術。著書滿家。學者稱玉林先生。是爲君之曾祖父。生子晉。晉生若彩。若彩生子卽君也。君諱繼宏。字世景。晚自號厚庵。少有至性。年十三失母。號慟如成人。每晨夕伏柩側。屏息聽。曰。吾母其復生乎。旁人嗤其癡。弗爲止。旣長。以家業日落。奔走服賈。然造次必依於忠信。嘗爲某氏持錢。同事瞰其家。孤寡可欺。欲以計吞之。君度力不能禁。慨然曰。受人之託。坐視其敗而不言。是與同惡也。卽攜襍被辭去。中歲節縮衣食。稍稍自給。營葬考妣及先世五殯。同時安窆。誠信有加。三黨之無倚者。分所有贍之。平生好扶助人事。變倉猝。傾囊相濟。不計其人之償否。亦不責異日報也。嘗訪友長沙。渡江兩舟並行。遇暴風。一舟先覆。同舟者惶怖無人色。君慰之曰。死生有命。雖恐懼無益。靜以待之可耳。其教子極嚴。有過。扑責不少恕。延端士爲之師。課以舉子業。晚歲謂子鏞堂曰。文章當從經典來。汝等能續我祖玉林公之傳。吾願足矣。又言。吾身後勿作佛事。天堂地獄。當於生前善惡決之。禮懺作樂。徒爲比邱輩作快樂場耳。嘉慶元年七月九日。以疾終於家。春秋六十有九。娶章氏。子鏞堂。常州府學生。次鱣堂。禮堂。屺堂。孫一人。始餘姚廬學士召弓。數與予言。鏞堂之賢。因與定交。及君之葬。鏞堂述事狀乞銘。故不得辭銘曰。

玉林遺書。伏而未出。什襲至君。手澤無失。君有賢子。校而錄之。士林快覩。尊爲經師。惟子之賢。由君之教。不言躬行。孝乎。惟孝。豐西之鄉。四尺其封。善必有後。允哉是翁。

嚴半庵墓誌銘

予與歸安嚴文學元照交有年矣。予假館吳門，相去僅兩日程。聞其家多藏書，而尊人善教子，乘興欲往訪之，輒以事阻不果。今冬元照墨縗至予館舍，稽類而言曰：吾父以今年六月十三日棄養，行且卜塋。思所以不朽吾親者，惟先生之文是賴。予辭不獲已，乃卽其行狀稍詮次之。按吳興嚴氏，本貫平江之嘉定。明洪武初，有達卿者避亂至歸安之石冢村，始占籍焉。有子曰毅，毅生敬，官監察御史，河閒長蘆運鹽使。敬生齡，齡生宇，字生茹，茹生贈奉直大夫刑部員外郎而泰。而泰生縣學生正思。正思生府學生欽，欽無子，以弟之子縣學生爾琪爲後。卽君曾大父也。大父躬逢德清縣學廩生，父秉謙府學廩貢生，候選儒學訓導母嵇孺人生子四君，最幼弱齡有至性。甫九歲，聞兄殤號，慟不食者三日。族黨咸異之，讀書警悟。初習制義，下筆頃刻千言。成童後，患疚積久之不愈，父母恐其苦思致疾，乃納粟爲國子監生。父嘗命主出納管鑰，數年纖毫無所私。父喜別賜之千金，及父病療經歲，君出所賜金買人蔞和藥以進，未嘗私一錢也。性慷慨，喜周人之急，雖解衣稱貸，不少惜。爲人排難解紛，必盡力。有負之者，亦弗與校。中年以後，困于外侮，所向恆不如意，又艱于得子。年四十始得子元照，甚慧。三四歲卽能作擘窠書，君喜甚。思所以教子者，則曰：浮而不實，非學也。於是聚書數萬卷，遇宋元槧本，不惜重價購之。元照旣長，延名師督課，舉業之外，兼及羣籍。旣入膠庠有名矣，則又曰：博而不精，非學也。士以通經爲本，窮經必通訓詁，而文字聲音，則

又訓詁之所由出。舍古訓而以意說經。大道之多岐。必始此矣。元照遵其訓。於是有娛親雅言之作。每辨論古義。必進質於君。而後筆之。遇有排擊先儒過當者。則又諫之曰。辨而爭勝。非學也。議論深刻。非徒招忌。亦恐損福。不願汝曹效之也。元照以高才生試行省。屢躡人或以爲病。君則曰。窮達自有命耳。古人以少年登科爲不幸。姑盡其在我可矣。噫。今世教子弟者。汲汲於利祿。讀世俗浮濫之文數百首。便可弋獲。視通經學古之儒。指爲迂闊。何怪乎士風之日薄乎。予故舉君之教子以爲法。君諱樹萼。字茂先。一字半庵。年六十有七。以嘉慶五年六月十三日卒。元配許氏。次陳氏。次亦陳氏。次莊氏。俱無子。篋室范生一子。卽元照歸安縣學生。孫男二人。培均女二人。銘曰。

懸黎在握。世所寶兮。不如有子之率教兮。袍笏盈床。衆所好兮。不若鉛槧之可樂兮。鞠子之勞兮。未食子之報兮。維令名之劭兮。庶以榮厥考兮。

郭肯構墓誌銘

三晉以孝友世其家者。曰平遙郭氏。五世同居。門無異財。縣學生樸村。肯構兩翁。寔董其家政。每督學使者至。輒旌其門以示勸。士大夫無不翕然稱之。今春。肯構翁卽世。將卜塋于城東十里之長寧原。其從子興讓。狀其行事。乞余銘。興讓與余同年進士。卽樸村翁之子也。讀其狀質而無溢美。故樂得而書。君諱大。址。肯構其字。始祖思忠。自陝西渭南縣徙平遙之王郭村。其十世孫曰三耀。三耀生縣學生紹儀。紹儀生

三子長爾強是爲樸村之考季爾翰寔生君故君子樸村爲從父昆弟君少樸村一歲總角時食同器臥同榻入塾同硯席旣冠同籍學宮自壯至老晨夕相依其友愛雖同產不是過也君狀貌嚴重鬚長尺餘事親孝交友信視端行直非禮不動家世同爨食指繁多而樸村翁性曠澹事無大小悉委之君每辨色卽起諸子姓上堂問起居惟謹婚嫁喪祭必裁以禮平居服用皆取儉朴惟課子弟讀書必延名師一門羣從學業皆有師法平遙三百年來以進士起家者自興讓始君之教也興讓之孫于君已親盡君撫視之如己出有過失輒加笞楚君旣不以屬疎引嫌家人亦帖然無少嫌也姑之子某負官錢二百緡吏逮治之急旦夕且瘐死君賣白金詣縣庭代輸之事得釋諸姑之孫以貧告者君出貲數百金俾各作生計折閱殆盡無慍色或諷君不善殖財則曰吾家藉先世遺產頗饒足彼雖遠戚自吾祖視之皆外孫曾也吾敢私先人所有哉君生于康熙三十二年六月十三日卒于乾隆二十九年三月十六日春秋七十有二配高氏子男一人于京國學生女三人適國學生梁理介休縣學生范韜光國學生張應璠孫男三人豐慶豐烈豐孚銘曰

子壯出分俗自秦別籍異財始弟昆戚單服盡行路均不念厥初同一身范道根李聖伯五世同居表史冊誰其繼之平遙郭千秋萬載眎貞石

孝廉蔣君墓誌銘

乾隆庚子秋餘姚邵二雲侍讀典試粵西得人最盛全州蔣君德載其一也予嘗訪粵士文行兼備者於二雲二雲輒舉君名予故耳熟焉而未之相識也今冬君之兄郡司馬雲亭來告君之訃且狀其行乞予銘讀之泫然知二雲之言不我欺也君諱勵容德載其字世居全州萬鄉龍水村州中言望族者必首蔣氏父振梨直隸慶雲縣知縣有子六人君次在五少靜默寡言笑而善承親意慶雲公嘗指以語宗人曰是兒孝我處伯仲間怡怡愉愉自幼至壯如一日讀書潛玩義理遇有疑滯反覆思之恆達旦不寐久之亦譟然以解尤愛宋儒書博觀約取務在切近易行爲文直抒所見不喜爲帖括揣摩之陋諸兄強之應試補博士弟子年三十六舉於鄉公車屢上輒躡吏部注選知縣需次南還平生無聲色靡曼之好無機械狙詐之習重義輕利篤舊慎交徜徉山水間泊如也與司馬幼同學勸善規過相敬如執友司馬攝青浦令時君往視之適歲暮徵漕粟君入倉鈞稽簿籍閱視斗斛雖滑吏莫敢上下其手君娶曹氏無子年五十有一以乙卯正月十八日終於里第遺言以司馬第三子啓錦爲後卽以其年某月日葬二雲爲予乙酉典試所得士君出其門與予有通家之誼不敢以不文辭銘曰

惟漢舉士興孝察廉家修無玷束帛乃占近代鄉貢登於禮部名曰孝廉實則未副恂恂蔣君佩實銜華內行淳篤潔白無瑕軒冕匪榮名教自樂沒而名稱豈爭旦莫金盆之原佳城鬱然過者必式曰惟真孝廉之阡

嵇靜園墓誌銘

君諱文揆。字大醇。一字靜園。無錫人文華殿大學士贈少保文敏公之曾孫。文淵閣大學士贈太子太師文恭公之孫。翰林院侍讀晴軒公之嗣子。自文恭公以上。勳德具載國史。君天資雋爽。好豪飲。視阿堵物若無所覩。隨手散去。亦不甚惜。中歲遵川運例入貲。當得府經歷掣籤試用江西。嘗委署南昌吳城同知。饒州景德同知。廣信弋陽縣丞。終未得實缺。君嘗自言。吾官當至四品。壽至八十。卽與君厚者。亦謂君之門地才氣。必能副斯言也。乃奔走簿領十餘年。訖無所遇。鬱鬱不自聊。年四十七。卒於弋陽官舍。娶同邑鄒氏子一人。國子監生峻女二人。長適歸安縣學生嚴元照。次許字程孫。男一人。女二人。憶予初入詞館。文恭公方位少宰。以後進禮通謁。卽荷獎借。以詩古文相期許。每有經進文字。輒招與討論可否。其後十餘年。予與晴軒同侍直上書房。寅入酉出。寒暑無閒。課誦之暇。相與縷述家事。不異昆弟。旣而各有視學之命。予往嶺南。晴軒往關西。宦迹邈隔。音問遂疎。予奉諱歸里。遂不復出。晴軒任滿還朝。未幾捐館。傷其無子。聞以弟兵部長子爲後。亦未得謀面也。乾隆庚戌。予以祝嘏抵都門。文恭公時爲首揆。親訪予寓邸。談諧如平時。以予之鈍劣疎懶。尙在元老記憶之中。古道良可感已。及文恭公薨。予適以病寢。未與執绋。私心恆以爲歉。今又聞君之訃。孤子峻踵門求銘。俛仰交情。轉瞬四世。老成久逝。蘭蕙俄摧。而予亦頹然將老。昔人云。旣痛逝者。行自念也。悲夫。銘曰。

相門世嫡而官以八品止。脅力方剛而算不盈四紀。生未相識。歿銘其藏。述德感舊。以誌不忘。

潛研堂文集卷四十六

墓誌銘五

國子監學正戴先生墓誌銘

乾隆四十有八年三月十四日國子監學正上元戴先生卒春秋五十有九嗚呼先生今之經師也往歲壬午與族人東原同舉于鄉一時有二戴之目予與東原交最久東原歿後始得交先生而意氣相投猶東原也先生之子衍善衍範又嘗從予遊乞予志墓其何敢辭先生諱祖啓字敬咸別字東田後更以未堂自號先世居徽之休寧明萬歷中有諱顯傑者始自江西徙江寧曾祖進忠贈文林郎祖天章上元縣生員贈朝議大夫父濬增廣生先生少穎悟世父學士雪村公教以書史記誦之餘卽能講解弱冠以後遂潛心經義有志于儒者體用之學於四子書用功尤深凡精義語類及大全之說皆博觀而審擇之所作舉業文精深博大一以先民爲師吳門楊文叔高郵夏醴谷兩先生先後主鍾山書院皆嘆以爲異才然浮沈諸生中者十有五年舉鄉薦累試禮部輒不遇而學益高望益重甲午歲陝西巡撫畢公慕其名延爲關中書院院長凡攷課甄別升降之規皆取決于先生日有課視生徒如子弟隨材善誘各

有進益。嘗曰：我無它愛憎。惟真讀書立品者，文或未工，亦優獎之。大要欲合文章學問人品爲一也。居數月，弟子著錄日衆。安西、迪化諸州來學者，趾相接。畢公乃奏于朝，言戴某學術純正，訓迪有方。六年後，如有所成效，乞格外推恩酌用。得旨報可。戊戌試禮部成進士，例授中書科舍人，仍還關中。明年，先生在院六年，載矣。畢公援前奏復薦諸朝，引見之日，特試四書文一篇，有旨以國子監學正學錄用。旣拜命，需次歸里。未到選期，奄不起。嗚呼！書院始于宋初，本鄉學也。世宗皇帝始頒詔立書院于行省治所，合一省之秀者，延名師教之，擬於古諸侯之國學。先生主講席有年，道尊而教行。牧伯咸薦天子親試，將以爲太學之師。視胡翼之之遇，殆過之矣。海內方以爲真先生復出，而竟止于此。悲夫！悲夫！平生篤志經籍，議論一以宋儒爲宗。所著尙書協異，尙書涉傳春秋四測。老子新解各若干卷，文集又若干卷。性不妄取，而常濟人之乏。嘗舉大父語以勸子弟云：利于人，亦利于己者，亟爲之；利于人，不利于己者，勉爲之；利于己，不利于人者，勿爲也。娶黃孺人，辛酉舉人元鑑之女子，四人衍善。上元學附生衍範、國子生衍緒、衍士、女子三人。增曰：丁酉副貢生王芾，曰已亥科舉人方遵軾，曰試用州同阮坦，孫男二人，孫女二人。銘曰：

俗學之弊，急於功利。口誦程朱，而行與悖。卓哉先生，文與行兼。規矩允蹈，泥淖弗濂。研思六經，旁及子史。不苟異同，要衷於是。牧伯禮請爲諸生師，夫子之稱，偏于關西。教成入覲，天顏有喜。俾官成均，分教胄子。濟濟槐市，企踵云來。胡不施期，梁木遽擢。先生逝矣，典刑猶在。學成一鄉，名動四海。九江信都，歿而道尊。

遺書無恙昌爾子孫

優貢生候選儒學訓導楊君墓誌銘

國家立學校崇儒術選京朝官提督學政三年一更代將受代例擇通省人士文行兼優者三四人或二三人升之成均以示勸也夫鄉試三載一舉大省解額或多至百餘人然徒錄其文未及其行惟學使薦舉優行擇之精故得之尤難幸而得之又或名與實不相應以予所見名實允副者其惟吾友楊君鐵齋乎蓋自平湖陸清獻公講學東南恪守攷亭不爲它說所搖動論者推爲本朝儒宗第一君私淑清獻尊而信之又嘗從陸聚綱編修遊與上下其議論故博涉羣書得其要領編修之歿君爲文祭之謂朱子後大儒無如南吳北許兩公魯齋墨守寒泉遺論草廬作諸經纂言則別有心得有魯齋以干城朱子然後異說不得逞有草廬以推廣朱子之學然後儒家不局於專門訓詁之陋蓋以清獻方魯齋而以草廬擬編修也而君生平學行宗仰所在斷可識矣君生而穎敏五歲授以漢魏六朝詩卽能背誦時族兄進士錫恆豪於飲一日宗人小飲指謂君曰弟試誦詩一首吾當飲一杯君卽應聲誦數十篇無一字誤進士連引酬遂至沈醉舉坐驚異及長補金山縣生員文日益有名十應鄉舉同考薦卷者四終不遇學使晉寧李公因培舉君優行明年聖駕南巡召試詩賦入二等有內府文綺之賜聲名隱然動江左而不得一官命也君之舉優行也與吾邑曹中允仁虎同薦李公有春華秋實之目中允旋登進士列侍從君獨蹭

蹬場屋以升貢太學當得儒學訓導未及官而遽沒然公論具在固不以顯晦分優绌也君事親孝居喪自大小斂至祥禫壹遵家禮儀節嘗與友人論喪禮謂記云居喪未葬讀喪禮既葬讀祭禮此爲平日未讀禮者言也儀禮十七篇素所誦習何待苦由中始佔畢哉張子言居喪它書不可觀者謂非聖之書也讀聖賢書未必越于禮外聖賢之學寧以居喪而遂忘之其議論通達如此教授生徒各隨才器誘掖之所成就者尤衆性耽著述丹黃不去手於四書詩書易小學皆有劄記於春秋有四傳存疑于三禮有臆說又有觀理編律呂指掌圖鐵齋偶筆詩文雜著合若干卷君初名開基字履德其後更名履基而仍其字鐵齋其自號也曾祖國訓贈奉政大夫祖黼一名貫甫江西臨江府同知父升歲貢生候選儒學教諭先世居平湖後徙婁縣之張堰雍正初析婁之南境爲金山縣今爲金山人夫人陸氏都察院左僉都御史某之孫平湖縣學生某之女早卒君壯失偶終身不更娶子運昌縣學生女嫁婁縣學生馮孝錫孫男一人女一人君春秋六十有三以乾隆四十年閏月十九日終於家以其年某月日葬於某鄉某原銘曰鑿之深而成淵也縗之修而及泉也玉粲之璫兮上燭天也終輶于櫨璞自完也讀父之書有子賢也謂客莫嘲後有子雲也

孝廉胡君墓誌銘

嶺以南才士予所識者三人欽州馮敏昌魚山順德張錦芳藥房及胡亦常同謙同謙以詩經舉於鄉出

吾友益都李南礪之門。其來京師。介南礪書訪予。與之言詩文源流。洞中癥結。它日讀其所作詩。超然獨
達。脫棄凡近之格。旣下第。南歸。與休寧戴東原同舟。至富春江。乃別。舟中盡鈔東原所著書。攜歸。將刊之。
東粵抵家後。手書報予。欲壹其志於經術。予益聳然異之。無幾何。藥房以書報同謙死矣。且述其事狀。乞
予爲銘。已而南礪書至。復以爲言。乃摭其略書之。同謙姓胡氏。亦常其名。贈文林郎。翰林院庶吉士。景輝
之曾孫。贈承德郎。吏部主事炳之孫。丙辰進士。翰林院庶吉士。吏部驗封司員外郎。傑之子。性冲淡淵默。
與鄉人處。由由然不見臧否。而抗志希古。不欲爲一鄉一國之士。方吏部捐館時。同謙年尙少。能自刻厲。
以殖其學。事母何太安人。孝有郭外田數十稜。最其歲入。悉以奉母。晨夕甘旨無缺。夫婦終歲厭粗糲。自
若。嘗購書盈籠。索直數鎰。謀諸婦。脫釵質錢償之。不敢私取田之所入。其於詩妙悟天成。不由師授。能於
南園諸公外。自成一家。魚山嘗謂人曰。吾粵詩人。曲江之後。當推海雪。繼海雪者。其彌浦乎。彌浦同謙所
居。因以自號者也。同謙生於乾隆癸亥某月日。以癸未三月廿四日卒。年止卅有一其卒也。以歸舟盛暑
中。鈔書多啖瓜果。解渴得胃寒疾。歸而益劇。竟至不起。死之日。有四女而無男。後數月。妾遺腹舉一子。名
應科。又明年五月。母何太安人卒。應科亦殤。嗚呼。同謙之目。其不得瞑矣。夫悲夫悲夫銘曰。
榕之不材。其大蔽牛。蘭之猗猗。秋風敗之。彌浦之原。四尺墳兮。恒幹久棄。神明存兮。

孝廉范君墓誌銘

予歸田後慕四明天台之勝數往來甬上與其鄉賢士大夫游所尤心折者孝廉范君莪亭也君性樂夷
澹外和內介以圖籍爲生活以友朋爲性命予嘗偕一二同志訪君甕天居出所藏明賢墨迹品題其高
下茗椀爐香相對竟日不知世間有徵逐游戲事君又熟於鄉邦文獻予纂鄞志數就君咨訪傾囷出之
無倦色古所謂直諒多聞之友君殆兼有之比年久不相見而尺素歲率一再至今春吾家竹初先生書
來達君之訃而孤子懋賢等復狀君行實乞予志其銘爰次而敘之四明范氏出宋尚書右僕射忠肅公
之裔忠肅子員外郎公麟始家於鄞迄今六百餘年代有顯人爲鄞甲族君諱永祺字鳳頡別字莪亭康
熙甲辰進士湖北通城縣知縣內閣中書某之曾孫府學廩膳生某之孫國學生某之子幼而敏悟未弱
冠補博士弟子屢應省試輒斥而文益有名以食餼久次列歲貢年六十始中式浙江鄉試主司以得名
宿相慶而君引疾不赴計偕遂以孝廉終君博覽強記好收藏明代及國朝名公尺牘自碩輔名儒忠臣
孝子文人逸士以及閨閣方外靡不收錄攷其時代爵里行誼別爲序錄以寓論世尚友之旨其仕宦顯
達而爲清議所斥者翰墨雖工弃勿錄也工於漢唐篆隸尤精摹印遠近得者咸什襲珍之甕天室成集
蘭亭字爲七言律二篇東南名士屬和者數十家一時傳爲佳話其內行修謹言動必依規矩宗族鄉鄰
推重無間言春秋六十有九以乾隆六十年十二月廿日卒娶朱孺人再娶黃孺人皆先卒子四人懋賢
懋穎懋楫懋樹伯季補縣學生餘皆太學生女一人婿曰水濬孫十六人曾孫一人銘曰

學之博也。蔚乎薦紳之型。行之敦也。叶乎州里之評。猗大器之晚成。而澹乎其居貞。雲養弗升。水冽弗盈。以昌其名。

張蔚園墓誌銘

君姓張氏。諱大受。字若谷。一字可之。蔚園其自號也。先世自無錫遷居常熟。曾祖雲昌。明中書舍人。祖廷華。鄉飲賓父。文揚倜儻。好義。交游皆賢士大夫。陶編修貞一嘗爲作家傳。稱九如處士者也。君所居卽瞿文懿公故第。始生之夕。處士夢文懿授以筆曰。以畀爾子。六歲就傳。穎悟絕倫。十二卽能詩。十三丁母陳孺人憂。日跪木主前誦金剛經。三年無間。五經博士言先生德堅。教授里中。君與陶太常正靖。嚴觀察有。禧。俱稱入室弟子。益都趙贊善執信來吳。中君以詩文請質。許爲國士。并賦詩書箋贈之。十九補太倉州學生。明年試高等。食餼於庠。與沈編修淑約入山讀書。學成乃出。未幾。丁處士君憂。沈亦聯登鄉會榜。不果斯約。以貢入成均。與番禺莊相公有恭。同邑孫主事夢達。襍被蕭寺。以道義相期勉。未嘗持一刺走貴人門也。鄉先達蔣文恪公欲延爲師。乘小車往訪。屏跡不見。累試京兆。無所遇。復歸里門。從學者日益衆。乾隆十六年。天子首舉。南巡之典。君獻頌行在。文采博贍。以籍貫誤注。不得預召。試之列。自是無仕進之志。而造詣益醇。鄉邦有大利病。輒倡議究其可否。先是。大吏建議築兩縣沿海石塘。君言築隄捍潮。本以衛民。今所定塘基。乃在濱海三五里以內。綿亘百廿餘里。所占皆膏腴之產。徙人廬舍。毀人墳墓。

不知凡幾。且築塘之土必取諸近地。計塘身及起土之所占田。殆將萬畝。國家會計久定。雖灘沙懸課。往往以漲補灘。未得遽議豁免。此所占田既無漲可補。勢必加派於通邑百姓。未得護田之益。先有加賦之累矣。因貽書蔣文恪公。纏纏千餘言。指陳尤切。其見義敢言。通曉治體如此。惜乎未得尺寸之柄。而以明經終老也。以乾隆三十四年八月十日卒。春秋七十有一。配黃氏。國子監生朝珍女。未嫁時。刲脣肉愈母疾。汪孝廉元亮爲之傳。子二人。曰應麟。曰應祥。戊子舉人。孫夔有學行。能世其家。君所譏述甚富。中年燬於火。今遺文四卷。夔所搜輯也。其墓在錦峯山麓。祔處士穴之左。銘曰。

士不榮世。宜昌其文。文無難易。有本則傳。剽賊偏駁。外強中乾。剪綵之花。雖多弗鮮。猗歟蔚園。本本原原。楹書零落。拾遺抱殘。志存開濟。非苟而言。鄉人尸祝。久而勿諼。匪直也文。其行允敦。我摭其實。式表墓門。

潛研堂文集卷四十七

墓誌銘六

廣東雷州府知府馮公墓誌銘

嗚呼。此故中憲大夫廣東雷州府知府前整飭洮岷兵備道甘肅按察副使代州馮公之墓。始公由戶部郎舉堪任道府引見得陝西甘州府知府陞辭請訓世宗憲皇帝大賞異之特賜御書及貂皮湖筆紫金錠諸物。越四年以公事吏議當降調總督劉文恪公等奏請留公疏入上曰馮某老成諳練係朕記名幹員不特應留府任卽道員亦可用之。卽照所請行。劉公奉詔驚歎曰上真知人。今上御極之十六年車駕幸江南公時爲蘇州同知執事行在一日宮門出片紙書公與掣鹽同知李某名傳問總督黃文襄公曰兩同知居官孰優。文襄以公名對因有雷州府之命蓋聖人在上酌民言而飭吏治一改唐宋明重內輕外之陋雖萬里之遠若在堂闈治行善否無異燭照數計而如公者亦可謂能舉其職者也。公幼能文年十七遊京師貫順天籍爲諸生已而改歸本籍中雍正元年恩科鄉試明年成進士又二年補戶部江南司主事遷河南司員外郎奉命典陝西己酉科鄉試得人稱盛其任甘州也西陲方用兵羽書旁午公星

夜馳之官。經理糧運無乏。軍器手自料檢。皆中程式。嘗被檄攝甘山肅州安西三道所治道里去府回遠。公來往往其間。百事皆舉。一時綰四印。未嘗稍形竭蹶也。乾隆三年。遷平慶道。按察司副使。次年。調洮岷道。洮岷番彝雜居。轄土司二十四。屯田茶馬任劇事繁。公以誠信待物。在官三載。不名一錢。及以事罷吏議。得旨送部引見。將行。土官屯軍追送。多泣下者。以父憂歸里。復丁太夫人喪。葬祭如禮。服闋。吏部引見。卽命往河南補陳州府知府。陳地窪下。多水患。公甫至。值淫雨卽周歷屬城。相視隄防。至西華之青龍隄。水大至隄。且潰。衆洶懼。勸公避之。公曰。官去民將安恃。下令敢有走避者罪之。親率人夫守護隄。賴以完府城。故有絃歌書院。七邑生徒肄業其中。公爲延名師課之。暇日。則親往校其文藝之優劣。而獎厲之。諸生之秀俊者。咸聞風而至。由是文風甲于中州。以失察屬吏。被劾。左遷江南蘇州府督糧同知。吳中估客所集。督糧主徵比逋欠。前政或持兩端爲利。案日以積。公至。敕吏胥取累年故案立爲決之。無敢干以私者。其治雷州也。海濱蠻獠多不帥教。公能以誠信化之。遂溪民韋甲爲仇家所誣。以姦殺事。巡道某力主之。獄已具。公審得其情。惻然曰。典郡之謂何。殺無辜以媚上司。吾不爲也。卒改其讞。大計。舉卓異第一。未及入覲。以疾卒於官舍。春秋六十有四。時乾隆二十年六月十九日也。啓其橐。無百金裝。巡撫以下咸歎息。厚賙之。公仕宦三十餘年。宅心忠厚。未嘗有疾言遽色。嘗題座右曰。居官求有功無過。無過便是有功。始在郎署。有能聲。及出典郡。以治行受知兩朝。官雖不過四品。然當世數良吏者。必屈指及公。昔人著官箴。

言私罪不可有。公罪不可無。公前後屢絆吏議。起而復躡。然未嘗有一私過也。此可以爲賢矣。其居家孝友。撫孤姪若已出。叔弟某嘗知金壇縣。罷官客死江南。公哭之慟。遂得左臂偏枯之疾。卒以是至不起。公諱祖悅。字鍾冀。別字敏齊。先世有諱盛者。自山東壽光縣遷于代。隸振武衛軍籍。皇朝雍正中。省諸衛改隸州縣。今爲代州人。曾祖如京。廣東左布政使。祖雲驥。康熙丙辰進士。翰林院編修。禮科給事中。父歷康熙辛卯舉人。刑部四川司主事。公始娶繼娶皆李氏。女兄弟也。三娶亦李氏。皆誥贈恭人。四娶張氏。生子三。曰鄆。乙酉選拔貢生。曰鄭。廩膳生。曰邵。國子監生。五娶戈氏。誥封恭人生女子二。偕夏邑縣舉人武潢。國子監生徐天駿。初公在甘州。恭遇恩詔。時張夫人主中饋。例得封。願讓封前妻曰。前人皆與君共貧賤。且無子。可無以少慰地下乎。由是三前妻得並贈。親鄰皆賢。張夫人云。孤郵等卜。某年月日葬公於某鄉。某原先期來請銘。銘曰。

稽古治行。大小馮君。代郡之馮。豈其苗裔耶。自左布政而下。多以方面績聞。堂堂雷州。名達至尊。當世以爲殊遇。何治之循而數之屯。井淳既安。以利嗣人。千秋兮萬歲。知有賢二千石之墳。

山西分守冀寧道沈公墓誌銘

觀察沈公。胚胎名族。通曉時務。起家州縣。累擢監司。與上官意不合。拂衣而歸。優游鄉里者十有五載。貴而不驕。鄉邦以爲矜式。予比年假館吳門。暇輒訪公。談諧竟日。公長於予七歲。而步履矍鑠。勝予數倍。常

歎羨目爲地行仙。今春示微疾，捐館灑然若無累者。公之子培嘗從予游，因請予志其墓。予不得辭。沈望出吳興，而吳中之沈尤蕃衍，多達人。公之先世，明兵部郎中某，以名德祀鄉賢，再傳至皇朝翰林侍讀學士。朝初，公卽學士。曾孫歲貢生曾虹之孫湖南零陵縣知縣華之子諱之燮，字汝枚，蔭園其號，少隨父任溫清之暇，兼習吏事。乾隆二十八年授河南獲嘉縣知縣，三十年調祥符縣，三十五年遷許州知州。四十年大計，以卓異薦，四十一年引見記名，卽擢山西寧武府知府。四十五年調平陽府，四十六年題陞分巡冀寧道。以四十八年引疾歸里。其卒以嘉慶三年三月三日春秋七十有八，卽以其年七月十五日葬元配耿淑人，繼配任淑人子五人：培、坊、壇、培均、孫十人：秉銓、秉鐸、秉鉅、秉鑑、秉鏗、秉鑑、秉鏗、秉鑑、秉鑑、秉鑑、秉鑑。曾孫一人，公筮仕之始廉幹識大體，尤習於刑名。其在祥符，以職獄爲何恭惠公畧所知，恭惠任臬使日，它郡有疑讞，多委公會鞫。公亦爲盡力，所平反甚衆。其尤著者：光州俞牛兒，新野李拒燶二事。牛兒故無賴，一夕村民阮志被縛，控官言牛兒等夜行竊，縛事主輪姦其婦。州獲犯既招伏矣，公以昏夜行竊，何由圖姦，志被縛，旣呼牛兒姓名，當殺以滅口，何又從容成姦？再三詰之，志詞窮，始言牛兒實竊非姦，乃鄰人怨恩，欲重其罪，以除害耳。牛兒等遂得不死。李拒燶者，李閔氏之姪。閔氏無子，養拒燶爲嗣，爲娶陳惟善女，拒燶隱宮者也。陳氏不安其室，逃歸者數矣。一日，惟善送女至婿家，還至中途，女復趨至，惟善憤怒，縊殺其女，并自縊焉。縣役鄧純士者，索賄於李弗得，乃言閔氏與拒燶通，令其兄閔國祥殺之。縣令入其言。

掠治拒獄。當抵極刑。獄已成矣。公覆驗得其情。白上司。請釋三人。而戍純土。縣令亦得罪。乃有左袒新野令者。謂公枉斷。故出入人罪。蜚語播京師。部臣卽以入告。詔提人犯。令軍機大臣與刑部會審。公以原問官亦赴質詢。及會讞日。大臣頗有爲新野令地者。詰公詞色甚厲。公極言拒獄冤狀。申辨再三。諸郎官驗拒獄受刑傷痕。經年不滅。皆曰。殆天意也。遂以實奏。請如原斷。而公治獄明恕。聞於海內矣。公在許日。臨潁有殺人獄。已審正兇。擬抵矣。大吏欲翻其案。訊囚以好語誘之。囚曰。我實殺人。不敢誣好人。乃止。在山西再署按察使事。秋讞多從輕比。嘗曰。罪疑惟輕。古之訓也。我敢不勉乎。公達於從政。雖遇盤錯。恢乎有餘。在豫日久。最爲上官倚重。亦未嘗曲意求合。其觀察冀寧入覲日。或勸以謁要人。謝曰。吾外吏秩卑。敢游卿相之門乎。公五世祖兵部公。久祀郡學鄉賢。閱百數十年。而公之考繼之。公乃剏建祖孫鄉賢祠。以志一門盛事。又特爲學士建祠。捐田八十畝。以供烝嘗。易簣前七日。猶親往宗祠致祭。拜跪如禮。其治家敦族周卹。故舊多可稱者。銘曰。

吳興之望昌於吳。世德趾美慶有餘。懿哉觀察名實孚。親民司牧衆所愉。雪冤肺石回瘠枯。如唐徐杜漢張于朱轡。擁節腰銀魚。年未七十賦遂初。元豐十老入畫圖。鬱鬱佳城白日徂。紀德示後久勿渝。

大理府知府張公墓誌銘

乾隆五十有一年九月八日。故大理府知府張公晴沙卒於里第。春秋八十有一。先是婁東有七老人會。

皆縉紳歸田。德望可矜式者。當時比諸睢陽洛下之盛。及予來主講席。則諸老已凋落。惟廬州守王公容齋。與公歸然無恙。每風日晴朗。輒從二老游。公眉目秀偉。衣冠肅整。望而知爲有道之士。尤熟於鄉邦文獻。口講指畫。無異目睹。雖年臻耄耋。未嘗有謬誤語。予益敬而親之。乃未及二年。而容齋先歿。公亦繼逝。老成淪喪。予益悽愴無所之矣。悲夫。越三年。孤子樟等卜以某月日葬公於某鄉之原。先期乞予文。刻之穿中。公良吏於法宜銘。且與予雅故。其何敢辭。按狀。公諱瞻洛。字文江。號晴沙。世爲太倉州人。明南京工部尙書輔之六世孫。尙書生候選訓導洪。洪生慶都縣丞凝道。凝道生儀徵教諭元薦。元薦生州學生。岑。岑生議敍州判舉孝廉方正閏。則公之考也。公始孩而失母。事父及繼母。能得其歡心。未弱冠能文。以國學生應南北試。數薦不售。乃援例入選。得湖北安陸府通判。分駐沔陽之新堤。其地四面環水。豪民編木截流。而漁水蓋激怒。舟楫多致覆溺。公親往撤之。行族稱便。嘗奉檄勘潛江水災。所至饑民載道。郡守欲匿不以聞。公曰。是可忍。安用民牧乎。卽馳詣大府言狀。得入告振卹。丁母憂。服除。補河南彰德府通判。彰德糧甲於中州。官吏不能檢束。旅丁因以需索。公至。則預告有漕州縣嚴飭家人胥吏。絲毫毋擾。由是旅丁無生事者。在任十年。署府事者四。攝州縣者三。嘗奉檄至陽武督賑。而饑民千數。蠭聚縣治。縣令倉卒無措。公輕騎往呼其耆老。使前曉以利害。因出散賑款目示之。咸唯唯而去。賑事甫畢。而河工徵稽料之檄又至。縣令益窘。夜謁公曰。縣境被水。安所得此。公曰。此易與耳。頃在賑所。見大戶儲料頗多。若酬其

直而善諭之。雖百萬可立致也。卽出示所屬果如期而辦。其署汲縣也。適河東商人乏鹽。假長蘆鹽行銷。各官皆有餽遺。公獨固却之。旣而歐陽觀察永祺舉其事。監司以下得罪者八人。唯公一無所染。其署歸德也。部檄採買黑豆三十萬石。公以積歉之後。派買獨多。力請於上官。得減五萬。民皆德之。遷雲南大理府知府。過闕請訓。奏對稱旨。到官律已以廉馭下。以法輯睦文武。撫綏土司甚得。吏人之和。府倉貯兵糧二萬餘石。每歲諸縣糧戶自運交納。公念其遠來。隨到卽收。且令人自執概各攜餘糧以歸。僉謂向來所未有也。他如修學宮。興書院。革鑄錢。攬砂之弊。嚴洱海巨綱之禁。皆足爲後來法。爲忌者所中。被劾落職。歸裝。唯攜點蒼石二枚而已。所居爲桑民憚先生故宅。水石竹木頗深秀。春秋佳日。與賓朋羣從觴詠其間。蕭然有世外之想。兩遇萬壽慶典。得復元官。而公以年老不能復出矣。元配陳恭人。於子爲中表姊。先卒。子樟。乾隆庚子舉人。詠葵太學生。皆側室張孺人出女二人。長適錢荃。次適俞佩聲。次適蔣載。孫寶熊吉燕仁煦。俱幼銘曰。


吏二千石。令長之率兮。苟民譽之毋失。雖去其官奚恤兮。言歸家園。樂耆年兮。曲江風度儼神仙兮。天與善人。有子而賢兮。我銘其室。曰是惟良吏之阡兮。

凌竹軒墓誌銘

君姓凌氏。諱存淳。字鯤游。竹軒其別字。居松江之上海縣。大父直齋。父蒼山。俱尙義有隱德。以君貴。贈朝

議大夫母黃生母何皆封太恭人君少而沈靜嗜學補縣學生肄業成均文譽籍甚族父兵部侍郎榆山公深器重之年三十三筮仕得府同知掣籤赴廣東試用屢署要職題補雷州府同知以廉明善決獄爲督撫所知在粵先後十有三年署縣事者四署州事者一署府事者五署同知者三通判者二而於雷州本任莅事纔數月蓋多試之縵劇不欲久置散地也初署永安閱舊牘甲訴乙賴婚乙言吾女許字甲次子而甲欲妻其長子故不願及庭鞫召二子至長醜而次美閱女年帖又與長者相若以詰乙則言兒女昏嫁年歲不必同且長幼亦不相懸媒氏又助乙證成之因諭曰汝兩家各執一辭婚姻天定吾爲女決之於天書兩名置盤中令乙探之探得者卽女壻乙對天虔禱取一紙啓視之甲長子也遂伏罪歎曰天果不可強也署番禺時有馮甲兄弟僦張內屋奉母同居一日以小故相詈馮不能勝則訟言張毆其母君往驗無傷遣出越數日忽言傷重殞命驗之仍無傷痕而得服毒死狀僉謂馮鳩母以陷張矣君意小冲鶴鴿糞可療飲之經宿死君因悟曰此鴿食斷腸艸糞中有毒其母適中之耳遂破械出之有巡撫吏訟佃戶欠租訊之無實乃吏利其產欲占之君勃然曰此風不可長卽重笞之而告于巡撫岳公濬岳公曰凌君洵健吏立命革役荷杖以徇省城肅然其署潮陽也有甲竊乙漁網事露反言乙竊其網已追獲之前令未之決以網存官庫君召兩造問網有識乎乙言損左一角甲不能對出網驗之果如乙言乃抉

甲而還乙其剖斷明敏多此類君旣以才能累攝大郡會瓊州守缺總督蘇公將特疏舉薦先檄任事君念太恭人年已八旬亟繳檄請終養上官交留之辭益力遂歸杜門不出者二十年事黃何兩太恭人生養喪葬必誠必信祥禱甫畢有司檄令赴補遂以足疾辭下帷却埽不與外事嘗舉先儒言居官不受一人屬居家不以一事屬人書於齋壁論者以爲不媿斯言性好施予厚於桑梓而薄于游客衣冠動作必依乎禮法有姍家子著新履頗詭異君見之曰此優伶所尙非良家子弟可用亟令易去好吟詠兼善擘窠大字題榜尤工生於康熙五十二年九月丙辰歿於乾隆四十五年九月某日春秋六十有八娶俞宜人孝謹勤儉白首相敬無間言子鏡心松江府學增廣生松心上海縣學生復心國子監生女一適國子監生黃珏孫男九人女七人鏡心等將以壬寅歲正月某日卜葬新阡先期屬予銘之其詞曰學優而仕政平訟理愛人約己廉可師兮將莅瓊海陳情引退養志匪懈孝無違兮老氏知足孟氏寡欲葛氏抱朴兼有之兮申江漣漣鬱鬱新阡先生藏焉名永垂兮



潛研堂文集卷四十八

墓誌銘七

鈍閑詩老張先生墓誌銘

吾邑詩老鈍閑張先生春秋八十有二以乾隆三十八年十一月廿一日卒又十年子承鈞暨諸孫等卜吉仲冬廿一日葬復禮鄉火字圩之原以元配錢孺人祔孺人大昕族姑也總角授書卽側聞先生緒論丁亥冬乞假里居往來尤密嘗從容言僕老矣身後之文願以屬吾子及大昕再入都門奉諱南回則先生謝世再易寒暑矣茲先生之文孫璉述事狀乞銘其藏息壤之盟其敢寒諸先生諱錫爵字擔伯號中巖先世自常熟至崑山三傳至諱元恩者始占籍嘉定生允陳允陳生縣學生欽明欽明生候選州同龍光卽先生之本生考也先生生未周晬奉祖母命爲仲父觀光後始就傳記誦兼數人外祖顏君茂名撫其頂曰此吾家陽元也弱冠與宗人南華宮詹同夫孝廉及朱藥庭徵士相酬唱抗志希古不爲俗學間就正於族父樸村徵士所得益博而醇補吳江縣生員又援例肄業成均累應南北鄉試終不見售而所作益奇中年以後絕意仕進長洲沈文慤公見其詩歎賞不置欲以代興屬之先生曰吾詩但適吾性耳

標榜非吾事也。年六十有脚氣之疾。杜門不出。每日焚香誦太上感應篇。與覺宗上人講論釋典。得遺世觀我之旨。年踰七十。視聽不衰。取平生所作詩。手自刪定。爲吾友于齋詩鈔廿卷。論說序記雜文。又得八十餘篇。皆有益於世道者。其居家恭儉。與人交有終始。訓誨子弟。必依於忠厚。視世俗榮利。泊然無所歆羨。晚年自號鈍閑詩老。蓋以辛敬之程孟陽。自況云。錢孺人國學生衍之女。勤儉自持。白首相莊。無交誦聲。年七十有九而卒。子五人。承鈞。承恂。葵。承詩。承禮。承恂。葵。承詩。皆邑庠生。葵爲弟西靖後女三人。婿國學生朱紹緒。附貢生金日藻。國學生錢肇震。孫十三人。曾孫五人。孫璉。曾孫彥曾。皆邑庠生。銘曰。詩老之稱。肇自溪南。松圓繼之。得公而參。辛固奇士。所患樸直。程亦逸才。所乏風力。猗歟先生。有實有華。根柢槃固。亦正而葩。一命非榮。千秋斯壽。封侯萬戶。不如千首。詩家長城。超程軼辛。碌碌餘子。曾何足論。井樟旣營。玉靈告吉。陵谷可移。詩名不滅。

舅氏沈君墓誌銘

舅氏沈君臣表之卒也。大昕爲位哭于京邸。旣而吾母以書至。命大昕汝宜爲銘。於是大昕泫然流涕。謹敘其事曰。君諱詮。臣表其字。居青浦之黃渡。曾祖某。祖某。父時俊。母黃氏。妻曹氏。先卒女一人。嫁毛某。春秋七十。以乾隆三十一年八月二十二日卒。合葬鄧家浜之原。從先兆也。君治家儉。交友信口。無戲言。鄉黨皆嚴憚之。少與陳山人雪笠善。雪笠工繆篆。鑄竹器爲人物山水。入能品。故君于二事皆能之。又善鼓

琴得前輩指法久之家日窘乃屏諸嗜好服賈三十餘年衣食粗能自給矣既老喟然歎曰吾久失偶又無子縱跡如苦行僧尙安以家爲哉先人同氣惟妹一人吾當依吾妹耳自是棄家而主于我終日焚香撫琴而已君之從弟虞明居重固里君嘗往視之撫其子某曰他日當爲我後今年七月忽買舟往重固問之曰吾旦暮且死兄妹親也生當相依死則當歸于沈氏吾母泣君亦泣留之不可在重固未一月竟卒若前知者嗚呼哀哉君長于吾母三歲吾母之來歸也去家三十里而近外祖父母存日吾母歲一歸寧或間歲一歸及喪外祖母吾母歸寧益稀自外祖父棄世後吾母不復歸矣君以治生故亦不能數至吾家歲中率一兩至甚則經歲絕不至故吾母與君相見常難也比四五歲始得聚首如少時君又棄吾母而去此吾母之所以悲而思思而欲假文以傳之也嗚呼悌矣銘曰

嗚呼是惟我舅氏之宅封四尺穿中石永不泐

徐良輔墓誌銘

錢門塘之名見于宋鄭覃水利書其水久湮廢而市猶以塘名南傍郭石塘東界顧浦臨水而居者裁百餘家與予所居望仙橋相去僅三里許在縣之最西俗朴而儉無聲色侈靡之習與予鄉略相似徐翁良輔居其地三世倜儻而尚義年八十餘筋力強壯不減四五十者乾隆三十五年某月日以疾終孤子文范寓書京師乞予銘其墓翁與家大人交最厚家大人誠子兄弟數言徐翁雖不讀書而行事闡與古人

合可以媿當世之號爲文人而薄于內行者於其歿也義當爲銘初翁之叔父介繁以任俠凌鄉曲好蒲博習拳勇不治家人業翁少從諸父遊而恥以俠名家故貧力耕作營什一之利遂以饒足然內行修謹友愛諸弟撫弟之子如子立宗祠於所居之西春秋率子弟行禮無敢跛倚僂言者平居食無兼味不衣縉帛然親故以急難告應之無難色里中橋道多不治爲行者病翁常出錢爲之倡木者石之迮者廣之圮者新之無者有之大小凡數十所鄉人稱爲造橋徐翁云翁諱某良輔其字墓以某年月日子文范國子監生篤志經史尤精于輿地之學孫口人東南之俗稱鄉之大者曰鎮其次曰市小者曰村曰行錢門塘南宋嘗置稅務于此故爲大鎮自明以來人戶衰少特鄉村之小者爾經曰十室之邑必有忠信然鄉曲微行鮮能播於通都大邑往往湮沒不彰甚可歎也自錢門塘置鎮至今無一人列名志乘獨明時有洪君學者歸熙甫嘗爲撰菊窗記故洪君之名得附其集以傳蓋文之足重如此今徐翁之行視洪君殆過之當得熙甫其人者而文之而文範乃求之予予則豈其人哉銘曰

父之執我所敬於人有濟世無競善積於身後當興視我銘詞左券徵

西沚先生墓誌銘

西沚先生以篤學鴻文登巍科入詞館不數歲而參綸閣班九卿貴且顯矣甫逾強仕奉諱星奔服闋遂不復出里居三十餘年日以經史詩古文自娛撰述等身弟子著錄數百人嘗取杜少陵詩句以西莊自

號學者稱西莊先生。西莊之名滿海內。頃歲忽更號西沚。予愕焉諷使易之。不肯。私謂兒輩曰。沚者止也。汝舅其不久乎。西沚於經義專宗鄭氏。茲以嘉慶二年十二月二日捐館。歲行在己龍蛇之辰。與康成先後一揆。斯亦異矣。予與西沚總角交。予妻又其女弟。幼同學。長同官。及歸田衡宇相望。奇文疑義。質難無虛日。予鴻緩。西沚數臻厲之。始克樹立。平生道義之交。無逾西沚。常以異姓軾轍相況。匪由親串暱就輒相標榜也。今窀穸有期。而予視息猶在人世。誌石之銘。奚敢辭。西沚姓王氏。諱鳴盛。字鳳喈。一字禮堂。外舅虛亭先生長子。爲世父升孟公後。幼隨王父卓人公丹徒學署。奇慧。四五歲日識數百字。縣令馮公詠以神童目之。稍長習四書義。才氣浩瀚。已有名家風度。年十七。補嘉定縣學生。學使歲科試。屢占第一。鄉試中副榜。才名籍甚。巡撫陳文肅公大受。取入紫陽書院肄業。東南才俊。咸出其下。在吳門與王琴德。吳企晉。趙損之。曹來殷諸君唱和。沈尙書歸愚。以爲不下嘉靖七子。又與惠徵君松崖講經義。知詁訓必以漢儒爲宗。服膺尙書。探索久之。乃信東晉之古文固僞。而馬鄭所注。實孔壁之古文也。東晉所獻之大誓固僞。而唐儒所斥爲僞太誓者。實非僞也。古文之真僞辨。而尙書二十九篇。粲然具在。知所從事矣。乾隆十二年。中江南鄉試。十九年會試中式。殿試一甲第二人及第。授翰林院編修。蔣文恪公溥爲院長。重其學。延爲上客。二十三年。天子親試翰詹諸臣。特擢一等一名。超遷侍講學士。充日講起居注官。其冬扈從盤山。明年充福建正考官。未歲事。卽有內閣學士兼禮部侍郎之命。還都召對。天語甚溫。未幾御史論其

馳驛不謹部議降二級明年授光祿寺卿扈從木蘭秋獮二十七年以平定回部覃恩誥封三代賜貂皮大綬等物二十八年丁朱太淑人憂去職回里既除喪以虛亭先生年高遂不赴補其後入都祝萬壽者一迎駕行在者再皆有文綺之賜恩遇不異供職時而西沚自以多病無宦情矣性儉素無玩好之儲無聲色之奉宴坐一室左右圖書咿唔如寒士卜居蘇州閨門外不與當事通謁亦不與朝貴通音問唯好汲引後進一篇一句之工獎賞不去口或評選其佳者刊而行之嘗言漢人說經必守家法亦云師法自唐貞觀撰諸經義疏而家法亡宋元豐以新經義取士而漢學殆絕今好古之儒皆知崇注疏矣然注疏惟詩三禮及公羊傳猶是漢人家法它經注則出于魏晉人未爲醇備故所撰尙書後案專宗鄭康成鄭注亡逸者采馬王補之孔傳雖僞其訓詁猶有傳授非盡鄉壁虛造間亦取焉經營二十餘年自謂存古同於輿地職官典章名物每致詳焉獨不喜褒貶人物以爲空言無益實用也蚤歲論詩溯原漢魏六朝宗仰盛唐中年稍變化出入香山東坡晚年獨愛李義山謂少陵以後一人前後吟詠甚富手自刪定爲二十四卷王琴德謂其以才輔學以韻達情粹然正始之音非虛僥恃氣者所及古文紓徐醇厚用歐曾之法闡許鄭之學一時推爲巨手又撰蛾術編百卷其目有十曰說錄說字說地說制說人說物說集說刻說通說系蓋仿王深寧顧亭林之意而援引尤博贍焉自束髮至垂白未嘗一日輟書年六十八兩目

忽瞽閱兩歲得吳興醫鍼之而愈著書如常時春秋七十有六夫人寶山李氏子三人嗣構候選州同嗣
穉嗣疇皆學生女六人婿姚冕嚴曜霄黃恩長顧亦宋宋豫芳吳振錡孫男女若干人銘曰

古三不朽立言其一言非一端所重經術漢儒治經各有師承後儒鑿空師心自矜堂堂光祿樸學是好
祖述後鄭升堂覩奧學優而仕實大聲宏鶩鳥累百鸞鷟先鳴立朝九考晉秩二品優游林泉著作自任
經明史通詩癖文雄一編纔出紙貴吳中弇山元美畏壘熙甫兼而有之華實相輔粉榆共社科第同年
肩隨兄事申以婚嫁有過必規有疑互質相思披衣老而愈密壑舟云逝大名長留斯文光燄芘護松楸

鶴谿子墓誌銘

鶴谿子姓王氏名鳴韶字鶚起有薄田在太倉之鶴瀝因自號鶴谿子外舅虛亭先生之次子而西莊光
祿之弟也其先世事迹已具外舅墓志中鶴谿子少于予四歲初相識時年裁舞勺眉目如畫舉止有名
家風度濡染家學高自期許稍長涉獵羣書慕洪景盧王伯厚陶九成王貽上之風好評論古文人物侃
侃伉伉不肯隨聲附和予嘗謂西莊曰君家又得僧彌矣及予作就壻晨夕與偕歲時中外姻姪聚會諧
謔予或少屈鶴谿子必助予揩柱之以是知其遇予特厚也予與西莊先後入都鶴谿子侍二親在家甚
謹而學日益進學使戶部侍郎夢麟公賞其文以廷誇名補新陽學生員後乃改今名性落拓澹于榮利
而好爲詩古文兼工書畫外舅論詩宗眉山劍南真書似裴柳行書似李北海鶴谿子盡得其傳又與邑

高士周晉瞻牧山談畫理。遂精其藝。與陸孝廉卽仙稱二妙云。西莊自列卿家居。以詩文提唱後進。評選江左十二家詩。鶴谿子居其一。論者不以爲私。歲乙未。予督學廣東。招鶴谿子至署。酬唱往復。無間昏旦。遇巖洞奇秀。輒邀同游。鶴谿子嘗得錢叔寶紀行圖殘本。乃弇山園故物。欲仿其意。自吾邑至粵。所過湖山鎮市。各紀以圖。規畫甫有緒。會予聞先府君之訃。匆遽歸里。此事遂輟。生平喜鈔書。所收多善本。每有新得。恆就予評泊。尤喜元明人書畫。真贊入手立辨。家貧不能多蓄。有心賞者。解衣付質庫易之。弗惜也。於邑中文獻。留心搜訪。寺觀橋梁。殘碑隻字。躬自摹搨。攷證異同。以補志乘之闕。談先達遺事。世系派別。里居遷徙。立身賢否。歷歷如在目前。自鶴谿子歿。而後生數掌故者。無從質所疑矣。生于雍正十年某月日。歿于乾隆五十三年某月日。春秋五十有七。娶莊氏。子嗣學。嘉定縣學生。嗣祥。孫男女若干人。銘曰。文毅之裔。簪紱綿聯。元陽學仙。孟夙逃禪。有文而隱。鶴谿繼焉。跌宕琴劍。揮灑雲煙。詩書滿腹。蓑笠一軒。第五之名。自足千年。少託葭莩。晚親笑言。人琴永訣。風流未湮。

瞿封翁墓誌銘

吾鄉有厚德篤行君子曰瞿封翁。學南以乾隆五十一年九月乙未卒。其明年四月壬子。子兆驥等卜葬於長洲縣八都四圖西北鄉劍號字之原。以夫人陳氏祔。先期乞予文。志其穿中之石。予病後久不爲人作銘狀。顧念總角時。卽與翁相識。歸田後。投契益密。翁之次子塘。又與予親家。乃不辭而序之。謹案瞿氏

見於王僧孺百家譜。蓋望出蒼梧。元明以來。散處常熟華亭上海。稱詩禮舊族。元末少中大夫號琴軒者。居上海之下沙。明初以巨室被籍。有乳嫗抱四歲兒懷棗實升許逃之。嘉定之高橋鎮閔數傳而子姓繁衍。田連數十頃。僮手指千。出入乘騎。里中莫敢抗。曾祖穎隆。好行善作黃浦義渡。以濟行旅。至今賴之。贈修職郎。祖有恆。始遷居嘉定城。以明經起家。由貴池縣訓導遷和州學正。父大定。贈朝議大夫。母汪恭人。翁九歲而孤。哀毀已如成人。後以家計中落。治生爲急。吾鄉地產木縣。衣被四方。乃於吳門經理貿遷。試計然之術。積其奇羨。遂至饒裕。翁性耿介。動必以義。不苟然諾。慮事情審。纖悉畢周。治家接物皆中法度。先世墓田爲族人私鬻。出貲贖而歸之。手定宗譜。條列井井。故居在儒學之南。歲久敝漏。翁旣葺而新之。後雖徙家吳閩。猶以學南自號。示不忘本也。少從侍御時西巖先生受業。故熟於邑中舊事。譚論鄉先輩嘉言善行。亹亹不倦。其訓子孫嚴而有法。讀書力學。務求遠大。勿狃於詞章浮靡之習。子塘孫中泌。皆以文學馳名。三吳翁之教也。晚歲多儲方藥。服食惟謹。嘗舉古人善言。不離口。善藥不離手之語。爲予誦之。翁長予一紀。而精神完固。乃過予。予往來白下。數主翁家。促膝劇譚。不限晨夕。洎翁沒。而邑中耆舊凋零。欲盡益悵悵無所之矣。翁諱連璧。字璞存。生於康熙丙申歲。春秋七十有一。敕授儒林郎。候選州同知。晉封朝議大夫。候選知府。夫人陳氏。少於翁一歲。其卒也。先於翁百有三十日。賢明識大體。白首相莊。無閒言。初封安人。晉封恭人。子三長兆。累國學生。候選知府。次塘廩貢生。碭山縣教諭。次兆麟。國學生。議敘

府同知女三人。壻曰朱漣。黃黼猷。錢喬雲。孫男九人。中泌。塵饒。生。中浩。國學生。中溶。中淵。中瀚。中治。中泰。中沛。中泳。皆習儒。中溶。予壻也。曾孫男二人。女一人。銘曰。

鶴沙之苗衍於江東。孝友世澤。耕讀家風。翁之大父移邑南郭。學優而仕。儒林矩矱。矯矯惟翁。蚤歲偏孤。始困終亨。以昌其家。研子心計。任公家約。道充身安。有餘綽綽。無慚無傲。曰儉曰慈。恭而近禮。約而好施。厥有義方。著爲庭誥。賢哉三男。令德克劭。綸音載錫。式賚里閭。郊原散步。飄然白鬚。言爲士坊。行爲衆望。翁之襟期。雲舒月朗。前瞻射瀆。後枕虎邱。鬱鬱佳城。平生所游。井樟旣成。卜日云吉。我銘斯藏。俾後有述。

陸淞園墓誌銘

陸子嵩庚。卜以乙卯歲十月二十五日合葬其考淞園。公妣錢宜人。於本邑崧塘之原。先期踵予門。流涕述母氏遺命曰。當代能文而不苟諛者。莫如吾詹事弟。它日吾夫婦志銘。盍往求焉。予亦泫然泣下。乃爲之序曰。吳中舊族。莫盛於陸氏。漢吳及晉。名德相承。唐宋而降。別爲四十九枝。其居青浦陸家圩者。自一耕公始。三傳至君滋。公始遷黃渡。卽淞園。曾大父也。大父學圃公。附監生。考授州同。父容亭公。國學生。竝以學行著於鄉間。淞園諱名時。字景雍。幼而開敏。十歲能文。先達多以遠大期之。弱冠游齊魯梁豫。諸公貴人。邀入幕府。折節訂忘年交。淞園不屑也。乾隆丙辰。以國學生入南闈。本房奇其文。薦之。以額滿未售。明年入都肄業成均。孫文定公爲祭酒。深加器重。會天子舉臨雍之典。淞園隨班聽講。得賜白金克食。及


經書一部蓋異數也其夏吏部試授職州吏目其秋應京兆鄉試二場甫畢得家書知父病不俟終場星夜歸里到家躬奉湯藥父病小愈又逾年而父歿既服闋親友勸以出仕謝曰小人有母不忍遠離捧檄非吾事也嗣是養志不出者幾二十年營治窀穸必誠必信生平篤於行誼見善必爲歲饑捐賑歲疫施醫苟利鄉井弗顧其私教子敦品讀書勿狃章句之陋以故兩子服官內外咸能有聞於時春秋六十有九以乾隆四十一年正月十九日卒議敘布政司理問敕授儒林郎誥贈奉直大夫配錢宜人歲貢生衍之孫女蘇州府學生如升之女性淑慎善相夫子事尊章能得其歡心識量明達不輕喜怒一日火焚其舍器物都盡淞園頗以爲憂宜人解之曰惟勤與儉可以集事是在吾兩人勉之而已不數年而堂構皆還舊觀晚歲精力益健每挑燈夜坐兒孫繞膝必告以敦尚忠厚毋失先世勤儉之風毋蹈華靡谿刻之習春秋七十有七以乾隆五十三年五月二十四日卒敕封太宜人子二長祖庚福建延平府南平縣知縣先卒次嵩庚光祿寺典簿兼珍饎署署正女四皆適仕族孫男四廷桂國學生廷槐曰壽邑庠生宜人於予爲族姊故於兩家行實知之爲詳系以銘曰

印纍綬若不如循陔之樂也款段下澤鄉里視之爲矩矯也室有萊婦白首與偕也有子登期義方之詒也淞江之湄土厚且沃也宰木蔥龍如斧如夏屋也潘楊之好感舊而神傷也勒銘穿中久弗忘也

敬亭弟墓誌銘

敬亭諱肇烹字希文晚自號敬亭少予一歲同出六世祖北郊府君高祖瑜字純夫國初以服賈致富行善於鄉名載聞在上縣志潛德傳曾祖麟字介邱歲貢生巢縣訓導有文名築東岡艸堂於南橫瀝之東與唐東江輩爲詩社祖衍字子振國學生有兩子長如升字天培吳江縣學生配旌表節孝范孺人敬亭之嗣父母也次楷字元禮國學生配姚孺人敬亭本生父母也嗣父蚤世事嗣母及本生二親廩廩愉愉無子弟之過年十二時元禮公延吾父爲之師予亦隨往晨夕聚首不異同胞敬亭性嚴冷不好與人狎爲文刻苦以先民爲程弱冠後補博士弟子鄉先進殷君聘尹有外岡志敬亭搜羅遺事續成四卷簡當有法少多病因博觀靈素難經甲乙諸書并宋元以來諸家書盡得其旨能決死生於數年前不爽豪髮然未嘗受人一錢之餽劉河人患尪羸數年偏體生五色暈衆醫莫能識敬亭診其脈知有積食詢其所嗜云素嗜牛肉敬亭曰此種牛毒也以藥下之大便成塊者數十暈去而病亦除歲甲辰予忽患痿脾胃以下麻木不仁亟延敬亭診之曰此脾陰下陷當用東垣補中益氣湯如其言服之數劑漸瘥半月後已能行矣平生爲人治療此類甚多或勸爲醫案記之則笑曰是偶中耳豈足以傳後世故予所記止此配愈孺人國學生九芝之女前卒子三人瑞恆瑞墀瑞口孫某某敬亭素重予文予文雖不工猶足以傳敬亭今衰病垂盡而其事不見於集中恐無以相見地下籌鐙力疾口授腹藁令東塾甄錄寄其子俾刻諸封中之石銘曰

學不求達。儒不爲迂。一蓺之工。比蹤淳于子。起予病。予銘子阡。非阿所好。其美足傳。



潛研堂文集卷四十九

墓誌銘八

封一品夫人熊太夫人墓誌銘

經筵講官太子少傅工部尙書新建裘文達公既葬之二十八年元配熊太夫人終於里第第三子行簡方開藩江左聞訃戴星就道雞斯號慟旬有九日而至苦次祭奠哭踊皆如禮將以某年月日奉太夫人靈輶啓文達公之兆而合祔焉先期貽書屬大昕文其囊中之石大昕夙從文達公游廁門牆之末嘗升靈輶啓文達公之兆而合祔焉先期貽書屬大昕文其囊中之石大昕夙從文達公游廁門牆之末嘗升堂瞻拜翟茀貞淑懿美知之最悉不敢以病廢才盡辭謹按太夫人姓熊氏世爲南昌甲族明崇禎壬午舉人皇朝贈資政大夫工部尙書諱曰馮者曾祖考也宜興丞諱一湘者祖考也康熙壬午舉人臨桂縣知縣加知州銜諱大樊者考也太夫人幼明惠知大體居不識廳屏言不出閭闈善相者謂當大貴且壽而文達公幼有神童之譽因縚姻焉年十七于歸不逮事君舅而奉姑王太夫人盡禮乾隆四年文達公官翰林乞假南旋奉王太夫人就養京邸太夫人偕行冷官俸薄節縮絲粟屢以不匱及文達公受知裕陵入直內廷由卿貳晉尙書前後卅年間內參密勿外理簿書兼領大著作又屢奉使指治河讞獄丈地

察邊東極遼瀋西逾哈密南至閩嶠馳驅鞅掌席不暇煖公固一心報國弗問家人生產而奉甘旨肅賓客經費出入章程井井公得以無內顧者繫太夫人之力及文達公謝世朝廷賜祭葬予謚恩禮優渥而冢次息早沒稚子幼孫未露頭角太夫人專力教誨寓嚴於寬由是子姓以科目起家凡五人歟歷中外聲望赫然餘各嗜學砥行不改寒素風太夫人年開九秩神明不衰諸郎君或握郡符或任牧令輒迎侍溫清維謹間以歸養請則正色曰汝家豈它人比耶戀私而忘公非汝先人意也行簡以中書舍人久直樞禁遭遇今皇帝眷念舊臣之嗣累遷內閣侍讀學士嘗召對詢及家事奏以親老不敢陳情卽奉命祭告南海諭以事竣省親蓋異數也今年行簡以太僕少卿奉命頒賞軍營途次擢太僕卿旋授河南布政使尋調江寧旬月之間三承綸綺及入謝諭以汝母年高改調汝近省便於迎養如老年憚行遣使問省不異在家也聖天子念舊教孝親若骨肉稽之史冊殆未嘗有於戲世祿之家名德相繼者鮮矣而裘氏多材咸自樹立恪守慈誨服官有聲太夫人康強壽考親見其子受兩朝榮遇以振文達公之緒生平鬻子恩勤藉以大慰妻道也母道也古大家所不能兼而太夫人德興福全無少遺憾置之劉子政十三篇中當爲第一於戲盛哉太夫人生于康熙五十四年九月十七日終于嘉慶六年八月三日春秋八十有七子四人麟乾隆庚辰進士翰林院編修師太學生俱早卒行簡乾隆乙未欽賜舉人江寧布政使行恕乾隆癸卯舉人湖北試用知縣護荊州府同知女四人壻鉛山程爲霖曲阜孔廣枚同邑曹寅生南昌徐

廷表孫十二人承重者元復庚子欽賜舉人國子監助教元巽甲寅恩科舉人增壽丁酉舉人福建廈門同知保舉堪勝知府元善太學生實錄館謄錄元淳元俊俱太學生元遜元穆元英元定太學生元勳太學生元秉元穎孫女九人曾孫男十二人女八人系以銘曰

敬姜惠班所天忽焉王姬韓姑似續無聞潘楊蘇程或促于年鴻妻滂母受福弗全懿哉女宗一品魚軒善相夫子槐棘崇班孝彰陔膳儉美組紩璇宮大慶錫賚使蕃先公卽世孤稚膝前家人嚴君兼於一身詩禮克紹科第蟬聯有子皆鳳無孫不蘭濟濟袍笏誨勉維勤樞廷地峻列職符分爭扶板輿綵衣舞駢皇華賜假定省寢門帝命方伯建業大藩謂近親舍就養差便安輯纔迓凶問倏傳阿婆老福何不百春瀧岡峨峨合祔茲阡善無不報歐陽所云山迴水抱瓦蔭後昆婦順母儀彤管垂芬

廣西按察使馮公妻封淑人王氏墓誌銘

故通議大夫廣西按察使代州馮公元方之夫人誥封淑人王氏世居江南之上元縣太子太保戶部尙書端簡公宏祚之曾孫刑部雲南司郎中瑜之孫廣西柳州府通判世清之女而翰林院編修禮科給事中雲驥之孫婦廣西南寧府同知塗之家婦也夫人外內兩家皆世族柳州與南寧同官相善故夫人歸於馮南寧奔父喪盡室歸里夫人始得拜見王姑魏夫人姑田夫人皆喜曰江南新婦動止有禮法及居舅姑喪哀敬盡禮宗族皆賢之馮公以名進士由州縣歛歷監司夫人常從任所治家事內外井井故公

得一其心於職事爲時名臣。公年逾四十未有嗣。夫人爲置側室。蘭氏生子郁。晨夕撫視若已出。公之仲弟。官嘉禾縣知縣。夫婦相繼歿。遺一子二女。夫人親撫養之。教誨婚嫁。履行侍膝下。僮僕新至者。不知其爲從子也。公旣卒。官粵西。夫人扶櫬歸里。營窀穸花家莊先塋之旁。勗子以讀書立品。無墜先人志。子郁以從三品蔭授河南閻鄉縣知縣。將迎夫人就養。夫人聞閻鄉清貧。恐以私養妨公務。竟不往。每獻歲。閻鄉使致。至安石榴木瓜一二種。夫人必問物何從來。答以同僚見遺。或署中所產。則喜。或誤答以紳士餽遺。輒不懌。貽書誠曰。此包苴之漸。不可不慎也。郁以是益自勵。用廉幹調儀封縣。咸曰賢母之教云。夫人年八十餘。神明不衰。燈下猶能治鍼綫。齒落者僅一二。其卒於乾隆三十五年八月十日。春秋九十。子一卽郁也。女一適辛未進士廣西左江道李天培。孫男四人。廷堅。廷望。廷圭。廷翌。以某年月日合葬夫。人於按察公之兆。屬其從子刑部郎中廷丞來乞銘。予與郎中以道義交。故得悉夫人之族世。銘曰。

尙書之門有淑女。廉訪之門有內主。仙令之門有壽母。祔同穴歸其所以德受福昌厥後。

王太宜人墓誌銘

刑部湖廣司郎中仁和湯君萼棠。奉其母王太宜人之訃。將奔喪歸葬。述事狀踵門來乞銘。且言曰。曩先君子捐館舍。太宜人遵治命。營窀穸西溪之上。葬吾王父母。以先人從葬。歲實在辛亥。越今四十有一年。將啓先人之封而祔焉。術者曰。神靈久安。動則有愆。土脈凝結。不利沮洳。若古攸聞。不以卑動尊。考亭大

儒故事可循。蓋別擇地而兆乎。詢之知禮者曰可。今卜葬吾母於某鄉某原。永惟苦節嫋行合於女史。請子述之。以蘄不朽。按狀太宜人姓王氏。處士某之女。誥贈奉政大夫湯公長庚之妻。幼有淑德。年十九而嫁。三十有五而寡。守志撫孤四十年。以乾隆三十六年四月七日卒。春秋七十有五。其年恭遇大慶推恩。誥贈宜人。子四人。長萼樓。太學生。次萼聯。乾隆乙丑進士。翰林院編修。先太宜人卒。次振殤。次卽郎中也。由乾隆癸未進士。歷今官。女三人。長適祝聖齊。次適魏學徵。季未嫁卒。孫男九人。憲優貢生。充覺羅宗學。教習照附貢生。愷勳俱縣學生。燾燧燿。並幼孫女四人。曾孫男三人。太宜人之嫁也。甫入門而舅疾亟。卽去妝飾奉湯藥。不以新嫁自異。姜翁周士者。姑之從弟。耄而無子。館之衣食終其身。曰吾不逮事姑。此以承先姑志也。人皆謂湯氏得孝婦。其佐奉政公也。家故貧。躬紡紝。務儉素。早作夜思。久而衣食漸裕。夫病割臂肉和藥飲之。人皆謂湯氏得令妻。中年而寡。遺息長者僅十有四。幼者未周歲。養之教之。使皆成立。有名于當世人。皆謂湯氏得賢母。湯氏自侍郎西厓先生後。久無達者。編修始以高才連取科第。登館閣。又十餘年。而郎中繼之。在西曹平亭疑獄。奏當無冤者。名動闕廷。方將大用于世。苦節之報。未有艾也。始郎中以養疾。不與計偕者三科。或以爲言。太宜人曰。遲速時也。躁進何爲。其識鑒遠達如此。大昕于編修爲後進。又與郎中交善。辭不獲命。謹敘次而銘之曰。

家之興。溯世德。節孝門。報不忒。懿宜人。內行備。先劬勞。後昌熾。伯養志。仲登朝。季踵之。名益劭。文章醇。政

事敏推所自母之訓卜新阡龜筮從神有知靡不通西湖水清而瀏賢母澤與同久。

邢孺人墓誌銘

益都李進士文藻喪其母邢孺人葬有日矣遣一介走京師以所爲狀乞予銘文藻從予遊久其母之賢固耳熟焉乃序而銘之孺人姓邢氏諱止候補州判李翁諱遠之配也端重寡笑言事君姑張孺人甚有婦道翁嘗病傷寒十日不汗孺人稽首籲天請減己壽十年以益夫算病良已又十年乃卒君姑猶在堂也孺人將迎百方懇傷姑心哀至則哭于別院久之姑亦怡然忘其失子延名師教諸子于家程課有常修膳必腆故諸子皆成立而文藻尤以文學顯青州士夫知從事于詩古文自文藻始也孺人好施予親鄰以貧乏告者周之無吝色戊辰歲縣大饑孺人爲粥日飼百餘人自十月至明年四月乃罷困廩爲空獨不信仙佛因果之說僧道至其門求施者拒之曰吾豈有貲財供其蓋五臟廟哉五臟廟者諺謂假修寺觀恣飲唱也其馭女奴以嚴有過必笞然能時其飲食勞逸必均又及時爲擇良對故旣歿而竈下皆哭失聲張孺人好畜啞婢謂有二善一殘疾不失養一不以口舌生家釁孺人亦買二焉村女有爲狼齧失人形者其父母棄之孺人令收養名之曰狼贍狼贍善操作孺人甚愛之孺人歿諸婢哭最哀者狼贍也孺人卒于乾隆丙戌六月某日丈夫子四文藻乾隆二十六年進士候選知縣文濤文淵縣附生文濬女子子二其嫁于竇者蚤寡守志孺人嘗慰之曰吾子女不朽者惟汝耳何恨銘曰

歷城之邢名族裔遷于益都今五世祖諱振邦考士掄兩世不仕潛德聞孺人十六室子李善事威姑相夫子中年集蓼食苦辛撫孤父師兼一身懿哉德修未食報終五十九座下壽海岱閣南安定鄉簪鸞佳城夫所藏丁亥二月日已未孺人之匱祔于是有子而才多文詞賢母之澤百代貽

張太孺人墓誌銘

元和陳孝廉鶴以乾隆五十八年六月廿有八日丁大母張太孺人憂卽以其年十有二月十有七日奉匱合葬於大父忍伯公之新阡先期自述事狀乞予銘其藏鶴篤行人也其詞質而可信故不辭而序之蓋鶴於忍伯爲族孫忍伯有子廣勤慧而能文早遊縣庠未娶而夭忍伯慟其子甚臨沒與太孺人議以鶴爲廣勤後而孫撫之且徧告諸族甫三日而忍伯沒族人有覬其資者相與齧齧之而鶴之本生考曾懋恥與爲人後亦堅辭太孺人以先夫遺言固不許越六年外侮稍定乃撫鶴膝下嫠婦弱孫相依爲命伶仃廿載卒能教以成立親見其登科可謂賢矣鶴之言曰吾祖母家故饒裕親串多素封而寒門獨終寢乃遭族侮遺產盡廢衣食或不給而太孺人安之若素嘗語鶴曰人生遭際各有定分求非分之獲必有非意之損又言處貧賤時持身不可不謹其明於大義如此吳中陳氏自中丞公以來名德相繼忍伯諱燦張由增廣生貢成均同輩推爲宿學初娶沈孺人早卒而太孺人繼之生一子一女子卽廣勤女嫁長洲學生胡璜女亦孝歲時迎養太孺人或留數月晚年辭不往曰吾老矣設有不諱不可殯於壻家識

者以爲達禮。嗣孫鶴乾隆壬子舉人。曾孫德勉銘曰。古稱女士能識大體。詒厥後人。式穀以似。猗與賢母。作配穎川。仁厚爲本。禮法靡愆。無子有孫。視孫如子。克家亢宗。由苦得旨。大母之訓。維孫是承。合祔云吉。佑啓雲仍。

墓表

候選州判李君墓表

君姓李氏。諱遠。君宏其字。先世自棗強遷益都東關之春牛街。曾祖有能。祖逢春。父元盛。以好義稱。推產讓二兄。服賈以奉母。年五十始得子。卽君也。君生之日。廳事方上梁。親鄰咸賀。以爲考室之祥。幼奇慧。應童子試不利。入粟爲國子生。後又援例候選州判。有志于仕進矣。太夫人年漸高。意不欲君行。遂不謁選。人以終其身。中歲得病。幾殆。旣癒。乃杜門攻甲乙家言。三年而成。療疾如操左券。求治者日闖街巷。君乘騎出視之。雖大風雪無阻。然未嘗受其家餽謝。嘗有男子叩門求寄炭。俟之半年不來取。君知其巧于餉也。命分給里之凍者。衆醫忌君之能。或譏君藥物有不盡識。持以相試。君笑曰。譬之于人。我識其性情心術。而君識其形貌耳。惡足以難我哉。久之家有狐祟。白晝投石傷什器。或言祭以雞卵白酒。則去。君不聽。日向空詈之。祟益甚。君爲文將訴于城隍神。詞甚厲。甫脫稿而安隣有跛者竇三。無故登君之門。大詬家

人咸不堪。君予之粟數石。慚謝而去。或以爲怯。答曰。吾伸于狐而屈于鄉人。不亦可乎。嘗論教子之法。十歲爲擇師。二十爲擇友。鮮衣美食勿使御。淫詞勿使觀。有不成立者鮮矣。乾隆丁卯春夢天召已。覺而歎曰。韓者寒也。入冬其不免乎。十月病痞。自診必不起。以是月十八日卒。春秋四十有一。配邢孺人。賢而知大體。君歿事姑氏。生養死葬無失禮。教其子文藻等讀書立品。毋忘先人之訓。歲己卯。文藻以第二人舉于鄉。明年舉禮部。而文淵亦補博士弟子。孺人乃泣告于君墓前曰。兒有登第入泮宮者矣。是夫子之志也。君有子四人。文藻。文濤。文淵。文濬。女二人。一嫁國子生蔣汝業。一嫁竇竦。蚤寡。君歿之二十年。而邢孺人卒。孤文藻等將啓君之兆而祔焉。先期。文藻以書告曰。先人捐館有年。而墓道之石未立。敢請吾子表之。又曰。世俗行狀多繁蕪。不合義法。爲文者別爲應酬之文。姑塞求者而不編以入本集。惟吾子擇其合于銘法者書之。庶附吾子之集以傳。嗚呼。斯可謂賢子也已。予惟古來淳德長者。行善于鄉。名位不顯。而卒能傳于後者。賢子孫之力也。行善矣。而無子孫。或有又不才。雖善久且不著。其傳不傳。有天幸焉。然而爲善者常爲之不悔也。觀君之行善如此。文藻之欲傳其親如此。天之報作善者。果有爽哉。果有爽哉。

贈儒林郎翰林院檢討曹君墓表

吏科掌印給事中汾陽曹君學閔。一日過同年友錢大昕。告之曰。某之先人行甚高而不求聞于世。旣沒

四十年士大夫數鄉之耆德宜有後者必首屈一指焉夫無善而誣其先非孝也有善而不能彰非義也某生十二年而孤於先人行事知之不詳惟夙所聞于先太宜人及親故常所稱述不誣者粗識一二乞吾子一言以表墓道之石給事人品修潔其文質直無虛詞乃詮次而志之曰君諱曰英字彥傑世居汾陽縣城北十里之太平村曾祖朝仕嘗遇異人授以術可暴富終不一試客請以千金受其方曰挾術而忘義必敗固弗與易簀時告子孫曰吾得異術非不知可少利若曹也然遺之以利何如遺之以正乎術竟不傳君未冠失所怙事母夫人孝爲邑諸生有聲庠序間與人交有終始重然諾倜儻好施予宗䣊賴以舉火者甚衆邑有王惠庵先生者孝子也貧而樂道獨與君善君常餽之粟寒則遺之布人或效君所爲王先生輒怒曰若豈彥傑比哉安得以所有溷我張嫗者於母夫人爲中表姊妹嫠老無所依君養之終其身張病且死語人曰吾受曹氏恩無以報天道有知其子孫必有顯者矣汾之土斥鹵可鹽塞外鹽亦間有擔以至者例皆禁不得售而令商轉安邑池鹽鬻于市道險又回遠鹽益貴豪商倚勢凌平民輒誣以私販罪君稔其害糾同志詣官白狀請均其稅于糧而逐商事得行民至今以爲便居鄉務爲退讓子偶與村甿詬語卽扶之曰此吾隣里卽汝諸父行孺子敢無禮耶親詣甿舍謝失教不計其曲直也年五十有一自尅其亡之日病革家人移床正寢笑曰尙須數刻及期整衣冠而逝實雍正九年九月三日也配王宜人壽陽縣儒學訓導凝道之女奉養君姑數十載無閒言後君□歲卒子男四人長學曾次學

思季學雍給事其三子也。登乾隆甲戌進士。由翰林院檢討累遷今官。女五人。孫男若干人。曾孫若干人。給事又言。君沒後數日。見夢于給事。張蓋輿馬導從甚盛。類世俗所祀神人者。嗚呼。幽明之理。固不可測。而行道有福。其常也。世果有神人。其必在正直而壹者矣。生不求聞。死而神之。此理之可信者夫。給事在翰林日。逢國大慶。得贈及父母。敕贈君儒林郎。翰林院檢討。葬以某年月日銘曰。

西河故郡。卜子所教。漂然節概。先民是倣。亹亹曹公。行善于鄉。貞固隱括。以矯俗涼。五十未衰。榮化則止。匪天斬之。以昌孫子。幽蘭空谷。其芳不言。過者必式。有道之阡。

黃氏先塋表

上海黃生森從予遊。乞予敘其先人事狀。表諸墓道。且言曰。森之王父載南府君。躬孝友。治生纖嗇。稍自給。王父與世父相繼辭世。而吾父治家事不懈。益虔。今從兄培蘭爲家督。門無異財。猶稱吾父遺志也。去秋。奉王母張宜人合葬於載南府君之兆。在縣東二十二保十八圖。而世父葬於左。吾父葬於右。昭穆相次。迫於時日。未及納銘於竈方。今能文而有法。莫如先生。願請爲文。刻於石。謹按黃氏。咎繇之後。以國爲族。而春秋衛有黃夷。晉有黃淵。戰國之時。楚有黃歇。漢初黃公居四顙之一。而景帝時有黃生。與博士轅固論湯武革命事。厥後丞相興於淮陽。司空太尉顯於江夏。而族浸以冒。述郡望者。皆原本於江夏焉。上海黃氏。先世仕宋。居於汴。有諱彥者。扈從高宗南渡。始居嘉定八都之騰陽。再遷而東。卽今析隸寶山之

清浦江傳五世至文明。兄弟三人。一居浙西。一居崇明。獨文明守故宅。三傳至昇。始居界浜口。以海水內溢。率其族築捍海塘。紓迥數百丈。至今有黃家灣之稱。有子六人。次二曰亨。以輸粟振山東饑。授承事郎。表其坊曰尙義。十一傳至錫周。好義重然諾。隣有盛甲者。罷官負累不得歸。錫周遇之逆旅。慨然出千金贈之。盛感其義。欲以愛妾出侍。艴然曰。公非知我者。遂拂衣而起。再傳至霖。性倜儻不羈。有子五人。長曰衡。松載南其字也。幼習舉子業。從嘉定張儼思先生學。與其子南華宮詹同筆硯交好。無閒父沒。棄儒服。賈其配張氏。南華從兄弟行也。賢而達大體。悉出奩中物爲貲本。逐什一之利。事母以孝。撫諸弟以友愛。課子以忠厚禮讓。不尙華侈。晚年與昆弟子姓聚首一堂。勸以勤力。或講論古今成敗得失。皆洞中窽要。卒年十有口。以子貴誥贈奉直大夫。張宜人年九十餘耳。目猶聰明。子孫欲爲稱壽。則力却之。令其子捐佃戶租一歲。曰此所以爲我壽也。年至九十五卒。誥封宜人子二人。長曰雲章。字漢文。一字勗哉。事親以禮。好施予。戚友有匱乏者。不俟其請。輒稱父命助之。嘗遠賈千里外。附書問父母安否。纖悉必以白。雖不在親側。親心安焉。年四十有五。誥贈奉直大夫。次曰雲師。字騶書。一字守愚。佐父家政。條理井井。兄沒。撫兄子四人如其子。剏建宗祠。合祀六世以下之主。春秋時享會祭者百餘人。乙亥歲大饑。有司勸富民煮粥以食餓者。騶書言。煮粥有中飽之患。有守候之苦。不若以錢給之。乃身自爲倡。卽所居五十二圖。驗其最貧者。大口日給錢二十小者半之。民不勞而得食。全活甚衆。以入貲。候選布政司理問。加二級。年六

十漢文子四人長培蘭候選布政司理問次培鎬淦培挂俱國子監生騶書子一人森邑庠生黃氏世居黃浦之濱黃浦卽古之滬瀆黃與滬聲相轉也今人以爲由春申君得名吾邑有黃渡亦云然皆傳會難信然載南翁父子以孝友勤謹起其家積善之慶其流必長異日援冉溪之例謂浦以高行黃氏而名奚不可哉

贈儒林郎董君墓表

君諱華鑑字進聲姓董氏世居浙江之慈谿漢句章孝子黯之六十世孫也父之璉國學生君少而朗悟讀書務通曉大義不屑屑尋章摘句旣長自傷家貧無以給甘旨乃棄儒服賈營什一之利嘗瀝荆襄泝巴峽舟車數千里與其賢豪長者交莫不信而服之旣而生計稍裕乃喟然曰父母在不遠遊古聖之訓也向特不得已而爲之今菽水幸無缺可以補前愆矣性儉朴與妻孥噉籠櫞而二親之饌必豐腆母嘗病劇諸方劑皆不效齊戒祈禱割左臂肉以進母服之竟痊僉謂至孝所感居喪柴毀骨立讀禮三年未嘗見齒仲兄客死虞山事寡嫂以禮撫其弱女如己出旣長罄已橐嫁之其游三楚時有客負其金五百鋌君知其不能償置勿索且爲籌生計毋致失所一時稱爲長者其治家纖嗇而教子弟必先以寬厚年四十有六而歿以長子入仕贈儒林郎元配葉安人莊靜寡言笑以儉勤佐家政事舅姑睦娣姒教諸子咸有法度晚歲病目翳就醫杭州湖上一日諸子請泛舟六橋忽愴然曰汝父在日嘗言卿一生勤苦足

不出門闕。倘得偕老西湖。不可不共游。今汝父已下世。吾何忍獨游哉。安人生三子。長景潤。候選州同。次景澄。國學生。次景沛。廩膳生。以讀書砥行。聞於鄉邦。嘉慶六年三月。景沛訪予吳門紫陽書院。出所撰事狀。稽首而言曰。先考妣合葬縣西五十里玉犀山之原有年矣。而墓表尚闕。唯先生幸憐之。予衰病久廢。鉛槧辭之再三。則又曰。鄴人之事昌黎。嘗有違言。願先生有以解之。予感其意。爲慨然敘次之。不復辭也。嗟乎。人肉療療。始於唐陳藏器本草。唐以前無此方。是以古聖賢無此事。夫身體髮膚。不敢毀傷者。人子晨昏之常節。一旦親在垂危。有可以藥斯疾者。雖蹈湯火亦所不辭。何乃於割股之孝子。而責之備乎。昌黎之論。特謂有司不當旌異之耳。有司立法。固當戒輕生之漸。人子盡孝。何暇計他日之名。今旣無旌門之例。而猶不令其稱於鄉黨。此與於不孝之甚者也。昌黎雖有是言。而後之史家。未嘗沒其姓名。蓋善善之心。人皆有之。不能執一家之議論。以抑千古奇傑之士也。審矣。昔虞仲翔以句章君怨親之辱。白日報仇。目爲孝子。使繩以後儒之論。必有大不滿者。而孝子之名。自與日月爭光。然則君之割臂藥母。亦可以自信千古矣夫。

墓碣

盛涇先塋之碣


盛涇先塋者。錢氏始遷祖之所藏也。蘇松之水皆注于婁江。松江以入海。縱者爲浦。橫者爲塘。其稱涇者。特小小者爾。盛涇介于吳塘顧浦之間。廣不過四五尺。不能容舟楫。相傳昔有盛姓者居之。鄉人讀盛姓爲直上切。并以氏斯涇焉。吾始祖自常熟之雙鳳里來贅于盛涇之管氏。貧不能歸。且樂其俗之朴而淳也。有田五畝。有屋兩間。夫耕婦櫛。足以自給。旣沒而葬于涇之陽。江澗錢氏多稱吳越武肅王之裔。吾始祖之遷失其譜系。其出于吳越與否。不敢知也。自始祖之沒。迄今二百五十年。先大父在日。嘗訪求始祖遺事。欲著之族譜。而宗姻隣里俱無有能言之者。近世士大夫述家乘。往往崇飾虛譽。勦取一二故事。可通用者。以文益之。此之謂誣其先人。非篤行者所取也。吾始祖行善于鄉。不求人知。傳序至今。閱八九世。成丁者垂及百人。或稽田。或讀書。皆安分量力。不輕去其鄉。無有作姦犯科。而麗于刑辟者。此則吾始祖垂訓之善。而流澤之長。有自矣。今秋大人貽書大昕曰。汝備位侍從。爲人作銘誌多矣。而先塋尙未有碣。是不可以闕。於是大昕謹紀所聞。令族子玷以小篆書之。寄歸刻于貞石。乾隆三十有八年歲在癸巳冬十月丙戌朔二十九日甲寅七世孫日講起居注官翰林院侍讀學士上書房師傅兼充三通館纂修官加一級紀錄四次大昕謹述。

布衣陳君墓碣

嗚呼。自科舉之法行。士大夫習其業者。非孔孟之書不觀。非程朱之說不用。國無異學。學無它師。真所謂

一道德以同俗者矣。然學者自就傳而後粗涉章句。卽從事於應舉之文。父師所講授無過庸軼骯髒之詞。得其形似。便可以致功名。轉不如詩賦策論之難工。由是六經諸史。束之高閣。卽四書之義亦可勿深求。譬猶莎葛誦經禮懺。志在乞食。而不在修行。蒙竊優焉。攷元時始以四書義取士。當時士大夫謂天理同根人心。誦其言者衆。則爲其道者將多。迄今垂五百年。自通都大邑。以至窮鄉蠻徼。無不知誦四書尊程朱。而未見有爲其道者所誦者。禮義所好者名利。豈口耳之果無與于身心歟。何其相戾之甚也。於此有人焉。能究心於四書。以自淑其身。而不爲科舉之學。可不謂豪傑之士乎。太倉之南鄉。有陳君宏猷者。幼而穎敏。年二十五。慨然有求道志。或勸應童子試。謝不應。家貧。教授生徒。手四書一編。晨夕研討。雖燕居衣冠必正。數十年如一日。鄉里笑其迂。稱爲小朱文公。君以爲誠然。欲然曰。吾無其實。敢有其名乎。寧化雷公鋐。視學江蘇。君攜所著四書晰疑往謁。雷公延以賓禮。留署中。講論無虛日。以爲相見晚也。君自少時好談易。繼乃專力于四書。晚年復作四書就正錄。其言平易。非儒先之說不道也。間出一二新意。或疑與注異。則曰。明經當以理爲主。與其屈經從註。何如舍註從經耶。明季陳孝廉確庵。以講學名。或言君爲確庵之後。君悚然曰。非也。然豪傑之士。必有待而興乎。其立志如此。君諱鋐。宏猷其字。其卒以乾隆二十八年十月廿九日春秋七十有三。葬於十七都七圖鹽鐵塘。今之士大夫諱言道學。憇無實而冒其名。或藉以梯進干譽。爲世所輕誚。然聖賢之書。具在優而柔之厭而飫之。終身不怠。而未嘗志于祿利。與世

競一日之名。若陳君者誠加于人一等哉。予居嘉定西鄉之望仙橋去其廬不二十里。顧未嘗與君識面。君旣沒門弟子王濤持其遺書請予文表其碣。予非能知君者。嘉濤之不忘其師重違濤意而爲之辭。蓋師死而不之背亦今人之所難也。



潛研堂文集卷五十

家傳

先大父贈奉政大夫府君家傳

府君諱王炯，字青文，號陳人。世居嘉定西鄉之望仙橋。生而穎敏，好讀書。年卅有三，始補學官弟子。家貧，以課徒自給。親舊家有藏書，輒借讀之。雖盛暑汎寒，未嘗一日少輟。又謂讀書必先識字，故於四聲清濁，辨別精審，不爲方音所囿。其教子弟五經句讀，字之偏傍，音之平仄，無少譌溷。士大夫有難字疑義，從府君取決，皆得其意以去。嘗游浙東，避雨入村塾，有童子問大學孔氏之遺書，明道語邪？伊川語邪？其師不能對。府君笑曰：此伊川先生語也。諸君未讀小學書乎？皆大歎服。或言王勃滕王閣詩序、蘭亭已矣、梓澤邱墟二句屬對未稱。府君曰：已矣，疊韻邱墟雙聲，何不稱之？有府君於四部書靡不研究，旁及卜筮禡命之術，輒有奇驗。唯不喜二氏學，嘗云：仙言長生，佛言不滅，二者皆未可信。夫神依形以在，未有形去而神存者。今學仙學佛之徒，徧天下卒無一人能見古仙古佛者。則長生非生不滅，仍滅也。若謂覺性常在，則吾儒何獨不然？匪獨孔孟程朱，卽李杜韓蘇輩，其精神亦至今在也。孔子言：疾沒世而名不稱，聖人豈好

名哉立德立功立言吾儒之不朽卽吾儒之長生不滅也府君事父母至孝兄早歿撫孤姪使成立剏修宗譜斷自遷嘉定之祖爲始而不附會貴胄蓋其慎也太倉李翁景初府君父執也幼時相依課誦李翁誨之備至翁歿無子府君迎其配黃孺人敬養三十餘年歿爲制服葬而除之歲時必設位致祭焉年踰六十始得孫大昕甫啐卽教以識字比五歲觀授以經書稍暇卽與講論前代故事詳悉指示俾記憶勿忘乃止如是者殆十年府君年九十餘視聽不衰出入不假扶掖散步阡陌間望之如神仙中人乾隆二十三年有司舉行鄉飲酒禮延府君爲大賓黃髮卽席觀者聳然起敬縣尹介公玉濤問何以致壽答曰某生平不知導引服餌之術但文字外別無他好未嘗輕易喜怒中年以後從不露處耳性和易有犯之者置弗校久之卒自慚謝與人子弟言必依於孝弟其有蒲博廢業誼競生事者正色責之往往改悔家無儲粟而錙銖不妄取於人方著艾時恭遇恩詔賜老人粟帛或請增年以覬賞府君曰欺天以邀榮吾不爲也己卯歲十月卒年九十有二以大昕貴誥贈奉政大夫翰林院侍讀加一級所著有字學海珠三卷星命瑣言一卷元和陳鶴填譯

先考贈中憲大夫府君家傳

府君諱桂發字方五號小山贈奉政大夫陳人公之子少承庭訓以讀書立品爲務性耿介不妄與人交友朋有過失規箴必盡所欲言或以爲太過則曰吾知有直諒而已豈可以謾佞待良友乎好讀先正舉

業文恥流俗腐濫之習年近四十始補學官弟子歲科試文益有名而秋賦屢躡及子大昕通籍登朝遂絕意進取以詩酒自娛是時王光祿鳴盛之父虛亭公曹學士仁虎之父檀滑公年齒與府君相上下親串款洽文酒唱和無虛日當時稱三封翁乙亥歲大祲邑令廖公運芳設粥施餓者外岡一廠距城稍遠特延府君董其事府君晨入夜歸檢視必周經畫井井胥役無中飽者性疎散好游山水三吳兩浙名勝之區足跡靡不到芒屨竹杖旬日妄返登陟嶮巖如履坦途雖少年不能及嘗謂子弟曰家貧不能爲園名山水近在數百里扁舟可達者皆吾園也但苦屐齒不盡到耳平生衣服飲食皆儉朴尤厭新奇玩好之飾嘗言士大夫居鄉不能轉移風氣已可愧矣況可爲風氣轉移邪當事重府君名往往造廬問興居府君自報謁外或終年不更至人以爲簡傲府君曰古人非公事不見邑宰今人非私事不見邑宰吾無私事故不見非簡也乙酉歲大昕奉命典試浙江奏請試畢乞假十日便道歸省時府君與沈太恭人皆年近七旬斑衣稱壽鄉黨以爲榮然府君雅不喜矜銜門第庳陋僅蔽風雨晚歲始於城中買數椽屋後有小池池上有亭周遭植花竹四時紅紫粲然殊有郊野之趣徒步出入不攜僕從遇人家有好花石叩門覩賞興盡便返城隍廣後園有林壑之勝距所居僅一里許非風雨寒暑日必一至與邨翁相爾汝觀者不知爲四品封君也授徒二十年遇少年質美者必教以兼通古學勿蹈科舉空疎之陋獨稱族孫塘可與道古後果以經術知名又剏議立宗祠於外岡之西每歲春秋合族薦享儀節略依朱子家禮年已

及耄猶率子弟行禮無倦容愛游山而未嘗拜佛尤不喜巫鬼禱禳易簣之日遺誠勿作佛事卒年七十有九以子官誥封奉政大夫翰林院侍讀加一級晉贈中憲大夫詹事府少詹事有小山吟稿三卷元和

陳鶴填譯

行狀

錢處士行狀

處士姓錢氏諱民字子仁一字生翁嘉定縣外岡里人早孤十三棄書學賈數爲鄉里所侮乃歎曰世多妄人求其不妄者聖賢而已初名樞字子辰夢許魯齋教以民名覺而思曰聖人之於民亦類也遂易今名慨然有學聖之志聞青浦有孔子衣冠墓擇日齋戒往謁願爲聖人之徒是夜夢有告己者曰謝絕漢以來諸儒論說乃可爲學自是始讀四書正文年已三十矣題其所居之室日存養塵日靜坐其中所學日進平湖陸清獻公宰吾邑以正學自任處士嘗與之論學又五年自謂學已成復往平湖質之陸公公與之言多不合怪而詢之則曰公從文公入某從尼父入耳嘗與友人書言先聖之學貴乎本末兼盡始終有序大學所謂知本者知所作聖之基也誠正者爲其作聖之功也中庸所謂尊德性先也本也道問學後也末也卽物窮理其誤在于無本六經爲吾注脚其誤在于無末論語曰君子務本本立而道生文

公以爲學者不可厭末求本教人但學其末是所謂其本亂矣本亂而求末之治豈可得乎此未合于大學也孟子曰堯舜之知不偏物中庸曰雖聖人亦有所不知焉文公教初學者卽責以知旣盡而後意可誠語類又云格物者窮事事物物之理致知者知事事物物之理如此則意之惑亂殊甚又何可誠且使堯舜復生亦恐知不能偏物况初學乎此未合于孟子也程子曰不必盡格天下之物又云存心一草木器用之間此是何學問所謂如此而望有得如炊沙而欲其成飯也文公則曰上而無極太極下而一草一木一昆蟲之微亦各有理一書未讀則闕了一書道理一事不窮則闕了一事道理一物不格則闕了一物道理須著逐一件與他理會過愚意無極太極是天人合一之學學至有成亦可自得初學者學之雖非先務無傷也草木昆蟲事物之衆人無百年壽算何能一一盡之孟子以治天下不可耕且爲文公亦以大臣不當親細務奈何志在學聖而反務盡一草一木一昆蟲之微哉此未合于二程也又言今之學者不知追求孔孟之實而只辨朱陸之所以異非聖學本務去道甚遠所以近世學文公者止得整庵之學而已矣學象山者止得陽明之學而已矣在朱陸當日雖有不同亦不至相闢如明儒之甚也學聖而相闢是務聖學必亡矣蓋處士之學得於靜坐謂後儒多未合先聖之旨故直追孔孟自闢門戶又以意更定四書次序其言洸洋自恣或不免果于自信之失雖然使以處士之志而得聖人以爲之師亦幾於嚙嚙之狂士矣成覲曰彼丈夫也我丈夫也我何畏彼哉孟子取其言以勉人之立志者若處士者勇

過成覬遠矣。處士之沒已七十餘年。子孫無能讀書者。遺文雖存。吾恐後人用覆醬瓿也。因叙次其行。如右後之人可以識其志焉。曾祖諱某。祖諱某。父諱源。娶衛氏。某年月日。族子大昕謹狀。

行述

先考小山府君行述

嗚呼痛哉。府君遽舍不孝等而長逝耶。府君天稟素厚。中年以後。無大疾病。或體中小不快。勿藥亦自愈。比歲踰七。望八。精力益饗饑。出行未嘗扶杖。亦不攜蒼頭。自隨輕衫芒屨。散步看花村郭間。往返日數里。許邂逅田父村甿。則與話桑麻。勗以孝弟任恤殷勤。如家人語。去秋不孝大昕奉命督學廣東。將迎府君就養。府君夙聞嶺南山水奇秀。又學使牒中有九曜石遺蹟。欣然規往。乃命不孝大昭偕諸幕友。先于今春赴粵。而自率諸孫。以仲夏啓行。晏天不惠。四月中旬。偶感熱疾。荏苒旬有餘日。遽至大故。嗚呼痛哉。不孝大昕在韶州試畢。與不孝大昭私計。府君南行有日。方遣人詣前途迓侍起居。乃舟行未一舍。急足至。得凶問。兄弟搥心飲血。昏眩靡措。卽目委教授盧君文起。賈勅印至省城。交巡撫德公。而戴星北行。鷄斯徒跣。踰嶺涉江。歷三旬。始抵廬次。痛哉痛哉。不孝等視息偷存。含歛失奉。終天之恨悔其可追。惟是府君居心行事。光明坦白。夙爲輿論所推。若不及今證次。以永其傳。不孝等罪戾滋大。用敢和淚泚筆。疏記梗

概焉。府君諱桂，發字芳五，一字方壺，號小山，姓錢氏。先世諱鑑公，自常熟雙鳳里徙居嘉定之盛涇。生北郊公，諱浦，北郊公生順郊公，諱炳，移居望仙橋。府君高祖也曾祖侍郊公，諱珠。祖公瞻公，諱岐，俱隱德弗曜。父青文公，諱王炳，博學篤行，有聲庠序，享壽九十餘州。縣敦請爲鄉飲大賓，誥贈奉政大夫。翰林院侍讀加一級。府君少讀書，不屑屑記問章句，習舉子業，滌煩去濫，壹以先正爲師，與同里王丈鯨、柏論文，尤有水乳之合。顧屢困童子試，年幾強仕，始受知於學使，禮部侍郎桐城張公廷璐，歲科試屢占優等。三上秋闈，不遇。杜門課徒自給。初，館族父元禮、齋後館族兄彥輝、齋皆攜不孝大昕，自隨晨夕督課。當是時，舉業家多不習詩，生徒或私作韻語，則父師相詬病，以爲妨于制義也。府君獨喜教不孝爲詩，示以唐人安章宅句之法，又謂詩文非空疏無學者所能爲，貸錢爲不孝購書，悉其繙閱。其後車駕南巡，不孝大昕以獻賦召試，通籍海內，傳爲殊遇。不數年，有詔鄉會闈歲科試，皆兼試詩，衆乃服府君先識。且善教子也。家故無負郭田，大父以授徒，餬口不足，則脫大母壺中物付質庫，償之歲時，伏臘四顧壁立，恒相對愀然。洎府君弱冠後，亦出授徒，束脩所入，悉以奉菽水。而吾母沈恭人躬紡織佐之，大父母顧子婦皆賢，雖寢貧，妄其憂焉。大父母並享高年，府君與吾母侍奉六七十載，未嘗有提絮諱語。府君寡兄弟，有幼弟甫十齡，以痘殞。府君以大母所鍾愛也，每時祭及忌日，設位奠之，終身府君於族人敦睦無間。倡議立宗祠於外岡之西，春秋偕宗人設祭，年已耆耋，猶拜跪盡禮，又增修族譜，前有表，後有小傳，義例謹嚴，無傳會失實。

之病性伉直戚友有過失面規之無所隱及其有患難爭競則委曲周全惟恐不及自爲諸生足跡不涉縣寺晚年不孝大昕列官於朝府君益避事遠勢遇鄉人益恭謹邑大夫或造廬訪利病則以年老重聽謝之惟乙亥歲大祲議勸富民捐穀於次年春分四鄉煮粥以食餓者縣令廖公運芳敦請主外閩粥廠府君晨夕赴廠察視必周災民得無失所而姦徒亦無敢中飽者府君久困文場備嘗諸生艱苦及不孝大昕承乏詞垣當預校試先期寓書諭以士子三年勤苦主文者勿以粗心致失佳士不孝大昕累忝司衡幸不得罪於士大夫者遵府君之訓也聞不孝大昕將使粵卽馳書諭之曰吾家累世寒士諸生無大過而摧辱之於心安乎大昕承命欝然按試半載未嘗笞一人諸生亦謾犯法者不孝大昭應南北闡鄉試屢薦愧得輒落府君亦不以介意曰科名得失有命無其實而暴得名者不祥汝但務實學何亟於科第爲府君於世俗嗜好罕所留意獨喜登臨山水自謂有濟勝之具中歲衣食奔走足跡不能及遠比婚嫁畢乃賦近遊常以春秋佳日扁舟遨遊蘇杭間訪尋名勝率旬日或涉月乃返龐眉皓髮登頓巖磴間身輕如飛童冠偕行者或喘汗不能從咸噴噴稱羨道書所傳地行仙府君殆近之矣今春二月表弟沈宿昭謁選得貴陽經歷將赴任府君送之吳門徧遊支硎楞伽鄧尉諸山探梅過東西崦至石壁望太湖徒步行山中竟日不疲僉以爲期頤可卜乃未屆兩月以微疾竟至不起痛哉痛哉易簣前二日問家僮侍疾者曰汝聞鼓吹聲否明日午後忽自言速具舟船旗幟若有騁從迎導者豈所謂歿而爲神者耶嗚

呼痛哉。不孝大昕久宦京師。屢請兩大人就養。輒不允。惟癸未歲。攜不孝大昭北來。留一歲。稍修潔白之養。乙酉以典試浙闈。請於朝。得給假十日。省覲還。召見勤政殿。蒙聖恩垂問。父母年歲甚悉。丁亥秋。不孝大昕念兩親年高。乞假歸里。故居褊隘。幾無容膝之所。乃別于城中買屋數椽。屋後有隙地百弓。府君日課僮鑿池蒔花竹其旁。意欣然樂之。居二載。府君察不孝大昕不欲離膝下。正色諭之曰。吾夫婦精力尚健。且有汝弟在家侍養。明歲國家大慶。汝叨列侍從。可不隨班行禮乎。不孝大昕再補官。承命入直內廷。侍皇子講讀。府君屢作書諭。以勤勉慎密。毋貽老人憂。及粵東命下。府君以書諭之曰。吾欲來觀汝聲名何若。且爲羅浮之游。不孝等私幸得於官舍綵衣稱觴也。而竟不可得。嗚呼痛哉。府君生於康熙三十六年丁丑三月二日。卒於乾隆四十年乙未四月二十三日。享年七十有九。恭遇覃恩。誥封奉政大夫。日講起居注官。翰林院侍讀加一級。配吾母沈恭人處士諱時俊公女。誥封宜人。子二長。不孝大昕。乾隆甲戌進士。由編修累遷日講起居注官。詹事府少詹事。兼翰林院侍講學士。上書房行走。提督廣東全省學政。紀錄四次。娶王氏。誥封通議大夫。光祿寺卿加一級。諱爾達公女。前卒次。不孝大昭。國學生。娶周氏。候選州同。名銘公女。女一。適邑庠生陳名濂公子。附貢生考充四庫館謄錄候選州同。名曦。例贈安人。前卒。孫男四。東壁。不孝大昕。出聘汪氏。內閣學士兼禮部侍郎名廷璵公女。東垣。不孝大昭。出。東塾。不孝大昕。出。東墉。不孝大昭。出。孫女二俱幼。不孝等。樸僕無文。重以荒迷忘失。墨一漏萬。然不敢以無實之言。誣我。

先人伏惟當代立言君子錫之銘誄以光窀穸。不孝等死且不朽。

益都李文藻填諱

亡妻王恭人行述

恭人姓王氏。諱順娛。字正仲。世居崑山。爲右族。後遷嘉定丹徒縣。儒學教諭贈通議大夫。卓人先生焜之孫。新陽縣學生。封通議大夫。虛亭先生爾達之女也。母朱淑人。恭人生而明慧。虛亭先生奇愛之。不欲輕字人。有議婚者。輒不應。予年十五。應童子試。甫出場。先生見其文。賞歎以爲必售。已而果然。恭人兄禮堂。於儕輩少可。亦極口稱予先生。乃以恭人許予。爲配焉。予家貧無負郭田。或謂骨相寒陋。雖早慧不能得功名。諸親戚反僮奴輩。竊議先生素奇幼女。何妄許寒士爲。先生終以爲快女婿也。歲庚午。予始贊外家。明年。以獻賦召試。行在特賜舉人。授內閣中書。報至。親鄰皆喜過望。予旣北上就職。恭人亦以次年入都。途間得病。幾殆。舟至楊村。扶入肩輿。舁至寓舍。調治兩月餘。病良已。甲戌。禮堂以第二人登第。予亦成進士。同入詞垣。衆皆爲恭人賀。恭人謂予曰。君與吾兄豈以一第爲重輕者。所幸兩家父母皆康強耳。恭人性儉朴。布衣蔬食。處之泊如。在都中十餘年。恒視一歲所入。以具饘粥。中饋操作。每躬親之。雖甚空乏。從不假貸于人。內外戚屬無長幼。待之以禮。遇減獲有法度。終年不加鞭笞。而事亦治。性強記。米鹽出入之數。典庫質劑之期。閱久遠。無一忘失。讀書不多。偶述一二故事。亦亹亹可聽。予年三十餘。尙無子。恭人屢勸予置篷。久之。乃納浦氏。甚憐愛之。去秋。浦生子。產後臥蓐月餘。恭人夜中數起視之。僮婢見者咸感泣。

今春二月兒病頗劇。恭人多方醫治。焚香禱天。言輒淚下。予慰之曰。豈有賢如吾妻而無後者。未幾兒果愈。而予復病。病兩月不解。恭人視醫藥。進飲食。夜以繼日。勸則和衣就枕。予曰。吾病未卽死。何太自苦。恭人忍淚不言。及予疾痊。恭人始喜曰。自今災星退矣。無幾何。恭人忽得嘔泄之疾。一兩日旋止。後十日復作。又五日大汗。四支皆冷。自謂汗出病已全去矣。索盥洗者再三。頃之忽自起坐曰。將去。侍者亟扶之。寂然而逝。若釋氏所云趺化者。嗚呼悲夫。予薄宦京華。兩大人以婚嫁未畢。不能北來。聞恭人能佐予治家。甚喜。吾父於甲申歲。嘗一來。恭人侍養者裁一歲。而于吾母未奉一日之養。今秋將攜恭人南歸覲省。行有日矣。乃令吾父吾母垂白爲長婦哭也。傷哉。恭人嘗言初生時。星家推其壽可至八十二歲。又術者言其行運佳。當相夫三十年。予比年心血耗。夜常不寐。恭人每爲予憂之。而未嘗自慮其短折。且以恭人之德及相法。皆不應止于此。毋乃予之獲咎于天。當死不死。而禍移于妻耶。天道恆予善人。而善者不久于世。又何說也。恭人生于雍正六年七月十九日戌時。卒于乾隆三十二年六月二十九日酉時。得年四十。子一人。東壁。恭人歸予垂二十年。離別之日殊少。比者俸入粗有餘。輒謂寒士得此已爲過矣。又謂女兒弟二人。姊性少急。不如某之知足。故不永年。蓋庶幾于知道者。平居忻忻無交譎聲。及爾偕老。吾願已足。一旦舍我而去。鰥魚之目。何時得眠也哉。謹述其大略。將乞銘于當代立言者。

祭文

祭座主錢文敏公文

嗚呼。龍頭之選句。臚玉除。尙書喉舌。上應斗樞。並人世之所貴。謂際會之特殊。公少登狀頭。沒贈尙書。徊翔著作之林。出入承明之廬。曉承旨而趨左掖。午轉對而伏青蒲。南齋侍直宮中。誇爲才子。西曹讞獄。輦下避其八騁。恩禮優于終始。名譽翔于八區。若夫神采湛若。眉宇軒如。丹鳳九苞。瑞應之生。非偶精金百鍊。時出而用有餘。口不言阿堵。而富于五車。三倉之儲。胷不設城府。而樂與先民。前喆爲徒。探百氏之奧窔。躋六蓀之膏腴。經緯成組繡。咳唾皆明珠。對策高第似董仲舒。詞賦獨步似庾肩吾。議論根柢似范淳夫。紀述博贍似洪景廬。讀經進之篇。則以爲唐之燕許。閱平亭之奏。則以爲漢之張于。聆其聲歎識爲神仙之骨。瞻其風度。可入名臣之圖。至于書畫之妙。灑落不拘。吐煙雲于咫尺。生花鳥于須臾。師造物而心得。追名蹟而手摹。縹素流傳。筆墨尙濡。一卷之直。重于璠璵。元則鷗波擅美。明則香光流譽。詔易名以文敏。洵並轡而齊驅。嗚呼。維公朝之弁冕。士之楷模。詞章足以潤金石。政事可以贊訏謨。讀破萬卷。而恥爲流俗之學。官登二品。而依然山澤之曜。樂稱人之善。不隨衆而趨。汪汪千頃之陂。亭亭百尺之梧。雖高位之自致。恨年歲之易徂。立朝垂三十載。曾未展懷抱之瑾瑜也。昔閼逢之紀歲。忝策名于天衢。公實爲座

主兮獨五策之賞予謂予可與道古兮暇長侍夫履絰昨衡恤而南邁送公行乎城隅瞻顏色以顚頷祝
眠食其慎諸痛歲蛇之奄及倏隙駟之不居凶問遽至仰天悲吁屬纊弗侍視舍徒虛感知已而未報思
立身之或渝踰歛詞以遙薦庶清爽之鑒於

祭外舅虛亭先生文

嗚呼馬鞍之峯古稱玉山蔚然耆儒鐘英其間惟公之先銀紺世聯文毅清強說經便便司成三黜謇謇
益振講求水利單鄉差肩元陽負才海岱嶙峋天祿外史奇奧眩真厥考通議鄉貢有名叶位不酬德終
于校官公少岐嶷日誦百篇作爲詞章紆餘而妍侍親京口官清地閑丹徒馮尹以文自矜一見公作嘆
爲絕羣顧謂當今此事推袁金焦北固鶴林招隱叶詩朋兩三拏舟策蹇叶潑墨大字留題巖端觀者不
知或疑列仙治家以禮事親克勤邱嫂次兄相依終身夫人沛國孝淑最賢尊章先後各無間言公之於
詩吐故納新長篇短律多師爲先心所追摹放翁後郵公之書法瘦硬通神三真六草柳骨顏筋一字藏
奔什襲是珍公之制義有本有原俗競速化勦說相沿廓而清之一宗先民嗜好酸鹹不與俗遷樗蒲弈
局齒道不分歲科兩試數冠其軍謂掇青紫必於其躬叶秋風翫櫟屢蹠不伸閉門課徒以昌後昆長公
光祿中朝鳳麟句臚對策五色雲屯帝稱才子擢冠詞臣旣掌內制入直絲綸改長卿寺九棘班尊歸而
著書南陔彼循名位富貴世或有倫文苑儒林兼之實難次公繼之逸才騰騫若軾得轍如機有雲畫品

神逸詩卷清芬江左風流萃于一門憶歲闊茂予初識韓成童無知如木之菴公獨激賞謂非常鱗小試鹿城索文往觀謂當見錄已而果然素奇季女許爲婚姻人謂碧鶴公耳不聞三載就壻東床坦眠食之教之與子姓均獻賦通籍公送登輪自我不見遂十四春乙酉暮秋再謁里閈置酒新堂引觴爲歡昨歲之冬乞假南還失我伉儷使公悲酸公猶健飯談諧不勸贊予卜居城西一廛十日五日從公周旋首夏示疾偶作而痊間日往問尙手一編微察容色了無苦艱公亦自言勿藥且安學海水枯蘋林葉乾痛矣哲人竟歸下泉戴侯云逝誄出安仁聘士石表考亭製文承諱忉怛迸淚潺湲撫棺一憇公其鑒旃

祭衛伯恭文

嗚呼南宮撤棘題名慈恩二百冊人異姓弟昆中州多材君軼其羣惟君早慧頭角嶙峋伯仲叔季師友一門文壇旗鼓大張吾軍君先登科石渠校文淵雲枚馬莫之或先京兆同考兩奉絲綸山左典試玉尺手懸癸未禮闈君尤得人識拔老宿師道以尊久次清華文與行敦天子予嘉將登臺垣一行作吏胡命之屯都門送別爲君三歎君曰往哉內外奚分我有利器試之盤根百里可治忍鄙吾民當陽古邑衆號神君三載考績薦達九闈廉吏可爲協于公論除目初下佐官臺端吾儕私喜小訃大仲君家尙書由縣令遷君或繼之才望惟均跋君還期在旬月間一朝訃至當食輟餐黃楊厄閨鮎魚緣竿文人薄命善士不年令僕牧伯金紫駢肩誰之不如而所遇艱楚山巒巒江水潺潺誰遣巫陽敵詞招魂在京華晨夕

般桓談諧間作。兩忘主賓。歲月如昨。警欸依然。今茲長別。路隔三千。設位遙祭。執紼無因。精爽不昧。尙或
鑒旃。

祭蔣秦樹編修文

嗚呼。皖江之濱。山幽谷奇。厥生才人。卓犖不羈。繡虎入夢。靈徵誕彌。慧業夙成。筆墨爲嬉。五車四庫。腹笥
在茲。作爲文章。蔚其鴻裁。往歲辛未。省方求才。大禮三賦。名動赤墀。給札召試。至尊書題。觀者堵牆。濡筆
淋漓。親收六人。君爲之魁。一朝釋褐。同登鳳池。稽古之遇。故事所稀。地分清切。入直樞機。扈從捺鉢。紀以
歌詩。句臚旣唱。策名金闈。十年禁近。風雅共推。皇武綏定。渠揆以西。詔修方略。手任編排。大書特書。博而
能該。九遷非願。一經是貽。學益道損。榜于棟楣。次道聚書。永叔訪碑。嗜好酸鹹。不以俗移。人生百歲。彈指
幾時。君已過半。沒而名垂。文苑之傳。鄉賢之祠。視祿萬鍾。奚止倍蓰。仲春朔日。良會吾儕。拍肩歡笑。不改
鬢眉。曾未二旬。逝者難追。有琴在床。有酒在巵。長夜永悶。一哀何涯。魂兮歸來。尙鑒予悲。

祭朱太翁文


嗚呼。先生之先。系出邾婁。自浙北徙。籍占大都。少就外傳。折節爲儒。高安文端。人倫楷模。翰林老宿。陽羨
之儲。公皆師之。亦步而趨。經明入仕。古道未渝。牽絲咸寧。漢唐故墟。移宰盤厓。士悅民愉。渭水之溢。奪民
田廬。百年以來。浮糧不除。蠶然心傷。手自作疏。墾荒終南。以償額租。證于碑碣。我言非誣。上官入告。天子

曰愈寬大詔下彫効以紓厥德不訾可例其餘投劾杜門課兒詩書伯仲叔季得四明珠各在仕版簪笏魚魚三登進士兩列石渠一門盛事爲長者娛正歲望日暨十月初鄉飲有典正齒媵觚大尹戒賓蒼顏白鬚兩太史從左右掖扶是父是子都人歎嗟匪齒之尙惟德之譽紫誥崇封頒自正衙積善之慶洵有是夫門才官職世或有諸所尤難者文與行俱於惟先生行充體腴教人自爲質而不夸四時代謝古今須臾年未七十哲人云徂憶歲焉逢貢士天衢先生叔子同與句臚交親十年臭味相於時從軾轍通謁老蘇撰杖脫屨清風穆如典刑永逝痛哉吾徒遺容在懸復衣在廡文以紀實侑茲清酌

祭亡妻王恭人文

嗚呼吾妻之逝越九十日仰見冰蟾三度圓缺人言秋月令人生愁愁多而苦孰如今秋自子歸我寒暑十七夙興夜寐動無違失我善忘事子輒記之我拙治生子能理之耽思致疾子恒戒我放言召謗子強誣我我顛而固子慧且通我躁多悔子靜多功辛勤爲我不爲一己家有佳婦我得良友我幼善病憇不永年而使子寡獨居塊焉何圖今日事固難料我猶爲人子去已杳嗚呼哀哉吾將安依想子下泉其能不悲人生同盡修短一揆以子明達詎昧斯旨夫病兒弱賴子扶持不能忘情或者在茲我今奠酒忍淚告子子不復生我未可死我有父母宜戀此生我有著述當待其成嬌兒幼小未解哭母子如有知尙其我佑嗚呼吾妻勞瘁有年天遣舍我以息子肩子有賢母又有伯姊先爾云亡見子應喜子之魂魄當戀


故鄉京洛雖廣。匪子所藏。買舟送子。澠河之側。我亦南歸。爲子卜宅。昔子北來。不與我俱。今雖同舟。幽明路殊。嗚呼。吾妻行長身促。匪子不年。繫我無福。靈車將行。贈子以詞。悠悠逝者。云何弗思。



僕自成童時喜吟詠而父師方課以舉業不得肆力於詩年二十以後頗有志經史之學不欲專爲詩人。然是時客吳門與禮堂蘭泉來殷諸君子日唱和所得詩亦漸多既而遂以有韻之文通籍及成進士承乏詞垣十有餘年恭遇天子右文制作明備每大典禮輒有經進之作其閒扈從屬車者再賡和之作往往盈帙又嘗奉命典試山東楚南浙西輶車所至紀天時述土俗山水之明秀民物之繁庶皆得寓之於詩獨恨才力弱意有所及筆不能至又未嘗不泚然汗下也昔揚子雲默而善著書兼工作賦蓋才之大者能兼衆人之長僕拙劣無似在京都退食之暇惟以經史自娛討論異同貫串古今丹黃不去手旣專心於著書故不常作詩偶有所作亦復不工譬之吐絲之蠶不能吟風才力有限從吾所好可矣歲丁亥將乞假南回檢橐中詩藁得九百有七篇其中稱意之作什不得一念其嘗耗日力於此乃鈔而存之以當敝帚遺簪之數非欲出以示人也竹汀錢大昕書

予旣以有韻之文受知聖明然性不喜噉名檢點篋中所作亦無甚稱意者故從未敢刻以問世而江南書肆選刊近人詩往往濫收拙作真贗相半偶有一客過予誦所見佳句聽之愕然謝以非某作句亦殊不佳客慚然而退予於詩雖非專門而寸心得失之故要自知之固不欲掠它人之美亦豈可以惡詩冒爲已有茲取前後所作鈔爲一集不敢自以爲是亦欲存廬山之眞面云爾庚寅歲五月丁丑

朔大昕書



潛研堂詩集目錄

卷一

五雜組八首

京口

登燕子磯

過明孝陵

京口晚眺集唐人句

席上贈王鳳岡顧培穎兼

懷王鳳喈在都下

詠史

少年二首

過昭慶寺訪喆公不遇

萊陽二姜先生祠

木棉花歌

宋徽宗畫龍歌

宜興道中

擬古七首

游橫雲山

讀任昉傳

春雪和東坡韻二首

徐毓洲讀書僧舍集杜工部句寄之四首

田家雜詩五首

金陵詠古八首

訪學成和尚集少陵句

讀曲歌

詠史雜詩三十首

短歌行

雉子班

卷二

歸家二首

舟行

遠別離

尙湖夜泊

秋日舟行

九日同潘璜谿凌叔子張策時王蘭成作

雪霽

贈翁朗夫徵君

春日閒居

金山

永濟寺

雨花臺

懷曹來殷二首

懷王蘭成

憎蠅

別席

聞金川平定喜而有作四首

秋柳次韻

同王琴德曹來殷沙斗初張崑南汎舟游

靈巖山寺

呈沈歸愚先生三首

五月

暮宿木瀆吳企晉園亭

邵伯湖

游天平山歷龍門白雲泉蓮花洞諸勝

寄內

訪上沙陸氏園居

題翁霽堂徵君秋林覓句圖

三十三山艸堂圖歌爲霽堂徵君作

憶內六首

送吳企晉游黃山

辛未七夕用李義山韻

陽湖雨泊同諸君分韻得桃字

淮陰釣臺

溧陽道中

淮安弔褚不華

金陵寄內

東軒相國七十壽詩二首

卷三

御試賦得指佞艸

中河

奉旨特賜舉人授中書舍人紀恩二首

邳州

吳越宮詞十首

與周西隱孝廉分賦漢陵得長陵茂陵二

王次山先生輓詩二首

首

元史雜詠二十首

冰茶聯句

移寓

兩頭纖纖詩二首

山行

青龍橋

香山月夜

靜宜園直廬卽事二首

贈金鍾越孝廉三首

送江蔗畦明府之官湖湘

題諸艸廬贊善高松對論圖

題曹夫人玉映樓詩集二首

題王琴德三泖漁莊圖

題王受銘比部龍湫宴坐圖

送翟晴江同年還杭州

聖駕東巡恭謁祖陵禮成恭紀

送吳掘楓

題同年范衡洲比部詩卷四首

題杜太守甲相馬圖

平定準噶爾告捷禮成恭紀一百韻

卷四

丙子春帖子詞

題李西華給諫賞番圖六首

題吳觀山編脩洗竹圖

移寓珠曹街與禮堂夜話五首

題裘漫士少宰苑東寓直圖七首

恭和御製懷柔縣元韻

恭和御製遙亭行宮對雨元韻三首

恭和御製出古北口詠古元韻

恭和御製至避暑山莊卽事元韻

恭和御製熱河啓蹕之作元韻

恭和御製山店元韻

恭和御製都爾伯忒台吉伯什阿噶什來

覲封爲親王詩以紀事元韻

恭和御製入崖口元韻

恭和御製雨獵元韻

恭和御製霜元韻

恭和御製行圍卽事元韻三首

恭和御製蕃劍行元韻

恭和御製晚荷元韻

恭和御製宴土爾扈特使臣元韻

恭和御製雪元韻三首

恭和御製允南省諸臣之請於明春恭奉

皇太后再舉時巡詩以紀事元韻

恭和御製固爾扎廟火用唐韓愈陸渾山

火和皇甫湜韻并效其體之作

帳房四首

白溝河

送蔡葛山少司寇請養歸里二首

蔡少司寇觀海圖

自珠巢街移居宣武門外題壁

金鍾越秋江擁權圖

送座主海寧相公予告歸里卽次留別元

韻六首

海寧陳文勤公輓詩

題盧紹弓編修檢書圖

送毛伊人檢討還萊州五首

石鼓

送禮堂學士典試福建

奉命典試山左出都述懷

自良鄉南行遙望大房諸山口占

涿州二首

卽目

過河間城外居民有種棉花者

贈梁秀才用梅

梁秀才以秋碧堂帖見貽賦答

東方朔

匡衡

答醫者

多病

題張憶嬢簪華圖四首圖藏繡谷蔣氏

卷五

回部蕩平大功告成恭紀一百韻

己卯除夕

初春懷鄉雜詠四首

題倪敬堂同年西谿探梅圖三首

恭和御製三月朔日御殿定邊將軍兆惠

副將軍富德等率成功諸將士朝謁詩

以紀之元韻

恭和御製上巳日凱宴成功諸將士元韻

八首

恭和御製塞宴四首

恭和御製行圍元韻二首

恭和御製哈薩克使至俾觀圍元韻

九日同習庵舍人叔華上舍晦之弟游城

南登陶然亭二首

送孫勛堂之官皖江

答施鐵如上舍見贈之作用山谷東坡贈

答詩韻二首

冬至齋宿題壁三首

正月二日夜雪用東坡聚星堂韻

恭和御製恭奉皇太后謁泰陵因至五臺

瞻禮卜吉起程得詩八韻

恭和御製過蘆溝橋元韻

恭和御製良鄉行宮晚坐元韻

恭和御製見新耕者元韻四首

恭和御製直隸總督方觀承奏報易州等處得雨元韻

恭和御製永慕齋疊舊作韻

恭和御製謁陵禮畢載啓西巡瞻彼臺山

祝茲介祉元韻

恭和御製曉煙元韻

恭和御製日日元韻

恭和御製曉行卽景元韻四首

恭和御製曲逆故城元韻二首

恭和御製題愜適齋元韻

恭和御製復雨元韻

恭和御製降旨免宣化府屬民欠詩以誌事元韻

恭和御製雪元韻四首

恭和御製停蹕元韻

恭和御製晴元韻

恭和御製阜平道中作四首

恭和御製三箭山疊舊作元韻

恭和御製射虎川元韻

恭和御製自長城嶺至臺懷再依皇祖元韻

恭和御製殊像寺元韻

恭和御製顯通寺卽事元韻

恭和御製羅漢坪元韻

恭和御製真容院再題元韻

恭和御製閱武元韻

恭和御製棲賢寺元韻

恭和御製降旨免山西前歲民欠詩以誌事元韻

恭和御製游千佛洞得古體四十韻

恭和御製題陳規守城錄元韻

恭和御製題宋中興聖政艸元韻

恭和御製經畬書屋卽事元韻

恭和御製游獅子園憶舊元韻

恭和御製鹿角椅元韻

留王快鎮座主少宗伯介公有詩紀事次

和

三月朔日疊前韻

憶五臺山三疊前韻

三月三日自曲陽入行唐境途中杏花盛

開四疊前韻

座主宗伯公折杏花一枝插行帳茶鐺中

至晚盛開有詩五疊前韻奉和

奉酬宗伯公見贈六疊前韻

真定府隆興寺七疊前韻

游蓮花池八疊前韻

懷鄉九疊前韻

寄題雪浪石用東坡韻

中秋後五日同錢坤一侍講王琴德舍人

曹來殷蔣漁邨二庶常過大慈延福宮

苦雨

題韋慎旃舍人翠螺讀書圖

題汪對琴博士後譚蘀圖二首

過歸義廢寺

移寓二首

盧端臣先生招飲卽席賦呈

卷六

奉命典試湖南出都宿良鄉縣有作二首

宏恩寺

督亢陂

道中卽事

雨宿定興二首

輿丁

曲逆詠古

定州道中

雪浪石和東坡韻

真定

登隆興寺大悲閣周覽隋宋元碑刻晚宿

雨花堂對月得詩七首

望華塔寺

戲題趙州茶棚

柏鄉謁漢光武廟

題圓津庵用壁閒梁棠邨湖南若湯西崖

諸公倡和元韻

鄴中詠古八首

苦熱

自鄭州入新鄭道中作

讀左氏傳

過許州追悼亡友周西隣刺史四首

望中嶽

許昌詠古

郵行二首

聞蟬

雨宿蔡寨邨舍

田家

雨止

曉行

與王惺園修撰對奕

確山道中

渡淮

山行二首

自信陽入平靖關六首

七夕宿平靖關

岳陽樓

曉行二首

長沙

賈太傅宅

東長沙張慧川明府二首

屈賈二大夫祠

中秋試院對月

試院示同事諸公二首

楚南士子場後以試文謁學使吳雲巖前

輩雲巖決其必售者五人曰丁甡丁正

心張德安石鴻翥陳聖清比揭曉則五

人皆中式而五魁之中得其四焉楚人

傳以爲盛事雲巖有詩因和其韻

吳雲巖學使訂於重九日載酒嶽麓登高

兼訪山長劉孟調前輩以風雨不果往

次日孟調以詩見寄次韻奉答

卷七

宿萬年庵用壁閒吳文恪韻

將抵巴陵二首

郵中記所見

萬松岡二首

蒲圻山行

高嶺舗

口占二首

嘲道旁楓樹

代楓樹答

予旣作詩代楓樹解嘲次日山行楓林有
數株先紅者復成是什

重過武昌

登黃鶴樓懷翁覃谿中允彭六一編修二

首

田家

德安道中

楊忠烈公連祠

入平靖關

信陽

確山

曉行口占

遂平

郾城

臨穎

鄭子產祠

鄭州道中

渡河

曉行口占二首

湯陰

韓魏公祠

渡漳水

晚抵邯鄲

食客行

沙河道中

定州道中三首

晚行清苑城外見月二首

寄楚南諸同好二首

還京述懷

江明府于九拓石鼓山劉莘老題名見貽

并索詩

題袁蕙纓孝廉南湖艸堂圖

蓀石宮庶庭前叢菊盛開招諸公同飲賦

詩並作墨菊長卷出以見示并屬題

送吳二匏舍人南還四首

五塔寺

萬壽寺

昌運宮

雙林寺

哭吳雲巖侍讀

題韋鐵夫授經圖遺照

獐酒詩爲查恂叔太守賦

題張右丞秋原放牛遺像

題陶吾廬前輩歸去來館圖

平確齋自臨川令被薦入覲賦詩奉柬三

首

送商寶意太守之官雲南

乾隆二十八年起居注書成詣乾清門入

奏恭紀六首

周稚圭同年觀察粵西

門神

火判

題曹檀潛先生柳汀觀稼圖

卷八

奉命典試浙江作三首

出廣寧門

趙北口

毛萇里

董子故里

周亞夫祠二首

途中偶作

卽事

晏城

將至開山鋪

長清山行

登岱四首

程蘊山明府招飲白鶴泉上

羊流店謁羊太傅祠

宿遷道中

雨中過永濟橋

隄上

清江浦懷舊

漂母祠

題淮陰釣臺二首

董江都祠和冰持前輩韻二首

同冰持前輩登金山次韻八首

游寄暢園

虎邱

山塘

游上方山

石湖

汎澹臺湖

入德清縣界有橋曰望儂喜其名與吾鄉

同作詩紀之

初到杭州

試院戲題三首

食筍

墳榜四首

汎河

九日浙中當事招集小有天園登高卽席

得句

表忠觀

岳忠武墓四首

浙闡歲事蒙恩給假省親恭紀四首

過青駝寺遇雨

口占

曉行

望岱宗殘雪

山行

十月二十八日河間道中遇雨

雪後過鄭州

趙北口殘雪

琉璃河

題查恂叔太守榕巢圖

漫成

丙戌禮闈卽事用壁閒韻呈望山相國漫

士少司農鳧川少宰及同分校諸公四

首

題邵蔚田侍讀收綸圖四首

題趙編修鷗北耘菘圖

冬至後六日錢籜石少詹招同查儉堂太

守紀心齋侍御程魚門舍人畢秋颯侍

講曹竹虛編修小飲分韻予得日字

送趙雲松出守鎮安二首

謝文節橋亭卜卦硯歌

病起二首

人日同王琴德朱竹君曹來殷畢湘蘅陸

健男登法源寺後閣晚飲琴德寓齋用

東坡廣陵會三同舍故事各以字爲韻

予得曉字

舟行偶占二首

衛河

臨清

阜河

宿遷

見道旁艸舍戲作

汎光湖

冬至京口阻淺

偕蔣春農舍人游甘露寺

遺懷雜題九首

八音歌效黃山谷二首

卷九

到家作

虎邱追和清遠道士韻同陳藥耘作

和陸魯望補沈恭子詩韻

第三泉

游獅子林

鱠諸巷

虎邱觀玉蘭三首

同陳藥耘宿陸筱歛荷風竹露艸堂

同筱歛藥耘步至湖上汎舟登孤山放鶴亭

上巳日游靈隱諸山

飛來峯

湖上雜題二首

湖上寓樓

葛嶺

葛嶺詠古二首

鳳凰山二首

水樂洞

三生石

重游飛來峯登絕頂疊前韻

韜光庵用白樂天招韜光禪師韻

神尼舍利塔

僧房偶題二首

寶成寺觀元人所鑿麻曷葛刺佛石像次

藥耘韻

寶石山次韻藥耘

游吳山紫陽洞

湖上對雨

連日徧游湖上諸刹有懷古德各題一絕

虎跑寺寶中

法相寺行修

聖果寺文喜

靈隱寺慧理

鳳林寺道林

瑪瑙寺智圓

龍井寺元淨

智果寺道潛

歸舟口占

題王麓臺蘇齋圖卽用卷中查初白先生

韻

題王石谷蘇齋圖

題繡谷牡丹圖二首

家中牡丹

讀漢書六首

贈張丈擔伯

王彙莫家藏古錢歌

題姚和伯射獵圖三首

登馬鞍山

題王未嚴畫三首

崑山學宮石

題西莊丈室散花圖五首

邵桷亭築小樓題曰梧巢作詩四首諸同

人多有和章邀予繼和四首

讀蜀檮杌畢得絕句八首

外舅王虛亭先生輓詩二首

卷十

題箕僊畫爲曹慕堂給諫作

臘八日同曹習庵編修吳白華侍讀陸耳

山宗人集趙實君齋消寒小飲卽席口

榜人謠

古索和

渡黃河四日入鄆州境

翼日諸公和詩未到疊前韻催之
同人約爲詩會遲而未果習庵疊前韻見

示依其數答之二首

題寓齋壁疊前韻二首

再題寓壁仍疊前韻四首

東習庵二首

曹劍亭刑部和韻見贈卽奉答

二十二日吳杉亭舍人招同褚鶴侶刑部

蔣漁邨編修陳寶所給諫小飲疊前韻

答嚴跋堂和韻見贈之作二首

己丑除夕疊前韻四首

次韻嚴跋堂正月三日對雪

跋堂和予詩兼訂春游賦此答之

正月十九日同曹習庵編修張繡堂趙實

君兩上舍游白雲觀次習庵韻

寶刀行送龔梧生同年之官黔中

送胡牧亭侍御南還

二月廿七日同慕堂給諫竹君學士伯思

戶部登陶然亭

哭翟舍人均廉二首

題候官林氏所藏漢甘泉瓦拓本

題吳香亭鴻臚古藤詩思圖

同曹慕堂給諫朱竹君學士陳伯思戶部

史文量孝廉曹申之上舍爲西山之游

出郊宿二老莊和竹君韻

張忠烈王輔墓

山行疊前韻二首

戒壇二首

和竹君戒壇讀遼法均大師碑因弔學士

王鼎三十韻

姚少師祠

夜宿潭柘寺用石刻金僧重玉韻

妙嚴公主拜輒

僧房偶題

潭柘寺

三月廿二日同錢宮詹鐸石紀太僕心齋

朱學士竹君褚學士左峨曹給事慕堂

馮刑部君弼入法源寺觀海棠偶見旁

院牆脚支發方石有異撤而視之則遼

大安十年觀音菩薩地宮舍利石函記

也心齋有詩紀其事卽次韻

琉璃廠窯戶掘土得古墓棺槨朽盡而骨

法殊異視其誌石題云大遼故銀青崇

祿大夫檢校司空行太子左衛率府率

兼御史大夫上柱國隴西李公墓誌銘

撰書人則不可攷矣督廠工部郎中孟

君澔令改埋於故兆東二十步并其誌

瘞之世遂無拓本李公之名不見於遼

史因摭誌文大略作詩以遺攷古者

題候官林氏陶舫硯銘冊子二首

送江于九之官安慶

游善果寺

法源寺看花

法源寺觀牡丹因懷琴德

題黃星槎所藏漢華山碑拓本

題惠松厓徵君授經圖

爲袁春圃給事題苦瓜和尚餘杭看山圖

題沈椒園前輩松亭讀易圖

病目廿二韻


贈伊宛中孝廉

燈下作

圓桌

暖炕

羅兩峯鬼趣圖



潛研堂詩集卷一

擬古七首

亭亭孤生松，結根山之阿。干霄聳直幹，蔽日擣交柯。下有伏苓芝，上有鳶與蘿。手植自誰氏，云已千年過。
幽人倚樹根，日夕常高歌。願爲歲寒期，相對鬱嵯峨。青青河畔艸，灼灼池中荷。顏色豈不好，秋深當奈何。
龍門百尺桐，輪囷盈十圍。斲爲綠綺琴，緼以白玉徽。水流何洋洋，山高亦巍巍。鍾期顧我笑，一彈情以移。
奈何舍我去，破絃不復揮。不惜絃斷絕，所悲知音希。郢人泣匠石，蒙莊感惠施。形存質已逝，千古同歎歎。
涼風號寒蟬，蛩吟徹四壁。蕩子游不歸，空房愁思積。相對影與形，夢裏憶疇昔。可憐團圓月，獨似去年白。
飛鴻從遠來，雙足纏匹帛。我欲寄之書，飛去杳無跡。君行作水萍，妾願作山石。萍飄無休時，石立終不易。
挾彈少年子，杖劍羽林郎。大冠鐵鉢錦衣繡襠，出入衛承明。車騎何輝煌，晨興戒徒御。射獵南山陽，前驅戒驛耳。
後隊走驘驥，蒼隼摩雲起。羅罝彌天張，獲禽亦無算。犒賞百千強，生飲黃獐血。分割元熊肪，西南羽檄馳。
堠火通沙場，何不從軍去。勒銘麟閣旁。

快馬志千里，健兒思邊城。結髮隨驃騎，大小數十征。數奇不封侯，賣劍歸躬耕。昨朝聞點兵，投牒從軍行。
據鞍左右盼，意氣猶飛騰。指揮捕生口，竟抵休屠營。一鼓俘名王，再鼓犁龍庭。下馬艸露布，勒作燕然銘。

勿使漢廷中衛霍空留名。

鸞鳩捨榆枋。晨風飛北林。萬族各有托。志士豈無心。昔我同門友。佩玉紆朝簪。折簡亟招我。彈冠當及今。翩然掉頭去。高臥東山岑。石溜滴清籟。冰絃鳴素琴。元雲覆屋上。白雲停樹陰。日夕無一事。把酒聊酌斟。此樂當語誰。知音有向禽。

蓬海渺何許。三山環其中。十二樓五城。金碧敞琳宮。有何古僊人。長眉更方瞳。煮就五色石。攜取九節筇。朝馳闕風顛。夕宿扶桑東。路人不能識。或疑是韓終。我來長跪問。欲言心憂忡。顧茲下方民。奄謝如秋蓬。願賜玉箱藥。兼之養生方。膚容切各各使老壽。年命無終窮。

游橫雲山

九峯如髻相連綿。橫雲秀色何便娟。怪石蹲立虎豹伏。老藤蟠屈虯龍纏。懸崖十仞尤斗絕。穿雲欲上脚蹠蹠。白浪層層雨後明。翠螺點點煙中列。問誰好事王與張。山有王嚴齋。張得天兩尙書別業。誅茅小築添山房。飛泉百道鳴瀾瀾。修竹萬个陰蒼蒼。是時山中秋正暮。落葉荒榛跼微步。四山楓林滅沒閒。夕陽掩映紅無數。回看前峯雲往還。依稀蠟屐經過處。咫尺機山相對青。風流當日傲荒倉。早知入洛名爲累。何似長聽鶴唳聲。

讀任昉傳

太行何崔嵬。世路更嶄絕。樂安任公子。海內之髦傑。騎兵呼天子。文筆冠同列。咄嗟起風雲。朱紫出脣舌。冠蓋紛相望。坐上皆名哲。人稱龍門游。並集蘭臺轍。清潭劇夜分。開樽酒同啜。刻燭賦詩成。擊鉢響隨滅。數子皆南金。能令公喜悅。盛衰會有時。風花隨轉營。一麾新安守。高朋成永訣。投盡綠沈瓜。滿坐爲哽咽。門庭鳥雀羅。琴書蠹魚齧。白楊冷蕭蕭。孤走霜雪傷哉。匹練裙朔風凜以列。當時把臂友。驕馬嘶金埒。揮手長揖去。夷然若不屑。嗚呼市道交。何異劍首映。所以朱公叔。長與故人別。

春雪和東坡韻

輕塵乍糁玉纖纖。料峭寒威幾陣嚴。誰挽竹弓彈密粉。王叔明岱宗密雪圖。以竹弓彈粉爲之。盡傾滄海煮形鹽。披簾獨釣迷江岸。屈金鉤早春詩。艸授簡長吟側帽檐。頗恨春光勾勒住。金鉤嫩綠未舒尖。屈金鉤早春詩。艸重閣何心閉宋纖。軸簾聊避朔風嚴。小兒任意裝獅虎。野老相過索米鹽。寂寞遙山遮翠黛。模糊破屋沒茅檐。一杯獨飲渾無賴。臘甕須探郭索尖。

徐毓洲讀書僧舍集杜工部句寄之

隱者柴門內。林花落又開。水深魚極樂。客散鳥還來。多病休儒服。相迎自撥醅。眼邊無俗物。隨意坐莓苔。用拙存吾道。幽偏得自怡。寬心應是酒。排悶強裁詩。野寺殘僧少。茶瓜留客遲。由來意氣合。步屐向東籬。林僻來人少。邨花不掃除。長卿多病久。中散舊交疏。把酒宜深酌。新文尙起予。吟詩坐回首。日暮且踟躕。

同調嗟誰惜。親情獨有君。優游謝康樂。俊逸鮑參軍。舍下筍穿壁。階前樹拂雲。幾時杯共把。水竹會平分。

田家雜詩

生世寡所諳。駕言返我廬。我廬亦何有。桃李三兩株。春過結實好。童稚來徐徐。攀條摘其實。果腹已有餘。食竟無一事。嬉戲聊相於。時復成謳吟。似言太古初。感此三歎喟。真意我不如。

朝驅黃犢出。暮驅黃犢還。豈不憚溽暑。力作忘其艱。昨宵甘雨至。溝水流潺潺。新苗出始齊。微綠生中田。且復牽黃犢。驅之浴前川。水淺不沒背。雙角隱見閒。桔槔亦不用。機心漸以閑。

小屋纔三椽。編茅以蓋之。老農八九家。卜鄰亦於茲。門戶同所向。酒食常分貽。雞犬各相識。棲宿無疑猜。禾黍旣登場。相見多好懷。旣念手足勤。還感雨露滋。有年君莫恃。當思無年時。

浮雲隨風遠。飄散何所之。逍遙十畝閒。終歲乃安棲。孺人提甕汲。稚子持釣歸。把酒共勞苦。無事心亦怡。曲池方繞舍。萍葉相因依。鯈鯉游其間。鱗鬣皆可窺。出入响以沫。人喧魚不知。卽此悟濠濮。當與莊惠期。鳴蟬識蚤晚。落木知炎涼。秋風歛以來。庭際生繁霜。刈稻旣以了。官租早輸將。皤皤沮溺子。相逢阡陌旁。傾蓋無別語。但言耕與桑。不知誰賓主。揖讓久已忘。

金陵詠古

蔣山王氣黯無光。天塹休誇擅一方。鎖斷千尋燃烈炬。樓高百步簇危檣。紫髯像古荒原廟。青蓋風翻入。

洛陽一自銜杯歌爾汝。曹劉事業總淒涼。

堂堂江左有夷吾。那向新亭灑淚珠。只怪諸君多譽賊。賴從元老未遷都。祖生擊楫猶吞石。謝傅圍棋亦卻苻。堪笑宋家修誓表。臨安得似建康無。

大廈還憑一木扶。哀劉駢首竟何辜。漫將腰扇誇寒士。無奈須眉不丈夫。眼作白虹終貫日。苔生黃石遽膺符。領軍腹大渾堪射。悔殺輕投金僕姑。

楊柳歌殘別苑聲。玉兒風貌正傾城。鳴雞埭遠迎鸞輶。射雉場開颺翠旌。豈有蔣王來左掖。只聽趙鬼誦西京。黃金此日真如土。化作蓮花步步生。

譚經同泰八關開。幾費金錢贖帝回。紅席未歸滄海使。青絲不道壽陽來。枯牆枳棘詩空在。曲項琵琶夢已灰。贏得暮年詞賦客。人間爭數庾郎才。

玉樹新聲久不彈。黃奴去後思無端。雲隨鐵騎來桃葉。水汲銀瓶冷井闌。歌舞曾聞袁學士。江山猶恨孔都官。迷樓亦是銷魂地。一樣鯀華取次看。

珠翹誰復整雙鬟。太息江南國步艱。天水碧痕深淺在。皖公翠色有無間。宮娥揮淚嗟何及。騎省飄蓬竟不還。從此小樓風又急。更無人唱念家山。

原廣衣冠三百秋。匆匆五馬又南浮。君王但卜通宵飲。弟子新翻法部謳。拱手盈庭尊狎客。囊頭詔獄盡

名流石城重見降幡出曹社何須怨鬼謀。

訪學成和尙集少陵句

澗水空山道相過人不知美花多映竹桐葉坐題詩易下楊朱淚難酬支遁詞扁舟吾已就舍此復何之。
紅豆向春種黃蘋向春生薄霧隱三星有心不分明
朝憶復暮憶憐歡還念歡夜雨沒牛跡蹣痕無日乾

讀曲歌

詠史雜詩

執手陳留邸歛歟空復情大書魏貞士不署晉安平
吾笑阮嗣宗臧否不挂口艸罷勸進牋歸飲步兵酒
林下山河邈黃廬憶舊游敗人憐俗物祇解執牙籌
樓闕知何處寥帷一笑開洛陽府小吏白日上天來
築壇建行宮一鼓罪人得不是溫平南諸君但譽賊
運甓渾無事孤忠判致身天門折翼夢謗史恐非真
一雌復一雄飛來入紫宮鳳皇在椒寢枉用種梧桐

別墅楸枰賭。小兒破賊還。西州空灑淚。身不到東山。
林木巢歸燕。行宮啓佛狸。封狼徙有志。何日一申眉。
侍疾延昌殿。開言淚數行。那知書一紙。喜字在中央。
金翅何來鳥。芟夷到七王。諸兒皆不長。涕泣自燒香。
長驅白門道。車騎何驛騷。欲得家豪富。今朝事御刀。
捉燭寂無言。引枕獨酣醉。此中可飲酒。解璽渾閒事。
金鋌不堪食。何妨乞與人。卻嗤蕭阿六。黃紫榜標新。
瑞室依巖築。高人寢處安。蟹螯堪下箸。多事問鍾阮。
巴馬行千里。長驅抵建康。黃塵何自起。失計納貞陽。
莫望功名立。難將鄉里忘。當年翻背將。不及一黃蒼。
大槊取富貴。傭書安足儔。卜人不忘語。南下作公侯。
自起臨春閣。但聞桃葉詞。擘箋宜夜飲。八婦總能詩。
明月今宵晦。蒺藜舊日埋。銷魂內宴罷。無復墮君懷。

舉觴勸官家。凜人復何似。殺玫尙能飛。可憐青雀子。
攷室三臺壯。長生卅載難。且貪人世樂。臨死服金丹。
欲雪先朝恨。銜枚戰馬嘶。投杯枉震怒。何不度關西。
任沈工詩筆。江南二妙稱。鄴中誰作賊。邢魏兩相矜。
捧藥賜蘭陵。謠言忌百升。長城君自壞。辛苦事椎冰。
父不識北斗。兒偏爲世神。瓠蘆空有月。掘梨伴誰人。
十二院分峙。林泉妙一時。敝衣還乞食。何處著窮兒。
薄暮軍書至。天池校獵忙。大家正作樂。忘卻陷平陽。
魂斷琵琶絃。碧染青谿血。南北兩麗人。至竟誰優劣。

短歌行

對酒當歌慷慨轉多敲缺唾壺和我者無解躬耕一畦不如販脂奉粟一囊不如賣漿二解言有金丸乃成少年言有錢刀乃成賢豪三解陟彼崇巒言采其蘭盛之佩纓以祓不祥四解

雉子班

雉子班飛飛野田間。吁嗟卒逢主人子。左抨弓右彈以丸。毛羽摧穢向天鳴悲。爲我謝主人。微軀不足惜。

有雌山梁。有子原澤。請勿張羅。向其側。雉子班。心煩冤。

五雜組

五雜組。羅紈垂。往復還。連錢騎。不得已。學馬醫。
五雜組。腰金帶。往復還。監司廨。不得已。望塵拜。
五雜組。鶗吐綬。往復還。箕張口。不得已。飲醇酒。
五雜組。金紫升。往復還。餐錢增。不得已。且模棱。
五雜組。僧伽裝。往復還。藥叉腸。不得已。拜佛忙。
五雜組。錦千純。往復還。金千斤。不得已。謁朱門。
五雜組。貴公子。往復還。五都市。不得已。窮餓死。
五雜組。窈窕娘。往復還。紈袴郎。不得已。嫁茶商。

京口

百雉樓高鐵甕城。朱方形勢尙崢嶸。江山秀合南徐鎮。士馬雄誇北府兵。雨霽瓜洲颯影出。雲開京峴黛痕明。擬摹古鼎雷回篆。枯木堂前躡屐行。

登燕子磯

扁舟泊江滻。乘興何所適。捫蘿上危磯。支筇踏盤石。徑仄勢欲崩。膽怯步愈窄。秋色江上來。吳楚千里碧。渺渺獨愁子。潮平葦花白。

過明孝陵

盤鬱鍾山麓。神邱闕寂寥。真容隆準在。王氣秣陵消。濠右膺符命。江東正斗杓。初承龍鳳號。終應富家謠。
元末謠云富家莫起樓貧家莫起屋但看羊兒年便是吳家國法踐三章約。星除九野妖。隆中起諸葛。塞上走嫖姚。劍佩丹墀肅。山河銅柱標。提戈開一統。畫界晒南朝。穎宋心徒赤。胡藍首已懸。遂銷丞相印。特遠侍人貂密網。刑雖峻。維城寵太驕。某收留失著。本撥出橫條。枉逐高飛燕。真成毀室鴟。青詞虛設醮。碧血恐難招。守衛規猶壯。朝陵路竟遙。春秋三百改。枝葉十傳彫。聖代存寬大。遺墟禁牧樵。隧無金椀出。火未玉衣燒。椒酒天王酌。香函使者輶。
康熙中聖祖南巡至江寧躬親奠酒國有大慶典輒遣官往告祭繚垣宮監住。宰木尙蕭蕭。

京口晚眺集唐人句

雨微煙暝立谿頭。風緊雲寒欲變秋。日晚江南望江北。兩三星火是瓜洲。

席上贈王鳳岡顧培穎兼懷王鳳喈在都下

相逢意氣重相期。翦燭更闌話雨時。檣酒三鉢傾宿醞。旗亭七字睹新詩。清譚只許王平子。癡絕終輸顧愷之。更憶薊門風雪裏。騎驢應起故園思。

詠史

曾無經略似龍韜。浪說烏衣甲第高。健卒秋風鳴射鏑。元戎曉日擁征袍。
油幕揮如意。寒禦貂裘酌小槽。褒鄂家聲銷歇盡。空教血涴衛公刀。

少年

少年不羨執金吾。赤鯉銀盤酒玉壺。沒羽南山朝射虎。聽歌北里夜呼盧。
驚沙秋漲鵲鶴湖。射落雙鷹金僕姑。乞得君王丈二組。一時縛取五單于。

過昭慶寺訪喆公不遇

五宗誰嗣響清絕。有祇林水月觀空悟。風幡答法音。我來虎谿下。佛火一龕深。不見維摩詰。悠悠訪道心。
仰蘇樓外有遺祠。漂泊當年事可悲。血染朝衫攀檻日。霜飛白簡毀碑時。山河轉眼分今昔。兄弟傷心灑涕淚。回首敬亭雲近遠。游魂兩地竟何之。

木棉花歌

木棉之花古未有。流傳乃自林邑南。高昌緬甸及南詔。移來交廣雷瓊僧。桐身楓葉芙蓉蕊。秋來結實離相參。周遭徑尺修數丈。非杞非梓非楩楠。蠻方寶此作活計。不數八蠶吳中蠶。爾雅釋木置不錄。南州舊

志披琅函迦羅婆刦載梵夾嘉名肇錫由瞿曇艸棉晚出乃居上卑枝弱幹霜苞含古終古貝名少別騷翁辨說徒詰誦何人分種到江左花開處處臨澂潭吾鄉所種皆艸棉沿其名曰木棉耳崖州老姥年七十卓椎雙髻頭鬟鑿傳來上世種植法至今立祠香茅庵烏泥涇上靈旗卷風鬟霧鬢留空龕爾來傳授五百載鄉邨男婦人人誦弓彈桿軋良自苦如食蓼葉蟲知甘吾生雖無田負郭田家月令曾研覃四坐勿諱聽賤子試爲具述忘愚憨疁城土燥不宜稻稻田十廩得二三三月才過微雨潤木香花下香醆譯木香花開種花之候農夫走尋官歷日翻閱敗壁祛白蟬詰朝相戒種花去蓬頭散髮除檻衫從朝至晡不得息汗出浹背流如汨東皋幾日生意早新芽迸土抽瑤簪火雲觸熱青笠覆艸根細斲長鉏錢向午不憚日杲杲凌晨時聽鐘鑀鑀簷門稚子攜酒榼餽餉小婦簪宜剪嗟爾婦子大作苦面目黧黑中心慚去年種花花事歉家中積儲無一甌今年天氣晴更好十日一雨波渟涵里巫釀錢賽社社翁社母醉且酣巫言祀神神不怒福汝祐汝非戲譚三秋轉眼西風緊捉花處處爭探探提囊花鈴大於繭腰繫圓籠攜荆籃不辭采擷指爪秃十五五頰肩擔歸來茅舍夕陽暮少長列坐齊羅聘園蔬餕釘剝菱芡水族瑣碎持羸蟲紅蓮飯熟出破甌菊花釀美開新咗拍手頓足紛雜沓太平有象樂且湛朝來忽訝聲剝啄市牙估客頻停驂得錢柵載渡江去吾廬依舊空沈沈長含切蚤花捉後花漸少霜黃滿地羣兒擣賣餬老翁打鼓過傾筐換取目耽耽促織初鳴河射角篝燈一縷光猶弇黃紗夜紡軒車鬧抱布賤售憂如惔我農經年長碌碌夫豈本性


由來耽官租私債償未足吁嗟筋力何以堪吁嗟筋力何以堪明年力作催丁男

宋徽宗畫龍歌

畫龍古今誰妙手前有僧繇後所翁宣和道君亦能事游戲落筆侔神工空齋歛忽風雨晦粉墨點點吐光怪陰雲合杳迷高穹震電崩騰驚下界一龍天矯胡鬚垂遙空隱見鱗之而神物變化意飛動豐隆列缺相追隨左方題識更瀟灑瘦金小字兼行楷興雲噴霧豈有心欲吸長江濟四海題云興天上雲吸長
十六字下兩凡一我聞汴都全盛初太清樓閣收圖書關仝董羽妙蹟在至尊清暇時臨摹棆蓬花日月促警眼菀枯如轉轂五國城頭塞馬嘶真龍終受泥沙辱吁嗟乎尺幅丹青千載傳烏號去杳竟誰攀一從曲洧南歸後寂寥龍顏想像閒朱弁使金得二帝御容以歸

宜興道中

連邨薑蔗足安居罨畫谿光畫不如兩岸綠陰微雨後半簾花韻試茶初遙山疊髻晴鋪翠隔浦鳴榔夜打魚陽羨買田曾有約沈吟此地十年餘



潛研堂詩集卷二

竹枝詞和王鳳喈韻六十首

練祁秋漲接空濛。望裏微茫是海東。短棹遠衝煙樹外。綠蓑漁子話鄉風。

宋寧宗嘉定十年知平江府趙彥肅提刑王棐請割崑山縣之安亭春申臨江平樂醋塘五鄉置縣以練祁市爲治所練祁水名也宋吳惟信泊舟祁川詩片飄屢捲暫停船東望微茫接巨川元陳達觀遊練水詩短棹遠衝秋色裏

彈丸城小只如鄉。繞郭春流匹練光。僻左自來遺跡少。圖經空識府君莊。

莊府君墓在澂江門南相傳土人掘得墓石云府君諱泰咸通

三年葬崑山縣東一百里伍家岡身橫瀝水西八十步

麗譙蓮漏急相催。背郭層樓面面開。夜半鐘聲驚客夢。應奎山上月華來。

鐘樓在城東南隅應奎山在儒學前

紺塔峻嶒枕水湄。昇僊臺下短蓬移。蒼松翠柏天台路。可憶高歌擊楫時。

王可交華亭人移居白鶴江以耕釣爲業一日櫂舟擊楫高歌泛江歟見中流綵航載七道士呼可交登航謂曰汝好骨相合爲僊與之二栗食之甘如飴命

黃衣送上岸。但是峯嶺重複松柏參天。乃在天台瀑布寺前今昇僊臺故址在青龍寺塔西。

江陰人避亂青龍江上顏活谿風度自超然。烽火催歸海上船。吟罷看雲滴露句。不知蘿月落平川。

王逢江陰人避亂青龍江上顏其室曰蘿月山房逢有詩云病就山中隱烽催海上舟又云看雲暮影齊巾角滴露春聲落枕回

海運乘風快使驅。千夫長各署頭銜。何人爲仿官師例。也補題名勒翠瑩。

楊樞字伯機嘉興人官松江嘉定等處海運千戶曹某常熟人官嘉定等海運副千戶遷海運副萬戶黃溍俱爲誌墓見黃文獻公集

徵歌曾費錦纏頭。檀板家僮唱石州。好事沈郎今不見。曉風殘月且歸休。安亭有二沈氏。昔時有沈元壽教童奴爲俳優。以此稱于邑人。見歸有光撰朱肖卿墓誌。

柳條拂浪水平磯。一片清光漾落暉。遙指幽人結廬處。風清月澹半開扉。元王子昭詠練川詩。芹芽迸土旁有人新結廬。軒窗瞰水宜幽居。風清月澹堪娛樂。笑掬滄浪縷可灌。

渺渺張騫槎畔煙。茫茫黃歇渡前川。滄桑閱盡恆沙劫。不信還留鐵力船。槎浦俗傳張騫乘槎處。黃渡抽白玉柳線拂浪搖青金。又隣邑人沈東津宅後掘得鐵力木船一蓋。朱清張瑄造舟海運時所遺。

耆德爭推中隱堂。科名父子破天荒。清修謹勿因人進。傳與當官一瓣香。張明之中吳紀聞。曾大父諱宗元字會之。登天聖五年第主杭州仁和簿。時范文正公爲帥。改容禮之。曰。公器業清修。官日必爲令器。謹勿因人以進。曾大父敬服其訓。又云。曾大父自都官員外郎分司南京。謝事家居。建中隱堂。與尙書屯田員外郎程適。太子中允陳之奇。相與從游。日爲文酒之樂。二公皆耆德碩儒。致政于家。吳人謂之三老。

移栽盆樹綺窗妍。截得筠筒手自鐫。花鳥徐熙山馬遠。無人知是小松傳。朱稚征號三松。善仿名畫。翦盆器三松小松之子也。

離披雨笠與煙蓑。款乃聲聲放棹過。一自樊川曾夜泊。至今清露白雲多。杜牧吳淞夜泊詩。清露白雲明月天。與君齊棹木蘭船。牡丹頭小撥輕橈。兀坐低頭長日消。行徧九行十八鎮。櫂歌聽唱雨瀟瀟。牡丹頭船名。斜紋布可製衫。黃雀西鄉多有之味美。

莊嚴佛像法堂供五粒松枝翠影重怪雨淙淙風瑟瑟夜深疑化作蒼龍。西隱寺古佛元時新安巧匠洪海雲所造寺有羅漢松二株係
三四百年物葉方謁詩畫鳴風

叢殘詩碣倚穠垣姓氏傳謠竹素園記否嚴陵投贈句南窗家世本蘇門寄集僊宮有元人石刻詩首題詩
頓首末題天歷己巳夏孟書于練庠冷齋南窗煉師者集僊宮住持提點冲靖守正凝和法師孫應元也
故詩有煉師蘇門僊丹竈白石之句韓浚嘉定縣志載此詩題云寄集僊宮葉煉師案續吳錄云嘉定
之集僊宮宋嘉定十七年道士葉子琬建子琬爲兩街都道正賜號沖妙大師此詩作于元天歷中不得與葉同時

花朝二月雨初晴笑語相將北郭行折得紺桃剛一朶小鬟偷壓鬢雲輕俗以二月十二日爲花

刺眼繁花細細開陌頭女伴踏歌來燒香纔罷遊園去延綠軒前薄相回城隍廟後園水石亭臺最勝中

辛苦吳郎髮早衰誅茅曾此傍江湄輕陰細雨東風軟又是梨花瘦盡時宋吳惟信字仲孚湖州人寓居

年閒將心事卜金錢梨花瘦

盡東風軟商略生平到杜鵑

橫塘縱浦水瀠洄吉貝花鈴兩岸開朵朵提囊看似繭急攜花籠捉花來木棉一名吉貝花房曰花鈴花人稱木棉花止稱花者猶洛陽之牡丹也

漁燈橫照滌波明插蘆編蒲岸岸平沙裏鉤來鄉味好統勝糖蟹與糟鯉沙中鉤出故名
菜圃瓜畦拓百弓杭家邨北夕陽紅棟花倒覆三閒屋酒幔低垂十里風襄忱嘗微行至此土人因名曰周文

周公

澹沱湖光漾晚曛。龍船戲水綠沄沄。丹沙書就符教佩。蕙帳涼風夜辟蚊。

五月五日看龍舟競渡丹沙符佩之辟蚊

橫斜藻荇鏡中涵。洗盡浮雲天蔚藍。煙際幾番回艤櫓。櫂歌聲入匯龍潭。

潘龍潭在儒學前

白鶴江邨吠乳厖。白鶴江水射船窗。罟師舉網日薄暮。定者四鰓鱸一雙。

白鶴江在縣西南有白鶴邨

病瘧唐生果怪哉。流連時命亦堪哀。胸中磊塊難消得。日飲無何且百杯。

唐欽堯答友人問疾書

僕茲病瘧轉神清。就枕之後一念感慨心雄萬夫。應制之撰述而君之議論雅與衆異。它人病瘧多氣亂危延。諍千言具有條理乃遂蕩清宿惡。扶植天常明揚幽沈別抉淫蠹。事已就緒謝政東歸素願大慰則安夜已過分以此疾不知當屬何門而治之當用何藥也承兄愛厚輒述病原觀畢便擲還小僕勿令世人知有此怪症也見歸太僕集

黃姑遺廟傍江涯。膜拜紛紛乞巧兒。聞說金籠曾割水。晚風肅肅捲靈旗。

中吳紀聞

崑山縣東三十六里地名黃姑古老相傳云嘗有織女

湧溢牽牛星降于此地織女以金籠割河水。

依依墟里散炊煙。短短笆籬帶晚川。黃葉西風鹽鐵路。布駢一半販花船。

鹽鐵塘吳越王運鹽鐵處

沈司徒廟夕陽沈趙四官墳蔓艸侵沙浦。潮兼桑浦急。腰涇水比界涇深。

沈司徒廟在婁塘元至正六年建趙四官不知何人有墳在腰涇水比界涇深

界涇二水之閒沙浦桑浦二水名

綠樹依微繡幕圍。平橋細雨正霏霏。菜花開後梅頭出。麥浪翻時團尾飛。

梅頭魚名團尾鳥名俱出高橋

一簣閑園近石岡。青蟲網戶弄斜陽。恰宜消夏浮朱李。亂打新荷雨氣涼。

石岡在澄江門外龔方伯錫爵詩

竹風荷潤北雨氣石岡南又同唐斐二兄遊石岡園林晦今朝雨荷散昨夜風安來無酒掃網戶有青蟲

鶴鷺鵠鵠任往還。野田雨過瀉潺潺。婁江北去無多路。記取儂家相見灣。

劉家河古婁江
也有相見灣

期頤堂下綠凝苔。垂白牙紺拜賜回。九十年華彈指過。有人曾識壽星來。

吳郡志。龔明之字希仲。居崑山

中吳紀聞。予年二十時與鄭君聘應求同在郡庠。應求精於人鑒。語

予曰。吾友乃一壽星。然亦可銀瑯瓊後。七十年。予始拜牙紺之寵。

語

菱角青青荳莢黃。秋成風候未全涼。老農屈指稻將熟。下馬試看烏野香。

烏野香下馬
看皆稻名

天僊古街繞清渠。鹿眼編籬密更疏。紅蓼白蘋秋色好。分明畫出野人居。

吳轍字中行。台州人。元末避亂
泖濱。顏其室曰野人居。倪高士

贊爲作圖。後徙清
浦里之天僊街

水面懸芎蕡。香餌多撒頭。船子晒漁蓑。斜陽一帶平蕪岸。依舊淞江落葉波。

白居易望海詩。震澤
白蕪岸。淞江落葉波

沙外平沙邨外邨。黃墩東望是雷墩。吳航販取秋瓜去。柔艣咿啞割水痕。

黃墩在縣西南五里。產西瓜最美。

墊巾樓下雨如絲。點水蜻蜓故故遲。記得新安老處士。松濤竹露醉題詩。
墊巾樓。程嘉燧故居。嘉燧有詩云。曉案晴光研竹露。夜瓢明月詩。

賀松
濤

曲綠寒塘鴈齒橋。澹黃楊柳影迢迢。扁舟載酒江湖去。好趁初三十八潮。

楊柳橋在十四都。
初三十八潮最大。

走馬塘邊下釣綸。青龍江水渙潛鱗。蓮衣褪後秋風緊。開偏繁花四葉蘋。
走馬塘在縣東南。青龍江在縣西南。相傳吳王造青龍戰艦於此。

齊公卓錫闢棆蕪。疏瘦天然冰雪軀。怪得邨氓爭布施。不知曾見鶴飛無。

中吳紀聞。崑山縣臨江鄉有餘翔寺。初寺基出片石方徑丈餘。南

常有二白鶴飛集其上。有僧號齊法師者，謂此地可立伽藍，即鳩財募衆，不日而成。因聚其徒居焉。二鶴之飛，或自東來，必有東人施其財。自西來，則施者亦自西而至。其它皆隨方而應，無一不驗。非也。元楊瑀《漁瀆壘》詩云：「嘉定縣志作袁崧，誤合山松爲一。」

月明往事重堪悲。殺氣東來偃將旗。故壘西風魂斷處，不知誰唱輓歌詞。晉書袁山松出遊，輒令人唱輓歌，時謂道上行殯後爲吳郡太守。守漁瀆壘爲孫恩所害，嘉定縣志作袁崧，誤合山松爲一。

外岡西去是儂家。數畝清陰落照斜。一扇柴扉容叱犢。半駛漁艇慣撈鮀。外岡在縣西十二里，又西五里爲望儂橋市。

莊濱南與練祁陽。一道平波跨石梁。顧浦待潮天欲晚。田居冷僻似僧房。望儂橋跨顧浦，右爲莊濱，左爲小練祁鄰，宣水余家在其西。

利書載松江北岸自北陳浦東至海口，有大浦二十條。顧浦其一也。顧發有待潮顧浦宿耕者張欽舍詩載崑山雜詠。

三椽老屋蘚花斑。只少谿南數尺山。試上望儂橋上望玉峯翠黛有無閒。登望儂橋可見。

半塍黃豆半青秧。花藥園邨竹遶岡河射角時勤夜作。商量莫負好秋光。

藍詵俗呼青秧。

笠澤江聲接杳冥。一雙白鷺立沙汀。望中點點如螺髻。數偏雲閒九朵青。吳淞江一名笠澤，九峰在其南。

潮聲半夜滿寒塘。銜尾中流到海航。載得黃魚白鯗至閣鮮一路賣沿鄉。俗呼海魚，鮓者曰閣鮮。

膽瓶換水貯清漪。月下鐙前影倒披。羅漢松青天燭赤，輕黃更閒蠟梅枝。新年瓶中插花，如蠟梅天燭羅漢松之類。

茅柴壓酒最清甘。醉踏郊原春色酣。黃艸鞶輕棉布暖。生來不識上山蠶。涼蠶出新溼，取黃艸織之，邑不宜蠶，人家皆種木棉作布。

銀鍾秬妝滿盤盛。正月人家未出耕。燈火夜闌喧小婢，鍼姑細語聽分明。正月燈時，迎鍼姑。

婉兮廿角亦多姿。上學初從句讀師。粗記神童詩一卷，聰明傲煞牧猪兒。小兒上學讀神童詩，千家詩三

木龍漿薄抵輕冰。橄欖瓜甜蔓細藤。燕子春來抽燕笱。魚苗秋老放魚鷹。取木龍子磨作粉。夏月食之名涼粉。橄欖瓜西瓜別種。出外岡。
燕竹以燕來時生笱。魚苗俗名魚秧。近太倉人家多畜之。魚鷹俗名水老鴉。

巨螯團壓認雌雄。手縛寒蒲教短童。頗羨楊涇老漁者。一年活計緯蕭中。楊涇蟹最美。諺云：雄蟹捨不得蟹，雌蟹捨不得螯。

市出布

激灑銀河低玉繩。蟬媚弦月挂西塍。舟移畏壘亭前泊。遙憶書帷幃蠟燈。畏壘亭歸太僕有光讀書處。

木棉花黃蝴蝶飛。木棉花白豆葉稀。木棉收盡軒車鬧。紡得黃紗製妾衣。

艸冷煙清一望平。錢門塘上掩柴荆。篝鐙細細鳴梭急。好和疏籬促織聲。

錢門塘市出布

生泔醱醳出新箚。令節分冬一醉休。怕見三朝迷霧重。裝絲徑寸暖于裘。冬至前一夕飲酒謂之分冬。酒諺云：三朝迷霧刮西風。

蜜餌糍團和粉餠。九斤爛煮大場雞。宵來送歲還迎歲。齊換宜春帖子題。三黃雞出大場。重至九斤。元日題宜春二字于門。

蘆簾紙閣好盤桓。煙篠風蒲水面寬。合喚漁兄與漁弟。柳陰深處下筠竿。

望櫂橋

傍水低低屋。穿橋小小船。潮來從顧浦。煙細認安亭。種豆青攢筭。收棉白拆鉛。邨邨歌歲稔。樂矣返柴扉。

滄浪亭

蘇君昔寓蘇。傍水小亭建。清風明月佳。買斷錢四萬。誰云傲骨屯。自取兼山艮。竹翠穿日光。窗青延野蔓。

日光穿竹翠玲瓏野蔓盤青入破窗皆子美句。吟詩寄歐梅。餘子毋我恩。平生金石文。委積塵一寸。那知誇焰息聲名。出蹇鈍翻

令後遊人到此適所願。前孫與後章棄置勿復論。清兮滄浪水。濯纓來者勸。

擬田家詞

學稼數十載。不入城市門。婚嫁早已畢。含飴聊弄孫。幼孫六七齡。岐嶷亦可人。問之讀何書。孝經與魯論。大意雖未曉。句讀粗能言。向母索棗栗。畏翁卻復前。撫景忽長喟。忽憶翁少年。此景難再得。回首心茫然。寄邵高二秀才

寥寥旅鴈尙南征。母對西風百感生。孤客途窮還臥病。天涯知已苦關情。持竿雨後思高鳳。種圃城東羨邵平。何日一樽重話舊。夜窗挑盡短長檠。

訪顧上舍郵居

五載曾爲客。重來訪舊游。麥青纔覆雉。沙淺不驚鷗。鮑菜參差市。颯檣遠近舟。比鄰如可約。還往儘風流。題爻吉兄赤壁圖

月射烏篷岸岸明。攝衣絕巘上頭行。危巢夜半驚棲鶴。知是當年長嘯聲。崎嶇石磴足淹留。如畫江山一望收。絕壁登臨應更快。笑它二客未風流。

擊筑行

朔風蕭蕭翻地軸。燕南酒徒畫擊筑。壯士一時怒瞋目。平生不識秦舞陽。殺人如麻人莫當。須臾色變何

倉皇秦廷劍光飛不起。青銅柱裂白虹死。輕身一擲長已矣。

君不見博浪飛椎椎折軸。下邳圯上無人識。大索十日索不得。

子房全身卒能報韓
悲荆卿之不能也

閨七夕 戊辰

又是秋河絡角時。停機重把織羅移。多情葭管灰偏剩。解事蓮花漏較遲。兒女穿鍼翻舊樣。詞人乞巧換新詩。素娥此夜知遙妒。不放金波萬里垂。是夕無月

漫成六首

說詩解頤匡鼎問。事長頭賈達。汗青一時未了艸元後。世誰知。坐客青眼白眼名。士大兒小兒。搗鼓三通古調詠。懷百首新詩。風裏登山落帽雨。中出郭墊巾。捋鬚欲臣老子。伸足不識故人。乞米平原有帖。移家東野無車。聊復中之美酒。且往觀乎異書。

巨口鱸魚秋美長。腰梗米冬春。新拓三椽老屋恰對五粒小松。

宅畔雞頭鴨腳生涯蟲臂鼠肝寄貲斷無錄事送菜可有園官。

用昌黎會合聯句韻送王艮齋先生歸海虞

朔雪凍差差。惛懷寒氣重。王鳴盛先生懷故園。浩然歸計勇。王昶冷雪武邱凝。秀嶂虞山聳。錢大昕襄輕

僕無痛。颯舉浪猶湧。曹仁虎養疴公志便。問字我忱壅。鳴盛結添卜商衣。履曳原憲踵。昶叩鐘聆噲咤。帶經鉏畝壘。大昕游嘗昇輿從。學歎望洋恐。仁虎嗚呼文教衰。流傳多繆種。鳴盛七略誰囊該。九師空雜冗。昶弔詭卜火珠。荒誕搜汲塚。大昕袞袞逐韻瀾。紛紛博世寵。仁虎先生筦道樞。詞林作梁柂。鳴盛砭俗論必嚴。匹古意未恂。昶覃思幹元造。購籍損官奉。大昕幽鍵啓突奧。銛斤斬拳腫。仁虎十道九域探。三篋百城擁。鳴盛當其烏臺遷。屹然白簡捧。昶默默嗤寒蟬。啾啾嘲羣螢。大昕正色排嬪婀。直筆刺微纁。仁虎然犀燭罔象。伏弩射闕羣鳴盛。獨立仰丰規。先鳴振傷隉。昶乃知一士愕。足令千夫悚。大昕旋解紫綬還。閒羅碧艸。葺仁虎酒兵整鞶鞬。騷壇集球珙。鳴盛遂初欣歸吳。耽榮恥得隴。昶吾谷峰嶙嶙。尙湖波溶溶。大昕聽閒身侶鷗鷺塵鞅脫桎綦。仁虎五年主講席。詩禮誠發冢。鳴盛教比時術蛾。文喻吐絲蛹。昶執經紆矩步。解惑快曲踊。大昕情愴驪駒歌。令紀鳥獸託。仁虎往矣冰蹙紋。來思花坼甬。鳴盛佇立望河干。霜風浩呼。

呼洶昶。

聞金川平定喜而有作

西南絕徼漫傳烽。命將專征出九重。閩外建旄麾鐵騎。軍門推轂賜黃封。雲連壁壘龍蛇陣。日閃旌旗荼火容。聞說如山號令肅。六師枕席過巴庸。

元戎出塞陣堂堂。制勝遙承廟算長。烏道千盤朝縵馬。龍韜三略夜封章。電矛雨矢軍威壯。雷鼓風旗士

氣揚聞說蠻方今納款亟銷鐵甲事耕桑。

桃林重疊賞元功廉李威名出禁中長子帥師期盡敵大君懿德載橐弓笳簫夜靜三更月鼓角春閒萬里風勒石橋門重紀績奎章百丈氣如虹。

秋柳次韻

極目長條更短條永豐西角最魂消渭城舊恨歌三疊白下新愁送六朝零落夜烏囀轉急蕭疏客鬢話無聊春來縱說輕離別尙有濃陰拂畫橋。

歸家

刺促何堪道生涯逐布飄高堂將白髮游子尙青衫短檠愁韓愈長竿笑阮咸歸來斲黃獨託命手中鐳數點灑塵雨新涼亦復佳著書翻鄰架沽酒壓茅柴更有羊何契相於簾笠偕天涯少知已不用敝青鞶

舟行

棹入煙蘿裏幽探願不違共知濠上樂漸息漢陰機柔艣謳鴉語閒鷗撲鹿飛坐看林際暝猶有白雲歸遠別離

扁舟破浪行布飄疾于箭紅豆盛羅囊相思不得見

尙湖夜泊

微茫雲水自萋迷。平遠山光入望低。唱罷竹枝飄盡落。孤篷殘夢尙湖西。

秋日舟行

西風一夜生。秋氣倏清爽。峯遠明餘霞。林疏透微晃。邨煙細如絲。水田平于掌。出泉占旣濟。虛舟利攸往。漸聞榜人語。始知暮潮上。鷗鷺眠不驚。水石激成響。忘機境俱恬。乘化意彌廣。逝者亦如斯。因之寄遐想。

九日同潘璜谿凌叔子張策時王蘭成作

木落鴈南下。天涯各滯淫。百年多病客。九日故鄉心。風度高樓笛。寒生別浦砧。西山爽氣在。無計一登臨。雪霽

平明雪初霽。幽人此散步。徐看朝暾升。忽訝時雨澍。青山如新沐。螺髻恰微露。老樹影漸瘦。陳根尙封固。早梅舒素萼。暗香纔半樹。疑是窈窕姿。輕紈障逾嬌。言尋小僧寮。蒼茫問古渡。橋欹劣容足。泥融略識路。隱隱鐘梵聲。靜聽得清悟。趺坐憺忘歸。不知日遲暮。

贈翁朗夫徵君

緯蕭抱犢白。家風薦牘頻。看達紫宮東。國人倫歸郭。泰西京儒術。數申公。江湖載酒風流在。耆舊論交意。氣同擬向君。山來問字相。從踏偏碧玲瓏。

春日閒居

五畝城西路。郊居賦若何。鳥聲新雨過。颯影夕陽多。酒熟人初醒。詩成客解歌。生來耽習靜。閒坐說禪那。

金山

方丈瀛洲路渺茫。金山終古獨蒼蒼。孤根自立何依傍。濁浪相排有抵當。樹影只疑雲影幻。鐘聲遙帶水聲長。中冷泉味誰能別。且坐僧寮子細嘗。

永濟寺

懸厓青瘦似磈礧。中有清涼十笏居。六合山光凭檻入。大江颯影卷簾餘。譚禪不契空行脚。養病無妨且廢書。三載重過忙底事。晨鐘送響只紓徐。

雨花臺

說法雨曼陀。高風宛如昨。坐久寂無人。惟有松花落。

懷曹來殷

忽忽三秋暮。蒹葭況復殘。涼飈一以至。落葉洞庭寒。我友今多病。相思獨倚闌。因風寄消息。中夜起盤桓。綠苔凝芳榭。子建獨煩憂。今夜西窗月。懷人定倚樓。天寒租賦急。歲歉稻梁愁。辛苦江鄉夢。郵籤肯寄不。

懷王蘭成

井梧撼撼下閒庭。悵望同心隔遠坰。舊雨祇今勞夢寐。三春曾此共飄零。白沙夜月潮聲急。紅葉秋山屐

齒停遙憶五茸雲正遠折麻何處寄芳馨。

憎蠅

營營亂形聲散豆不可打都瓦切從宋適從何處來會須杖門者。

別席

楊柳無端折笙歌有意留清言仍袞袞長路但悠悠細雨兼花落歸雲赴客愁江淹黯然別南浦一扁舟。
同王琴德曹來殷沙斗初張崑南泛舟游靈巖山寺

申旦戒清遊極目路非遠橫塘流琤淙枉渚任回轉幽賞心忘疲津逮境屢變弭棹入山中相於陟崇巘
琴臺既清峻石廊復平坦緬懷昔時人繁華自流湎原荒走麋鹿徑僻積苔蘚代往迹豈邈物移理空顯
雍門操未彈牛山淚先泣因之感古今徘徊遂忘返

暮宿木瀆吳企晉園亭

羲輪不暫駐夕景來陰崖沿途越修畛命駕登幽齋吾友早遺榮相見愜我懷盍簪樂情話容鄰升堂階
坎習激清籟解作滋新荄以茲邱園樂況復聯朋儕迢迢月初上千里無塵霾清輝長不滅良覩寧愁乖
素履貞无咎同心道長諧願言崇令名相於游息偕

游天平山歷龍門白雲泉蓮花洞諸勝

夙昔慕臺尙散髮事登陟名山志遠游攜屐探九域天平況在邇葱翠望不極屯雲生層岡蒙泉注巖隙
壁立石骨露峻絕苔徑仄梯空疑無路攀蘿若可卽行險心惟亨仰止道自得理以湛寂超境與幽邃適
卽此澹塵慮笑自逃藪澤歲宴期重游眷茲山中客

訪上沙陸氏園居

尋芳信坦步徑行越故蹊名園在西郊不辭路逶迤自田復之湖果得瞻巖棲木水自明瑟蒲稗相因依
激泉植疏援折柳樊新籬機忘魚鳥適地偏心神怡幽人托肥遁衡門忘朝飢高風未縣邈軌躅良在茲
我亦澹蕩人寄興耽山茨相期沮溺耦開徑耕東菑

三十三山艸堂圖歌爲霽堂徵君作

前峰後峰石巒屹千重萬重雲往還秋林滿眼楓葉丹艸堂突兀當其閒主人乃是湖海客著作終年樂
泉石方瞳皓首冰雪顏恐是列僊天上謫暨陽城邊嵐氣濃五畝之宅一畝宮說經勝匡鼎鑿穴師臺侈
三詔六聘笑不應芒屨竹杖踏徧三十三青峰煙蒼蒼兮乍合水澹澹兮生漪喬松蔽天以磊砢野卉薹
露以華滋遙岑出沒望不極惟見長江東下奔赴大海一氣磅礴無端倪使人目眩色動而嗟咨蓬萊在
何所五嶽不可期四壁臥游太癡絕撫琴動操徒爾爲何如艸堂卜築好日餐蛾綠可娛老窗前皓月來
如期階下蒼苔閒不掃青山便是耐久朋息壤盟言悔不早我披艸堂圖爲君試作艸堂歌安得誅茅開

徑來傍山之阿。從君艸堂晨夕時相遇。

送吳企晉游黃山

黃山三十六。杏靄望難分。初日天都上。峰峰皆白雲。赤松學道處。嘯傲列僊羣。亦擬支筇去。鐘聲煙際聞。

陽湖雨泊同諸君分韻得桃字

去去毗壇路。孤邨繫小舠。隄邊折楊柳。竹外拆紺桃。風雨同鄉夢。江湖對濁醪。三更聽棹曲。轉念客途勞。

溧陽道中

漠漠平蕪野色寬。林泉幽勝足盤桓。疏隄燕語垂楊路。細雨春扶蘤藥欄。地近洮湖沙岸長。煙昏瀨水客飄寒。更思入饌尊羹滑。好著紅衣下釣竿。

金陵寄內

春江回望路迢迢。簫管秦淮空暮朝。三十六鱗封錦字。澹煙疏柳白門橋。

潛研堂詩集卷二

御試賦得指佞艸五言八韻
得忠字

中天方遠佞。小艸亦懷忠。匪手偏能指。無心乃至公。孤標宜近日。勁節詎隨風。自欲傾葵效。全教滋蔓空。

奉旨特賜舉人授中書舍人紀恩二首

俳優薄技擬枚皋。給札金門異數叨。五色霏微承紫誥。十年蕉萃媿青袍。登科仍許陪先進。通籍何須謁。選曹小艸自來無遠志。也蒙搜采到蓬蒿。

趨承行殿謝恩齊。冰樣頭銜紙尾題。葵藿忽回初日照。鶯鵡何分上林棲。青綾被暖中宵擁。紅藥花翻入戶低。却笑杜陵誇獻賦。五年纔得尉河西。

吳越宮詞

婆留水淨了無塵。腰鼓城堅霸業新。握手殿頭耽午睡。不應翻怒沃湯人。
清歌緩緩惱人懷。陌上花飛濕錦鞞。一望浮圖如紺碧。不知破費幾金釵。
枕來圓木肆勤勞。宮姬司更各一遭。蜥蜴沿緣油欲竭。君王昨夜飲麻膏。

東院欽鉢十二行。金櫻的的各舍房。錦繡貴子生來早。碧眼高僧獻玉羊。
新添侍女直嚴更。青絹輕幬夢未成。曲宴胡琴纔弄罷。牆陰微度彈丸聲。
擲筆波心膽氣麤。匆匆除夕失歡娛。當時應悔輕題句。一軸鍾馗擊鬼圖。
帳前銀鹿弄羣兒。嬪御翩翩窈窕姿。獨有才人吳漢月。練衣淺澹道裝時。
麗春院子夜沈沈。樂部更番奏雅吟。怪底佛堂鐘梵歇。好催新月譜新音。
龍蕊千金購海南。真妃稽首供精藍。山僧不遇波斯客。一笑唐捐日本簪。
一彈指頃願心微。佛髻旋螺出禁闈。多謝君王親合十。插天金塔榜黃妃。

王次山先生輓詩

西臺真御史。東觀舊詞臣。賦艸凌雲筆。車埋當道輪。平生尙風義。傲骨獨嶙峋。辛苦遺孤在。誰爲分宅人。
掌夢巫陽杳。催人鬼伯侵。訃來猶恐誤。悲極不成吟。寥亮山陽笛。摧殘爨下琴。半生知己感。淒斷竟難禁。

呈沈歸愚先生

通籍清華紫鸞深。乞身歸老解朝簪。文章巨手唐燕許。山水前盟漢向禽。綸閣容臺譚故事。赤城黃海入
新吟。年開九秩身猶健。獨樂依然戀闕心。

舊宅靈巖十笏安。天留耆碩領詩壇。御賜詩壇者
碩四大字高承沆瀣中霑露。獨掣鯨魚大海瀾。供奉拾遺光燄在。

椒園竹里嘯歌寬，集成不用求元晏。帝製鴻文在簡端。

絲竹東山閱歲時，白頭重話主恩私。遂初久已辭中禁，清俸猶煩給度支。層閣靜聽松籟遠，平泉細譜藥苗滋。五湖煙水明于鏡，好鑑蒼蒼海鶴姿。

五月

五月秧鍼綠兼旬，雨澤稀甌窯乾欲坼。布穀暮空飛米價，頻年長田園生計非。老農占甲子，辛苦候荆扉。

邵伯湖

澤國微茫長綠蕪，薄游蹤跡感羈孤。疏鐘夜火孟城驛，官柳長隄邵伯湖。往日漂流悲鴈戶，祇今村落足漁租。波光面面清于鏡，得似沙鷗穩宿無。

寄內

徐淑偏工病，潘仁未定居。艱難千里別，迢遞八行書。已負餚糜約，能禁愁鬢疏。相思應最苦，酒醒夢回初。

題翁霽堂徵君秋林覓句圖

四序天平分，最好惟三秋。秋高氣迥望不極，滿林清籟鳴颺颺。遙岑明滅碧無數，楓柏經霜點紅樹。彷彿江南黃葉時，煙靄漁舍斜陽暮。中有詩翁臞而清，扶藜散步探雲局。山空人靜參真悟，無心得句如天成。劃然蘇門鸞鳳嘯，千巖萬壑音泠泠。君不見柴桑陶徵士，采菊東籬插鱘蕊。地偏心遠日夕佳，吟向南山

蒼翠裏君不見吳興柳使君清詩五字妙入神寒砧北渚蘋洲晚隴首西風木葉聞先生吟卷媯羣雅標格古今足比亞柱頰長歌得意初定知十手爭傳寫憶昨相逢吳會閒問奇載酒每忘還疏鐘夜訪楓橋寺蠟屐朝看林屋山甘羅城邊同作客話雨西窗樂晨夕天末鄉心白露深河干官柳寒煙碧示我小幘一尺餘吳裝渲染却蕭疏分明清逸倪迂畫貌出吟詩孟浩圖年來我亦因詩瘦滿眼秋山重回首只合從君汗漫游欲向林間掇三秀

憶內

薄寒疏雨睡瞢騰忽憶年時別緒增一幅水精簾未捲遠山濃綠畫眉曾
方池菡萏葉田田斗帳溫磨應未眠別整雲鬟香霧裏月明涼浸夜飛蟬
輕衫彈畫折枝疏屈戌終朝掩玉除一翦微風梳鬢影滿庭河柳納涼餘
無心繡佛說禪那雨過閒階長綠莎屈指刀環知幾日澹雲清漏落秋河
參橫斗轉夜闌干自試麋丸墨未乾爲寄新詩裁錦字中央四角幾番看
匆匆書劍枉飄零水驛山程次第經君上高樓休望遠銷魂官柳短長亭

辛未七夕用李義山韻

搖落天涯感別離幾番屈指數歸期懷人江上參橫後聽雨更闌夢到時西北浮雲秋望遠東南孔雀夜

飛遲那堪客裏逢佳節。莫怪安仁鬢有絲。

淮陰釣臺

淮陰未遇日遺跡此河干。洵有眞王相。曾登大將壇。藏弓鐘室恨。捲雪釣臺寒。輸與嚴陵客。忘機把竹竿。

淮安弔褚不華

我登韓信城。平野莽無際。極目古戰場。浩然足長喟。嗚呼至正年。劇盜起如蝟。衛公來石樓。孤城手扞蔽。指掌悉兵形。分壘扼地勢。白簡飛風霜。總戎爲短氣。鐵頭援已孤。青軍氣更熾。鼓衰落日低。矢盡空脊銳。破賊滅賀蘭。嗟哉志不遂。蒼茫大將星。中宵竟隕地。長淮怒浪高。豐沛浮雲逝。招魂去何之。麥飯無陳祭。不見清水塘。穹碑負負最。謂余忠宣誰爲立專祠。我將告具位。元始稱軍興死事之臣以不華與余闕爲第一

東軒相國七十壽詩

久登黃閣領簪紳。後樂先憂在一身。門第膏腴唐宰相。經筵啓沃宋儒臣。骨清真有儻曹分。事練還勝年少人。七十杖朝仍古制。天留大老展經綸。

星軺銜命出台階。歷試勳名邁等儕。畫戟森嚴兼使相。金闕輦固定河淮。行其無事休民力。告厥成功慰聖懷。今日生申歌介雅。東南老稚頌聲皆。

清口

黃河如奔雷。驚濤走沆漭。長隄束兩崖。鬱怒激危響。淮陰地勢卑。河身出其上。三秋水稽天。有識心惚恍。清口受全淮。洪源故深廣。瀦水以刷沙。議自印川防。築堰塞尾閭。不惜糜內帑。併力趨一門。驚湍瀉萬丈。浩浩雲梯闢。二瀆相摩盪。稍紓南顧憂。且以助轉餉。迄今讀遺書。擘畫若指掌。成跡詒後人。喟然起遐仰。

清河道中

清晨北渡河。破浪長風駛。峭颯若飛鳥。瞥眼無停晷。撥棹指中河。村落正邐迤。依依垂柳籬。隱隱炊煙起。居人傍遙隄。柴門臨水涘。鄰近八九家。一鬧成小市。趁虛賣魚蝦。沿邨散雞豕。地瘠少桑麻。民貧戒浮侈。瀕河彫劖餘安堵。差足喜來牟。方有秋年豐。未可恃。努力護長隄。勿使蟻穴毀。哀哀諸鴈戶。忍令數轉徙。

中河

東南歲轉漕。海運道久廢。長淮泝流上。黃河路迢遞。中經呂梁洪。洶湧浩無際。冒險非長策。各各獻大計。鑿渠泇溝始。開道阜河繼。我朝靳中丞。持節江淮澨。周歷審地脈。慷慨闢浮議。渺瀰駱馬湖。泉源納千派。引之使南行。築隄以扞衛。峩峩大艍來。峭颯趁風利。破浪不須時。截流占既濟。宿預逮下邳。百丈銜尾至。水驛經三千。魯齊泊幽薊。遂令運租船。踏浪若平地。竭來溯遺蹤。波光正容裔。想像經濟才。倜儻竟誰嗣。前陳瑄。與後宋禮。鼎峙差無愧。敢告載筆臣。采入河渠志。

邳州

百里彈丸地。傳聞古下邳。孤城奚仲國。衰艸石崇碑。入市魚蝦賤。瀕河波浪危。船頭青數點。山色隱修眉。

與周西隣孝廉分賦漢陵得長陵茂陵

金刀天啓入咸京。扶義居然長者名。三尺獨提游子劍。一杯險啜若翁羹。芒山雲起蛇先斷。垓下歌殘狗已烹。誰道英雄多嫚易。也能輟洗謝狂生。

寶帳珠簾甲乙陳。樓居縹渺切星辰。浪傳阿母來青鳥。却喜奇童對白鷺。鑿空偏通旁國節。舞文幾積後來薪。長門枉買相如賦。不記當時金屋人。

元史雜詩

一介相邀泛綠醞。角張未許嫁娉婷。南鴻一夜驚飛去。枉信人間有白翎。
鐵券金符異代書。艱難王業未寧居。班朱泥水渾流在。莫忘君臣信誓初。
凌兢瘦馬各銜枚。鞚繫蹠皮誓不回。傳語乃蠻諸部長。統軍盍喚可敦來。
兀朱加葉總名邦。大將征西金鼓搃。百里沈檀香霧遠。軍門曉受算灘降。
名王西北翦圭桐。萬里神京封事通。站赤星馳三百日。計程未到大安宮。
歲賜平分五戶絲。荅兒海子浸玻璃。冊妃尙主承新旨。忘却揮刀踢岸時。
金章螭紐備藩臣。甥舅姬姜肺附親。歲歲江南分戶鈔。一時望闕拜溫綸。

軍門獻策氣無前。百戰勳名露布宣。白馬朱纓朝突陣。霸州元帥破丹延。
金沙灘險瀉灣漫。飛度爭趨龍首關。六詔一時分郡縣。軍威先已震烏蠻。
微茫國語乍宣初。關紐翻來屈曲餘。傳是法王新製字。詞頭休進畏吾書。
雪山六月未流澌。九渡河源度馬時。終古乘槎誇漢使。幾人曾到朵甘思。
乃顏故地水瀠洄。漁戶千絲舉網纔。進得巨魚剛九尾。無人知向肇州來。
窮海淹留歲月徂。風高霜落鴈飛孤。金明池上彎弧客。曾見繫臣繫帛無。
灑馬年年祀禮成。葡萄細乳革囊盛。如何太祝升神座。偷喚先朝帝后名。
真珠簾柙自重重。織錦花紋肖御容。擁護還憑龍象力。影堂人定聽鳴鐘。
正殿朝儀集九賓。兩宮竝御肅楓宸。誰傳珠絡天家詔。別有跏趺上坐人。
梵書白繖影團鑾。儀鳳雲和樂未闌。游徧紅門城內外。官家親御綵樓看。
金甕珠衣寵錫新。退衙夜宴酒千巡。花枝瞽眼渾如夢。空作鴛鴦會上人。
名鷹文豹賜頻仍。一字真王封邑增。七寶玉書鐫上輔。頭銜未換薛禪稱。
殿中宿衛早承恩。侍直還教近至尊。宣喚內庭催博進。衣香輕涴餅茶痕。

我讀桑苧經。載稽忠惠劄。大昕活泉半杓煎。細茗一旗狹。吳志鴻江心汲中冷。雨前焙清雪。大昕碾磨競。
八閩薑鹽晒三峽。志鴻冰茶防何年。濫觴誌某甲。大昕土窖啓及時。凌人供未乏。志鴻腹堅紋乍裂。頭綱
芽新掐。大昕取彼明月光。配以驚雷莢。志鴻一片玉斲初。百過湯沸恰水火適旣濟。炎涼變一霎。大昕
舌凍欲含蟹眼浮。漸壓志鴻甌倩樵青擎。椀任玉川呷。大昕肺熱渴思消。齒冷酒徒狎。志鴻兩腋散松風。
六角拋紈筭。大昕火宅生晨涼。妙諦參梵夾。志鴻吾儕嵇阮儔。脫略忘巾帽。西山拄笏看東華。染塵插大
昕花影亞檐牙。波紋漾簾柙。志鴻譚高屈雕龍香熏浮睡鴨。大昕滿貯玉壺清。小試竹爐法。炎歎稍破除。
罏穢謝款洽。志鴻寒泉浸瓜犀。涼颯扇蒲葦。大昕手弄月團香。心盟白水歃。志鴻鬪茗會有期。強韻好重
押大昕。

移寓

客居燕臺兩寒暑。有似澤雉游樊籠。虎坊菜市三易寓。去住蹤跡風轉蓬。我生倚著詎定在。雪泥指爪隨
虛空。重陽風雨倏又過。借車攜具何匆匆。書籤藥裹手搘擋。邨夫子態與我同。枳籬周遮當硯北。繩牀曲
絳安牆東。舍後老槐恰兩本。經秋樹影猶龍葱。芻尼定巢久不去。侵曉輕語枝頭工。主人兀坐風簾捲。苦
吟竊比寒號蟲。褚生季野吾執友。褚鶴侶舍人。與予同寓。論文說賦相磨礲。同心竝命蛩負鑿。容膝共此一畝宮。化
城暫生安穩想。底事落託悲途窮。直沽紫蟹味不惡。涑易清釀時復中。明朝好約高陽侶。醉鄉竟去從無

功。

兩頭纖纖詩

兩頭纖纖蠶繭絲半白半黑楸枰棋脣脣春冰澌磊磊落落亂石堆。
兩頭纖纖指南鍼半白半黑沙際禽脣脣落葉音磊磊落落松柏心。

山行

落葉風初定疏林艸未芟晴雲深洞壁返照亂山銜僧院青蓮漏人家白木鑊避喧宜小住便覺隔塵凡。
崎嶇卵石路延緣鴈齒平橋望渺然十里長隄虹影落一灣淺碧縠紋圓午窗翠袖調笙地夜柂青帘鬪酒天想像故園真在眼沿流只少櫓頭船。

香山月夜

來青軒外月迴出碧雲端穆穆金波滿遲遲玉漏殘疏鐘諸界靜落葉萬山寒憐爾南飛鴈棲枝尙未安。

靜宜園直廬卽事

別苑西郊外山腰蠟屐登重湖鏡面闊遠嶂黛眉層襍被周廬近判花細字能小春風候暖幽澗未凝冰晝轉松濤響宵分月氣涼格詩閒索句品字細焚香吏隱真難判林泉此不忘上方塔鈴語清韻落回廊。

贈金鐘越孝廉

澆愁十榦似淋灰。絕妙詞成大雅材。風雪長安吟思在。蹇驢重向灞橋來。

三隱高人剩舊蹤。家山作達是誰儂。酒徒尙有吳郎在。謂杉亭舍人共話桑根點黛濃。

菜把多承地主恩。圍爐輭脚共寒溫。清言擁鼻相酬和也。勝投書光範門。鍾越寓東墅太史邸

送江蔗畦明府之官湖湘

天末郵籤幾十程。銅章綠鬢吏人迎。山如宋迪圖中好。花到潘仁縣裏明。疏簾棋聲簾乍捲。匡牀琴響月初生。平沙遠浦無窮思。贏得詩篇風格清。

題諸艸廬贊善高松對論圖

古松在庭隅。孤幹恰疑聲立。凜然歲寒姿。霜皮圍四十。盤回鶴騰空。蜿蜒龍出蟄。入夜濤淙淙。巡檐風颯颯。其根漱寒泉。井渫可用汲。相傳尚書第。項襄毅故宅老屋松陰蒼。嘉蔭垂至今。計年百有卅。先生此卜居。七錄盈藤笈。懷鉛仰屋梁。謝客閉戶戾。窗前支離叟。相於若素習。空齋寂無人。蚪髻儼對揖。閒來折一枝。聊代麈尾執。妙義忘言筌。何用多冒冒。昔聞柴桑翁。盤桓落景入。真逸居華陽。樓閣三層蒼。杜陵四小株。圓陰如覆笠。東岡種百枚。雨過亦戢戢。懷抱今古同。清標誰能及。伊予蒲柳材。龍門仰空峩。松高比如何。可許阮生集。

題曹夫人玉映樓詩集字

荐賓黃星槎孝廉之配也

薇露傳來絕妙詞。松煤澹寫更多姿。風流詩格誰能似。陳窈辛蕭王邵之。

窗間芳艸長于帶。樓上青山曲似眉。集中句想見含豪風幔底。竹陰翠袖暮寒時。

題王琴德三泖漁莊圖

昔游三泖秋正暮。涼波十里浮吳艤。中流塔影插天半。突兀如建蓮花幢。蒼茫葭蘆望不極。半篙淨綠流淙淙。漁人此時齊結網。蜻蛉一葉張桺雙編簾。挾昌繁筭箸。扣舷樂甚歌無腔。斜風細雨波不起。時聽野寺疏鐘撞。前塵十載寄夢寐。此意耿耿誰能降。王郎湖海一奇士。潛夫作論驚愚蠢。清詞雅材追百五。勁筆直擬龍文扛。風塵侘傺不得意。便欲采藥尋老龐。故園況在長泖上。三閒老屋開虛窗。維摩十笏庵容鄰。恰喜面面當晴江。漁兄漁弟還往熟。籬根那復驚花尨。有時一棹乘興去。繫纜好在枯楊椿。背篷圓笠自攜。取得雋往往窺魚矼。金銀鱸鮰味不惡。痛飲且倒玻璃缸。但見青芙蓉九朵。遠近出沒連空徑。一聲款乃交唱和。有似竽瑟壎箏控。人生所貴在適志。年華晚同奔驍京國。留滯幾寒暑。登樓洵美非吾邦。披圖舊游宛在眼。浮家有約無虛嗟。拂衣我亦竟歸去。潞河南下掣輕舟。葑中洞上好相待。可許主客圖成雙。

題王受銘比部龍湫宴坐圖

我聞天笠諾矩羅尊者偶來震旦棲重巖其東南面臨大海芙蓉削出青巉巉龍湫挂空五百丈散作飛雨何霏霏蒲團入定此宴坐白豪五髻頭彎彎六根聞見都寂滅齒冷饒舌徒詰誦誰與讚誦禪月老至今靈蹟傳琅函王郎山水有奇癖平生嗜好殊酸鹹永嘉作客大快意躡屐未要人扶攬初尋靈巖入古寺方丈四面圍松杉探奇濟勝興不已健步上下同躉躉大龍湫忽落吾手懸流倒瀉衝空嵌有若白虹挂天半駿馬下坂脫轡銜投梭激箭轉車轂霏絲卷絮堆球城勻圓萬顆撒璣玕連縣一幅垂旒繆廣陵觀濤賦雷雨洞庭張樂鳴韶咸匡廬天都恨未見其餘下視皆卑凡津梁疲甚一憩足耳畔但覺音漸漸冷然清寒沁肺腑那惜霑濕青蕉衫竭來燕市幾寒暑前塵譬如驚飄閒提畫幘出示我息壤有約神明監幼輿祇合置邱壑客兒最愛窮磬磬忘歸亭子堪小住黃精細斷攜長鑑西來大意參慧業生天成佛母譏讐它年後游紀歲月題名重擬常苗剗小龍湫有常鼎苗振題名

送翟晴江同年還杭州

翟君逸才真希有往往新詩敵雙井閉門日夕耽苦吟百鍊還同金出礦鵬高秋獨控搏驛驅天際能馳騁竭來長安初會面數載神交喜合併曲江隴柳共探春夜雨檐花同說餅一朝過我便分手片葉歸飄零艸船誅茅好在屋三間負郭恰贏田十頃但尋沙戶相逢迎恥向朱門工造請家園風景況不俗處菰蕘雜蒲荇南屏踏花手榔栗西谿釣雪腰簪簷江湖小集自足傳那羨頭銜署臺省人生所貴在適

意避俗快如喉脫韁。君今還山追禽尚。我亦夙志慕張邴。何時過訪揚嘉橋。主客圖成清話永。

聖駕東巡恭謁祖陵禮成恭紀

在鎬王居壯于幽。祖澤貽迪光。縣舊德繼序頌。今茲汭泥周原膴。粉榆漢社基。遂修時邁典。重舉上陵儀。
六校鳴騶從千屯。控鶴隨柳邊。回玉輦。榆塞駐金文。納款通疏勒。傾心逮月氏。谷蠡泥首拜。頡利捧觴辭。
鑿齒雕題侶。前歌後舞時。短簫朱鸞曲。槃木白狼詩。赦漢峰回互。伊松水渺瀰。星隨行幄動。月傍列營移。
石鼓岐陽碣。河宗漆澤陲。天低圍大幕。野曠建長麾。怯辭呼鴈掣。云都試馬騎。艾蘭虞侯職。舍茲夏官司。
長白連雲峻。升中望祀宜。高山彼作矣。列聖乃康之。四七貞符叶。三千佐命姿。澗瀍宅新邑。皋應度宏規。
原廣松楸古。橋山霜露思。玉衣神宛在。紺帳儉如斯。祕殿藏宗祏。豐碑拓色絲。戊辰烝祭歲。丁巳戒賓期。
嚴具當軒設。鳴鐘進食遲。東廂奏安世。太祝告蕃禧。莅政黃金撼。班朝赤羽旗。九賓瞻北極。五位拱南離。
視膳君王孝。承歡聖母慈。推恩真不匱。錫類總無私。禮樂神人洽。隆平福祿綏。慶成宜獻頌。額手上彤墀。

送吳挹楓

落託將歸客。牢愁送別時。臨岐猶款款。揮手尙遲遲。著錄晁公武。評詩敖器之。西沽後夜月。應照兩相思。

題同年范衡洲比部詩卷

籍甚才名范德機。篋中秀句近來稀。月泉社裏如相識。奪取隃麋百笏歸。

家園好在賀家湖。萬壑千巖入畫圖。譜就竹枝翻古調。不教輕薄類吳歎。

翼匡師伏有功臣。經筭便便洵絕倫。剩有格詩如束箒。還將慧業傲文人。

竹蒙詩格最清奇。謂穀原比部比舍聯吟樂不支。歷下弇山詞客盡。風流重見白雲司。

題杜太守_甲相馬圖

世間何者真驥騶。九方一去誰能求。驪黃牝牡且莫辨。況從骨相論殊尤。杜公夙有王濟癖。早莢橋頭回玉勒。估畫常懸韓幹圖。呼詩直逼少陵格。東郊風日當清和平。岡沙淺艸滿坡。奚奴牽韁者幾輩。五花汗血高嵬峨。一馬昂首意雄傑。一馬回身工轉折。雙耳晨批隴阪雲。四蹠夜蹴幽并月。掀鬚撫掌氣雄哉。徑欲乘此游八垓。天生神物信有待。坐令沙苑成凡材。卽今燕南控大郡。紫綬朱轔肘銀印。牧民無改馭朽心。不假鞭笞祇靜鎮。甘棠蔽芾郁郁栽。行春五馬來山隈。兒童驂篠走相告。使君自有雙龍媒。

平定準噶爾告捷禮成恭紀一百韻

聖武恢三略。皇謨運六奇。成功惟獨斷。制勝在乘時。蒲海沙重沓。葱山路險巘。從來稱倔強。自古塵羈靡。耆定先猷遠。威稜祖烈垂。洗兵幹難水。飲馬朮居湄。繼序思皇考。宣靈憺赫曦。電矛明煜煜。鐵騎騁蹠蹠。解網邀寬典。包蒙廓聖規。煙銷光祿塞。戍撤拂雲祠。望氣旄頭暗。交爭蝸角岐。控弦多不靖。鳴鏑競相持。遂有瓜分勢。真成瓦解危。五原齊納款。百部各陳詞。贊謁呼韓服。朝正突利隨。龍顏瞻咫尺。鴈序列逶迤。

食甚鴟音革遷喬鸞羽差感恩咸蹈舞效力願驅馳枕席過師穩山川聚米知阽危情正迫待拯踵方跂天意誠多助宸衷決在茲非常承廟算定識破羣疑鵝鶴堂堂陣蛟蛇正正旗牙璋諮典瑞竹矢問工倕燕領元無匹龍驤本不羈材官揮黑稍都尉夾長鉢鄉導諸當戶前茅左谷蠡指撝驅阿跌籌策用烏黎獻歲旂蒙紀中星鶉火移初消鹽澤凍漸解雪山澌兩路分鑪進曾峰入阻采柳垂青冉冉艸長碧猗猗鼓角從天下旌旄布地塵儲胥雲晝護敕勒曲宵吹斥堠風無警飛芻士不疲懸梯緣崩勞拔轍出厔厔聞說王師至還如化雨霑市皆安甯幕農自樂耕耜羌女供華鬘偷童和竹枝官茶嘗蠟面洞酒醉醇醕風定時聞柝沙平可畫錐受降來款款慕德舞倣倣自是欽威信奚煩剖質劑投戈胥帖伏折筆足鞭笞巴罕峰回互伊犁水渺瀰長驅猶破竹飛渡自浮筭壯士爭探穴殘兵盡倒旅何曾遺矢鏃底事缺錄鑄空幕巢烏樂求林班馬悲兔投徒超趨鹿走漫伎伎五技真窮矣三軍果赫斯金牙擒賀魯赤谷縛昆彌豨突逃無地鯨奔氣已衰渠魁施械杻苞蘋逮妻兒去疾真能盡除殘靡有遺三年鬼方伐六月太原師在昔猶夸大于今況倍蓰氛靈激縱徼掃蕩滌纖疵一月聞三捷崇朝達九達摧枯堪比似壓卵信如之察察羣加額君王屢顧頤如神歸睿算用命在戎綏異數施何渥酬庸賞不訾大勳惟豫順至德更謙撝保泰恆兢業承乾益微咨明禋蒼昊懋祀展黃祇列聖神靈祐重光基緒丕孫謀念詒厥祖武庶繩其弓劍橋陵輩球刀手澤詒戊辰書祝冊丁巳卜神蓍琴撫空桑響卮當宥坐敲告成陳灼賚述德溯豐郊

重廣尊親義。還明教孝思。大安崇懿號。長樂晉純禧。鸞詔頒三殿。鴻恩溥八夤。康衢頻擊壤。編戶慶含飴。
振旅軍容壯。遄歸士氣怡。山莊親駐輦。曲宴各揚觴。饌出紅螺椀。湯擎白雪盃。芳醪浮鑿落。抹匕載留犁。
上將橐鞬服。名王熊豹姿。需雲占宴樂。兌澤布含孳。紫微通千障。黃圖拓四維。版章連漆齒。正朔被長鼓。
黃赤雙環極。璣衡六合儀。土圭測分寸。句股算豪釐。豎亥東西步。義和晷日推。廣輪窮道里。準望定高卑。
銅柱銘勳地。橋門飲至期。摩厓鑄篆籀。勒石負躋跼。倬彼瞻雲漢。昭茲拓色絲。湯盤孔鼎作。金檢玉符基。
天錫仁兼勇。神符軒與義。六韜歸掌握。萬里中機宜。方略璇圖炳。編摹柱史爲。高文垂誓誥。鉅筆染淋漓。
王會陳鵠露。昆命貢纈皮。上林栽苜蓿。大予舞侏𠙴。鴻業昌而熾。明堂坐以治。鐃歌擬朱鸞。願佑萬年卮。

潛研堂詩集卷四

丙子春帖子詞

綵樹千花放。憊莫五葉敷。吉雲鋪似錦。春蚤是皇都。天街綠意蚤。萋萋殿上銀幡入賀齊。幾日甘泉捷書報。春風先到玉關西。

題李西華給諫賞番圖六首

奇絕平生此度游。長風駕浪送扁舟。從來不信譚天衍。真到婆娑第一洲。
青螺澳外鳳山偏。頽賞諸番例久沿。麻達暹郎襍負出。一時羅拜繡衣前。
轅門初啓曙霞分。意氣軒軒屬使君。帳下健兒紛夾侍。試將蠻語問參軍。
禾閒高下足官租。纖就戈紋新樣殊。風俗依然是唐魏。不知身已度澎湖。
輶軒別國足清探。蠻俗方言略已諳。狀出南中閒艸木。咫聞端合傲嵇含。
天南盡識相如節。海外爭傳玉局詩。重遣吳裝圖粉本。烏嵌城下賞番時。

題吳冠山編修洗竹圖

無竹令人俗。此語古有之。但得青葱峭蒨落吾手。那用千戶封侯爲主人。雅負子猷癖。十笏小築谿南宅。

平泉花木百不愛。獨放叢筠數竿碧。上番移種春方酣。駢頭戢戢多于蠶。堅中筭中細分別。凱之舊譜粗能諳。亟攜鴉觜鉗。自闢百弓徑。蒙密一以除。娟娟新綠淨。疏篁瑟瑟靜可聽。輕風敲戛響不停。著書風幔日卓午。惟見萬个攢空青。燕郊庭際只消三兩竿。便覺衫袂生清寒。何如家園千畝疏影合。我欲從公親授洗竹法。

移寓珠曹街與禮堂夜話

殘氈斷帙舊柴車。畫裏邨夫子不如。僂指桑根幾度宿。五年光景七移居。

予以壬申六月至都寓繩匠衙
十二月寓艸廠衙僧舍癸酉

西二月寓潘家河沿九月寓椿樹街乙亥二月寓憫忠寺街六月寓橫街至是凡七移寓矣。

積潦晴餘聚白沙。新蒲雨後迸青芽。荆高酒伴如相訪。白紙坊南第一家。
刻燭論心水乳投。廿年親串意綢繆。前身兄弟機雲似。仍占東西屋兩頭。
圍爐燈火夜團團。丈室居然夏屋寬。爨婢奚奴無彼此。兩家原當一家看。
團焦小小類吳艸。茶竈藤牀蠟屐雙。先算安排筆硯地。棗花陰裏讀書牕。

題裘漫士少宰苑東寓直圖

去天尺五苑東偏。休沐歸來步屢便。員嶠蓬壺在人世。風光真不數平泉。
風前跪地萬垂楊。曲泉橋通宛轉牆。不信軟紅香土裏。神僊仍占最清涼。

樓外偏宜煙雨冥。西山窈窕入簾青。分明著色礬頭景。一幅天然好畫屏。

趙臺西畔有新廬。履道坊南宅不如。

公賜第在長安右門西應爲城居少花竹。天教銷夏此閒居。

溫宜春更澹宜秋。避暑方知此地幽。載得碧笛三伏酒。菱荷香裏蕩扁舟。
棐几牙籤次第排。清風朗月見公懷。若爲評隴林居勝。應較秋屏閣更佳。

溫室從容造鄰陳。長源僊骨是前身。金蓮燭外雙騶引。傲煞東都獨樂人。

恭和御製懷柔縣元韻

郊圻駐翠輿。羽衛肅周廬。初旭林梢出。朝霞天半舒。紅螺峰繞髻。白水溜通渠。望幸諸童叟。康衢定跂予。

恭和御製遙亭行宮對雨元韻

浙瀝遙亭雨。空濛行殿秋。層峰疑半隱。薄霧未全收。細溜松間響。飛泉樹杪流。清塵應有意。先爲灑山郵。
疏疏還密密。靜聽不知煩。最喜連畦潤。兼聞時鳥言。天當雨後爽。節爲閏前暄。明發龍旂動。先驅度塞門。
四山飛瀑布。一帶辨炊煙。對景真悠爾。披襟益曠然。宸章裁綠字。御墨灑瑤箋。預卜明朝霽。羲和曉振鞭。

恭和御製出古北口詠古元韻

雄哉留幹嶺。設險有重關。地控神京臂。天連古塞山。百尋攀磴上。一綫劃崖閒。鉤抱長城峻。縈回九折難。
唐家乘障戍。漢使戴星還。誰似皇圖遠。清風鼓角閑。

恭和御製至避暑山莊卽事元韻

到處林亭宜入畫。望來巖壑宛疑僊。激泓水似空明鏡。峭蒨山當翰墨筵。滿眼禽魚皆至樂。會心艸木有真緣。昇平中外承嘉謐。好待深秋羽葆旋。

恭和御製熱河啓蹕之作元韻

秋郊新霽啓行時。發軫僊莊歷廣達。山路平開紅樹裏。人家半在白雲涯。輕風迤邐隨龍旆。曉日依微擁翠蕤。扶杖邇農頻額手。停輿問俗每遲遲。

恭和御製山店元韻

連邨結構總天成。半是山樵半是耕。疏柳千條遮酒幟。澹煙一抹露柴荆。馬頭遠近青螺繞。木末參差候鴈征。有象太平宜入畫。豫游處處愜皇情。

恭和御製都爾伯忒台吉伯什阿噶什來觀封爲親王詩以紀事元韻

納款弟從兄。承恩襲組纓。渾邪泥首服。疏勒革心誠。湛露三巡治。分茅五等榮。聖朝懷遠略。陋彼渭橋盟。

恭和御製入崖口元韻

不用河江遠結臥。塞山歲歲奉鑾輿。四圍列陣雲成幕。一綫嵌空石作閭。小隊呼鷹躡脫蚤。平岡試馬艸肥初。渠搜諸部頻來覲。翹首瞻雲恐後予。

恭和御製雨獵元韻

木蘭校獵何雄哉。羽林萬騎如雲來。批熊拉虎尋常耳。況乃鹿友與雉媒。六飛乘秋一莅止。長楊上林何足擬。乍覺雲頭冉冉迎。有時雨脚垂垂起。艸柔沙軟彌可喜。發蹤只如臂使指。周官大獵典所詳。王道由來無懈弛。卽看一矢射天狼。魚海洗兵兆應此。

恭和御製霜元韻

山迴寒偏蚤。清霜乍降時。白沙渾不辨。紅葉最先知。暗拂昏鴉翅。平添疏柳絲。含豪傳睿藻。遙向五雲披。

恭和御製行園卽事元韻

森嚴羽仗自天來。雨霽重嵐掃碧埃。控鶴三千神策士。飛龍十二上襄材。令懸旌旆和門合。陣布風雲大幕開。共識聖人親講武。不煩司馬戒銜枚。

野闊天高九月秋。伊松河上塞風遒。玉鞭乍指祥煙拂。紫幄初開瑞靄浮。雲入望中皆澹蕩。山當佳處暫停留。廣成欲進詞臣頌。詰屈空慚短韻搜。

彌山絡野勢分張。變化神機自廟堂。蕃部傾心瞻法仗。降王泥首懾天綱。握奇齊列龍蛇陣。懷德遙迎日月常。頻見玉關西奏捷。攬槍掃盡國威揚。

恭和御製蕃劍行元韻

清波淬鍔激寒塘。流星迸采飛電芒。細觀不類昆吾鑄。渠搜作貢輸尙方。天山之西雪嶺外。重巖百折如羊腸。四衛拉特舊屯據。夜郎自大矜豪強。控弦十萬隨指嗾。谷蠡左右紛成行。就中有人最躊躇。雄視吐渾兼燒當橫磨。霜劍新出水。按鐸四顧非尋常。傳聞風雨匣中吼。悅惚變怪難具詳。分爭廿載彈指過。電光石火寧久長。此劍豈有神護守。不隨兵燹俱銷亡。一朝持獻詣闕下。從官傳視趨紫闈。由來神物歸有德。什襲合備天家藏。什襲合備天家藏。熊熊魂魄光氣騰未央。

恭和御製晚荷元韻

亭亭標格壓羣芳。秋晚猶開十里香。依約風前明月佩。參差鏡裏絳綃裝。僊肌自識能離垢。素節何妨獨傲霜。畫手崔吳應未識。溶溶祇傍玉波長。

恭和御製宴土爾扈特使臣元韻

重嚴詰曲路樞。父行盡昆侖。萬里賒。受吏願同烏弋國。承恩許賜綠雲茶。占風所至寧殊俗。懸度能通總一家。自是至誠無不屆。非關拓塞偏幽遐。

恭和御製雪元韻

乍深乍淺雲圍幕。宜整宜斜雪散絲。始識僊居在人世。瑤田瓊樹只如斯。不愁落葉連山積。還有繁花著色開。雪後塞垣無限景。天工留待聖人來。

萬樹綴來珠的爍千峰疊就玉嬋娟此中疑到光明國慧業重參清淨緣

恭和御製允南省諸臣之請于明春恭奉皇太后再舉時巡詩以紀事元韻

年年宵旰軫斯民載舉虞家典四巡長奉慈顏娛太姒克繩祖武繼高辛天低牛斗星遙接地入徐揚境
是鄰獻賦昔時真忝竊重逢盛典感恩頻

恭和御製固爾扎廟火用唐韓愈陸渾山火和皇甫湜韻并效其體之作

玉關以外逾羌渾伊犁之水無盡源洪波奔淪自吐吞上有祇林高以軒齋魚粥鼓香薪燔刹竿百尺凌
遙原部婁輒敢矜厚坤問誰剏建來西垠瓦刺遺孽盜塞垣彎弧鳴鏑窺花門張眼不識扶桑暾爰爰者
兔啾啾猿嘯聚蜂蠶驅魚鼈腐鼠漫欲同游鵠耽耽虎視兼狼奔一傳而後彌自尊鳩材发構祇陀園苾
蕘優婆類實鱉偏袒膜拜唄誦喧法螺鈴鐸閒荒墳蠢爾詎解參風旛失笑何異蟲處禪梵相殊詭露肘
臂鳩茶藥叉旁挾轅天魔鬼母弓垂鞬人非人等攀朱幡廟門空爾颶風帶神不顧饗其脈膳前年王師
戊己屯日昭昭兮照戴盆蕃落鞠陋陳酒爵彼狡豎罪何可言煽誘黃帽心覆翻干上帝怒難平反祝融
承命賴兩暖除惡務絕其本根一花五葉紛兒孫若冠有縷履有跟合掌不知報佛恩迅掃惡業還真元
轟砲砰磕不可援懲汝助逆并案論雷車虹勒燭九闕青紅像設無留痕天意褫爾貳負魂膽裂魄慄心
煩冤犇竄大宛難久存宵無廬帳朝無殮烏合數輩豈世婚王師再舉出堅昆布陣雲立還山蹲怪鴟那

許飛騰騫渠魁斯得士。雪怨誓批犧。猶屠鯨鯢。大書深刻銘。岷崙日月所燭警昧昏。除殘不愁玉石焚。天人感召非虛煩。迷替罔覺心爾捄。

帳房四首

斜支布幕當團焦。小幟風前各認標。桺杖丁丁張鴈翅。奚囊一一卸牛腰。破寒乍爇圍爐火。趺坐真成放帝寮。彷彿春江煙水闊。圈篷船泊短長宵。

直將大地作蘧廬。野曠沙平展幔初。半面放開延月入。四圍密釘避風疏。道旁築舍成偏易。岸上牽船景略如。家具比車還覺少。莫嫌一日一移居。

卷舒隨分占山坳。行處還從馬後捎。豁爾便疑林屋洞。偶然只類惠施匏。三竿日出俄成集。五鼓鐘敲各打包。身作社前飛燕子。偶然得木便營巢。

與我周旋有幾春。團鑾燈火夜分親。都嘗風雨冰霜味。長伴東西南北人。上銳下豐伸脚穩。前軒後輕打頭頻。往來細把光陰數。鴻爪泥中幻亦真。

御試賦得夏雲多奇峯

藹藹層雲合。蒼蒼遠嶂重。垂天纔一縷。拔地忽千峰。乍作凌虛勢。仍含出岫容。卷舒排玉笏。突兀簇芙蓉。卓立全開面。光明欲盪智。懸崖疑似鷺。觸石宛如龍。萬壑空中落。三山海上逢。御園晴眺處。歷歷翠微濃。

送蔡葛山少司寇請養歸里

廿年稽古被殊榮。清望西曹冠列卿。
海內文章韓吏部。昌黎由刑部郎遷吏部故云閩中人物蔡端明。由來勇退根懷骨。況是陳情出至誠。

故云歸到北堂萱葉蚤。小春已見惠風生。

起居八座古來稀。樂地偏于名教宜。
綵服回風依鄰下。板輿置酒趁花時。一行帶艸康成里。六首陔蘭東

哲詞祖帳都門傳勝事。如公真不愧經師。

蔡少司寇觀海圖

騶衍譚九州。奇詭不可稽。海外環以大瀛海。阿誰津逮窮端倪。先衛卜居近海上。三神咫尺堪攀躋。讀書要窮萬里目。官令局促同測蠡。太武峰高接縹緲。五更直上青雲梯。天風浩浩海水立。光明世界堆玻璃。怒濤砰磕自奔湧。有似萬馬爭鳴嘶。海若遊戲劇狡獪。撞鐘伐鼓振鐸鼙。須臾一輪出鏡面。博桑隱隱枝柯低。茲游奇絕足千古。下視河伯猶醯雞。十年移家住人海。蓬萊侍直趨金闈。文成懸河瀉萬丈。導源星宿注百谿。夢游時落滄溟外。忘機欲狎鷗與鷺。竭來一櫂賦歸去。釣游舊跡今不迷。九十九山青滿眼。櫻鞋筇杖相扶攜。壯觀重作第二卷。裝池珍重開黃緹。

自珠巢街移居宣武門外題壁

真似山僧慣打包。桑根三宿等閒拋。勞如車軸無停轉。拙比林鳩未定巢。市近米鹽喧耳畔。客疏塵土積

堂坳年來學得安心訣容鄰三閒卽樂郊。

金鐘越秋江擁櫂圖

兩三株樹風瑟瑟四五尺水秋淙淙天邊賓鴈落幾點沙尾母鴨飛一雙煙波叟蓑笠小影猗玕子款乃舊腔菊花黃酒獨自酌醉著高枕烏篷窗。

送座主海寧相公予告歸里卽次留別元韻

清望朝端孰比肩溫公事業潞公年丹霄地峻擎中極黃閣班高領列僊北闕上章陳雅尚東門祖帳賜華筵春飄安穩三千里看徧江鄉蔗芋田。

近光常被日華臨黃髮番番在禁林應變守文真相略立誠主敬大儒心明農歸去留姬烏洞酌歌來矢召音手補衰衣無闕事太平元老合抽簪。

三朝珥筆侍彤廷舊種槐陰已滿廳絳帳論文清似水朱幡開府福爲星卷舒自在春雲藹衾影無慚夜火熒儒術致君從古少韋平家世有遺經。

午橋水作珮環鳴丞相安車取次行到處吟風還弄月陪游張丈更殷兄黃花晚節秋逾潔海鶴精神老益清料得平泉閒撲杖肩忘曳履殿頭聲。

泰華高峯大海瀾樂全邯要九還丹千秋道脈承非易一點靈臺畫亦難謝闕更聞頻晉秩子太傅賜閒

未許竟休官。必開缺臨行。鄭重頒天藻。袖有驪珠拜手看。

栽成桃李已經年。得御龍門喜欲顛。雪夜每參洛下座。菱谿常預醉翁筵。清銜漫竊同冰冷。學道無能媿火傳。遙望台星滄海上。從游何日重殷然。

海寧陳文勤公輓詩

赤烏三朝望蒼松。百鍊姿獨能扶直道。真不愧台司。寂寞還鄉夢。淒涼墮淚碑。它時言行錄。應與富文垂。
題盧紹弓編修檢書圖

書齋十笏清且佳。丙丁甲乙牙籤排。主人謝客門不闔。尙友直與先民偕。丹黃鉛槧不去手。盡掃風葉無纖霾。自從二篆變隸楷。豕虎轉寫多參差。有宋以來雕板盛。南閩西蜀逾江淮。咄哉俗生不自量。叫噪招井官私蛙。金根銀鐙私竄易。坐使眞本嗟沈埋。以茲繆舛貽末學。猶以烏喙投積瘀。日思誤書乃一適。子才所見何其乖。先生博雅由天授。上窺姚姒追皇媯。百家七錄咸瀏覽。夜分雒誦然麻稽。平生汲古得真諦。屏除俗說刊淫哇。觀書如月靡不燭。砉然洞中竅會皆刊誤。眞笑李涪陋。正俗切與顏籀儕。一瓻借鈔倘見許。僦屋恰近春明街。

送毛伊人檢討還萊州

同年五載又同官。意緒纏綿有萬端。忽聽驪駒初戒道。教人真數別離難。

著書善病亦吾徒。膠漆酸鹹略不殊。寂寞西窗舊時燭。更誰主客譜新圖。
金薤遺文世少知。從君一一剖然疑。不知天柱山南望。可有熒陽第二碑。
石刻何人辨糾紛。唐公德政拓遺文。如何靜治堂中錄。只說萊州子府君。
孤瘦真如病鶴身。掉頭歸去理漁綸。頭銜仍領承明署。未是行吟澤畔人。

石鼓

岐陽石鼓其數十。至今遺碣留橋門。甲乙迄癸分左右。古色斑駁侔敦龕。團團柱礎忽中斷。纍纍覆釜當階蹲。磊塊面凹似杵裂。彭亨腹果欲手捫。鐫鏤歌詩垂不朽。三百字比千璵璠。奎斗墮地芒爛爛。蛟螭擎雲形蜿蜒。文斜時作倒薤勢。苔缺半露屋漏痕。田車旣安宮車寫。右驂驂左旆旆。小大具來樂天子。吉日丙申蒐于原。麛鹿雉兔暨羆蜀。其來趨趨咸歐奔。禮成歸格禘嘗享。獻用太祝陳脈脈。摛詞似出吉甫手。車攻常武齊肘跟。況兼史籀筆蹤古。天矯鸞鶴雲中騫。蟲書禾穗法始變。下視斯邈皆兒孫。斤權毬畧畧強分別。一笑辨口徒瀾翻。岣嶁禹篆跡茫昧。好事摹拓猶紛緜。銅盤殷銘壇山字。亞駝詛楚多謾言。三代遺文漸澌滅。歟忽過眼雲煙屯。歸然此鼓獨無恙。四千年物能久存。自雍移汴入燕市。歷恆沙劫如晡昏。金石集錄此最壽。獨立誰與爲弟昆。成均位置特帖妥。深檐大廈繚以垣。鐘鏞杓籩共陳列。永鎮竹素千秋園。平生愛誦韓蘇句。橫空奇語恣騰掀。作歌媿乏懸河舌。布鼓敢向雷門論。

送禮堂學士典試福建

玉尺真煩大匠持。八閩迢遞使車馳。
目空已盡驪黃種。手植都成桃李枝。
朝望歐陽真學士。文壇孟縣是宗師。
僊霞嶺上新秋路。天遣留題絕妙詞。

奉命典試山左出都述懷

容臺宣詔出明光。相馬真慚比九方。
濟上定多名下士。岱宗況是聖人鄉。
沙平冀北停行騎。月落盧溝趁急裝。
卻憶十年前此日。蹇驢席帽大功坊。

自良鄉南行遙望大房諸山口占

無心舒卷暮雲還。百里諸峰鬪髻鬟。
貪看大房濃翠色。涿州南去更無山。

涿州二首

舊宅樓桑在。祠宮闕古苔。
千秋比豐沛。遺恨不重來。

潞涿君誰是。狂生語太譏。
西州求士日。何意忌芳蘭。

卽目

蒼茫平皋路。停鞭四望餘。
乾沙疑積雪。古道半成渠。
秋思聞蟬後。人家剝棗初。
冷然風乍過。殘暑已全除。
白溝河

我行白溝河。鱗鱗綺塍接。遙見稷與黍。有穗無一葉。停輿問田叟。蹙額久乃答。飛蟲昨者來。紛若蝟毛集。葉傷心已枯。安能結寸粒。之蟲夫何知。蠕蠕仍戢戢。風露恣汝餐。謀食胡太急。中飽曾幾時。撲滅行自及。物性固如斯。令我增喟悒。

過河閒城外居民有種棉花者

吾鄉木棉大于蠶。每到秋收鬧比鄰。今日河閒城外路。眼明如見故鄉人。

贈梁秀才用梅

秋碧風流擅一時。謝家玉樹有孫枝。門才共數烏衣巷。蘄苑新傳白雪詞。清似冰壺真見底。澹如春竹自多姿。探奇況具歐陽癖。響揚摩挲辨色絲。

梁秀才以秋碧堂帖見貽賦荅

泰山流落一豪芒。過眼雲煙詎易忘。自到平泉留祕本。人間不數戲鴻堂。

東方朔

奏牘三千墨未乾。歲星幾載住長安。一囊奉粟饑須忍。怕作將軍食馬肝。

匡衡

說詩妙處解人頤。牢石同朝默不知。但服儒衣稱醞藉。李微陳惠亦饒爲。

答醫者

人薦生遼左。補中功殊特。一莖重五銖。白金一鑑直。良醫憫我衰。苦勸厲聲色。家雖無甌石。孰與身命亟。假貸猶足支。何苦自遴嗇。服之勿遲遲。後悔無終極。再拜謝醫言。生死匪藥力。上藥果活人。誰游不死國。維揚富家翁。儲糗當蓐食。用之或失宜。大限在頃刻。昨聞田家嫗。百歲髮尙黑。有病不求醫。三極眼未識。多病

多病方求道。端居且避囂。無心調息訣。不寤讀書宵。舌以柔難敝。松因勁後凋。南華養生主。第一是逍遙。

題張憶娘簪華圖


圖藏繡谷蔣氏

褰屐風流宛舊時。綵雲化去杳難追。何人解喚真真畫。有客爭題好好詩。

一枝春到鬢雲邊。盡道呈花臉更妍。不遇才人洪玉父。千秋那得小名傳。

珠喉一串案紅牙。好事爭迎油壁車。怪煞休文歌六憶。不曾相憶到簪花。

春風繡谷列金釵。細步纖纖引上階。六十年來傳本事。青衫紅袖說蘇齋。我有青衫無限淚。與君紅袖一般多。蔣樹存題句也。



潛研堂詩集卷五

回部蕩平大功告成恭紀一百韻

西極功成聖武揚。紫宸稱賀集冠裳。黃圖遠闢堅昆塞。朱鷺重歌魚雅章。日運萬幾逾業業。星馳八陣總堂堂。神謨有濯高三捷。盛事無前邁一匡。纘序兩朝欽至孝。宣威往歲定遐荒。天山雪霽銷烽堠。碑嶺霜寒試劍鋒。執馘虎臣齊矯矯。射生騎士竝洸洸。屯田已過伊犁水。乘障無煩都護防。渭上呼韓初築邸。殿頭頡利許擎觴。靈臺測景分昏旦。重譯占風共享王。勃律陪臣瞻日角。洛那侍子覲天闕。傾心內向同葵藿。汗血牽來盡驥驥。大閥和門旗正正。山莊曲宴露瀼瀼。三階常朗星從斗。八表攸同網在綱。翩彼飛鶻猶食甚。蠢茲黠鼠漫跳梁。花門雜種原無定。大食分支杳莫詳。俗尙高車傳自魏。派承回鶻衍由唐。兩酋項領依蛩跼。窮塞么麼轉蛣蛣。俛首頻年隨籠絡。推忱一旦脫銀鐺。何期狼子心終野。俄見螳螂臂已攘。伏莽頓施蜂蠭毒。控弦欲任鷙鳩搶。六軍聲罪詞嚴正。七萃遄行氣激昂。分遣材官傳羽箭。還咨典瑞下牙璋。上襄齊騁金羈勒。小隊爭裁鐵襫襪。初抵庫車申討伐。羣看禁旅競騰驤。摧枯屢振稜威壯。漏網翻令小醜颺。改命師中謀。上將爰攜麾。下度連岡鷹揚衛。士材無敵燕領元戎勇。莫當傳檄諸蕃胥懼伏。應關百部效趨蹻。阿蘇郭外浮醞酪。烏什城邊獻柘漿。鄉導前驅探虎穴。諸軍深入歷羊腸。奔躋踔伏應無

地瘦犬猙獰尙逞狂。四面崇墉遙屹屹。一麾徑渡正茫茫。流星隊隊鳴鼈急掣電。聲激石強奪槊甫徵人伉健。揮鞭偶值馬元黃。列營仍占層峯險。築堡旋當黑水傍。撼似岳家軍不動。守如墨翟應無方。連宵格鬪空卷勁。排日鏖兵擊鼓鐘。不數耿恭求井拜。還勝道濟唱籌量。軍書絕域傳郵到。廟略先幾握算良。五校赴桓已蚤發。八旅健銳各分行。蘆笳響遠吹邊月。鐵甲光寒踏曉霜。兩月兼程經瀚海。先春轉戰度河湟。前茅票旅紛超距。後隊驕蹠亡脫轄。入夜研營風獵獵。平明合隊氣僂僂。徒踰突鬚徵吾壯。隴種籠東晒彼恒。共計大効侔破竹。始知秘策比探囊。休兵暫命三軍駐。制勝誰能一旅亢。投石驍騰交習鬪。飛芻絡繹每因糧。裹餌餉處頻盈橐。抱布歸時恰滿箱。略地和闐揮短矟。屯兵玉隴奮長槍。遙知山壓無完卵。蚤見瓜分剩破甕。引脰鏡中方悚惕。游魂釜底益倉惶。驚弓漫訝飛鳶墮。鋌險俄傳駭鹿忙。遠挈妻孥行彳亍。盡攜幅重走蹤。名城次第來降表。伯克趨迎夾道旁。日月無私歸所照。雲霓有象久相望。洒漿戶戶盛樽缶。糗果家家載筥筐。樂德共聞歌宛轉。承恩翻使涕淋浪。逖疏何幸霑皇化。撫字重煩奠此疆。令甲新頒人皞皞。先庚申命澤滂滂。丁中黃小皆登籍。黍稷梁稌競築場。吉貝花纏勝南粵。蒲萄子熟似西涼。青蚨改鑄司農式。赤鋌仍輸少府倉。遂使窮荒分尉侯。長令編戶樂耕桑。犂庭已見龍沙靖。蹠影難容獸迹远。捷比票姚征遼漢。健踰充國定開羌。衝堅竝放千鈞弩。剷逆爭持百鍊鋼。突騎登山凌巔峩。神檜臨淖震雷礮。千夫賈勇蟄弧舉。萬衆呼降龍纛張。冕免投林空趯趯。飛蛾赴火漫悵悵。遐方延踵咸歸

化蕃部同仇共悔亡。捧檄纔教擒猰㺄。援戈親爲殮封狼。三驅月使前禽失。壹發頻看大兕戕。疏屬尸方械貳負專車骨已折。汪芒捲喉真快人心憤。懸首還將國法彰。進表稱臣趨魏闕。訊囚獻馘到虞庠。從茲遺種殲芽蘖。永見新畲絕莠稂。露布明駝馳遠徼。星躔侯琯應初陽。握樞乙夜垂衣肅。送喜千官佩玉鏘。師克在和嘉衆帥。功成惟斷仰吾皇。天休滋至時。難失祖烈不承動。必臧直拓提周。二萬獨恢大略軼尋常。圓壇昭告瞻顚若。清廣升禋倍肅將。諱日陵園陳鬯卣。分曹嶽鎮禮琮璜。百神咸秩隆儀舉。三殿親臨鉅典煌。聖澤普霑高以厚。慈寧齊祝壽而康。南薰解悵仁風扇。北陸迎長淑氣翔。異數酬庸增爵秩。近郊宣勞奏笙簧。析圭已荷盼茅土。賜馬羣看簇繡瓌。蒲海沙平明似雪。于闐玉美白于肪。洗兵欲輓銀河水。度索應通濛汜鄉。鉅製伊西鑄壁嶂。鴻文太學炳琳琅。捧來薤葉芝花潤。拓取銀鈎鐵畫裝。允矣豐功垂宇宙。咄哉浮議沸蜩螗。一篇特啓羣言惑。五載眞勞睿畫長。燕翼有謀貽列聖。至誠所感協穹蒼。乘乾惕惕惟無逸。保泰孜孜自不遑。豫順行師功莫尙。謙尊下濟德彌光。宣饒願譜昇平曲。拜手陳詞獻未央。

己卯除夕

謬占金閨籍。于今歲八除。思親頻佇望。報國愧迂疏。病久無良藥。家貧少異書。光陰敲石過。太息負三餘。

初春懷鄉雜詠

郭澤塘南顧浦西。水東日記范石湖爲李結記濬塘浦云浦有五曰新洋江曰小虞曰下張曰顧浦塘有三曰郭澤曰七丫曰至和吾宗四世卜幽棲肥田屋後

秧針細漲水門前蟹簖齊市小數家成一閩酒醕有戶借偏提官租輸了無它事饋歲紛紛管榼攜士風瑣碎記邨氓故老相承例莫更振子驅邪蒙紙面銅童祀竈爇燈檠支門炭取長身立印砌灰偏巧樣呈拜節家家總相識不須半刺更通名

人家大半住茅茨木几藤牀位置宜黃皺香椽裝定武紅凝天燭插軍持春風游屐徐公浦夜月神絃英布祠吾鄉以英布爲土地神傀儡登場纔過了盲兒遮莫又彈詩

人日元宵興不孤小時了了記歡娛燒燈巧解藏頭謎對局偷拈謁選圖潘叟踢歌宵按板陳娘貰酒午當爐橋東巷北嬉游地二十年來夢故吾

題倪敬堂同年西谿探梅圖

桃李漫山未足珍橫枝數點逗先春天然清瘦非凡格比似先生骨性真橫空嫩蕊簇疏枝彷彿西谿入夢思共羨蘂花滿頭插幾人賞到未開時樸學君家世澤沿黃門介操憶當年七清妙墨依稀在要與茲圖一例傳

恭和御製三月朔日御殿定邊將軍兆惠副將軍富德等率成功諸將士朝謁詩以紀之元韻
金殿晨開鶴鷺排六師大獻愷歌皆分茅列爵周三等舞羽敷文舜兩階蕩蕩天門初日啓依依楊柳入
春佳行閒將士羣羅拜其喻投醪聖主懷

恭和御製上巳日凱宴成功諸將士元韻八首

青郊宣勞禮言旋。王會新開西海壠。五載豐功天祐聖。萬全成算聖因天。洗兵魚海龍沙外。張樂流觴曲水前。嘉讌昇平當此日。春臺何地不熙然。

澹蕩韶光春事深。連茵曲宴集華林。食苹鳴鹿來郊檄。在藻游魚戲水潯。九奏鈞天人旣醉。八風妙舞樂難禁。手檠瑤琴斟初徧。要識分甘聖主心。

玉關新柳正垂垂。壯士長驅入塞時。犒賞百千沾闔澤。登咸三五慶昌期。鏘歌試譜伊涼曲。鼓吹新翻汋賛詩。繩武由來追祖德。百年豐芑念留貽。

屈指師行暨凱旋。輸將幾歲荷除蠲。握奇乙夜羲軒略。推轂三軍衛霍權。往矣冰霜酣戰地。來思花柳暮春天。回中伯克全歸附。葱嶺西偏執訊連。

瓊筵曉啓趁芳辰。飲至論功異命中。五等析圭先燕領。千官獻壽近龍鱗。卻從畔甲橐弓日爲念。披堅執銳身。感激一時齊額手。臨觴猶轉結纓人。

生長行間荷聖憐。從征親到雪山邊。真逢采玉于闐國。快覩竿頭涿鹿年。拔幟名城誇捷捷。執殳絕徼盡精堅。卽今杕杜歌成日。譜入南薰叶舜絃。

纏頭別部向風歸。羅拜華裯初日暉。盡識軒轅通道遠。方知光武閉關非。金人捧劍剛修楔。玉塞韜弓遠

集璣大食刀環爭入貢天戈從此已停揮。

三日風光朗更清禮成上壽聽呼聲助名真見圖麟閣賞勞頻煩酌兕觥錫宴周京多受祉詰兵禹迹克
方行欲知討叛綏邊略保泰淵衷在不盈。

恭和御製塞宴四首

名馬數百皆龍媒牡者四驪牝者駿誰其騎者惟嬰孩控之曾不施銜枚神鎗一聲殷若雷翻身上馬寧徘徊風雨驟至急箭催砰磕振蕩何喧逐直下峻阪凌曲隈四驪飄鬢無纖埃二十里外往復回如響斯應彈指纔就中卅六尤傑魁觀者咋舌驚且咍詐馬舊俗有是哉至尊顧之歡顏開宣敕頒賞陳觥罍名藩小大紛具來拜手敬進萬壽杯右詐馬

天淨秋高張大幕頭鵝宴中什榜作蘆笳羌笛應節鳴亦有箏琶雜弦索將進酒遠如期當筵自奏樂府詩陛下之壽千萬歲東臣元菟西月氏前有緩聲後有促拍渢渢入耳太古音不減撻金與拊石敕勒企喻古所傳白狼慕德共勉旃况今龜茲諸部盡內屬西涼散樂更進破陣篇右什榜

高秋曲宴紅氍鋪布庫之戲古所無壯士脫帽膽氣麤先聲直欲吞於菟空夸搏躋兩兩俱騰踔撇捩百變殊角力以智分錙銖失勢一蹶愧弗如何人得雋酌以觚整暇自謂可賈餘彼哉厄魯亦善鬪坦腹跣足不巾袖老拳怒臂發以驟使氣氣出若饋餉強者植立弱者仆伏而鹽腦亟相就屈肩著地昂其脰有

覲面目悔大繆勝負既決斯放手曰四衛拉俗之舊吾皇顧之樂且康何以予之蒸黃羊天厨禁臠大嚼忙以手爲箸腹爲囊鞠脰再拜頓地搶食指不動已十霜一飽何幸在帝旁天章頒示紀事詳昇平同樂誌不忘右相撲

平原如掌水艸肥驅來駿馬各不羈減陽茀方類自別升轍上阪隨所爲誰與少年雄且傑短後之衣長竿掣翻身走馬疾于飛欲使生駒就銜紲雕鞍繡勒色樣殊控繫未及跳擲俱有如負奇蹟跑士倔強不受人閒拘飛揚跋扈賦且急有時豨突作人立乘閒直上跨其頸持之以暇久方習八尺曰賦七尺驥追風躡景游八垓乃知駕馭得其道上襄詎乏飛黃材維昔周官訓馬政佚特攻駒順月令卽今塞北多名藩善馬調來千里騁至尊九月行獮田割鮮行賞排長筵瘦人閒試教駢法小雅秉陳攷牧篇况聞天馬徠西極大食康居歸有德不是君王神武姿絕域安能服羈勒右教駢

恭和御製行園元韻

平林呦鹿自甡甡六轡安行不動塵疊嶂環來成帘幕周陘結處儼城闉材官共試批熊技蕃部新攜回鶴人咫尺天威齊額手塞垣肆觀拜恩頻

舍茭張羅各有司名王扈從遠如期天開靈囿規模壯山入深秋眺覽宜壹發其欣威遠振三驅仍示惠兼施承平詰武還綏遠豐芑貽謀監在茲

恭和御製哈薩克使至俾觀園元韻

葱嶺西偏逐艸居。獻琛久已隸方輿。六師韁鞚歌瞻彼。萬里郵籤蚤跋子。特敕陪臣從捺鉢。重教獵士布周陸。漢家漫詔長楊賦。蕃使來觀詎有諸。

九日同習庵舍人叔華上舍晦之弟游城南登陶然亭

不到城南五載餘。軸簾真似蜀嚴居。登高偶趁重陽節。結侶同乘下澤車。淺水牛涔經雨後。遠峰螺黛勝春初。聽來吳語真多味。曾是當年共隊魚。

十笏閒亭曲徑旋。到來便覺避喧闐。三秋鄉夢囊萸後。一段詩情落木前。廢廠尙傳宣德樣。古幢細認壽昌年。卻輸扈從灤陽客。直上興安絕塞巔。謂禮堂光祿

送孫勸堂之官皖江

曲江簪取一花新。便綰銅符出牧民。名士何妨工製錦。甘霖况是果隨輪。底須譜自山陰授。會見名逾漢吏循說與孫廉兩字訣。它年惠化定如神。

荅施鐵如上舍見贈之作用山谷東坡贈荅詩韻

寸田不自耕。坐成荆棘場。活水來有源。斯涵千頃光。衆卉亦薈蔚。所愛蘭蕙香。幽谷本無言。登之宜嚴廊。彼美淮東彥。抗志義黃詞。壇趙幟拔道味伊俎。嘗置身百尺樓。白雲翼其旁。自立良獨貴。勿爲遺俗傷。

下里久聒耳。泠泠聞古聲。郢中引商羽。碩人歌棟荅。三歎竟此曲。愧非鍾期生。金斷本同心。萍合乃異蒂。相賞自有真詎以形迹計。昌黎有遺言。雲龍願相似。

冬至齋宿題壁

襆被奚囊載滿車。迎門呵殿吏人譁。冷官公事常多暇。逢著齋期始到衙。
煖炕騰騰石炭薰。呼童拚掃去塵氛。詞垣資格皆前輩。促鄰相從話夜分。
謂吳易堂朱石君秦潤泉三學士周石鵬侍講

東廳槐樹老輪囷。偃蹇離奇不我親。太息誰能如汝壽。空庭閱盡去來人。
待詔廳事前古槐一株蓋金元以前物

正月二日夜雪用東坡聚星堂韻

茶爐半檜始展葉。夜窗手點浮綠雪。開門密霰已滿庭。狂呼失喜冠纓絕。軒轅忍寒肩輒聳。柴桑習懶腰愁折。松枝插戶壓漸低。燈影搖空暗欲滅。生涯碌碌風輪轉。歲月堂堂電光掣。頻浮薊北柏子樽。苦憶江南梅花纈。停雲遠道空滯留。歸夢殘更付騷屑。詰朝初旭雪半消。似有仍無只一瞥。空中色相定何著。文殊師利猶多說。便須參訪不二門。顧我舌根鈍于鐵。時有尼從五臺之命

恭和御製恭奉皇太后謁泰陵因至五臺瞻禮卜吉起程得詩八韻

孝治協人天。重光帝德宣。上陵崇漢典。肆覲展虞年。演法參師利。延釐紀握先。啓途張翠葆。初日出黃絲。官路西郊直。人家東作便。璧雲山疊疊。浥露艸芊芊。已致登三治。還尋不二緣。承恩諸父老。額手屬車前。

恭和御製過蘆溝橋元韻

西陸朝覲將出冰。六龍夙駕官道平。鼓車記里未一舍。長橋翼然自昔稱。渾河西北來。厥性善遷徙。酈元所記載。曩跡半湮矣。上游多山下平衍。所難不在首在尾。至尊指示周且詳。疏濶有方勿旁諉。從今永永慶安瀾。永定之名不虛耳。

恭和御製良鄉行宮晚坐元韻

吉行五十首。駐蹕暮色自遠蒼。然生牽波孤塔湧香界。芯題兩峰抽筍萌。有渰雲興未成雨。艸木欣欣如有情。行齋清永供宸賞。景物到眼皆空明。卷阿游歌詎爲樂。無非事者春省耕。

恭和御製見新耕者元韻

柳梯初綠麥苗滋。有事西疇及是時。二月豳風人舉趾。分明粉本馬和之。新畬如羅足遐觀。蹂踐頻聞戒。從官菖葉杏花農侯蚤。一人春省萬人歡。焚香夾路拜恩齊。扶挈皤然與草兮。欲識太平真有象。煙中蓑笠雨中犁。耕鑿堯民作息均。不須布穀巧催人。臘前三白春初雨。好協維魚吉夢頻。

恭和御製直隸總督方觀承奏報易州等處得雨元韻

陣雲如墨勢方酣。滋液燕南又易南。天遣雨師先灑道。人迎日馭望停驂。丹邱不遠誠能格。綠壤均霑樂。

且湛欲擬載芟良耜頌小臣橐筆祇懷慚。

恭和御製永慕齋疊舊作韻

橋山咫尺構宸居。帝曰精誠庶鑒予。天繹依依通旭卉。皇風皞皞繼羲虞。永言弓劍心恆慕。如見羹牆境。豈虛入暮廉纖將作雨。八神先路爲清除。

恭和御製謁陵禮畢載啓西巡瞻彼臺山祝茲介祉元韻

麗農瑤室占高涼。親祝純釐孝治彰。五百僊人行教地。三千法界大慈光。金根啓處祥雲擁。玉燭調時化雨長。天保九如天瑞協。至誠昭格聖心憂。

恭和御製曉煙元韻

暮山含紫九秋凝。春曉看來景最勝。澹似游絲飛不定。濃如蒸餾氣方升。柳容新沐黃千縷。麥氣微烘綠一塍。山市人家貪起蚤。炊煙隱隱出高陵。

恭和御製日日元韻

吉行日五十。羅拜盈馬前。十年望幸心。何異望歲焉。雨暘旣時若。耕鑿皆安使。詔書免正供。觀者杖屨駢。出入而息不知何以然。三多祝我皇。庶符觀華年。

恭和御製曉行卽景元韻

曉雲鑿靉未全晴。邨屋炊煙次第生。貌出山居農作景。人從摩詰畫中行。
巖巒複沓路回斜。蘆荻初芽柳未花。陌上豚蹠春賽社。堪嗤持少願偏賒。
一帶嵐光繞遠坰。好山在望玉鞭停。恰從拂霧籠煙處。全露霏藍翕黛形。
甘澤依旬候不遲。歲占大有更何疑。伊祁山下倉箱滿。遙祝千斯與萬斯。

恭和御製曲逆故城元韻

遺封猶是壯哉城。阿世難逃身後評。但割膏腴胙諸呂。笑渠分肉那能平。
反閒徒誇沮范增。第功畢竟遜陽陵。美如冠玉中何有。變理陰陽或未能。

恭和御製題愞適齋元韻

行旌小駐古渠濱。猶是伊祁舊俗淳。峭蒨山容真入畫。霏微雨脚不虛塵。
唐河九折窗前見。隄柳千絲檻外春。別有愜心嘉景在。堯民擊壤望堯巡。

恭和御製復雨元韻

極望重巖又作霖。春鳩喚雨杏花陰。雲容鑿靉低猶濕。樹色依微綠漸深。
古道衝泥添滑滑。懸崖濺瀑尙淋淋。天膏即是君膏澤。誠意相孚在一欽。

恭和御製降旨免宣化府屬民欠詩以誌事元韻

體仁以長人。義在易春秋。有孚占元吉。是惟益下優。涿易洎恆代。玉輦首經由。復除昨頒詔。後樂常先憂。猶恐地僻左。或致向隅不延訪。咨大吏。尺一下置郵。災黎所逋課。蠲放無徵收。二月春始和。好易鳴栗留。山田耕及時。樂哉助以休。龍門瓦赤城。養欲給所求。耕三可餘一。勉旃足食謀。

恭和御製雪元韻

二月十日

臘前瑞雪占三白。春蚤甘霖慶九農。法駕漸臨香界近。天花先灑翠微峯。
篋篋六出點行旌。茅屋依稀是雪坪。一望千山皆玉立。天工渲染若爲迎。
藻思禪悟兩相期。萬斛源泉千首詩。一片輕雲飛几案。金壺初試剡藤時。
踏雪扶犁未少休。邨邨叱犢尙鳴牟。勢山駢石皆宜稼。何論三施更五猶。

恭和御製停蹕元韻

暫止宿人駕。師紓陞楣勞。濕雲迷靄靄。遠岫翳周遭。一宿停清蹕。千屯儼列曹。幾餘吟趣洽。斯咏復斯陶。
恭和御製晴元韻

連朝兼雨雪。此日喜新晴。古道山腰轉。前旌樹杪行。平疇猶帶潤。細艸乍滋萌。遙指周廬合。紅雲拱幔城。
恭和御製阜平道中作

積雪澹于一幅練。鳴泉清入五絃琴。人家半在山深處。遙見炊煙出柳陰。

一郵欲盡一郵連。風景分明似輞川。父老呼兒課東作。無過鑿井與耕田。
龍泉關外駐輕驂。咫尺僊山路舊譜。天外數峯明霽雪。清涼世界靜中參。
派河乍漾麴塵絲。彷彿僊源異境移。好是杏花菖葉候。春旂遙拂柳梢時。

恭和御製三箭山疊舊作元韻

豐碑御射舊曾聞。天錫仁皇勇出羣。飛鏃同時穿疊嶂。呼嵩萬歲動千軍。霜濃白羽三成勁。斧劈青巒一
道分。今日神孫重繼武。王弧親試氣如雲。

恭和御製射虎川元韻

一綫雲關峻嶺前。當年射虎尙名川。唐弓親輓神如在。夏諺來游事宛然。祖德懋貽以燕翼。皇心克紹若
稽田。卽看探穴恢天網。葱嶺西頭振旅闖。

恭和御製自長城嶺至臺懷再依皇祖元韻

龍藏載五頂。演法自曼殊。眷屬一萬衆。東來歷雲衢。大啓功德門。示以清淨途。各各生歡喜。合掌寶號呼。
微聞千花塔。鈴語清于竽。時巡祝純嘏。詎爲游觀娛。長城挾兮軋。曲徑繚而糺。清涼境不遠。天開靈異區。
彷彿常喜國。室利之所都。五采青芙蓉。可望不可圖。神燈夜光見。地菜法雨濡。天人跨狻猊。妙手徒形模。
百千億化身。非有亦非無。

恭和御製殊像寺元韻

不二真如相。何曾法報殊。圓光融指月。妙諦悟衣珠。
棲鴿禪王窟。乘猊道子圖。天花迎羽葆。咫尺卽雲衢。

恭和御製顯通寺卽事元韻

演法遙居七祖前。金身入夢憶當年。肇開震旦獅王窟。宛似靈山鷲嶺天。
三度巡臨祈介祉。十方供養拜瑤筵。成虧彈指分今昨。戒慧還須積寸田。

恭和御製羅漢坪元韻

妙相三十莊。莊嚴誰能過。各生歡喜心。受福詎不那。
何人寫殊像。永峙山之阿。諸方護持者。天龍摩喉羅。
似聞梵夾書。名號各異科。八百與五百。沿襲多紛訛。
此缺其一聊足笑且呵。本無我人相。分別作甚麼。

恭和御製真容院再題元韻

上方雪初霽。寒意倏已退。止輦禮花宮。像設妙于績。
三十二好相。如月圓不晦。是真見文殊。歡喜復遐愾。
百牟尼珠圓。八功德水漑。聲聞辟支乘。誰能企項背。

恭和御製閱武元韻

展義臨三晉。乘時習五戎。山連恆嶽壯。兵練代方雄。
赤羽和門日。朱旗列幕風。九重親教閱。不數被廬功。

恭和御製棲賢寺元韻

三峽匡廬勝。幽棲略似之。應真飛錫舊。上足付衣誰。枯坐能離垢。繙經且忍飢。由來儒釋異。親爲剖然疑。恭和御製降旨免山西前歲民欠詩以誌事元韻。

迓釐禮中臺。問俗溥宏惠。正供減今年。溫綸宣德意。載咨司農臣。重稽格外例。往者值偏災。曰惟單閼歲。民欠權倚閣。爲軫穠瘠地。茲來全豁除。十行詔遐暨。鴈門功德峙。汾水恩波逮。祝聖轉金經。佛日四表被。

恭和御製游千佛洞得古體四十韻

宗門心卽佛。立說簡而約。云何有千佛。誰解此理竅。清涼真佛國。僊洞鑿嵒嶠。得毋五丁手。抉幽力排奡。沿谿向右折。十步九回拗。始進若入窻。漸深未掀淖。奇峯各羅列。如鶴或如鵠。兩臂緩攫擎。一足夔跼踔。遠望目已眩。下臨心更燒。洞口闖然谿。神燈夜光搖。中有諸佛像。膜拜來四徼。世尊說大乘。迦葉示微笑。藥叉魔波旬。各各護持效。目犍富樓佞性。大德修行劭。不二啓法門。文殊提其要。騎象誇緩猊。那用輿輜輶。一一具好相。距有胛肥誚。千佛本一佛。心性人各抱。三教理同源。我皇並深造。春巡歷臺懷。晴雲披絮帽。四禪透宗旨。掃除儒釋鬧。因過白雲寺。遂指西嶺廟。甘露功德水。滿月天人貌。精舍樸而古。秘洞窈且窕。直上試輕蹕。寧辭路回繞。卻登絕頂望。積雪四山曜。法螺鐘磬聲。靜中聞大樂。叶山田麥抽萌。邨舍粟藏窖。占豐察璇樞。祝釐闡象教。山靈答嵩呼。洞府供宸眺。宗鏡微乎微。傳燈道可道。谿光皆空明。谷音自清妙。天工巧渲染。著色非意料。紺宇列如麻。茲焉獨幽峭。付戒馬駒踏。離步鵠王叫。于茲托新詩。泠泠釣天

調造化運爐錘理蘊入燭照小臣叨載賡下里望莖韶叶追趨豹尾後異境媿未到韻奇已迫窘況欲窮禪奧

恭和御製題陳規守城錄元韻

從容應敵竟全城一局殘棋話汴京大廈詎能支寸木良醫未可恃黃精金湯無德難爲固輓輓非人何以行天語煌煌垂定論先幾莫待事將成

恭和御製題宋中興聖政艸元韻

和親何至以臣稱往事堪嗟宋紹興汴洛刦灰全不計汪黃推轂已同登兩宮竟絕還歸望二策空矜聳動能半壁偏安慚袖手長城自壞憤填膺漫言五馬南遷匹幾見三軍北伐曾內禪得人差足慰詞臣歸美例相仍爲尊者諱詞多曲允執其中愆必繩大矣皇言褒貶正千秋公論式欽承

恭和御製經畬書屋卽事元韻

六經教士各專治四庫新編聖主時甲乙丙丁統所部校讐繕錄慎攸司哲王道在惟欽若諸子言淆必辨之日理萬幾還學古健行以造物爲師

恭和御製游獅子園憶舊元韻

游賞卷阿昔日陪園居仍對碧峯開羹牆見處皆思聖心性渾然不改孩慈孝一誠常默感因緣有觸記

從來世尊法會真如昨，餅水天雲絕點埃。

恭和御製鹿角椅元韻

五紋岐出質猶全。想見仁皇射獵年。橐建虎文兵不試。椅名鹿角用長絲。欲存大路椎輪儉。詎鬪雕文刻鏤妍。手澤依稀神鑒在。文孫繩武志殷然。

留王快鎮座主少宗伯介公有詩紀事次和

天教十日住鞭絲似與谿山有夙期。古寺半藏雲斷處。好花全放雨晴時。三成官笛穿揚捷。一隊征驪踏雪遲。行帳追陪真是樂。夜來頻醉百分卮。

三月朔日疊前韻

日飲無何但學絲。匆匆又過禁煙期。折花紅杏深廊裏。選石清波激溜時。山未知名看亦好。客來不速話偏遲。同年小集今朝是。遙憶芳醪倒屈卮。每月朔同年諸君例有小集

憶五臺山三疊前韻

清涼峯色翠如絲。欲見文殊那有期。靈境雲封全未識。鈍根棒喝定何時。但求達磨安心竟。不礙豐干行脚遲。會得菩提本非樹。可容無當也名卮。

三月三日自曲陽入行唐境途中杏花盛開四疊前韻

上已煙光颺柳絲。此行未負杏花期。偶來冀北深郵路。大似江南細雨時。每到籊枝鶯語密。怕防落蕊馬
蹏遲。鳴尼若許隨身挂。一朵真宜飲一卮。

座主宗伯公折杏花一枝插行帳茶鐳中至晚盛開有詩五疊前韻奉和
伴取爐煙細細絲。拗花供養趁花期。氈帷四面留香地。茶銚雙清吐蕊時。著色還須崇嗣畫。尋春真笑牧
之遲。一枝何幸隨桃李也到公門侑玉卮。

奉酬宗伯公見贈六疊前韻

清如冰更直如絲。坐我春風一月期。燕許文章推後輩。崔盧門第冠當時。八持玉尺衡材富。雙引金蓮歸
院遲。獨愧散材同社櫟。縱經雕刻不成卮。

真定府隆興寺七疊前韻

林立豐碑認色絲。巍然傑閣俯崇期。遺文猶識張公禮。殊像難描李伯時。綺語多生消欲盡。機鋒百偈轉
空遲。醍醐具足清涼味。未要花前白雪卮。

游蓮花池八疊前韻

激泓十頃麴塵絲。邂逅清游愜所期。巖壑宛成千里勢。烟花況值暮春時。游魚吹沫涵空樂。洛鳥梳翎點
水遲。一事尙留餘憾在。不曾池上舉三卮。

懷鄉九疊前韻

春筍秋瓜夏藕絲。齊民月合有程期。
客來但乞澆花法。憧約頻申曬藥時。
頗解著書師蔡癸。也曾學圃問樊遲。
大瓢五石原無用。只合江湖作巨卮。

寄題雪浪石用東坡韻

彈渦空復說登州。那似雲根湧急流。
四面空嵌銜石骨。一拳凹凸激潮頭。
玲瓏明月懷中貯。透瘦襄陽衷裏收。
咫尺波濤來眼底。渾疑朝暮見黃牛。

送李莘晚進士東歸

籍甚詞壇第一流。御風曾未到瀛洲。
揮鞭重指都亭路。又逐人間款段游。
截鳬斷鶴兩兼難。天許才名折美官。
半刺但題前進士。故應蚤達勝方千。
我識鄭公元賦媚。人嫌李令太穠唐。
雲門山色容高臥。大勝東華軟土忙。
古柏參天鐵榦成。風霜歷盡骨逾清。
縱然才大難爲用。偶露文章世已驚。
蠶尾山薑例可循。頭銜未辨領詞臣。
生天偶落它人後。終是拈椎得髓人。
岱宗訪篆劉斯立。歷下題詩李泰和。
探借十年多暇日。著書定較往時多。

中秋後五日同錢坤一侍講王琴德舍人曹來殷蔣漁邨二庶常過大慈延福宮

傑構出雲端。三元舊戒壇。延禧資母后。董役出中官。明成化中孝肅皇太后建古壁丹青繪。虛庭栝柏寒。豐碑猶未圮。
剔蘚幾回看。殿外有成化敕諭碑。

苦雨

翻盆伏雨接秋天。避漏移牀夜少眠。瘦柱壓欹支未穩。殘書徽漬曬無緣。艸生屋頂多于薺。車到街心泛若船。一事差強人意處。久稀剝啄至門前。

題韋慎旃舍人翠螺讀書圖

牛渚山頭月。娥眉亭上風。謫僊已千載。高興古今同。鐘響夕陽外。書聲老屋中。誰能識此樂。毋乃逍遙公。

題汪對琴博士後譚蘀圖

識是詩人骨相寒。瘦羊分得供朝餐。偶然泥上留鴻爪。便與人間重此官。白雲明月悟前身。諫果甘回味始真。三百年來得同調。阿誰譚蘀似汪倫。

過歸義廢寺

一泓古井兩株槐。券尾比鄰署字皆。輭燈模糊埋碧蘚。古幢剝落臥空階。老僧持鉢身全病。過客尋碑眼獨揩。聽話閒坊宣化事。剎那興廢漫牽懷。京宣化坊門裏面街西小巷子內空閒地內有井一眼。槐樹兩株。未有東鄰南鄰西北鄰人姓名。又載寺所藏畫像大小硬幃九幅。輭燈四壇。云云。又有石幢仆地。其一面云會同九祀龍集敦牂。亦遼時物也。

移寓

幾度柴車轆轤行。喧囂爲避市人聲。門開一面西山對。庭敞三弓夜月盈。新燕呢喃邀作客。古槐磊落事爲兄。玉虛道院南鄰近。時有天風度碧笙。

藤牀木几手揩摩。洗足關門耐養疴。巷僻最宜生客少。家貧猶蓄古碑多。先生自署支離叟。前輩曾題安樂窩。陶晚聞阮裴園沈欽伯諸前輩俱曾寓此儻直從來須計月。催租也似吏催科。

盧端臣先生招飲卽席賦呈

八米詞林秀。蒲江樂府傳。才應雄大歷。名肩後盈川。俗味酸鹹別。家風禮讓先。蒸壺招弟子。啓羈各忻然。

潛研堂詩集卷六

奉命典試湖南出都宿良鄉縣有作

五千里路賦南征。六月都亭擁傳行。
桃李滿蹊教手植。冰淵一念久心盟。
長風欲渡江河漢。壯觀全收冀。
豫荆回首春明猶未遠。試拈詩筆紀初程。

四年五度此停驂。玉尺重持祇自慚。
已卯七月典試山東庚辰二月及今年五月恭迎大駕辛巳二月扈蹕至五臺山皆宿良鄉此次過此計五度矣漸識途矜。
老馬智偶留跡似印泥。參迎風宰堵金鈴。
語過雨芯題翠黛含應笑勞勞車騎客。軟紅十丈點朝簪。

宏恩寺

侵晨投豆店。便道訪桑門。排闥羣峯入。當街雜樹籬。
法王猶守律。寺僧係律門與華山同宗慈氏不言恩。強與安名字。
誰將公案論。

督亢陂

督亢膏腴迹已荒。攜圖當日入咸陽。
千金枉購夫人劍。不及無且一藥囊。

道中卽事

經月愁霖雲霧迷。怪來三伏冷淒淒。
回風撼樹全疑雨。積水平塍半作谿。
古道已看濡馬腹。淺澗何止洶。

牛蹠肩輿縱比徒行穩。怕聽禽言滑滑泥。

雨宿定興

三椽客舍小于舟。淅淅瀟瀟響不休。恰似故園梅雨後。孤篷聽雨泊沙頭。
北方盛夏常憂旱。惟有今年苦雨連。官路水深二三尺。居民入市欲乘船。

輿丁

陸行不通車。水行不可船。泥濘數里閒。行旅歎屯邅。王事有程期。豈敢或遷延。
夙昔怯鞍馬。而況淖在前。籃輿昇丁夫。跣足徒步涉。便夾輿以四丁。扶持防蹶顛。牽輓蟻緣附。參差魚貫聯。
退躡後人足。進拍前者肩。踏土仍踏浪。腳底懸渦旋。所得纔分寸。其難乃萬千。嗟爾亦人子。詎不知自憐。
不惜胼胝苦。終朝博百錢。勞人以奉己。我慚紅兩頰。前途可安行。且莫歌局蟾。

曲逆詠古

六奇孺子擅陰謀。曲逆名城萬戶酬。阿世取容終王呂。因人成事竟安劉。白登圍解輸奇繪。
雲夢弓藏痛偽游。當日高皇數三傑。運籌元只說留侯。

定州道中

形勝居然控趙燕。中山故國暫停鞭。行來明月清風店。恰稱輕雲細雨天。楊柳青濃圍近郭。黍麻綠潤長

平田太行西北遙環擁千里蒼茫一氣連。

雪浪石和東坡韻

韓幹散馬雲錦屯。聲價未若海石尊。古來文人例愛石。摩挲一日忘昕昏。衆春園中春最好。水木彷彿江南邨。誰移石丈此中貯。一拳突兀當松門。咫尺便作千里勢。天吳蹴踏光魂魄。只疑靈洞通水府。故遣百浪飛山根。天工游戲自奇絕。嵌空不費雕鏤痕。神物欲下襄陽拜。絕品宜與奇章論。文登彈渦石安在。當年曾養菖蒲盆。大千世界恆沙劫。俛仰陳迹感慨存。

真定

河朔雄藩自昔聞。南連趙魏北燕雲。風聲勁挾滹沱響。山色青從恆嶽分。宏正有靈應俎豆。寶臣何物紀功勳。廟堂姑息無長策。往事空悲成德軍。

登隆興寺大悲閣周覽隋宋元碑刻晚宿雨花堂對月得詩七首

飛檐縹渺敞三層。乾德規模記昔曾。始信護持龍象力。千年傑構尙峻嶒。隆興寺鑄金菩薩像并蓋大悲閣序乾德元年僧惠演撰

白豪殊相頂光圓。聞說金塗七度全。遇宋卽興遺識在。荒唐且任老僧傳。

周顯德中毀佛像鑄錢像中有文云遇顯卽毀遇宋卽興見僧

惠演所撰序

開皇龍藏護瑤函。奕奕銀鉤妙蹟鐫。彈指周齊經幾刲。參軍猶署舊頭銜。

長明燈向佛前吹。分付官錢幾貫支。閏月上旬當怯薛。傳宣中旨出嘉禧。

元長明燈錢記延祐五年僧永恩書文云閏正月初二日拜住永有時分欽奉聖旨云云

承旨書家奉楷模。膽巴遺跡久榛蕪。惟餘本命長生碣。留在西廊少榻墓。

元聖主本命長生祝延碑王思廉文趙孟頫書并篆額今在閣前西廊寺舊有帝師膽巴碑亦趙書今無存

冰山一霎便全傾。玉券空鐫上輔名。贍有孤嫠逢愍思。施錢地下懺長生。

秦王夫人施長生錢記至正十四年王訪撰秦王夫人者伯顏同登是塔今公已下世

輶車幾日太匆忙。一宿安眠青豆房。多謝雨花堂外月。照人心地亦清涼。

望華塔寺

華塔同登最上頭。重來清淚落西州。金光紺碧依然在。忍向城南續舊游。

去年三月與介少宗伯同登是塔今公已下世

戲題趙州茶棚

宗門語錄太紛掣。直下鉗鎚是作家。公案古今難勘破。鎮州蘿蔔趙州茶。

柏鄉謁漢光武廟

白水出真人。天符赤伏陳。一成仍祀夏。三戶果亡秦。決戰昆陽日。膺圖鄗邑辰。雄才殄羣盜。大度保功臣。豁達高皇匹。精勤宣廟倫。嚴陵星作客。南頓號稱親。卜洛規模正。崇儒教化淳。祚延十二世。頌溢卅三春。

小縣祠猶古荒臺跡未湮石人傳誕妄有碑大書光武斬石人處麥飯話艱辛樹老神鴉宿梁空乳燕賓冕旒紛夾侍想見帝王真。

題圓津庵用壁閒梁棠邨湖南苕湯西厓諸公倡和元韻

名流題詠想當年興寄長松怪石邊無策破閒聊覓句有方療俗是譚禪古藤似幔低延月曲沼如珪冷浸天燕楚往還經萬里飛鴻留爪亦前緣。

鄴中詠古

銅雀臺空霸業陳分香遺令劇酸辛纍纍疑塚都相似愁絕西陵泣望人
南皮公讌興何如雲散風流十載餘少壯人真須努力至今猶寶偉長書
井蛙何事逞雄心一柱橋頭朽骨沈記否三臺功就日殿中棘子已成林
專征景略樹奇功瞽眼魚羊事業空太史浪占星得歲雌雄飛早入秦宮
孝穆當年奉使還評量文雅薄衰辱中原文物知多少心折韓陵片石閒
青雀飛來羽翼垂河邊羖羈那能羈內家相對空揮淚玉體殷勤黃髮期
殿上紛紛供御囚癩癰國是十年休風流宰相楊遵彥只與君王進廁籌
白頭臨陣被犀渠投袂勤王葛誕如可惜關西好男子老爲晉六茹驅除

苦熱

青蠅結隊故飛飛。火繖炎官又作威。暑已失時猶張王。二字俱去聲。秋方當令尙依韋。曉風稍稍涼侵袂。午日騰騰汗透衣。空羨蘇門高隱者。適然鸞鳳共忘機。

自鄭州入新鄭道中作

百里陂陀路。連岡往復皆。雙厓堅似鐵。一線旋如蝸。土硬全疑石。沙回忽有階。坡翁烏帽句。寫景妙難儕。

東坡鄭州道中詩登高回首坡龍隔惟見烏帽出復沒二句寫景宛然

讀左氏傳

從政威不猛。五美之大端。云何尙火烈。以民爲艸菅。國僑昔治鄭。衆母鞠育殫。遺愛長在人。清淚尼父潛。救世鑄刑書。要豈如申韓。易簣告太叔。猛易而寬難。此言失持平。罔顧理所安。將母慄礮子。博會非真傳。政寬則得衆。我思魯論言。

過許州追悼亡友周西隣刺史

三載金臺別袂分。繆爲恭敬意殷勤。今朝真到潁城路。不見風流舊使君。已卯夏西隣之許州任過予寓許某當貢督效驅耳

文章博洽世無雙。手葺官齋榜古幢。招悵堂成人已逝。蛛絲空罥讀書窗。通石幢一後梁貞明石幢一于西隣到許後貽書言近移唐咸

廢中築小室貯之。
顏曰古幢書屋。

讀史縱橫貫弗功。眼光如月破羣蒙。和林舊事編成後。更與何人質異同。
予近改修元史。

夜臺寂寞竟何如。落月空梁夢見虛。不用中郎求貌似。手痕細認隔年書。

望中嶽

西來紫氣鬱千盤。天外諸峯馬上看。石闕遺文留漢篆。金泥絕頂表唐壇。星辰捫歷三霄近。松柏陰森六
月寒。五嶽壯游初志在。何時扶屐到層巒。

許昌詠古

識書曾記代塗高。艸艸移都計枉勞。國是卅年禾絹諾。姦雄一手太阿操。樓桑未遂中興漢。石馬俄成大
討曹。休詫牀頭捉刀者。軍司狼顧亦人豪。
中興之中讀平聲唐人已有之。

郵行

幾日輕陰暑漸銷。孤郵稍喜避塵囂。秋粱已穗宜刪葉。晚豆將花亟護苗。細細菱絲浮水面。纍纍瓜蔓挂
牆腰。雨餘準備前途滑。伐柳填薪當小橋。
真羨寬鄉一老農。久無冰炭在心胸。妻工舉白調鉛拙。兒解耕田識字慵。食指動來炊飯熟。衰顏開處濁
醪濃。平生不省公卿貴。世守頭銜賣菜傭。

聞蟬

真令俗耳得鍼砭。愛汝迎涼不附炎。曉月一聲楊柳店。午陰百過綠槐檐。身輕自覺能離垢。飲少從知未礙廉。莫信忘機便無患。螳螂張臂亦何嫌。

雨宿蔡寨郵舍

爲避淋頭雨。聊求蓋頂茅。泥深愁滑滑。雞唱聽膠膠。野老能供饌。山僧暫打包。淹留隨處好。恐類伏波嘲。

田家

岐路忽三叉。居民四五家。人行茅屋罅。犬吠枳籬斜。拗項壺盧架。長身巨勝花。故園宛在眼。南望白雲遐。

雨止

天改雲容澹。人欣雨脚停。依依遠邨外。忽有數峯青。

曉行

揮策去匆匆。郵原極望同。樹枯時帶瘦。山好不嫌童。紫蓼秋塍雨。青帘曉市風。輕涼適吾體。渾忘客途中。

與王惺園修撰對弈

夢騰長困日如年。暫賭楸枰當晝眠。真訝觸蠻分敵國。幾曾虞芮讓閒田。到頭才悔全軍蹙。得手徒爭一著先。白鶴觀中成例在。從來勝敗總欣然。

確山道中

昨望翠嶺嶒。今朝度幾層。連岡肥少骨。仄徑曲如肱。紅倚谿頭蓼。青垂屋角藤。童兒纔五尺。驅犢上高塍。

渡淮

我昔北游過清口。兩瀆交匯趨雲梯。獨清安能救衆濁。浪湧半挾沙與泥。今朝乘轎義陽郡。遙望桐柏明秋霓。長台關外尋古渡。輕舠撇波如鳬鷺。粼粼白石照見底。輕風吹皺青玻璃。連峯屈曲自回抱。一條玉帶垂腰圍。南來計程三千近。經涉渾沌漳洺淇。渡河以後惟汝颍。終類邾莒朝魯齊。當年神禹奠四瀆。各以巨海爲會歸。河伯雖欲鵠巢占勢。不肯下猶相持壯觀先後落吾手。所惜汎汎故道迷。高興竟馳大別頂。坐看江漢萬里朝宗時。

山行

了無攀礪礙人行。起伏高低路總平。可是山靈多蘊藉。不將圭角露峥嵘。林於萬个柳千行。木槿編籬卵石牆。高地棉花窪地稻。不知身住在它鄉。

自信陽入平靖關

宛轉雲盤阪。崢嶸冥阨關。千重包汴洛。一綫劃荆蠻。要害思防戍。登臨忘險艱。四圍蒼潤意全改。北條山勢逼疑中斷途。窮忽有梯祇尋山脈絡。不辨景東西。倏覺升天易。終憂入窟低。回頭來處路。恍惚已難稽。

紫翠繞重重。橫岡更側峯。樹藏山面目。雨拓水心胸。花艸都含秀。陰晴乍改容。此中多隙地。安穩讓三農。水向山頭引。人從屋上耕。腰鎌收稻出。背笠跨牛行。籬借新栽槿。扉編舊種荆。雙河衣帶似石鱗。弄琴箏。池沼天然匯。曾無斧鑿痕。三時魚價賤。七月蕩花簾。風定波猶急。沙激水不渾。在山清澈底。難向外人論。夙抱看山癖。曾無濟勝資。此行天假便。卻喜境多奇。氣厚蒸雲霧。姿妍薄粉脂。後來須刮目。記我首題詩。

七夕宿平靖關

七夕今朝是窮關。風雨秋。祇依山作嶂。不見月如鉤。兒女團圓節。征夫寂寞愁。艸花籬外放。也自號牽牛。

自應山入安陸縣

百里孤城倚翠峯。揮鞭雨望翠猶濃。地靈未肯趨平行。山意居然踏復重。絕磴千回牛旋磨。危蹊一線蟻盤封。後岡欲斷前岡合。登頓翻添客興慵。

控扼申光襄漢閒。北來歷盡幾重關。湖波演漾雲連藪。嵐氣空濛陪尾山。背郭千家黃穠熟。沿邨萬个綠筠環。征人日暝剛投宿。細數昏鴉接翅還。

雲夢縣

地溯西陵舊宮傳。雲夢遺人煙低遠市。秋意入疏離。艸綠黃香冢。苔封伍員祠。圖經尋往蹟。歷歷寄懷思。行連岡閒卽目。

低岡如伏牛。直上踏脊膂。曲折隨地勢。向背迷處所。上坡復下坡。時見風帽舉。日夕少人行。斜陽亂鴉語。

詠道中所見艸木

楊柳性易活。道傍鬱婆娑。一一懸官牌。手栽數不訛。行旅苦煩渴。小立清風過。誰云無才思。庇蔭亦已多。前時河水溢。濁濁浪驕鼈。斫伐千萬株。猶足支頽波。豫章號良材。十年始作科。迂闊好大言。收功竟如何。樗木生不材。匠石棄弗視。栽之官路旁。蔥蔚亦可喜。云何冒椿名。附會罔知恥。枝葉偶相若。臭味詎能似。人言樗易長。舍彼寧取此。嗟哉逐臭夫。亟去洗我耳。樗木俗名臭椿。孟秋天始涼。下隰見紅蓼。花繁帶露斜。身弱得風早。疏籬淺水閒。娟娟秀而好。根柢非堅牢。顏色能自保。騷人倘回顧。終覺異凡艸。

木槿日及花。晝榮夕輒悴。莊生論小年。蜉蝣蟪蛄類。道旁見一枝。妖紅可人意。未登君子堂。俛仰籬下寄。壽命旦暮間。猶以色取媚。嗟爾亦何知。我言責太備。

瓜壺皆蔓生。莖葉頗相同。秋來結實好。纍纍懸屋東。剖瓜如蜜甜。爭噉喧兒童。生冷忌食多。恐致腹疾攻。壺盧雖寡味。佩之當藥籠。中流偶失船。坐收千金功。徒以甘苦論。鄙哉田舍翁。

浮萍生無蒂。隨波忽近遠。風來半汀失。雨過一池滿。飄泊狂瀾中。葉葉獨安穩。衆芳憂淹溺。乃以智自遯。推移不凝滯。于我元無損。不見長樂翁。五朝被公衰。

讀詩識芣苢。采采向中田。雨後綠葉肥。結穗垂馬鞭。物微人所棄。不堪充豆籜。本艸幸見收。弗以下品捐。

小試輒有效果使結轎痊用之苟得宜功豈下參連乃知醫國手廣蓄所當先。

小艸澹巴菰得名蓋未久移栽始閩嶺近乃處處有烈日炙葉乾黃絲細如綴筠筒煙一縷相習以口受肺腑非鐵石火攻奚可狃奈機今時人嗜此不去手糜財更妨功濫觴起誰某安得拔其根卮茜種千畝

武昌

驚濤卷雪壓城低九派江流迹已迷三楚颯檣風上下萬家煙火水東西山圍大別單椒峙洲擁金沙碧艸萋遙指僊人騎鶴地危樓終古切雲霓

秋花

蝴蝶紅房坼牽牛紫萼攢偶依籬角住也受露華團天意憐秋艸人情感歲闌穠芳難耐久珍重及時看

邨中記所見

小小茅簷曲曲籬牆敲聊借石頭搭日高編箔烘煙葉雨歇攜锄打豆萁香稻已催千頃割殘荷猶見一枝垂由來氣侯山中別試補豳風七月詩

萬松岡有序

七月十七日入咸寧縣行山岡間夾道皆長松官爲編號懸牌于樹記其生枯之數遙望小松布滿崖谷其多如薺數十里中青葱不斷山故無名予目之曰萬松岡詩以紀之

虬枝引路百尋強。五粒新柯密作行。說與它時編地志。嘉名合喚萬松岡。
連岡登頓不嫌疲。爲愛清標瘦更奇。頗勝湛然老居士。低頭下拜萬松師。


蒲圻山行

我家東海上百里不見山。偶然平地覆一簣。便已自號岡與巒。茲來山行已五日。置身長在煙雲間。橫峯側嶺各秀絕。如眉如髻如玦環。如龍掉尾牛奮角。神龜縮頸長蛇蟠。濤聲十里松子落。楓葉未老青猶攢。悅惚置我山陰道。應接不暇目力艱。寸岑倘可移吾里。壓倒虎邱更馬鞍。高人偃蹇恥標榜。名字那肯留塵寰。區區河伯傲海若。夜郎自大吁可歎。

高嶺舖

一徑入煙霞。危崖赤似砂。石奇蹲巨豕。路曲綰長蛇。揅釜宵煨芋。提筐午捉花。邨居無面勢。茅屋數家斜。
口占

萬疊雲嵐有路通。一峯不與一峯同。松篁夾道如迎送。人在秋山紫翠中。
湛湛江楓葉未丹。相逢有約莫盟寒。重來記取深秋後。烘染殷紅待我看。



潛研堂詩集卷七

宿萬年庵用壁閒吳文恪韻

庵有董思白書
歇心處三大字

琴筑鳴幽澗聽來不厭喧鐘聲和月遠木葉受風翻奧曠疑天設清涼卽佛恩安心何日竟我欲問桑門

將抵巴陵

入山八九日山意漸闌珊螺髻經千疊羊腸剩幾盤泉聲無雨縮蟲響入秋寒遙望煙靄外漁舟閣淺灘戴星忙結束卓午便消停樹影窗中速某聲枕上聽有情花展醫無事鳥梳翎此去巴陵近煙波渺洞庭

岳陽樓

傑閣出城墉驚濤日夜春地吞八百里雲浸兩三峯已極登臨目眞開浩蕩胸不因承簡命那便壯游逢

曉行

爲避風波就陸行潺潺卻愛聽谿聲楚南不比黔南險也覺途無三里平沙岡凹凸不成山也有煙嵐四面環遙見人家村落近青螺出沒短牆閒

長沙

行盡官郵兩月程崇城百雉儼嶧嶢雲開嶽麓千尋碧秋霽湘江一鏡明礪砥砮丹仍土貢火耕水耨樂

鄙氓笑它遷客憂卑濕。每日登樓玩晚晴。

賈太傅宅

石牀柑樹跡云徂。故宅猶傳賈大夫。世已治安偏上策。賢如絳灌尙嫌儒。洛陽太守封章薦。宣室君王禮數殊。如此遭逢良不薄。未應問鶴寄押揄。

柬長沙張慧川明府

獻紵論交十載前。滄浪亭畔話纏綿。訪秋圓泖宵連榻。過夏長安午擘箋。管領風騷名下士。平章山水吏中僊。停車傍聽輿人頌。三異中牟萬口傳。

昨歲燕臺我送君。今朝握手楚江濱。折麻不待衡門鴈。卷幔同看夢澤雲。泉性出山仍峻潔。蘭言入座益清芬。宦游我似文園倦。慚媿臨邛恭敬勤。

屈賈二大夫祠

去國憂君志未伸。千秋廟食共湘濱。吉占枉向靈氛卜。痛哭誰憐年少人。呵壁問天空。侘傺沈書弔古寄酸辛。莫言宣室虛前席。也勝招魂七澤辰。

中秋試院對月

萬里清光一樣圓。重簾深靜夜忘眠。筆琵俗調休來耳。冰雪高文若有緣。射策諸生難樞燭。鎖闥同事鬪

蠻牋明珠魚目由來混。恐負天家鐵網懸。

試院示同事諸公

杞梓丹沙眼底收。評量甲乙費窮搜。劍埋地下猶沖斗。錐處囊中自出頭。從古文章無定論。由來場屋困名流。風檐甘苦皆親歷。珍重諸公子細求。

五色迷離信有之。隔簾幼婦認妍媸。須求神駿驪黃骨。漫賞鮮新桃李姿。腕底生枯憑畫筆。眼前勝負賭圍棋。當場勒帛休輕下。此是青衫淚濕時。

楚南士子場後以試文謁學使。吳雲巖前輩雲巖決其必售者五人曰丁甡丁正心張德安石鴻翥陳聖清比揭曉則五人皆中式而五魁之中得其四焉。楚人傳以爲盛事。雲巖有詩因和其韻一一春蠶食葉聲。善鳴此日果先鳴。鑄顏蚤識心良苦。說項方知眼獨明。僞體別裁當代望。愛才如命古人文情三年手植多榦榦。分別無私玉尺平。

吳雲巖學使訂于重九日載酒嶽麓登高兼訪山長劉孟調前輩以風雨不果往次日孟調以詩見寄次韻奉答

擬訪皋比嶽麓陽道鄉遺跡未全荒。一宵秋雨回征櫂。幾疊青螺掩翠妝。問字相從緣恨淺。看山有約興空狂。臥游只合師宗炳。欲借冰絃四座張。

嘲道旁楓樹

秋光九十去侵尋。樹樹山楓尙綠陰。枉費詩人盟息壤。不知叵信在霜林。

代楓樹荅

何心火迫染臘脂。遺世方成絕代姿。可笑鴈臣歸太蚤。不曾留待葉紅時。
予旣作詩代楓樹解嘲。次日山行楓林有數株先紅者復成是什
片片秋容獨自矜。一宵霜後暈潮凝。不欺然諾從來少。數本真成耐久朋。

重過武昌

黃鶴磯前水抱樓。金沙洲外荻花愁。燕吳南北傳迢遞。兩地離情入暮秋。

登黃鶴樓懷翁覃谿中允彭六一編修

二公典試湖北

榜人催欲渡。小泊爲登樓。奇觀詎容失。高秋聊此游。空濛雲外岫。浩蕩水中鷗。信美非吾土。凭欄亦少留。
城以依山壯。樓因得地奇。塔仍元代瓶。棗說古僊遺。
樓前有勝像寶塔。題云大元至正威順王太子建。後爲僊棗亭。有棗一本枯而未朽。云僊人所植。紫蟹秋來味。丹楓霜後姿。登高羨星使。來趁菊花期。
湖北當事例于重九日置酒樓上延主司登高

田家

霜落秋原萬木衰。蕭蕭亂葉逐輕颺。漁舟小泊丹楓裏。酌酒初齋黃菊時。老屋旋蠅催墐戶。新禽驅犢蚤。

翻犁官租足了身無事。燈火團團婦孺嬉。

德安道中

一徑穿山頂。人來樹杪行。輿丁防足滑。擔僕苦肩頰。楓柏天然畫。原田局上枰。三關遙在望。翠巒倚雲橫。

楊忠烈公憲祠

茄花委鬼日。猖披想見張。鬢目時倉猝。移宮關大計。慨慷伏闕進危詞。姓名空冠東林籍。魂魄誰招鎮。撫司齒冷三朝修要典。南牙宰相北牙兒。

入平靖關

曉看紫翠畫圖明。不信身從畫裏行。谿水一灣分向背。山雲片刻改陰晴。盤旋石磴重關峻。曠蕩秋原古木平。屆指歸程垂及半。幾回清夢到神京。

信陽

淮水淺可涉。楚雲望已微。日斜棲鳥樹。人語釣魚磯。伐木家燒炭。裝縣客製衣。往還經兩度。逝景迅驟駛。確山

朝辭明港驛。夕秣朗陵芻。風力冬來壯。山容寒到枯。櫨樛悲落葉。蒼莽眺平蕪。此去中原近。官郵總坦途。

曉行口占

山行五日僕云痛歷偏嶽崎得坦途底識主人獸平行幾番回望翠模糊。

遂平

蕞爾吳房邑猶傳夫槩封隱成淮蔡蔽直達汴河衝納稼先完賦于茅計禦冬鄙氓閒最樂擊壤話高春。

郾城古召陵地韓退之平淮西碑勝之召陵郾城來降

楚使盟書地淮西戰紀勳濺波潁陽月古驛召陵雲老樹全成禿饑鳥似喚羣蒼涼荒艸路誰弔太邱墳。

臨潁

小邑停征旆高歌倒酒杯苔皴鍾傳字艸洩馬融臺禪漢詞多詐依梁事可哀千秋傳潁谷純孝輓風韻。

鄭子產祠新鄭

東里有祠堂輿人誦不忘救時羊舌誚授政子皮良製錦成非易操刀割恐傷墓門遙在望心折杜當陽。

鄭州道中

山如禿赭樹如髡風緊雲凝漲霧昏莫道冬來生意少青青宿麥偏寒原。

渡河

古渡尋榮澤遙山辨太行落槽中溜緩解纜一颶張微綠千畦麥深黃萬樹楊回思前濟日禪指改炎涼。

曉行口占

日出煙消見遠邨。嵐光依約是蘇門。天容山色看無別。只認遙空抹一痕。

最愛寒山面目真。鉛華洗盡見精神。天然古澹仍堅瘦。比似嶽崎磊落人。

湯陰

美水流城北。淇泉屈邑東。霜清僧寺磬。樹老古原風。故里堯君素。荒墳嵇侍中。金牌三字獄。千載泣英雄。
韓魏公祠

宋家賢宰輔。屈指首韓公。將相三朝寄。安危一體同。黃花堅晚節。霖雨斂神功。漳水有時涸。此祠終古崇。

渡漳水

水道三冬縮。輿梁十月成。荒雞催夢短。瘦馬踏霜行。趁蚤僮偏嬾。衝寒酒易傾。畿南今日到。遙指滏陽城。

晚抵邯鄲

邢趙山川指顧間。太行千里勢回環。寒雲北入邯鄲道。落日西銜車騎關。倦鳥梳翎將就宿。疲牛脫輒自知還。往來驛吏多相識。塵涴征衫幾許斑。

食客行

平原豪俠如信陵。傾財結客坐上盈。錐處囊中相奇士。三年不識毛先生。騏驥千里由來寡。戀棧甘心託廄下。蚤知碌碌皆公等。悔殺美人謝璧者。雞鳴狗盜脫孟嘗。不如世有市義良。三千珠履從春申。不如世

有無望人翩翩濁世誰最優觀君玉貌皆有求君不見千金上壽天下士拂衣徑去魯連子

沙河道中

霜落山無色沙深艸不生一河岐兩派五雉見孤城文筆顏開國功名宋廣平梅花亭外月十里送人行

定州道中

寂歷荒寒古渡頭空林敗葉落颼颼何人領略蕭森意明月清風過定州

昭陵繭紙久無存響楊臨櫟互攷論肥瘦紛紛辨真贗空依定武作兒孫

雪浪齋中秀色參松醪自釀最清甘八州作督如春夢又見孤臣到海南

晚行清苑城外見月

十月十日

朝辭郭隗里夕宿徐河涯明月大如鏡照見人鬚眉空林葉盡脫了不蔽清暉微風動枝柯水中荇藻披一颯風利過乃是人影移誰言霜月苦玩之獨忘疲山家多畏寒未暇領此奇行者日旁午有景無人知寓意不留意適爾與吾期瞽眼恐易失援筆爲賦之

自我出國門五見明月圓鎮陽禮大佛虛堂可譚禪武昌東湖驛圍棊夜忘眠中秋在試院官燭三條燃歸來宿岳陽鏡面天水連六月十五宿真定隆興寺七月十五宿東湖驛今夕復何夕清光益激鮮地以南北異節亦溫涼遷惟有如珪月長此清淨緣過去及見在未來亦復然太潔性所抱有恆德斯全莫嫌

霜華冷悟茲忘言詮。

寄楚南諸同好

乘傳曾游七澤瀆。三秋氣候似春分。曉山出霧皆成浪。晚樹和煙半作雲。引路松楠存古幹。涉江蘭茝有奇芬。舉頭嶽麓遙相望。恨未摩挲北海文。

冠蓋追陪恰四旬。芝蘭臭味倍情親。舊游回首譚三泖。

慧川刺史相過。輒譚淞江之游。

古碣留心訪九真。

蕉畦以手揚吳

清泉明府江君

九真太守谷

寶慶守鄭

學使吳雲

府君碑見贈。

太守風流懷鄭監。

寶慶守鄭

學使吳雲

府君東里

嚴前輩

清風店上重相憶。

學使吳雲

落月依稀入夢

學使吳雲

頻。

還京述懷

僂指星軺半載期。楚雲燕樹兩相思。幾回夢憶金鑾直。兩度恩叨玉尺持。湘浦秋風催驛騎。蘆溝寒月照鞭絲。歸裝檢點贏前度。篋裏新排一卷詩。

江明府子九拓石鼓山劉莘老題名見貽并索詩

江侯昆弟古與稽。同游石鼓窮西谿。二分垂足百尺梯。偏拓唐宋元人題。千里誠致費赫蹠。忠肅留識尙未翳。廣韻。烏奚切。軒如老鶴立羣雞。熙寧新法算黍圭。抗論十害遭排擠。監倉公暇兩子攜。振衣扶屐來攀躋。九字瘦勁懸虹霓。題云。劉摯莘老來游跋踏侍。凡九字右方題云。後百八十三年。六世孫震孫蒙恩來持庚節拂拭舊題。不任感愴。寶祐二年秋九月旦。凡三十三字。誰與讒口貝

錦縷父死不葬肆慢懶。廣韻郎奚切。拜罷錄元祐六年言者論擊父死于衛委而不葬爲子不孝擊抗章辭位自作家廟記以辨當時之冤。文孫持節腰玉犀三改甲子跡未迷拂拭遺刻心愴悽孫以祖重名不澌維公忠義爲根柢偶然飛鴻印雪泥重之乃與瑤琨齊人貴自立非虛兮。

題袁蕙纓孝廉南湖艸堂圖

湖光一輪鏡面揩四圍遠山眉黛佳誰與寄貲營茅齋松毛覆檐落洩階軸簾終日屏掩柴仰屋著書萬卷排不妨土木爲形骸有時乘興上翠厓自攜藤杖青櫻榦蒼茫高詠金石譜澳門別駕謂張雲澍同知同調偕相於唱和投詩牌力返正始芟淫哇扁舟過訪泊天涯由來臭味無參差不知主客相忘皆多君嗜好與俗乖泉石之癖如宿癢偶游京洛行六街征衫曾不涴塵霾題君畫卷手屢叉敬亭雲氣滿我懷。

擣石宮庶庭前叢菊盛開招諸公同飲賦詩竝作墨菊長卷出以見示并屬題

小庭才半畝點綴頗不俗春華詎非佳獨愛秋英菊黃白間紺紫淺深各有族不用瓦作盆不用架縛竹所貴全其天自然無拘束主人供寫生不寫形寫神淋漓潑墨汁下筆清而淳百四十餘朵朵朵皆鮮新裝堂風牡丹凡品何足珍真花元入畫畫花直偪真相清圖主客洗盡京洛塵幾日不相見坐失此良會卷後許題詩附庸收自鄙迫冬花事歇掩關且塞兌日手畫圖看已勝雅集再

送吳二匏舍人南還

一葉梧桐始報秋。潞河東下趁輕舟。歸程十里嚴陵瀨。紅蓼西風古渡頭。
薇垣詩格數吳均。歸興秋風戀紫蘚。閒煞青綾舊時被。對花題詠更何人。
手版支頤爽氣來。家山大好足徘徊。天都面面光明海。此去休教空手回。
凌寒兩到夙齊名。姜被今年又合併。不羨春明聽漏夜。對牀風雨更分明。

五塔寺

卓立金剛座。巍然五塔崇。猶傳印度式。匪假育王功。分影光明月。搖鈴縹渺風。石闌終古在。不壞是真空。
萬壽寺

宏麗仁王寺。經營萬歷年。飛來奇石簇。藏奔漢經全。董役傳常侍。延釐說九蓮。一鐘移兩度。彈指悟因緣。
明永樂中命姚恭靖監造鑄大鐘重八萬七千斤藏大內萬歷丁未建寺移置于此國朝雍正中復移鐘于德勝門外之覺生寺

昌運宮

香火前朝院。天風夏玉笙。門開青嶂對。人蔭白松行。亭覆康陵敕。
碑亭二其一刻正德五年六年敕諭兩道苔封內監塋。正德宮爲
中司禮太監張永所建賜額混元靈應宮。永墓在其後。
劉瑾建大德元明宮在朝陽門外遺址今無攷客來譚往事。差覺勝元明。

雙林寺

可怖修羅相。無遮演揲兒。祇林誰昔構。像設至今貽。洞失明陽跡。碑留媚竈詞。

碑稱寺後築上石爲山有明陽洞左臺右榭今皆廢

毀碑中稱馮恩公隔牆半畝地片瓦拾沙彌寺東爲興教寺明景泰中司設太監王助所建香火院以奉梵僧者今已鞠爲茂艸矣

哭吳雲巖侍讀

隔夕仍同醉。今朝遽哭君。只疑囚問誤。難制淚珠紛。朝露晞何速。愁雲黯莫分。受恩三楚士。誰作大招文。

題韋鐵夫授經圖遺照

先生扶陽之苗裔。漢唐以來稱德門。詞章雕蟲哂小技。枕薜六蓀培本根。廿年寒氳冰雪擁。打頭屋小如祇園。諸生執業競問難。辨舌欲擬懸河翻。胸中空蘊經世略。手無斧柯誰與論。側聞秉鐸泗州日。諮詢疾苦行荒郵。州城久洩洪澤水。民田大半居魚籠。何人奏報水已涸。廬井非改租額存。一田兩賦計畝算。遑恤閭左朝無殮。一朝丈量詔書下。奏記上官叩九闈。至今泗人口碑在。活我婦子釋戴盆。當時牧民者誰子。媯嫋坐視徒聲吞。從來行道必有福。不于其身于後昆。公餘下帷課子舍。亭亭玉立皆瑤琨。五郎標格更絕俗。執卷雄誦無晨昏。誰與傳神在阿堵。鬚眉彷彿清而溫。少陵熟食示宗武。康成禮堂傳益恩。惜哉祿養生未及。展圖涕淚空餘痕。生晚恨不識公面。得交公子猶弟累。忍饑讀經亦有志。廢棄自歎古井眢。願從太史乞家法。五世教授衆所尊。只愁里中兒。噍讓那不簾金遺子孫。

獐酒詩爲查恂叔太守賦

三年粵西賢太守。薏苡明珠百無有。獐人遮道送公歸。各各獻以一盛酒。金臺召客勸客嘗。色黝而黑甘。

且香好添南徼虞衡志。滿酌青州從事觴。

題張右丞秋原放牛遺像

華陽真逸自畫牛。一絡其首一脫縕。楊岐禪宿靜者流。升堂羨渠得自由。斯圖寓意其然不。一翁方瞳更白頭。忘機兀坐與天游。秋林深處聊夷猶。烏犍神駿如驛驅。縱之平坡俾小休。中青本白厥角抹。自飲自齧鳴聲牢。文犧被繡非我儔。底須叩角爲商謳。天空野闊任所投。善刀而藏可自謀。從茲不作穿鼻翁。今已去其神。留披圖彷彿瞻前修。湛然心跡不繫舟。此意得之蒙莊周。

題陶吾廬前輩歸去來館圖

先生蚤賦歸去來。山中日永循南陔。前身靖節只君是。卜宅仍在匡廬隈。羲皇之上有歲月。顏謝以降無人材。偶偕素心析疑義。要使俗學除陳荄。文孫指點手澤在。清風彷彿無塵埃。小同能承北海學。不須問道求宗雷。

平確齋自臨川令被薦入覲賦詩奉柬

幾載參商歎隔塵。京華會合倍情親。天涯聚散憐同調。海內循良見古人。廉吏可爲從所好。素心相對得其真。寒窗小集團園話。鴻爪留泥認宿因。

豫章南去數郵程。撫字心勞得頌聲。錐利終能脫穎出。泉流只似在山清。薦書共道公評在。異政知因儒

術成宗派西江兼領袖。吏才元不掩詩名。

紬書東觀話當年。舊雨常懷平澹然。木以不材宜號散鶴誠善舞。未妨僂要知菽粟功堪濟。終勝俳優格取妍。計日朱幡開五馬。姓名題處紫薇天。

送商寶意太守之官雲南

十年遺愛粵西留。萬里天南又壯游。詩句好題金馬嶂。心期依舊玉壺秋。單車按部人歌德。隻手安蠻帝借籌。不負衝寒輕叱馭。滇山奇秀甲神州。

乾隆二十八年起居注書成詣乾清門入奏恭紀六首是日雪

時政年年注起居。編成常屆歲將除。尋常卷帙休相擬。此是人間第一書。

紀月編年例發凡。卷分廿四祕瑤函。每月分上
下二冊一言一動無虛美。特許詞臣手自緘。起居注書成例由本衙門奏聞即緘封送本內閣滿本堂庫收貯不進呈御覽

元日千官賀紫宸。歲除曲宴酒三巡。四時典禮從頭紀。一統于今百廿春。順治元年甲申世祖章皇帝定
燕京一統中外至是歲癸未蓋
百年有二十年矣。

跋尾千言綴後頭。輕塵足嶽露添流。清班久占慚何分。四度書中姓氏留。卷末跋語起居注官例得列名
歲庚辰辛巳大昕以署起居注
官癸未甲申以充起居
注官皆得續姓名卷末

平明啟事入乾清。一隊僕班禮服更。是日易補服中貴向前相指點。玉皇案吏奏書成。

銀海光搖六出駢。僕居處處是瓊田。呵融雪水濡新翰。更紀明年大有年。

送周稚圭同年觀察粵西

酌君椒花酒。聽唱驪駒詞。春風一去六千里。壯游持節灘江湄。十載情親比骨肉。如苔同岑鳥共枝。曲江列讌午試馬。瀛洲分席畫課詩。僕指同館卅餘輩。聚散落落晨星微。素心晨夕我與爾。臭味投合無差池。前年天子試館職。如椽巨筆濡淋漓。瑤臺月明鸞鶴響。坐令笙磬皆凡卑。才人例具用世略。特簡侍從充監司。文章經濟本一揆。名位輕重由人爲。新正錄別遽分袂。露輞直指天南陲。計程西江歷南楚。沅湘交會連涪谿。衡山石廩可落手。起看雲海鋪琉璃。粵西山水更殊絕。一峯獨秀卓筆錐。七星巖迴捫列宿。西湖波澹澈清漪。載門晴暇鈴索永。按部排日探幽奇。磨厓處處識歲月。妙跡何減蕉黃碑。宦游如此良不俗。那戀班直趨蛾眉。雪中鴻爪皆前定。兩萍會合必有期。南魚北鴈報無恙。庶幾一慰長相思。

門神

蚤春佳氣正充闌。袍笏僕曹一例除。刻畫從人爲活計。推敲無地得安居。彈冠即是當樞日。冷眼相看對面初。故紙堆中堪送老。功成不退待何如。

火判

誰言官到判司卑。鑼市元宵得令時。炙手盡知騰上速。攻心卻以架空奇。電光石火爭些子。鳳髓龍筋炫阿誰。捫腹此中何所有。因人作熱亦憐伊。

題曹檀潛先生柳汀觀稼圖

廿年前侍春風座。負郭無田居轎軻。食硯何曾飽糜粥。叩門差免催租課。此時只羨多牛翁。碌碡登場飯黃稆。旁人拍手競揶揄。矯屋頭低氣不挫。一經遺後計未失。厥父載菴子有播掌上珠。元照乘明庭前槐已參天。大紫泥封誥下九霄。里鄙聚觀牛酒賀。人情轉眼改。苑枯先生付人一笑歌。卻寫江鄉觀稼圖。綠楊流水圍邨暝。黃梅雨足瀉淙淙。三寸新秧始分科。水田營營如掌平。主伯亞旅來相佐。立苗欲稀兼欲勻。縱橫成列無偏頗。方阜堅好幸其然。鹵莽減裂報將柰。秧歌信口無宮商。前者一唱後者和。先生科頭搖羽扇。閒看三農泥溲裸。齊人要術書可續。石湖雜興詩能作。頗欣南畝亦懷新。未戀北窗但高臥。買田異日恐虛譚。望歲庶慰民勞憊。伊予上世本力耕。竊祿官倉良已過。回首鄉園顧浦西。四體不勤計何左。陶潛歸田吾欲云。樊須學稼公毋呵。從游應許老門生。倘昇籃輿備一个。

潛研堂詩集卷八

奉命典試浙江作

頻年奉使單車出手種齊松與楚莊三度承恩今較渥此邦文獻甲它邦
鍾陵制義穆堂文浙榜從前說兩君眼力縱輸前輩好得人猶望張吾軍

順治甲午熊公伯龍康熙庚子李公紱主浙江試最稱得人

聲名標榜久相忘不愛腴田陸氏莊但願它時到台蕩有人爲我具春糧

出廣寧門

又作皇華使輕裝出郭門雨微前路潤雲淨遠峯尊稽古榮真忝程材鑒恐皆臣心元似水擬與漸江論

趙北口

漣漪百頃鏡光涵十里長隄路舊譜淺艸平沙通薊北板橋流水似江南兩行官柳排濃綠幾隻漁舟點蔚藍浩蕩白鷗應笑客浮家泛宅只空譚

毛萇里

申培轅固各專門誰似毛公詁訓尊北海作箋傳古學西河製序啓真源四詩未墜斯人出千載云遙故里存太息後賢矜鑿空欲將部婁廢崑崙

董子故里

蒼莽長河古木疏。流傳董子下帷居。
天人不媿賢良詔。道誼羞稱功利書。
曲學公孫方貴幸。助邊卜式蚤遷除。
空譚災異真何用。絕倒從游呂步舒。

周亞夫祠

棘門霸上兩營分。細柳堂堂獨不羣。
大慰君王拊髀意。竟收頗牧作將軍。
重厚堪爲少主臣。顧成遺命記來真。
如何吳楚功成後。撤箸翻憎鞅鞅人。

途中偶作

久晴厭塵揚。久雨苦泥滑。正使不晴亦不雨。曉猶畏風午病渴。
人生大患求無狀。乃以我相去聲咎造物。一身所欲尙難副。
天公焉得人人悅。吾儕乘傳四牡駢。日有廩給廩度支。居停得所人忘疲。
客行如此樂復樂。偶值暑雨意不怡。何況悠悠行路者。敝車羸馬愁輞飢徵逐。名利將奚爲。

卽事

畿南千里列輕郵。纔過雄州又莫州。半日晴兼半日雨。五分夏雜五分秋。
綠楊樹底鳴蟬語。紅蓼邨中浴鶯浮。指點昔年來往地。飛鴻指爪幾曾留。

晏城

地入齊河縣。城仍晏子封。禳星詞正大。枕股義從容。節儉砭時失。流連究主調。但存足欲戒。抑殿益何庸。

將至開山鋪

青山正如黃叔度。旬日不逢鄙吝生。忽見馬頭晴翠湧。計程知已到長清。

長清山行

四圍屏障似天成。人在青山缺處行。雨過乍添谿水響。秋涼偏愛嶺雲生。朴淳摩詰田家句。平遠營邱畫。裏情好景當前愁。易失停輿卽事一回賡。

登岱

巖巖氣象傲王公。錫號天齊配昊穹。五嶽降神尊第一。長男出震位居東。登臨始覺乾坤大。讚誦真慚擬議窮。梁父肅然分左右。同時頰首丈人翁。

歷盡嶇嶔十八盤。攬身已在碧雲端。煙光依約齊州小。水氣微茫少海寒。石壁尙留唐帝隸。玉符莫問宋家壇。傲來_{峯名}高峙空千丈。俯睇聊同一簣看。

水激沙崩石磴危。振衣直上不言疲。畏難長恐中途誤。陟險全憑定力持。目極吳門橫馬匹。手摩秦樹認虯枝。壯觀天借今年雨。添得銀河百道垂。_{前月大雨磴道間爲水所壞行至半山半尚有相阻者予堅執不可}

半生虛慕列僊材。日觀天門未到來。此度初窺真面目。新秋更喜豁氛埃。已離下界衣無垢。漸近剛風樹。

不栽偃蹇羣峯休傲客。新從岱頂賦詩回。

程蘊山明府招飲白鶴泉上

晨游東岱上層巔。歸路重尋白鶴泉。山水夙饒狂士癖。淹留爲有主人賢。蒼茫擘絮雲初合。瀲灩浮波月正懸。酩酊今宵判盡興。詰朝南去又揮鞭。

羊流店謁羊太傅祠

古祠瞻拜薦山肴。野店西風石徑坳。墮淚碑猶存峴首。浮江計已定吳郊。輕裘偏愛文人服。杯酒何嫌異國交。不是君王能信任。樂羊三篋謗書淆。

宿遷道中

近水田多下。依岡徑半荒。人貧愁旱潦。地小束隄防。老屋苦爲瓦。終年麥作糧。莫嫌淮北陋。千里亦同鄉。

雨中過永濟橋

垂虹一道枕清波。漁戶擎篙挂綠蓑。載得滿船魚虎子。秋風細雨六塘河。

隄上

三伏汛初過。新秋仍滿槽。增隄沿歲例。刈葦歎人勞。颯向林端過。波逾屋頂高。寢薪憂厝火。迂闊獨吾曹。

清江浦懷舊

壬申之夏渡清口。固哉亭前賦折柳。是歲相國高文定公具舟送予北上同舟者仁和周君天度陽莊君櫂及子三人固哉艸亭在河道總督公廨之西文定公所建三千里路送輕舠。素心晨夕得二友。周生媯雅才胸羅四庫無不有。莊生倜儻士痛飲狂歌坎鼓缶三人齒序我最少。挹袂拍肩相左右。只言莫樂新相知。風裏浮萍那長守。我今乘輶重渡河。已成老翁髮未皤。莊生投効周生死。聚散零落同逝波。艸堂突兀猶如許。艸堂主人今何處。華屋山塲鬱眼殊栗。主空聞祀袁浦。十四年來如夢中。雲泥泡影總成空。惟餘九折黃河水。仍與清淮流向東。

漂母祠

一飯且知報。寧忘推食恩。少年輕國士。老母識王孫。惠比千金重。名將百代存。娥姁亦巾幘。鐘室淚空吞。
試問真王貴。何如守釣磯。生慚增等伍。那至結陳豨。
鐘室謀何亟。平城計已窮。暮年思猛士。太息擲良弓。

董江都祠和冰持前輩韻二首

漢代徵賢良。天子臨軒策。晁董及公孫。舊史可尋繹。江都獨純粹。言必則古昔。六蓀是表章。一使爝火息。
嗟哉曲學徒枉尋。勵直尺居然。廁公卿坐受小吏白。君看平津閣。何如廣川宅。休言宦不達。幸免故人責。
先儒專一經。白頭守師承。惟公業春秋。天人理可憑。人事或僭差。五行災異乘。貴近勿優容。天警見園陵。

眭李譚禩祥所見判淄灑讀書重有識毋任勦說仍膠西王雖倨禮賢尚足稱下馬拜遺祠百世願振興

同冰持前輩登金山次韻

平山佳麗說揚州爭似江心翠黛浮車馬塵埃從不到忽疑天際結飛樓
蒼茫四顧全無路縹緲中流得此山身住風波卻安穩始知方丈在人間
遠望若若紫蓋形馭風頃刻到青冥只疑身是乘槎客銀漢中央一點星
妙高臺聳俯羣山玉帶橋頭水一灣莫道單椒形勢小聲名久已動江關
銜刀如廁也徒勞兵解由來數莫逃世上豈無營葬地卻將遺蛻付風濤
禪房要下各排連曲徑穿來翠嶺巔試取中泠第一水要從波底得真泉
半日無風海氣晴山靈知我遠來情游僊真挹浮邱袂同到金鰲背上行
焦先舊隱若堪攀咫尺丹梯想像閒得隴何妨仍望蜀取之不禁是名山

游寄暢園

名園結構自然佳真在青山綠水涯奇石介如廉士操清泉鏗爾古音諧濃陰半畝松杉在樂事三春花鳥皆萬歲亭前瞻聖藻輞川別墅詎能儕

虎邱

巨石千人坐。清秋雙屐停。樹含新雨潤。窗入遠峯青。臺識高僧跡。池藏古劍靈。題名多未蝕。手錄補圖經。

左旁崖石有淳祐辛亥四明程振父等題名右有淳祐癸卯長樂潘昉等題名德祐乙亥天台戴覺民等題名又石觀音殿壁間有宣和六年胡少汲等題名紹興八年向子諲題名自來修山志者皆未之載

山塘

宛轉山塘路。繁華自昔傳。波光千里暝。郭外萬家連。樓閣煙中市。笙歌月下船。狂游思曩日。彈指十餘年。

游上方山

果然奇秀占三吳。樓閣空明入畫圖。半畝疏篁蟠徑曲。百尋紺塔倚雲孤。山容蘊籍真名士。波影清妍彼美姝。宜雨宜晴宜月夜。石湖元是小西湖。

石湖

激灑紅亭射曉霞。波光百頃渺無涯。居民種芰分湖面。小艇叉魚踏浪花。遠浦風煙通震澤。上方鐘磬出楞伽。田園雜事皆詩料。曾是當年參政家。

泛澹臺湖

解維鮎魚口落帆寶帶橋。激波杳無際。十里明青瑤。輕颯出其閒。快翦分生綃。煙開虹亭樹。風動淞江潮。水禽去又來。葭葦寒蕭蕭。緬懷浮家客。清標不可招。臨淵起餘羨。且聽榜人謠。

入德清縣界有橋曰望僊喜其名與吾鄉同作詩紀之

故園門對小橋開。顧浦西偏一水洄。此地嘉名欣偶似。今宵鄉夢若相催。魚梁蟹斷分明見。桑葉蘿絲次第裁。怪得征人屢回首。便疑身已到家來。

初到杭州

生平但願識杭州。便抵人間萬戶侯。五十日程欣始到。四千里路不空游。湖光澹沱遙連郭。山色清佳恰傍樓。只待秋深公事了。畫船載酒暫勾留。

試院戲題

終朝閉閣亦何爲。萬卷文書次第披。還怕粗心失佳士。闌中一月廢吟詩。
秋風片片落花飛。射的雖懸入彀稀。簾外未知逢勒帛。點頭猶自祝朱衣。
壯游濟勝興空賒。閉置真如新婦車。一道重門分內外。吳山咫尺卽天涯。

食筍

簣管千畝采人頤。已過春山燒筍期。差喜鞭梢秋正長。食單頓頓一斤貽。

主司供給單。每日鞭筍二斤。日有兩頓食。故云。

墳榜

丹沙竹箭眼前收。衰衰諸生放出頭。百炬燃來渾不夜。文光直射斗牽牛。
揣摩剽襲枉辛勤。千手雷同欲亂真。別白淄澑心獨苦。要令世有讀書人。

青袍鵠立望如何得意常稀失意多留取寸心公道在冬烘頭腦任人訶
鍼石相投有夙因飛花茵溷那能均宋家坦率休輕誚我亦當年落解人

泛湖

秋水清無滓天然鏡面平四圍山作髻鏡裏照分明出郭便離俗泛舟聊適情樓臺金碧色人在畫圖行
九日浙中當事招集小有天園登高卽席得句
依巖面水敞軒堂賓主東南翰墨場信有湖山稱絕勝不妨風雨作重陽是日笙歌入耳音非俗詩酒當筵興最狂佳節向來孤負了今朝高會願無忘

表忠觀

錦袍玉帶儼天人鐵券當年字未湮運至開門稱節度時平納士列功臣碑文淳古思和仲祠宇馨香續妙因忠孝千秋終食報卅傳枝葉尙紛綸

岳忠武墓

已奉班師詔空憐涅背文雕兒能告密竟撼岳家軍
一紙到詔獄雙棺藁葬時五郎猶有子二聖竟無兒
公案莫須有沈冤何日伸東朝猶未返遺恨賈宜人
文臣勳愛錢武臣多惜死中原事可知含冤到獄市

浙闡歲事蒙恩給假省親恭紀

久列蘭臺校祕文。每依北斗望南雲。叨承鳳詔衡多士。曲體烏私荷大君。十日循陔申眷戀。一庭舞采試續紛。老人倍覺精神爽。聽話天恩到夜分。

程才濟北又湘南。玉尺叨持已度三。敢戀湖山尋勝槩。庶憑文字契真參。人誇桃李新陰茂。天與椿萱老境甘。此日登堂拜家慶。添將佳話入叢譚。

故鄉風景尙依稀。暫卸征衣著錦衣。門外喜無熱客鬧。案頭猶是舊書圍。家傳壽骨占應驗。臣祖贈大夫王炯年九十二母朱世戢良箴誠勿違。贏得親朋相歎羨。瀛金終讓一經韋。

經旬子舍重留連。回首睽違十四年。車服敢言稽古力。箕裘恐負義方傳。翁誇豐饌休扶杖。母恤單寒爲著絲。分付臨岐無別語。主恩高厚寸心鑄。

過青駝寺遇雨

青駝寺北去匆匆。古木寒煙四望同。十月東風吹雨過。蒙山全沒暮雲中。

口占

調調刁刁西風生。蕭蕭撼撼落葉輕。秋蟲唧唧復唧唧。客子行行重行行。

曉行

曉星欲落猶未落。僕夫催我起趁站。清泉橫道淺可涉。老樹人立儼冠劍。誰家牛鐸已先鳴。雜以鞭笞言多儳。我語僕夫且緩行。月黑沙深防馬陷。

望岱宗殘雪

雨霽已三日。岱宗殘雪明。斜拖吳觀練。寒逼泰安城。風勁裘知敝。霜濃酒易傾。匆匆乘傳過。回首玉崕嶧。

山行

沙回路轉歷巔峩。窄處纔通劍一械。獨木橋敲聊代筏。隻輪車小卻張颿。蓋茅屋比旋蝸縮。戴石山如覆釜。驅日暮馬蹠行較疾。識途應喜脫征銜。

十月二十八日河閒道中遇雨

十月小雪候。北方例無雨。昨已入大雪。頗訝氣蒸礎。晨興日光澹。亭午雲氣聚。微雨從北來。廉纖絲萬縷。淅淅落疏林。滑滑憚行旅。彷彿江以南。小春候如許。六合今一家。天意示和煦。徒以疆域分。淺哉夏蟲語。

雪後過鄭州

昨來猶見雨斑斑。那識飛霑積此間。雪滿寒原全沒路。霧籠遠市只疑山。官郵百里分炎冷。客子兼程又往還。趙北燕南今日到。孤城指點瓦橋關。

趙北口殘雪

林端積玉尙封條。冰下叉魚泛小舠。想得西湖當此日。孤篷聽雪段家橋。

琉璃河

征車轆轤媿塵顏。咫尺西峰未易攀。一片玉裝成世界。琉璃河上望房山。

題查恂叔太守榕巢圖

太平賢守政多暇。廨西一池綠波瀉。不須岸上更牽船。頗喜枝頭可築舍。一榕婆娑數畝餘。材不材閒天所赦。直榦撐空風日遮。橫枝臥水龍蛇化。向背俯仰隨面勢。似與先生作閒架。巢居之閣有前例。嘉樹何嫌吾久假。開徑祇須就樹根。安窗恰好尋葉罅。一榻以外長物無。十笏之居樂土借。水氣微茫只似秋。月光穿漏偏宜夜。判牘何曾公務妨。覓句且將熟客謝。身居瘴鄉貌更腴。日坐斯巢美無價。只今卜宅傍春明。尙戀前塵如味蔗。乃知寄託苟不凡。一枝居然勝廣廈。不然打頭矮屋長欠伸。樹猶如此徒悲吒。天南榕樹多無限。此樹因公得名乍。丁寧莫掃舊巢痕。它時好與甘棠亞。

漫成

一水逶迤活羣山。峭蒨親日長。桃自銜。春蚤柳橫陳。蜂蝶忙何事。絲蘿施有因。喬松千百尺。偃蹇不隨人。

丙戌禮闈卽事用壁閒韻呈望山相國漫士少司農鳧川少宰及同分校諸公

南宮登俊鎖闈深。元老司衡赤鳥臨。燕許文名推蘋苑。韋平相業出儒林。探驪真喜珠光映。射斗還愁劍氣沈。話到寒窗稽古日。風檐甘苦卅年心。

廣座從容語笑深。聚奎堂上德星臨。前身永叔元文伯。與歐公同當代宣公久翰林。煙染松煤香細細。光分藜火夜沈沈。冰壺表裏俱激澈。想見和衷一片心。

勺水難分渤澥深。螢光敢竝月華臨。隨班幸躡僊人跡。列坐真游作者林。刻燭已輸才捷敏。剝蕉猶媿思深沈。穆如一誦清風句。取士無非報國心。

斗室低吟一榻深。七年光景兩回臨。庚辰會試曾預分校飛鴻踏雪重尋跡。新筍逢春又出林。所望宗工懸尺度。只愁宿學易埋沈。應真十八東西列。同證菩提不染心。

題邵蔚田侍讀收綸圖

六鯉曾得手。獨繭遽收綸。此去江湖闊。煙波自在身。
緣木人求欲。信天吾所師。得魚同一飽。漫畫亦奚爲。
一璜何足戀。白首釣磻谿。試看投竿者。江鄉醉似泥。
蛇足休重畫。屠刀且善藏。從今林下好。見一榜新堂。

題趙編修鷗北耘菘圖

淺水淙淙雨後添。讀書不礙灌園兼。猩脣鹿尾都嘗徧。那及秋菘分外甜。

冬至後六日錢籜石少詹招同查儉堂太守紀心齋侍御程魚門舍人畢秋飄侍講曹竹虛編修
小飲分韻得日字

三百有六旬赴壑蛇行疾吾儕耽文酒爲樂時勿失朝聞折簡招快若癢去蟲隆冬相暖熱作會慕真率。
後至不我拒密坐可促鄰酒行蕉葉三客偕竹林七捫腹方便便舉醻尙逸逸主人顧妃客言啓畫禪室。
橫斜萬玉圖煮石山農筆席間出王元章萬玉圖長卷傳觀一一皆生動疑有暗香出華光與補之誰能漫甲乙忽憶香
雪海玉梅萬株密此時踏雪尋清逸興無匹見彈思炙鴟欲語失笑哇近游天所許懷歸我已必銷寒判
今宵友梅願異日

送趙雲松出守鎮安

詔守繁難郡官辭侍從班文雄能敵瘴政簡足安蠻臘月衝寒去長途叱馭艱天教詩境拓飽看粵西山。
世方尊外吏君尙戀春明結習惟文字關情獨友生才由更事出心到瘴鄉清莫獻籌邊議南交亦我氓。
府南爲交趾地交人奉職貢甚謹故云

謝文節橋亭卜卦硯歌硯爲查裕集

是何一片石千秋磨不磷疊山先生遺手澤滿堂觀者神爲振當年變名入建陽朝天橋上亭中央明夷

三日義不食却以破硯當餳糧君平賣卜非吾匹北望中原長哽咽眼中只有石丈人江南且無廝養卒集賢學士來求才手書卻聘心不回太息作銘刻左右重公并重此石友硯之兩旁刻程文海銘云此石如石不如石堅誰似當年采薇首陽采薇計已成倉皇重作燕山行憫忠寺中守義死不食而堅與硯似不食守義賢也凡三十二字

硯背有明人題宋謝侍郎硯五字左方云明永樂丙申七月洪相地得之閩後學趙元

榕巢太守癖嗜古紫檀匣子深藏弄斗室居然七客寮耐久石公堪共語歙州龍尾名夙聞貞心不轉獨此君停尊欲酌忠臣酒炙硯慚無放膽文

病起

四十年猶壯經旬病獨侵害風增欬逆伏枕屢呻吟思澀詩魔退精銷藥債尋今朝差快意屋角聽鳴禽五色徒盲目三餘欲息肩安心真是藥省事便成僊昭略生來瘦元章近日顛山妻苦相勸第一且歸田人日同王琴德朱竹均曹來應畢湘衡陸健男登法源寺後閣晚飲琴德寓齋同東坡廣陵會三同舍故事各以字爲韻予得曉字

人日例登高此風近來少西曹澹蕩人志欲出塵表約我試春游初哉首基肇法源古寺近毘盧修閣嘗一握去天裁千里極目了鈴語清而和鐘聲輕不窕上方洵嚴淨下界徒纏繞犀首適無事止酒毋乃矯同隊水中魚故交松上蔦聊復恣談嘲不待引介招騷人感初度是日予四十生辰歲月如過鳥念念煩惱縛法

鏡本常皎，在家蒲褐師。李德好譚禪題所居曰蒲褐山房大意已先曉。泰山秋豪末，究竟誰大小。

舟行偶占

十指擎篙邪許同。腰牽百丈曲于弓。篷窗兀兀低頭坐。閒看來船使順風。

浩歌擊楫滿天涯。生長江鄉每自誇。半夜疾風人不寐。始知泊宅不如家。

衛河

河曲如之字。飄斜作扇形。依依岸旁柳。猶贋數分青。

臨清

城外雙流合。波光玉帶彎。風尖舟似箭。水縮岸成山。置牀裁通漕。譏商舊設關。北來稱鎖鑰。煙火萬家環。

阜河

宿遷

出牖通泇口。沿流下阜河。飄隨風轉脚。艤過水旋渦。樹老殘黃葉。沙明浴白鵝。旅人聽最喜。半夜有吳歌。

左挾中河右大河。彈丸小邑地無多。長風送客過淮浦。輕舫沿流學楚歌。畚土丁夫勤版築。算緝關吏恣喧訶。拊循彫効良非易。傳語當官政莫苛。

見道旁艸舍戲作

雪壓風掀雨又零。編氓終歲苦伶俜。誰知廣廈神僊客也。縛黃茅作小亭。

氾光湖

澂湖萬頃鏡新磨。撒網家家住碧波。行到淮南勝淮北。艸房漸少瓦房多。

冬至京口阻淺

到家途漸近。留滯復連朝。風逆濤頭縮。天寒澤腹枵。行傾京口酒。坐俟海門潮。不寐鰣魚目。隆冬第一宵。
偕蔣春農舍人游甘露寺

潤州城北三芙蓉。昔人曾以神山況。屹如北固居中央。震爲長男方主鬯。老鶴昂藏首俯啄。卻顧金焦雙翼張。甘露之寺當其巔。傑閣凌虛誰昔剏。茫茫浩刼閱廢興。刹竿千載猶無恙。元豐鐵塔插紫霄。正統金經闕龍藏。修廊屈曲宛虹垂。正殿巍峨滿月相。六時梵唄長讚誦。萬里江山作供養。古鐘製從至正年。巧思乃出平陽匠。達魯花赤識姓名。方信圖經語多妄。大殿銅鐘元至正九年造鐘款有鎮江路達魯花赤馬速忽總管李世安鎮江上萬戶府達魯花赤永安名又有溫州路平陽縣匠人名鎮江府志職官表失載馬速忽名又誤以李世安爲達魯花赤不知世安漢人不得任達魯花赤也我昔翦江數往還探奇未到常怊悵天寒潮涸阻歸舟。夙緣未了今宜償。舍人本是山中人。導吾先路蠟屐網。水枯遙指巖壁露。木落兼無榛叢妨。徑造禪關心地涼。更上岑樓眼界放。哆口直欲吞滄溟。摩頂居然俯羣嶂。平生富貴吾不戀。一餉清閒神所覩。會須徧踏江南山。竹杖從君次第訪。

遺懷雜題

悼亡妻
恭人

泊宅秋來願少酬。輕裝穩上潞河舟。清輝玉臂今何在。看月蓬窗獨自愁。

布衣椎髻不曾嫌。雅稱貧官上竹鮎。懊惱疾風吹爨室。從今擬廢五音占。

京口阻

淺雨日

挂壁丰姿宛似君。返魂那有異香薰。真成南旺湖頭水。行到中流卻兩分。

鐵甕城邊風雪餘。京口阻淺雨日三山秀色望何如。魂歸到此應留戀。四十年前說悅初。

恭人丹徒學生于舍

江上青螺秀作堆。風流眉嫵事成灰。將愁排遣終難子。只似潮頭去又回。

生無枉橫亦無愆。相見今生詎有緣。倘遇蘇州趙十四。結壇判倒一囊錢。

伯通橋下水如銀。一昔經過亦愴神。廡下祇今誰舉案。固應目我作凡人。

美酒新魚自製詞。急流長怪退猶遲。今朝果泛東吳櫂。孤負懷歸管仲姬。

管夫人漁父詞身在燕山近帝居歸心日夜憶東吳斟美酒膾

新魚除卻清閒總不如。趙子昂題云：吳興郡夫人不學詩而能詩，不學畫而能畫，得于天者然也。此漁父詞皆相勸以歸之意，無貪榮苟進之心。其與老妻強顏道雙鬢未全斑，何苦行吟澤畔，不近長安者，異矣。

彈指匆匆歲又除。安仁鬢髮已全疏。縱然下溟田居遂。更有何人出荷鋤。

八音歌效黃山谷

金屋貯阿嬌。彈指朱顏彫。石椁自云固。長夜不復朝。絲吐蠶已僵。玉韞璞空剖。竹林有達人。閉關但頌酒。匏樽引自酌。醉入無何鄉。土中皆可埋。青烏誠荒唐。革故鼎取新。勞勞歲月促。木散匠弗顧。得全吾道足。

金人背有銘。戒哉三緘口。石言晉魏榆。反常乃爲咎。絲惟飲無何。籍不挂減否。竹直懼先伐。水虛故善受。匏繫人所全。櫟散天與壽。土炭重有時。榆枋起亦偶。革華暫相於。毛穎盟耐久。木人石心兒。仲御吾尙友。

潛研堂詩集卷九

到家作

十年詞賦殿頭傳。一夜蓴鱸夢裏緣。竊比奎章虞閣老。在朝應制又歸田。

虎邱追和清遠道士韻同陳藥耘作

春風吹我游。閉門真癡漢。最近數虎邱。而無猛虎竄。平平轉多奇。小小頗堪玩。陳生今雲卿。肯伴元結漫。
舟繫青山橋。人行綠楊岸。劍池水清淺。講臺石零亂。摩娑題名字。殘缺已失半。俗生不好古。遺文日放散。
安能呼蜉蝣。與之語。昏旦日高花坼房。雨過禽刷翰。撫景良可咍。學道遲自歎。皈心普門品。合掌人天贊。
平章事曾公亮而下。凡九十餘人。不署年月。以宋史宰輔表公亮除授次第推之。當在熙寧初矣。

和陸魯望補沈恭子詩韻有序

魯望補沈恭子詩。不知恭子爲何人。予以南史證之。蓋吳興沈初明也。初明仕梁爲吳令。陳文帝時以明威將軍還鄉。卒于吳中。其答張種書極道虎邱之勝。誠不媿風流詞翰之目矣。所謂清遠道士者。或寓言如茂陵通天臺之比。抑世果有僊人。千年不死而游戲人間者邪。晉宋已降。官未至台司。又無五等之封。而得謚者。例稱子。

安期曾干楚柱下亦仕周誰云列僊人非卽爾我儔關洛一枰弈秦漢兩部優日月眼中過山水腳底游
棲神遨八極鍊形藏九幽不知何時臘但覺天易秋適來與我遇勾吳有故邱竝坐千人石偶配劍池流
彭殞孰爲天今昔奚足愁翩然化鶴去肯作樊籠囚桃源津已問干寶記獨搜悅兮成夢覺爾唱我且詣
虎邱泉第三又新品久傳阿誰屈次五後來強爭先

陸羽品虎邱泉第五

人心有愛憎泉德無差殊夫惟不爭名是以長不枯

游師子林

柏池松徑未全荒咫尺居然萬仞岡題詠最多名士句清幽爲近上人房繚而曲似盤之谷阻且長非水
一方畫手倪徐今不作天留真本在吳間

鱗諸巷俗訛爲穿珠巷

炙魚抽劍決須臾曾爲吳王啓霸圖何事世人多愛富卻將俠客作穿珠

虎邱觀玉蘭

虎邱玉蘭天下傳坐臥其下日屢遷游人莫漫輕題品曾閱游人六百年
白于縣更膩于肪晴日烘開澹澹香共信潔清能自保生來不上美人妝

托根近在法王居。萬朵含苞次第舒。欲祝人天長養力。更無風雨一句餘。

同陳藥耘宿陸篠飲荷風竹露艸堂

江漲橋頭路。油雲濕四圍。偶同陳正字。來訪陸探微。艸閣邀山入。蔬園得雨肥。主人留宿宿。翦燭話依依。

同篠飲藥耘步至湖上泛舟登孤山放鶴亭

湖山與我有夙約。際曉東風收雨腳。清游造物詎我靳。火急出門杖策各客兒。蠟屐從所好。陶令籃輿且先卻。花光橋抵松毛場。桑柘陰陰青繞郭。一重一掩引入勝。四山合沓疑張幕。三年再到西子湖。澹妝濃抹渾如昨。榜人解事若相待。一葉扁舟鏡中著。沿緣跫音荇藻閒。卻上孤亭望寥廓。昔人孤絕肯結廬。特立雞羣意有托。茂陵不艸封禪文。齒冷乘軒衛公鶴。有山可居品便高。欲買空言氣徒索。興來且作十日游。廉讓之間差不惡。

上巳日游靈隱諸山

不負嬉春上已期。氣晴天朗最相宜。菜花黃惜三分減。柳葉青兼萬縷垂。對酒常醒差少憤。愛山成癖未須治。鷺峯著意延生客。紫翠玲瓏特地奇。

飛來峯

岩嵬鷺嶺認靈蹤。始信飛來第一峯。壞塔尙傳埋舍利。幽龕隨處肖真容。洞穿巖腹皆通透。泉出雲根自

激淙結習未能忘好古題名一一拭苔封。

湖上雜題

十里春風碧玉流。四圍曉霧翠眉浮。游人第一難忘處。明聖湖中水月樓。湖船精妙者名水月樓見戒庵漫筆

一片光明鏡裏身。四時涼燠總宜人。十分面目纔窺半。前度深秋今暮春。

湖上寓樓

錢塘湖口寺門前。黃篾三間一榻便。排闥山爲不速客。傍檐柳亦有情緣。清宜摩詰詩中畫。窄比思光岸上船。晴雨春光都領略。樓居真足喚神僊。

葛嶺

稚川澹蕩人偶爲餘杭游。遂令斯嶺名與公俱千秋。我來登絕頂。江海生雙眸。雲蒸僊巖石。竹覆僧寺樓。井溯煉丹舊。臺延初噉浮。清泉流鳥下。宛聽琴空侯。蚤衰導養拙。神僊非所求。卻掃謝浮榮。肯許同調不。何必訪勾漏。此中可忘愁。

葛嶺詠古

集芳園裏貯蛾眉。燈火西湖此一奇。六載襄陽園不解。相公卻有半閒時。公田搜括竟何堪。幕上營巢計太慙。風月無邊枉拋卻。南行愁煞木棉庵。

鳳凰山

天目飛來一鳳皇。婆娑兩翼拱錢塘。
木波去後遺蹤失。猶有人稱御教場。
一王駟馬萬人誇。腰鼓城堅靜不譁。
造物那知旁舍貴。卻驅怪石爲排衙。

水樂洞

水石相撞擊。善鳴假以鳴。何必絲與竹。太音無虧成。

三生石

咄哉澤公癡。三生證夙諾。顛倒一念誤。乃爲情所縛。
生死且未忘。何怪長墮落。至人外形骸。無相本無著。

重游飛來峯登絕頂疊前韻

只疑福仄少行蹤。捫葛真登最上峯。
石露礬頭何齒齒。雲生鳥下自容容。
夕陽倒射巖閒塔。夜雨平添澗底淙。
珍重飛來莫飛去。天龍爲我一丸封。

韜光庵用白樂天招韜光禪師韻

嶺上疑無路。雲中別有家。
行過翠竹徑。忽見金蓮花。
浩蕩登高興。清幽學道芽。
啞羊真可哂。不會趙州茶。

神尼舍利塔

神光夜起般若寺。阿師識兒風骨異。
五柱入頂鱗角生。苦桃駢走兒墜地。
焦梨嚙索數欲終。晚得天下文。

軌同此公距止作柱國。佛法所佑非人功。仁壽初元頒舍利。各造浮圖石函瘞。河朔清流解貢訛。普爲諸州紀符瑞。妙善菩薩入涅槃。覲地伐大漸放癲。阿摩侍疾數無禮。區區佞佛良可歎。慈悲之教自天竺。沈猜峻法祚宜促。可惜神尼付囑言。不勸君王少誅戮。恆河沙劫閱廢興。斷塔猶以神尼稱。人言佛光夜常見。照徹十方無盡燈。

僧房偶題

公案重重落臼窠。上堂舉拂意如何。九年面壁無言說。失笑兒孫語錄多。打包參學辦行縢。青豆房頭度牒增。休說解吟僧亦俗。爾來并少作詩僧。

學士橋

背郭一灣春水活。臨湖盡日遠峯描。它年倘卜杭州住。記占清波學士橋。橋在清波門外

寶成寺觀元人所鑿麻曷葛刺佛石像次藥耘韻

世間何人最慈悲。調御丈夫號悉達。若云慘毒可度世。何異活人用野葛。世尊皮肉捨勿吝。普濟衆生如捲渴。云何番僧作變相。卻塑魔王喚菩薩。祝釐漫說朶兒禪。梵語或訛馬吃刺。纍纍髑髏懸胷前。吮血磨牙澹生活。旁觀縮舌增怖恐。錯認鬼母刦兒鉢。我聞黑神起北方。柳貫護國寺碑。摩訶葛刺神。漢言大黑神也。摩訶葛刺即麻曷葛刺譯音無定字。提兵南下助式遏。當時君臣各膜拜。受戒皈依意惻怛。涿鹿之北全寧南。涿州全寧路俱有摩訶葛刺神祠。六時供養

求解脫此像鐫從至治年石不能言也塗抹供羊羊果害人不帝師義墮氣已奪輟耕錄今上初入戒壇

見馬哈刺佛前供羊心上曰曾聞用心人肝者有諸帝師答曰有之凡人萌歹心害人者事覺則以其心肝作供耳上再問曰此羊曾害人乎帝師無答輟耕錄所云今上謂庚申君也

寶石山次韻藥耘

岩嶺出城西卓立千花塔雷峯儼弟羣鴈行不相雜曉迎暾光射暮受雲氣納盤石踞其顛呀如門半闔山高風自涼匪秋亦颯颯二分垂在外側足敢輕踏遙聞鐘磬聲隔嶺相應答天然好圖畫可惜付郵衲安得買山資結茅安木榻澹沱高士湖一日繞一帀傳聞寶正年制書可摹搨千搜竟何有前路碧蘚合

游吳山紫陽洞

城隅抱崇峯樓閣插天半支從龍山分秀奪蛾眉粲晨聞折簡招濟勝得良伴小泊學士港同訪列僊館孤亭洵四宜平臺詫大觀紫陽頂最高丹磴陟匪憚湖山秀而文江海浩無岸分明在目前一一几上玩山腰尋古洞曲徑連復斷人險嶝穿珠得路鳥攫翰飛來青芙蓉舉頭開紫絲幔豐下朶頤垂窪中引手盥迷蹤注眼認異境咋舌歎僊翁昔棲真妙用在嫋散胡然怛化餘留偈召舉案乃知情難忘夫豈吾輩但山中遺蛻在俯仰人代換令威倘歸來安識舊里閈學道煮沙初駐景熟胛旦對酒且放歌低昂任土炭

湖上對雨

疾雷殷殷陣雲烏對面山光一霎無牖口忽疑噴急雪波心無數撒明珠快思老杜翻盆句濃似襄陽濺

墨圖獨坐小樓叫奇絕。雨湖真箇勝晴湖。

連日徧游湖上諸刹有懷古德各題一絕

虎跑寺寢中

說得須行得。何人悟宗旨。多事兩於菟。遠移南嶺水。

法相寺行修

修公古如來。宴坐味禪悅。參禮但默然。永明大饒舌。

聖果寺文喜

前三後三三。惘然昧多少。文殊自文殊。大意吾已了。

靈隱寺慧理

杖錫西天來。呼猿明月上。孤峯飛何之。師言毋乃妄。

鳳林寺道林

棲禪依鳥窠。安心架巖。广可笑宰官身。不知住處險。

瑪瑙寺智圓

杜門中庸子。不識王欽若。致意老慈雲。一僧且留卻。

龍井寺元淨

辨才住訥齋。非辨亦非訥。何處見全身。睡霧卽明月。

智果寺道潛

苦空百念冷。新句尙驚衆。一酌參寥泉。是身卽是夢。

歸舟口占

輕波滑笏一飄開。細雨留人濕綠苔。多謝南高峯頂塔。五十_{平聲}里外送儂回。

題王麓臺蘇齋圖卽用卷中查初白先生韻

峨眉僊人去渺茫。誰能抗手與頡頏。遼哉尙友七百載。有若米顛寶二王。與古爲徒世大笑。從吾所好生非狂。稽首拜遺像。堂堂復堂堂。儼然俛仰揖。讓于其旁。當年桄榔林中僦屋尙見逐。祇今空齋供養弈。弈鬚眉光。鏡潭月相磨。繡谷花半掩。地已占清涼。心真忘夷險。麓臺翰墨奪化工。咫尺萬里望不窮。雪堂白鶴觀。悅忽移此中。天人游戲八極同。飛鴻偶見指爪蹤。不信桃花塢畔宅。眼中突見長帽翁。伊余生晚思遺風。裴回小庭三徑通。珊瑚網中畫卷亦無數。清遠獨愛王婁東。丁寧勿涴寒具手。過眼雲煙夫豈偶。紀聞它日傳中吳耕漁之軒名與俱。倪高士耕漁軒圖爲吳人徐達左作銘心絕品世所無。

題王石谷蘇齋圖

笠屐頹唐古丈夫。騎鯨去遠欲相呼。東坡號借香山白。繡谷齋顏玉局蘇。春夢過來那有迹。小園賦後未全蕪。摩挲雙眼誇奇絕。心折耕煙第二圖。

題繡谷牡丹圖

康熙己卯蔣樹存先生邀諸名流于繡谷送春庭中牡丹初放馬元馭扶羲楊晉子鶴徐致采若及日存上人上睿各圖一花乾隆戊子十月先生孫應平出圖相

示爲賦
二絕句

胭脂多買亦何爲。一朶居然絕世姿。好手寫生從古少。徐黃難得在同時。

藍尾三杯酒未乾。斬新花蕊出豪端。百年手澤能藏弄。羞煞人家黑牡丹。

家中牡丹

暮春三日到臨安。頗恨尋春後牡丹。那識故園遲半月。天香猶是待人看。

讀漢書

黃綺避秦漢。采芝汗漫游。不與豎儒伍。而況辨士流。吾冠幸而恙。欲溺將奚由。姓名落人間。失計逢留侯。鴻鵠羽翼成。徒爲娥姁謀。假館建成所。安呂非安劉。區區具金幣。毋乃溷公不。

茂陵慕不死。意與僊人期。豈知巫蠱禍。乃自方士貽。黃老尙清淨。文景所以治。變而譚神僊。所見一何卑。我欲見鉅公。罔上如嬰兒。服藥可少病。勿爲妖妄欺。

在漢中葉後政柄歸尙書。置相不選賢。賣取容默徒。流汗婦參語。僂背吏夾扶。扶陽與防鄉。醞藉稱通儒。

恩澤列徹侯。促媿保位俱。威福自臣作。履霜慎厥初。居攝頤功德。後來奚足誅。

厚味實腊毒高位易觸罪。五鼎食幾時失意便菹醢。不見葛繹侯。刻印拜上宰。涕泣不肯受。自云從是殆。才果濟蒼生。溘死亦何悔。淺哉曲學夫。持祿不知止。

文網日以密。士節日以貶。造請公卿閒。見笑徒自點。鄰席避田蚡。長揖無汲黯。將軍肯臨況治具。吾敢儉。乃公戒牀下。大要教兒謫。偉哉平林朱。願請尙方劍。

持平三尺法。人主與民共。云何武健吏。內深次骨痛。操下束濕薪。一時重足恐。殺人計自安。古法置叵用。天道有神明。好還神所恫。賢哉萬石嫗。斯言可警衆。

贈張丈擔伯

詩翁老去鬢毛疏。風格依然正始初。無事何妨浮白飲。研思雅稱艸元居。羊求舊侶凋殘後。禽尚游蹤冷落餘。魯殿靈光今獨在。它時通德表門閭。

王彙英家藏古錢歌

錢府上士受姓始。我今逃債無從逃。九章綴術亦曾學。不解子母營羊羔。平生最嗜金石刻。鐘鼎款識窮爬搔。貨布雜品儲一二。如捉蠃蛤遺鰐鼈。王生好古今。都穆卜居恰近吳。南濠十年藏弄肯出示。古色斑駁爛錦條。溯初尊盧首作幣。三品後出泉布刀。外圓函方法。九府扣囊底。智自六韜金。刀契錯布么幼黃。

新一代漢先塗高真人白水識已驗造物終厭蛙聲囂五銖之廢開通鑄椒房指爪痕深牢紀元各各吉金
勒三司呈樣頒神皋所嗤僭僞盜正朔寸涔妄欲驕海濤世閒兒女尙厭勝吉語宛轉銘周遭幕文奇詭
難殫述星官北斗下采旄雙魚三雀隱龜背蒼龍糾屈鸞翔翔或言撒帳取善頌貴主釐降夸富豪或云
佩之辟五兵卻鬼可當度索桃願譜洪志人所讀愛而不見空鬱陶多君聚之在掌握區別年代分牛毛
臨川之愚和嶠癖同牀異夢嗤若曹阿堵中物如此良不惡傾身障籠誰訾譽孔方絕交吾已久畫餅差
勝啖白苔白苔艸食之不飢謂孔謂孔瞻謝猿鶴獻嘲休誚北山移

題姚和伯射獵圖

寶馬茸裘態甚都車中閉置哂非夫不看南部煙花記卻擬東丹射獵圖
詭遇休誇獲十禽參連白矢法重尋由來射御無非學見獵何妨儒者心
逐免呼鷹一隊偕雨餘天闊淨于揩江鄉那有寬平地姑妄言之亦復佳

登馬鞍山

一峯縹渺小而奇歸熙甫云吾崑之馬鞍山小而實奇乘興登臨憶少時彈指流光真小劫拍肩名士又新知危崖大字鐫
和仲荒艸孤墳認改之欲倩孔珪謂孔瞻謝猿鶴獻嘲休誚北山移

題王未巖畫并引

未嚴修撰。蚤爲麓臺入室弟子。筆法蒼勁。駿駿欲度驛驅前。登第未久。卽赴玉樓之召。尺素流傳。人爭寶之。此本雖未完。而架構已具。一展閱間。如見經營慘澹之迹。鶴谿主人善藏之。勿爲人豪奪也。

縑素風流數太原。奉常墨妙啓兒孫。
麓臺已老耕煙死。又見吾鄉畫狀元。
浴堂西畔蚤修書。紅杏詩才小宋如。
幾輩句艤矜第一。評量能事要推渠。
買畫金多贍太孺。紛紛贋鼎散人間。
匡廬真面誰能識。一幅模糊未了山。

崑山學宮石

洵美夫子堂。卓立一品石。氣蒸震澤濤。秀分洞庭脈。天公爲鐫剗。雲根起巒積。混沌竊鑿七。空洞腹容百。
舞女大垂手。飛禽小張翮。劍客但蒯緜。神人儼冠幘。中豐肥勝瓠。下銳枯疑腊。豹文窺一斑。螺髻露寸碧。
置之在東膠。重于寶尺璧。雨灑翠娟娟。雲生青圉圉。左股割蓬萊。全身見姑射。玉山連修眉。婁江繚匹帛。
似充雪堂供。不費康樂屐。吾儕雅好事。來觀湖疇昔。謂言丈人峯。來自平泉宅。
石本宋參政衛文節公家物。夷亭潮初驗。石浦居新闢。扇障元規汚。詩取白傅適。奇石聚所好。兼金買非惜。九華列几案。二室落肘腋。羅立如兒孫。得意詫賓客。茲石尤絕倫。與公交莫逆。雲煙過眼殊。山邱回首隔。高齋犂爲田。曲池填成陌。遂令皴瘦姿。半遭屠沽辱。巋然適有幸。觀者愛無斁。巍巍尊經閣。肅肅函丈席。諸生競摩挲。異代發光澤。介如君子。

操偉哉巨人社。它山攻可籍。一簣進求益。洗宜泮池水。蔭借歲寒柏。十鼓媿岐陽。七壁陋張伯。誰云一卷小。肯以九鼎易。卻憶畏壘亭。曾載吳松船。雙峯比泰華。百年挂蘿薜。歸太僕安亭故宅有雙石其一亦衛文節物。邨童敲火頻。牧牛礪角亦。席裏倘移來。劍合真喜劇。盡取望徒奢。得一心已懌奇。傳到公名拜學米。家癖清叔人可重。熙甫記良核。題詩諗後來。流連日將夕。

題西莊丈室散花圖

毗邪一室靜無朋。十笏量來了不增。爲有散花天女在此生。判作在家僧。茂苑春光花白紅。斬新一朶倚東風。天然滿月天人相。只恐劉元塑未工。雕籠百舌弄朱唇。萬首唐詩記得真。見說送郎新句好。清才今又見陳璇。法門不二悟如何。結習多生佛所訶。何事靈山諸弟子。一身容易著花多。淨名示疾原非疾。嚼蠟無心卻有心。多事登肩老羅什。不知吞卻幾回鍼。

邵桷亭築小樓題曰梧巢作詩四首諸同人多有和章邀予繼和

百尺樓居倚碧梧。目窮千里豁平蕪。秋霜躡屐探鴉舅。春雨添棚護鼠姑。境到閒時喧亦靜。心從安後有仍無。南華義諦都參透。牛馬隨人儘意呼。便欲身攀棲鵠巢。安牀恰對樹枝交。購書只似求聲鳥。避俗真嫌在戶蛸。魚乍戲餘蓮動葉。燕方來候竹。

抽梢元亭問字尋常事門外從無熟客敲。

惠子多方據槁梧維塵宴坐作跏趺木因號散能逃斧金爲求祥怕躍鑪立腳定來知地闊置身高處似雲孤堯夫觀物書成後安樂窩中自得吾。

果有楊修菜有巢主賓雜坐閒談嘲樓高雅稱登王粲詩苦偏宜學孟郊親友搏沙嗟易散光陰炳燭莫輕拋更呼便了申初約不遣塵埃積滿坳。

讀蜀檮杌畢得絕句八首

井底蛙聲妄自多鬼兵開國事如何武陽叢冢聞枯骨枉向風塵識八哥。
樂府新聲試轉喉海棠花蕊想風流徐家姊妹皆傾國玉貌偏輸趙解愁。
玉簫歌徹月華新長夜觥籌集會真怪煞嘉王悲底事臨觴不飲太癡人。
翊聖宮深入侍曾煙霄謬陟那能勝十臣各有安邦略專寵無如剃髮僧。
龍舟戲水碧淙淙花外樓臺見數重從此錦城真似錦城頭張幕種芙蓉。
長鞭萬里去何依餘慶新年願已違天水東遷向何處夢中神語出青衣。
指揮如意擁貔貅漫擬隆中第一流卅載平章非伴食它年降表要卿修。
石經次第刻豐碑下筆羞爲輕豔詞莫道降王才思少官箴四語後人師。

外舅王虛亭先生挽詩

華屋山邱瞽眼殊江鄉。太息失潛夫。伐檀詩格先雙井。嘉祐文心啓二蘇。身健幾曾扶卽栗。心安偶喜坐團蒲。十年八座郎君貴。雄誦依然稷下儒。

清羸碧鶴鈍無知。一見偏將國士奇。不獨譽兒兼譽婿。只宜稱舅又稱師。三年寂寞鱣魚泣。七日倉皇梁木萎地下。若逢靈照女。爲言蒜髮已如絲。

潛研堂詩集卷十

京口阻風

恆河回首感波斯。潘岳顛毛蚤就衰。舟遇逆風多費力。人來熟路懶題詩。漸疏肉食牙將落。苦愛山行腳未疲。問訊竹林知不遠。天應留我一探奇。

榜人謠

江上多顛風。三日斷來去。鄰船猶未開。且莫爭先渡。

渡黃河四日入邳州境

水急沙深兩岸彎。經旬不見髻螺環。推篷一笑真難得。目送邳州幾點山。

昭陽湖

濛濛萬頃水雲風。八月猶殘菡萏紅。湖上人家無長物。蕩舟齊出賣蓮蓬。一年強半是辛勤。家具無多只一身。菱角魚苗都賣卻。晒將荷葉當炊薪。兩行老柳綠方酣。百里遙山翠欲含。只少紅樓兼畫舫。風光約略似江南。

謁先賢仲子祠

世已無堅白。誰能免忮求。升堂功自進。浮海去何愁。品與顏曾亞。賢于管晏流。巖巖鄒嶧近。廟食共千秋。

濟寧

鴻爪重來此地留。清波依舊遠城流。天邊又見初弦月。沛上終誇第一州。水引魯橋回玉帶。碑傳漢隸揚銀鉤。尋常那敢輕題句。子美南池太白樓。

杜文貞公祠

森木鳴蟬八月涼。拾遺游跡未全荒。中書落筆才真壯。賓客諸侯老更狂。直欲許身追稷契。何曾譚蘋薄。盧王南池再拜瞻遺像。宛到成都舊艸堂。

南旺

四面皆成浸。中流貫一河。民居編葦易。生計捕魚多。打棗秋霜煮。懸燈夜舫過。尙書遺澤在。廟貌儼巍峨。

分水廟

十夫邪許舌脣乾。挽索長嗟上水難。不道順流元有日。試從分水廟前看。
輕颯如箭激漣淪。下牖開頭捷有神。好語來船莫相妬。明朝各自順流人。

衛河

順水攀篙捷乘風挂席便漸移雙隻堠默數往來船岸柳秋仍綠沙禽晚欲眠河流元自濁不礙月長圓

古詩

治生無良方要取纖嗇善不見東家翁起富百千貫幼小歷辛勤到老腳猶健兒孫漸頹惰蚤眠起常晚
婚嫁選高門煩費不知限產分食指多歲率恐無羨乃逸侮父母空使識者歎
新隴故鬼冢古屋今人居百年一小刦艸木更榮枯當其快意時自詡智有餘錢刀身外物偶爲我之儲
人滿天所概封殖徒區區子孫已難保勿嗤它家愚

東家選入官西鄰試登科側聞長老言祖父積善家一朝遽自大輿服相矜夸內史固貴人里門肯下車
英特縱邁昔行義恐不加世情見爛熟聊付一笑呵

伊尹世所師與人斬一介取之胡不然多多母已太子母算無遺尺寸得始快忍斷友朋交不念骨肉愛
疏傅飲幾何和嶠癖可怪老至耄將及蓋受孔子戒

楊邨道中

岸岸垂楊萬縷斜輕陰日午不飛沙只疑白浪如銀湧十里秋風喬麥花

題王雅宜借銀券

文云立票人王履吉央文壽承作中借到袁與之白銀五十兩按月起利二分期至十二月一併納還不致有負恐後無憑書此爲證嘉靖七年四月日立票

人王履吉押作中人文壽承押

艸堂貲待王錄事少米惠乞李大夫分人以財今已罕稱貸保任古有諸詩人多窮乃往例四壁蕭然了無計雅宜山色難療饑下策區區憑約契誰其借者袁與之白銀五十無零奇萬息二千一歲率貨殖之傳寧吾欺年月日子紙尾壓歲暮責償應不乏生平恥食豪家鯖此來卻費山人押風流寸楮偶流傳筆法圓勁鍼裏縣好事嗟賞歸休文與趙凡夫評估一字直十千褚先生客馬少游此帖爲吳中馬上舍紹基所藏馬生寓褚學士邸乞我作詩述其由歲將暮矣我亦愁有臺逃責招我不

題沈東田觀察小像

調御元無相猶龍患有身信天心是易行樂氣常春山以靜斯壽梅因清益新當前生意滿落落寄吾真
靜裏日如年春來樂事便夢知蕉鹿幻戲任紙鳶牽曉撰青藤杖閒浮藥玉船行窩隨處有觀物悟先天
題箕僊畫爲曹慕堂給諫作

列僊逃人間無爲得自在云何爲物役毋乃洩天縕前身筆墨綠結習了不悔促迫見能事淋漓絢異采
胸中出邱壑意外藏傀儡遙山翠列眉繁花紅綻蓄武陵本人世此景不我給黃門偶得之寶于珠百琲
色相眞卽幻達人視齊等多改切畫廚慎藏弄莫學狂顧愷

臘八日同曹習庵編修吳白華侍讀陸耳山宗人集趙實君齋消寒小飲卽席口占索和
車輪嬾逐軟塵忙官意文情兩欲忘隋書李孝貞傳官意文情一時盡矣不速竟來容惡客無何且飲卽寬鄉鋪糜大勝盤

游飯咂酒兼呼般若湯。招引吾儕相暖熱。詫渠元叔未空囊。

翼日諸公和詩未到疊前韻催之

聽鼓應官有底忙。會依真率約無忘。身藏人海翻成隱。酒遣愁魔別是鄉。只愛澹交深似水。不知世味熱于湯。諸公才大皆詩伯。好句先催出錦囊。

同人約爲詩會遲而未果習庵疊前韻見示依其數答之

身閒心卻爲詩忙。結習應嗤老未忘。臘盡正宜催歲課。交親還似在江鄉。霜肥鐵腳堪成鮮。冰凝高芽好按湯。便擬清譚消永日。從來無底是書囊。黃山谷詩書囊無底譚未了

輕塵弱艸百年忙。自愛垂名久不忘。中酒幾曾妨學道。著書何必待還鄉。聯吟韓愈應招夢。雜體江淹或擬湯。我欲致師慚思涸。匹如瀨水壅沙囊。

題寓齋壁疊前韻

墐戶窮冬了不忙。異同堅白辯都忘。身隨候鴈重爲客。語類籠禽尙帶鄉。故友漸稀星向曙。妄心已去雪消湯。一家長物休嫌少。羞澀猶存舊日囊。

紫薇司諫校閒忙。渴睡希夷一覺忘。大自在能參佛地。無何有可認吾鄉。三冬粗足撐腸米。甲夜先溫洗腳湯。算計平生差受用。東坡居士腹如囊。

再題寓壁仍疊前韻

四十餘年日月忙。蚤衰容易事全忘。推排自媿稱前輩。譖謔偏欣道故鄉。且住爲佳嗤望蜀。徒勞無益莫揚湯。如來慧眼看能破。未必愚公讓智囊。

丹黃塗乙勘書忙。掩卷先愁過目忘。賦別久枯江令筆。說經欲到鄭公鄉。古泉汲井憑修绠。活火煎茶候沸湯。杜左和錢均是癖。休將便腹傲空囊。

鼻端觀白怕心忙。煩惱歡愉要兩忘。形影互嘲皆妄相。神僊可致有真鄉。滑甘且試青精飯。峻利休嘗白虎湯。康濟一身吾已足。千金肘後檢方囊。

一冬何事夢偏忙。梅筍江南思不忘。百里近游船當屋。三農活計稻爲鄉。澆花特地儲新水。薤艸隨時利熱湯。聞說林檎栽幾樹。秋來結子定盈囊。得家書知後圃新栽林檎幾本林檎俗呼花紅

束習庵

款門剝啄不辭忙。坐久譚深主客忘。甘井汲泉宜勿幕。習庵寓甘井溉術官園種菜只如鄉。予寓官菜園上街校書君正

然藜火病齒吾方呷藥湯。卅載光陰敲石過。兒時記賭紫羅囊。

傳依縛律枉多忙。挂角羚羊迹要忘。誰似公才誇八斗。真看詩老出吾鄉。蒸砂千刦終非飯。薄酒三鍾卻勝湯。攻短自來須苦口。刀圭爲我啓行囊。

曹劍亭刑部和韻見贈卽奉答

餽歲人閒作意忙。先生閉閣坐來忘。兩篇觀物心中易。一枕游僊夢裏鄉。老手詩真如啖蔗。庸醫藥莫試煎湯。熊羆譚笑居然卻。十笏清齋倚隱囊。劍亭疾初愈

二十二日吳杉亭舍人招同褚鶴侶刑部蔣漁邨編脩陳寶所給諫小飲疊前韻

行厨真訝咄嗟忙。翦燭西窗話不忘。但願同心常聚首。何妨異縣更它鄉。吟堪度日頻敲鉢。熱不因人自造湯。門外飛沙寒刮面。欲從質庫檢衣囊。

答嚴跋堂和韻見贈之作

黔南薦北馬蹄忙。踏雪飛鴻意未忘。暮節無聊惟索句。才人不遇例思鄉。詆嘲顧我真如朔。儻蕩憐君略似湯。一盞酌來相慰藉。毛錐那得久藏囊。

可怪詩成擊鉢忙。把來過日不能忘。半空真見華嚴閣。六出爭奇戶牖鄉。力厚似斟缸。面酒味甜欲嚼菜羹湯。求魚自笑先投網。引出人間罟百囊。

己丑除夕疊前韻

九陌喧闐爆竹忙。過年俗例未應忘。北來幾月俄除夕。南望停雲是故鄉。繡褓癡兒能覓栗。青裙小婦爲調湯。屋租米券都償了。壓歲錢猶足一囊。

一夜偏兼兩歲忙。春風如候幾曾忘。癡獃不資甘達衆。慈儉能持欲化鄉。促坐共圍爐炭火。延齡預辦粉團湯。元日食粉團。吾鄉謂之百歲團。只愁才減年徒進。食粟區區爲革囊。

竈馬桃符遞換忙。迎新推故了相忘。艸元多暇官知冷。泥飲相邀士有鄉。習嬾漸如三起柳。療貧終少十全湯。祇應無譽仍无咎。日玩羲爻六四囊。

矻矻窮年爲甚忙。文章報國意難忘。遺經獨抱真奇貨。破硯重磨當狹鄉。壯不如人思炳燭。行求無悔怕探湯。開春欲到琉璃廠。購取奇書滿一囊。

次韻嚴跋堂正月三日對雪

聞君逃禪學迦葉。不作佛助驚蟄蟬。苦吟瘦生生未攝。險語逼人和韻疊。我窮堅壁兵不接。詩腸十日稻安貼。齋空法喜爲妻妾。苦行如僧少度牒。今日何事手揩睫。示我新詩笑浮醫。春三日雪盈尺浹。曰大有年紀瑤笈。當甲如荼萬夫讐。真妃攜從畫出獵。六合湧洞一足涉。大慈布施倒囊篋。令嚴不聞从語喋。詩人舌耕六籍饁。失喜滿酌三升臘。一身康濟陰陽燮。搖筆千言觀者憎。句奇格變書之筆。令我目睂心以懶。彼盈我竭欲頰頰。信手答之倚牀櫟。技癢不禁破械輒。我詩可棄履中屨。君才有用劍上鋏。春風馬蹄行蹀躞。勿作平原乞米帖。

跋堂和予詩兼訂春游賦此答之

此身何似舟一葉。了識非周亦非婕。聊以詩酒自調攝。憶昔下筆文采疊。自言古人武可接。少游風雨縱妥貼。不中退之作婢妾。陋哉斷獄取陳牒。盲人漫學離朱睫。嫫母強效西施髻。少作可焚汗背浹。君平僊骨注丹笈。洗默艸元語。不讐暮作干詩。當漁獵。奇外出奇趣。日涉白戰了。不攜三篋。我頃多言悔。喋喋豆羹菜。蠶田父餧。敢匹炮羔祠伏臘。獻歲三陽和氣變。蟄蟲始振响雉惺。春雲如黛風如簾。與子偕游我心愜。一笑色動三豪頰。酒一偏提果一楪。醉翁飲少一醉輒。有山且著謝公屐。有車莫彈馮公鉞。過隙白駒去蹀躞。觴詠千秋傳禊帖。

正月十九日同曹習庵編修張繡堂趙實君兩上舍游白雲觀次習庵韻

重陽之教起關右。一花七葉了無垢。神僊宗伯出善門。戊辰正月日十九。全真心欲長交梨。遺世肘仍化枯柳。千燈焰向岷峨傳。一滴源從甘井濶。馬譚劉郝漫齊名。泰華居然俯陵阜。兩朝徵召笑不應。卻著芒鞚雪山走。老翁八十更何求。曷不杜門丹竈守。至人有道先濟物。忍令芸生死速朽。菜芝黃綺解避秦。區獨善詎高手。僊家那有不死方。五利文成非吾偶。長春真人告元太祖云。有衛生之道無長生之藥。阿誰辨僞妄訾譽。多事山僧想顏厚。釋祥邁作至元辨。僞錄詆毀全真。卽今都人傳謳邱。了識長春道長久。招邀朋舊出城西。後車不載偏提酒。令威千歲幾曾歸。不朽之名乃真壽。白雲去住自無心。能解世人煩惱否。

寶刀行送龔梧生同年之官黔中

梧生藏一
刀甚奇古

寶刀千金淬鸚鵡。丈夫出門萬里攜。四更月黑白虹出。眼中貝玉真如泥。三刀佐郡才小試。百鍊平生成利器。生笛買犧相勸耕。循吏于今見龔遂。

送胡牧亭侍御南還

矯矯神羊柱後冠。曼容移疾遽辭官。賣文價賤窮休送。避債臺遙去尙難。半世艸元耽寂寞。十年薄宦耐酸寒。鄉園舊侶應相待。夢澤春風把釣竿。

二月廿七日同慕堂給諫竹君學士伯思戶部登陶然亭

瀟灑閒亭子。登臨便不同。人來春樹杪。山落酒杯中。艸細纔抽甲。池枯不滿弓。江鄉當此日。桃杏已青紅。
哭翟舍人均廉予乙酉典試所得士

才望雄三浙。文章博兩官。瘦羊終澹泊。小鳳亦清寒。鵬自培風久。鮎偏上竹難。侏儒應笑爾。長飽一囊餐。
祿命妨文士。精神憊苦吟。空羅胸列宿。終欠腹三壬。管輅言。腹無三壬。不壽之驗。自牖言如昨。居肓病已深。祝予何太急。慟絕不成音。

題候官林氏所藏漢甘泉瓦拓本

貴賤世無常。不見金與瓦。尋常博者注棄之。等土苴。一枚傳自漢。萬金千勿假。古色敵敦彝。篆法證蒼雅。誰云搏埴工。恐是造化治。古人一物微。製作不苟且。曰長生無極云。漢并天下款識避雷同。吉語當祝嘏。

香泉強解事毋乃所見寡。陳子文疑長生未央爲甘泉別宮名。茂陵甲帳空銅僊淚盈把博物不逢張千年委山野文孫寶手澤勿替引來者瓦全神所護金瀛我姑舍翻怕多財翁笑汝癖成痕。

題吳香亭鴻臚古藤詩思圖

海王之邨近書市新城尙書曾卜廬藤花一本手所植歲久翦敗惟枯株神明扶持終有力生意宛轉枝頭蘇好花應厭俗客對風流今又逢鴻臚追逐唐賢究三昧新詩解脫如花腴猶嫌三春花事去更倩畫手紀以圖古槐修竹靜者居置身花下晨夕娛綠陰滿架清有餘封殖無忘前輩譽明年花開可痛飲折簡行復招吾徒比鄰更呼程舍人謂魚門相於聯句窮朝晡此藤此屋清不孤佳話欲繼匏菴吳吏部官廨匏藤花吳匏庵手植

同曹慕堂給諫朱竹君學士陳伯思戶部史文量孝廉曹中之上舍爲西山之游出郊宿二老莊

和竹君韻

探春有伴斬從驂濺眼山光削碧簪心以地偏應更遠味于交澹不求甘竹谿耽逸人仍六蕉葉澆愁我亦三城市漸遙巖谷近此中容得是清譚

張忠烈王輔墓

高冢似祁連旁可萬家聚蒼涼閱人代忠烈增跋慕百戰起將門三台贊政務偉哉定南交富良一葦渡

縛曾如縛羊繫頸逮婦孺疆理二十年木壞中自蠹空聞捐之議盍思鄭吉護可惜東西楊一著偶投誤事往那可追墓田了非故猶存翁仲立尙識夫人祔夫人吳氏祔劉氏葬石刻敍宗支昭穆粲然具歐表例可循世系足追溯摩挲恭靖碑忠烈子懋碑在其右數十步有碑題云特進光祿大夫左柱國太子太師追封寧陽王謚恭靖張公神道碑梁儲撰文李鍇書文字中矩度傳鈔病未能悵望斜陽暮

山行疊前韻

仄磴崎嶇不礙驂雜花瑣碎也宜簪雲來天外當頭合泉在山中徹底甘陟險直須作氣一避喧已似伐毛三十年結想今纔到目擊端因勝耳譚

歲月堂堂隙過驂清游差喜盍朋簪只除佛地境皆俗每到山行心欲甘驃騎名真輸第五瞿曇義且叩前三捫蘿恐有遼金刻好撫遺聞入筆譚

戒壇

大眾同回向天神護此壇光明心不昧堅忍力須完薙艸根宜斷傳薪火自鑽宣尼箴四勿吾道亦先難傳戒從心幻開山記法均結壇還似昔成佛定何人清磬諸天曉喬松太古春安心雖未竟三宿亦前因和竹君戒壇讀遼法均大師碑因弔學士王鼎三十韻

爲禮司空塔兼鈔學士碑殘編猶可讀遺行已難追博物雄燕涿通經習禮詩太寧蜚遜日上已祓除期

下坐羣相誚。揮豪信不羈。識山嗟肉眼。脫穎借毛錐。
策射清涼殿。名臚白玉墀。奪標先獨占。紀歲兩存疑。
遼史道宗紀清寧八年六月御清涼殿放進士王鼎等九十三人本傳則云清寧五年擢第與紀異初捧州僚檄聊牽縣令絲才名宜館閣祕典預論思汲黯言常慤宣公政屢咨忤時官未進罵座醉偏癡騷客終遷謫清流被榜笞孤寒經歲甚雨露一朝施果復鑾坡舊何曾鳳德衰暴雨驚忽舉臥榻正無欹忠直神惟佑詞章世所推珠雖百琲失豹偶一斑遺幢署優婆塞有石幢二其一題云受戒弟子優婆塞范陽王鼎製文銘徵壇主師簡栖文品貴法護筆蹤貽刻倩王惟約求容釋裕窺焚椒書可匹礪畢妙難訾椎拓應千本模糊恐異時舊聞探墜逸正史證階資開國分封渥丹文制誥知勳纔都尉轉賜許佩魚垂碑題馬鞍山故崇祿大夫守司空傳菩薩戒壇主大師遣行碑銘并序朝議大夫乾文閑直學士知制誥充史館修撰騎都尉太原縣開國子食邑五百戶賜紫金魚袋王鼎撰并書稽古榮非忝逃禪俗漫嗤元言譚吼石密戒受毗尼佞佛何妨達匡君要有裨馬鞍峯頂望

懷古且支頤

姚少師祠

瀲瀲泉流檻外分披緇入定戒香熏空登北郭詩人社難上西山老佛墳好殺共知和尙誤著書賴有故交焚依然病虎形容在曾否聲名直半文少師自贊畫像云這個禿廝忒無仁聞名垂千古不直半文

夜宿潭柘寺用石刻金僧重玉韻

泉清山瘦氣如秋假榻精廬臥亦游夜靜與居惟木石心忙難伏似龍蛇月篩叢竹搖空影風入高松響

急流一室了無增減相此身今欲號浮休。

妙嚴公主拜輒相傳妙嚴爲世祖女子史無據恐是傳會之詞元時宗女皆得稱公主不必帝女也。

昔聞元公主苦行何精進六時五體投一甄雙趺印沁園自言富視之如朝露法輪得慧珠愛河斷利刃單極幹可絕受礪石欲磷區區搏埴土踏破存者僅至人得魚忘凡夫刻舟認饒舌紫柏師寶爲山門鎮匣藏尙宛然曾費宮錦襯當時宗室女下嫁魯趙親去聲各冒貴主稱內朝鴈行覲詎必出辭禪齊諧勿盡信。

僧房偶題

漸綠春來艸常青屋裏山門前無垢水不肯到人間。

潭柘寺

四圍山簇青蓮花蓮中之的法喜家篋裏龍子自來去殿頭鴟吻猶含呀泉聲無盡波羅密樹影可怖鳩盤茶盧溝橋只一舍近行人不記恆河沙。

三月廿二日同錢宮詹籜石紀太僕心齋朱學士竹君褚學士左峨曹給事慕堂馮刑部君弼入法源寺觀海棠偶見旁院牆腳支榦方石有異撤而視之則遼大安十年觀音菩薩地宮舍利石函記也心齋有詩紀其事卽次韻

長安春可游賞花到佛寺至德靈芝書景福南敍記妙跡屢摩挲響揚勸好事卓立尊勝幢石函列其次復有党竹谿令史述建置寺有遼薦福大師尊勝陀羅尼幢記磁州司馬劉贊撰又石函四面題字天水蕭甫書金禮部令史題名記大定戊戌八月黨懷英撰皆昔人所未著錄予數訪得之先後劫火了不焚人天護初地得隴復望蜀吾儕心已肆運甓覆苔石果得義中字想見揮豪初淋漓墨瀉翠一萬舍利藏卅二相好備檀那百千家合掌歎神異金錢巨社輸宮商法螺吹皆用記中語事往七百年誰識聰辨智記文燕京管內左右街都僧錄崇祿大夫檢校太師行鴻臚卿聰辨大師賜紫沙門善製所撰自大安十年甲戌至今六百十七年矣昇來鎮僧寮鈔取入書笥紀年古多同舊聞或誤識劉同人帝京景物略題作金大安十年考金王永濟紀元大安止于三年此記乃遼道宗時所刻非金刻結習文字閒淨名毋我議

琉璃廠窯戶掘土得古墓棺槨朽盡而骨法殊異視其誌石題云大遼故銀青崇祿大夫檢校司空行太子左衛率府率兼御史大夫上柱國隴西李公墓誌銘撰書人則不可考矣督廠工部郎中孟君澑令改埋于故兆東二十步并其誌瘞之世遂無拓本李公之名不見于遼史因摭誌文大略作詩以遺考古者

琉璃廠前工博埴昌切十夫畚土土委地捨畚漣洒見枯骸棺槨不具骨法異其旁片石誰所誌大遼李公官閥備厥諱內貞吉美字漢前將軍出所自家於媯汭世有位舉唐秀才祕書試試主簿丞清淨治大聖南牧六師肄向化請命隸下吏屬珊瑚帳下蕃漢騎廿萬精兵可敦置中丞提舉金魚賜左右僕射新寵

被述蘭王燕南面寄授以押衙心膂倚戒得抱公輸忠義專城薊州寬惠莅都監銀治廉直遂檢校司空三台致終于太子左衛率先嫖殷氏三子嗣繼室以何有男二各各通顯周行置保寧十年月夏季行年八十恆幹乘葬之京東石室闕黃腸便房久摧毀白日忽照長夜寐歲閱八百隙過駟富貴聲名竟何事改埋且免烏鳶飲猶勝溟漠堙名字吾生金石有奇嗜恨未擅椎入篋笥遺聞可補隆禮志傳與好事紀原委

題候官林氏陶舫硯銘冊子

蕉葉青花甲乙分故交耐久更能文想嫌結綠縣黎俗別署頭銜萬石君

鐵畫分明手自鐫名山藏弆耐千年怪它歐趙搜金石椎榻何曾到硯田

送江于九之官安慶

隆冬風雪冷僕夫將載馳送君路三千游宦皖水湄君才故磊落循良古爲師文章與政事能手兩兼之仕途如黃楊逢閨一寸虧別駕古通守職閒秩未卑衡陽君舊游手捫岣嶁碑天柱亦南嶽山靈緣在茲振衣可一登荆揚儼列眉石壁剔落蘚恐有龍眠詞見彈太蚤計令我朶兩頤人生有幾別後會復何時君爲江淹賦我媿錢起詩

游善果寺

白紙坊前青豆房。當年賜額乞貂璫。明天順八年尚膳監太監陶榮請賜額禮部給劄付石刻尚存。題修廊搏換鬚眉古。東西廊塑五百羅漢明孝宗時。姚訓所造。老幹支離檜柏涼。豐碣未磨禮部劄。荒原誰認故侯牆。碑載寺四至東至官路西至歸依山。桃一樹開旋落。瞥眼春光有底忙。

法源寺看花

丁香花落海棠殘。火迫春風到牡丹。冷笑山僧忙底事。栽花只博別人看。

法源寺觀牡丹因懷琴德

精藍地近一牛鳴。每到花時幾度行。天與色香矜智慧。人從開落悟虧成。老僧底用譚優鉢。長者真須學淨名。蒲褐先生無恙否。何緣共坐話無生。

題黃星槎所藏漢華山碑拓本

江夏過吒我袖中有西嶽。六丁取不盡。古色尙斑駁。一飯先鍾梁。三舍後斯邈。森森劍鋒藏。苕苕禾穎擢。美女簪好花。壯士橫長槊。白象露齒牙。蒼龍吐芒角。掉尾魚戲波。垂頭鶴俛啄。依稀六百字。字字玉在璞。杜遷石已碎。郭香文未剝。當年松譚閣。此碑舊藏宛委山人郭宗昌松譚閣後歸王山史嘯月樓顧亭林所見即此本。薇露手親濯。侍史妙裝潢。牙籤自追琢。嘯月古逸民。顧榮共商推。手書付官奴。恐溷俗子濁。山史題冊尾戒其子非承我命不得令人輕爲題跋。歲久罕益珍。性癖果而確。風流今猶昔。嘲笑任蜩鳬。院體行楷書。我見輒欲殼。借君羅紋硯。試一臨池學。

題惠松厓徵君授經圖

漢儒說經重詁訓。授受專門先後印。三代遺文近可推。大義微言條不紊。後人鑿空誇心得。一筆欲將鄭服攘。虛譚名理訶玩物。陳義甚高詞已遁。我朝經術方昌明。天遣耆儒破迷悶。紅豆風流手澤貽。三世大師清望峻。正誼古常晞董仲舒。識古共推劉子駿。尤長義易泝九師。輔嗣說行存亦僅。郢書燕說一例芟墜簡。逸象盡日据。畫吞仲翔洵已足。論持趙賓兼旨仞。苦心孤詣識者誰。後有子雲或能信。禮堂寫定不得傳。令子趨庭萬人俊。羣書暗誦才翩翩。家法相承語諄諄。青紫拾芥何足云。樸學千秋宜自奮。吾生亦有好古癖。問奇曾許摵衣進。廿年聚散等浮漚。宿艸青青老淚挾。展圖彷彿見平生。苦井長智幾時濬。黃門精熟繼長翁。試聽它年石渠論。

爲袁春圃給事題苦瓜和尙餘杭看山圖

連蜷不了幾行樹。辣鬪無根千尺岑。一洗人間甜俗格。丹青如見苦瓜心。

題沈椒園前輩松亭讀易圖

先生晚好易。韋編百過讀。兀坐古松亭。清吹風謾謾。凜然歲寒姿。勁直凌凡木。三百八十爻。取象各有族。白茅藉无咎。枯楊華非福。失據蒺藜危。得繫苞桑卜。乘剛怕葛藟。善柔嗤覓陸。松耶何乃遺。疑義費往復。善易象可忘。至理思爛熟。科上槁奚爲。堅多節所獨。抱經究終始。洗心以自淑。行藏三十年。回首一信宿。

漸鴻瞻羽儀。賁趾脫輪腹。道協敦艮九。名取安節六。磊砢後彫心。莫逆交不讚。經師多上壽。額手爲公祝。

病目廿二韻

百目帀月餘。屏葷疏酒醕。晝常怯窗明。夜苦辨星皖。觀火光忽岐。迺風涕偏濟。眵凝春麥芒。淚流浙米澗。綠瞳欲掩珠。赤眚已侵販。漫天作謝絮。平地起秦棧。朱碧只一概。金沙莫分揀。看書春月翳。作字秋蛇綰。視鳥真如鳥。寫弗卻類弗。約僮宥便了。課兒昧瑟僨。漸近杜欽盲。空羨華元睆。欲尋龍樹方。安得金鑑剗。平生耽文字。蘊林志飛獮。分無蛾綠餐。徒勞汗青纂。多記精日銷。玩物顏有赧。天教息吾黥。日使良其限。五蘊先斷色。萬事難挂眼。方圓河洛圖。疏密麻沙板。相對了不知。付之一笑莞。象罔傲離朱。申徒薄子產。戒慎所不睹。斯道本至簡。渾沌未鑿初。今吾豈異撰。

贈伊宛中孝廉

本蒙古伯都氏。改隸滿洲古北口提督謚慤信布蘭泰公之孫。

之子名家彥。風流數妙年。譚經探義海。搜句出心田。老馬途能識。神錐穎最先。中郎枕中祕。欲待仲宣傳。

鐙下作

一鐙熒熒光。歛然散數點。漸遠光益多。百道飛電閃。外環暈幾重。著色閒濃澹。殷紅日杲杲。蔚藍波激激。心知眼前障。欲以一手揜。五采更交射。不絕始饒饒。夜夢神告予。妄相去以漸。莫漫投刀圭。最忌弄鉛槧。幻影非有著。真精宜自斂。譬之泥在水。水激泥不濺。又如雲掩月。雲過月不染。復其見天心。我圭本無玷。

圓桌

曾記瑤臺聚八僊。方桌一名八僊桌模棱新樣阿誰傳。翦鐙真快團屬話。讓坐無妨左右旋。移到中庭天似笠。分將半面月初弦。瓜廬與爾差相稱。聲叟從今莫惡圓。

暖炕

熾炭中央氣四通。先生真欲號冬烘。未妨厝火仍安寢。且耐薰心略禦窮。上座試安木居士。炕邊以木爲之炎官新守土司空。江南有客酸寒甚。伏枕偏愁內熱攻。

羅兩峯鬼趣圖

人言鬼可憎。君獨觀其妙。觸于目所遇。審厥象惟肖。巨室可偃寢。馳逐誰所召。昏暗鎖自縛。安得慧鐙照。六趣理本同。執著互相笑。奇詭到筆端。似聞譏出訐。書家艸聖難。聖予云人言畫鬼爲戲筆是大不然此乃書家之艸聖也豈有不善真書而作艸。苦心世莫料。瞰室非爾防。一任梁閒嘯。

潛研堂詩續集序

予兄詹事竹汀先生幼即工詩以獻賦通籍乾隆己丑庚寅閒在京都嘗手錄詩集十卷自爲之序嗣先生專意經史小學服官之暇悉力著書詩遂不多作亦不盡存存者亦未及編定也先生沒遺書滿家同學諸君子謀分任剞劂事黃君在東謂先生雅不欲以詩鳴然觀生平所作溯源漢魏出入唐宋腹貯萬卷而不屑以掃捨塗抹爲事胸有智珠而不肯以纖縟佻巧爲能春容淵雅蔚爲大宗詩集之刻其亦奚可緩乎于是先取前集付梓氏俾秦子照若董其役而以辛卯至甲子詩屬予暨先生女婿瞿子鏡濤續鈔成帙又得十卷蓋先生自辛卯以後供京職者五年卽膺廣東督學之命旋以先大夫憂歸服闋不復起歷應當事聘主鍾山婁東紫陽各書院凡三十餘年中間惟奉使衡文跋涉稍遠否則游蹟所至近止百里遠不過千里兼以晚年東南故舊日就凋落以故登臨贈答之什較少于前而優游林下日事丹黃意有所得觸而成詠性情之蕭曠議論之確覈實又有過于少壯時者茲所錄皆就遺艸略加排次其隨手散失僅見于它人選刻者非先生手藁詩雖佳不敢濫采以幾毋蹈嫁名掠美之失此則區區矜慎之心亦卽先生生前編詩之微旨與在東予姻親嘗從先生游先曾刊行元史氏族表一書在三之義弗聞于存沒是亦可傳也因并書于此嘉慶十有一年龍在丙寅夏五月弟大昭謹序

潛研堂詩續集目錄

卷一

疊前韻寄王琴德

王樓邨先生十三本梅花書屋圖其曾孫

少林進士屬題

秋日集城南分賦得集字

嚴冬友扁寓舍曰散木庵乞予賦詩

覃谿學士視學嶺南還摹東坡英德南山

石壁題名及米元章藥洲題字嵌齋壁

顏曰蘇米齋招同賦詩

十月六日覃谿學士招同擗石宮詹裕軒

學士兩峯山人城西訪菊兩峯出所買

杜瓊畫卷贈裕軒擗石謂是己所藏頃

爲偷兒攫去者乃以此卷歸擗石仍請

擗石別作一幅以償裕軒覃谿作詩記

之用東坡集中王晉卿欲奪海石軾欲

送沈莘田之官四川二首

與曹慕堂光祿入城南僧舍小坐

送熊學橋前輩請假歸江西

七夕公餞紀心齋太僕分韻得如字

心齋太僕將卜居吳中與錢撻石詹事程

魚門文選翁覃谿學士陸耳山西曹羅

兩峯山人分賦吳中故事送之予得石

湖

題吳鑑南蘇門聽泉圖

送王性之赴官淮南

趙璞庵自永昌寄詩用東坡除夕倡和韻

次韻答之

以韓幹馬易畫詩韻予亦繼作

琉璃河

裕軒前輩題詩薜荔葉上招飲次韻奉酬

曉行

兩峯將訪魚門爲馬蹄傷右手魚門疊仇

樓桑邨和西崖侍讀韻

池石韻嘲之予亦繼作

趙州道中

蓀石詹事招同覃谿學士白華侍讀習庵

雨花庵

中允魚門吏部夢穀耳山兩刑部集木

豫讓橋

雞齋觀元延祐甲寅鄉試石鼓賦卷真

磁州

題劉屏山集

韓魏公祠

祝芷塘編修屬題接葉亭唱和詩卷

過安陽有感韓平原事四首

哭趙損之二首

黃梁祠

覃谿購得宋槩施元之注蘇詩屬賦

汴中詠古十二首

羅兩峯畫醉鍾馗圖

渡河

到開封作

到開封作

卷一

奉命典試河南出都作

歸德道中

訪良嶽故址復成詠古十絕句
贈何謙之制府卽留別三首

會亭道中

宿州城外

臨淮

包孝肅祠

道旁

舒城山行

宿武峽關驛舍壁閒見香樹先生山行詩

追次其韻

曉過北山嶺至桐城

入潛山境行亂山中山甚高而平坦易上

不露巔絕之迹賦此美之

題寄山谷寺

潛山城外

太湖縣

過楓香驛

黃梅東山禮五祖真身

題五祖塔

行廬山下六首

烏石門

安義郵行

曉行

高安

清江城外

文信國祠二首

憩萬安郵舍有老叟年八十三矣足迹未

嘗入城市爲賦詩

曉霧行萬安城南二首

霧

山行

贛州

山中

庾嶺謁張曲江祠次壁閒德定圃前輩韻

過嶺口占

南雄舟行

忽忽

得李南澗書知于廣州相待卻寄

滇陽峽

大廟峽

初到藥洲用石上宋人詩韻三首

題仇十洲桃花源圖用陶靖節韻

王石谷仿惠崇江南春色卷

湖山慶雲寺

齋中無事興到輒書數字共得八首

莫釐峯

林屋洞

縹渺峯

包山寺

龍渚

石公

橫塘

游慧聚寺用張祜韻

筱歛造一船于湖上顏曰自度航製極精

雅卽用其韻二首

詠史

游三茅觀同王方川邵二雲陸筱歛作

梅市

岳忠武墓

宗陽宮二首

越王臺

門神四首

題施荃漁三臺子役圖

次韻鶴谿見寄

卷三

齋西老梅一株盛開

析薪謠四首

假榻郡齋偶成四首東石公太守

顯寧廟

登望海亭

鑑湖

禹廟二十四韻

石公以過南鎮詩索和卽次韻

雲林寺借秋閣

讀綦譜偶成

雨後抵麒麟門

誌公像

贈澹懷相國四首

題嚴子進春江送弟圖

臺城詠古

蔣忠烈廟

卞忠貞廟

劉越王廟

曹武惠祠

衛國忠肅公祠

始興王墓碑歌

普生泉歌爲陶悔軒方伯賦

寄蔡丹徒蛟門

慕堂同年六十寄詩壽之卽用其自壽韻

二首

送傅雨窗明府還南豐

江寧城外作

東陽盧府君廟

題隨園雅集圖四首

渤海相國挽詩二首

牌灣記所見

悼陳翠月

牛首山觀辟支佛塔

游靈谷寺

登翠微亭

隨園鐙詞八首

湯婆子

題李義山詩四首

舟行

多病

游茅山三首

過常州不見馮康齋留寄

淮北行帳喜晤王副都蘭泉因懷吳舍人

竹嶼曹中允習庵并追感趙少卿損之

張舍人策時用昌黎郾城夜會聯句韻

虎邱寺題壁

題畢秋颯中丞靈巖讀書圖五首

送王道士朴山游揚州

卷四

秋颯中丞招游靈巖山館

章淮樹觀察安園落成招飲

送袁香亭之官粵東

烈女篇

嚴道甫五十壽詩二首

送秋颯中丞再撫秦中

金陵寓齋偶然作六首

吳杉亭同年輓詩

贈何南原

白歎

自京口至江寧道中口占五首

喜雨

南浦觀察署中畜鶴飛去數月頃又歸來

公子慶貞有詩次韻二首

送周卉舍游武昌兼訊吳白華學使

臺城二十四韻

諸藪堂招同仇一鷗王心原蔣亶夫游湖

上三首

六一泉

寓舍偶然作

喜晤李匯川同年

賀祕監祠

題范氏天一閣

題竹初丈小像三首

奉化

山行

海口

方正學祠

雨止二首

小谿二首

桐巖嶺下作

將至台州

東黃見滄太守

午日同王條山登巾子山

東湖

台州名宦祠

自臨海西郭至百步谿三首

贈天台何明府

題張氏來復園

赤城

宿國清寺

三賢堂三首

一行禪師塔二首

高明寺

題高明寺壁贈實雲上人三首

幽谿

圓通洞二首

金地嶺

宿華頂寺四首

右軍墨池

太白書堂

華頂峯

登華頂作歌

茅篷五首

僧舍偶題

石梁

蓋竹洞

宿方廣寺三首

珠簾泉

斷橋

萬年寺

羅漢嶺

寒風闕

桐柏宮

夷齊廟二首

訪崇道古迹得二絕句

瓊臺

桃源三首

護國寺

卷五

出山口占四首

石梁觀瀑圖爲華秋槎賦

題黃雲門先生傳真圖

重過桐巖嶺二首

麻櫟

雨宿止觀庵二首

海口南五里地名缸窑當是江瑤之譌也

予游明州不及啖江瑤柱今日過此戲

次韻范孝廉莪亭

留一絕句

題乞食圖傳奇六首

奉化谿漲二首

題文敏公書二首

登舟

題印松汀觀察隱几觀書圖

王陽明祠

題座主文敏公仿元四家長卷

雨過上虞

英公夢堂藏文敏公詩卷羣公題詠甚多

偶作

未幾夢堂下世此卷流落市肆竹初丈

積雨

于京邸得之屬題其後

自題天台游艸三首

題王定山所藏秦漢民當拓本

豆腐

題趙文俶水墨花鳥冊四首

題金丈月泉弄孫圖二首

閔峙庭中丞七十二首

贈寶應吳明府闡林

擗石侍郎以新刻詩集見貽卽次集中寄

閩林以藕粉詩見示爲賦一律

懷之韻報之二首

題侯大年先生鳳阿山房圖二首

三月十九日蔣香洲立厓招集復園送春

小唐廬偶題

敬修上人招集江心寺卽席口占

聞漑亭姪金陵之訃二首

絕句六首

過將軍教場銜術舊寓庭前槐大半已枯

感賦

題邵二雲編修所藏王文成公詩卷

程易疇臨董文敏書王文肅祠記長卷付
其幼孫屬予題之二首

荆軻里

郭隗故里

中山靖王墓

曲陽道中

謁北嶽廟

雪浪石二首

卽事

真定道中

客有言蘇味道不當昌其後者賦此解之

肥鄉道中

卷六

哭褚宗鄭同年二首

題顧樵水落花詩意畫卷二首

題徐友竹倣吳漁山湖山秋曉卷

嚴豹人移居城東次西莊韻二首

題黃小松看碑圖

錢叔寶謝湖艸堂圖

和榕皋齋中雜詠四首

題馮巽泉太守秋缸補讀圖

題費玉衡窺園圖二首

題陳樹齋提督聽雨圖

題汪大紳摹鼻圖四首

簡齋小疾作詩自輓并徧索同人輓章依

韻戲答四首

題程易疇說劍圖卽用自題元韻

題竹柏樓居圖

題程易疇讓堂友教圖卽和其還山吟韻

四首

同方坳堂觀察訪彭尺木居士

題王秋史二十四泉艸堂圖

題金二雅禊游圖二首

題袁實堂載書圖

題唐立方進士遺像二首

范莪亭自題甕天室集禊帖字索和二首

題薄石宗伯仿沈石田花卉冊

得畢秋颯尙書札卻寄二首

選吳竹嶼舍人遺詩畢感舊有作

白桃花和張止原韻

題吳竹堂墨蘭

王西林秀才丁堰覆舟戲爲絕句三首

題潘榕皋水雲圖榕皋嘗夢見董思翁舟

中作書并舉彌陀經語二林夢樓題詩

因有援以入佛之意作此解之二首

送汪稼門方伯之任甘肅二首

邵松阿舍人七十二首

盧召弓前輩寄重游泮宮詩索和三首

和潘榕皋移居

題熊謙山曠然有我圖二首

聞述庵司寇致政南還之信

秋晚訪述庵司寇三泖漁莊因同訪圓津

禪院慧照上人卽放舟游余山適雲閒

汪西邨張坤厚金治昆仲亦至偕入王

氏園登皆山閣久之復至天馬山登周

氏山舟堂還抵萬壽道院道人雪颯留

車飲歸途得詩四首

題獨立圖

題吳玉松除夕游山圖

趙文毅咒觥詩爲者庭明府賦二首

題熊謙山紅鵝香稻圖

金焦雙峙

平山高詠

鉢池丹鼎

雲龍放鶴

題陳東浦方伯詩藁二首

題陸豫齋蘭亭卷

蔣立厓以虎邱和東坡韻詩見示因次和
揮石侍郎輓詩二首

題何夢華滌碑圖

蘇臺柳枝詞四首

袁簡齋八十壽詩四首

鰲滄來州牧施粥圖二首

述庵侍郎招同袁春圃潘榕皋宋汝和蔣
立厓周漪塘費在軒王西林張農聞袁
又愷戈小蓮徐佩雲集塔影園小飲卽

席得句二首

惠山九隴
九峯三泖
洞庭疊翠
石湖天鏡
靈巖石鼓
鄧尉香雪
玉冠萬松

繖嶺棲霞
題江南名勝畫卷十二首爲熊謙山臬使
作

送方坳堂觀察之申浦二首

到家偶成二首

耳聾

春日

題陸生學錦幽篁獨坐圖

丙辰孟冬朔本縣舉鄉飲禮忝預賓席口

占呈當事暨同飲諸君四首

同人枉和拙作幾及百首疊韻答之四首

丁巳人日七十生辰漫成四首

探梅

題吳香巖詩藁

還家

東浦方伯枉過寓齋卽用集中見贈元韻

洞庭雜詠二十首

冬日山行

靈祐觀

石公山二首

卷八

范文正公祠

西沚光祿輓詩四首

用東坡涵星硯詩韻題潘榕皋易硯圖

題吳蘭雪新田十憶圖十首

題熊謙山臬使江春曉鏡圖

王拙庵太守大字千字文真迹其家人珍

祕之後忽失去元孫柏厓縣尉百方購

得之屬賦詩紀其事

題袁介隱遺像四首

題沈石田碧山吟社圖爲秦小峴觀察作

題唐陶山明府岱覽圖二首

題唐陶山松陵十二景冊子二首

題黃小松郡丞得碑十二圖三首

謝金圃侍郎輓詩二首

送熊謙山方伯之任滇南

盧抱經學士輓詩

題關山雪騎圖扇

題唐陶山荆南十二景冊

和范芝巖編修移居元韻

題法時驅大司成詩龕圖二首

題時驅梧門圖二首

題織雲樓詩集三首

題宋汝和觀察竹梧清嘯圖四首

文綱庵荷笠圖

題王秋塍明府龍門攬古圖卷

汪杏江編修五十

湯雪樵五十

費筠浦中丞移節閩中詩以送之二首

和袁又愷移居四首

虎邱剏建白香山祠落成用白公武邱寺

路韻四首

短簿祠

真娘墓

中秋前四日袁綬階招飲漁隱小圃卽席

分韻得蕭字

題法梧門梅石小照

鮑臥雲招同邵晴巖馮補亭陳秋嘯游虎

邱白公祠和臥雲韻二首

卷九

題宋牧仲法螺秋色卷二首

題秦繹山碑拓本四首

袁簡齋前輩輓詩三首

和謝錯山明府當湖書院紀事詩元韻

東浦方伯奉命監臨武闈詩以志賀

自適二首

獻之以霸陵圖求詩得二絕句

尺

題鳩磈靈澤夫人像四首

題筠浦中丞甘雨應祈圖卷

河豚歌

冰鐙

十月八日汎舟山塘登千人石次兒東塾

從行口占絕句二首

東浦方伯寄示立春日見懷詩依韻答之

二首

題雲松太守虎山看月圖二首

題顧秀才抱沖小讀書堆圖二首

題晦之弟水流雲在圖二首

三月十一日袁又愷招同王述庵潘榕皋

段懋堂蔣立匡諸君集漁隱小圃賞牡

丹分韻得惠字

十六日戈小蓮招集范邨別墅賞牡丹分

韻得酒字

錢生宗穎攜陳孝廉詩庭所畫秋窗聽雨

圖屬題二首

戊午除夕立春二首

庚申元日

生朝偶作

吳江夜泊

題三高祠三首

歸安道中

雨後攜東塾游吳山入紫陽洞

西湖

菜花

喜晤山舟前輩卽以留別

武林歸舟二首

題開元寺古佛

可盧舉孝廉方正志喜

世味

苦雨

王夢樓贈東塾詩兼及京華舊事不勝今

昔之感依韻答之

題王叔華笠屐圖三首

卷十

辛酉新年作二首

讀史記二首

爲秦照若題其曾大父雲津先生遺像二

首

上元夜二首

絳老

滄浪亭柳寄都門舊同學

下箬寺陳武帝故宅二首
顧渚山行五首
輓周少霞廣文

和唐陶山明府修復唐伯虎墓

贈胡石梁

題宋汝和畫花

曉聞禽聲

前蜀王鏗書妙法蓮華經殘本
次榕皋蟄室韻二首

題同人姪策塞訪碑圖

治隱園三友圖爲韓旭亭作二首

壬戌元日二首

題唐陶山海上乘槎圖卽送之海州任五

首

題縣津山人詩藁二首

題尤西堂夢游三山圖圖爲海寧俞體仁

畫作莊生曼倩淵明太白東坡五像最後一人則西堂也王阮亭朱竹垞韓慕盧諸公皆有題詠予亦作六君詠繼之

六首

四月廿有六日重游泮宮賦贈新先輩因

追懷西莊光祿

吳竹橋禮部湖田書屋圖四首

題汪竹香孝廉詩藁四首

蔣湘颯寫經圖二首

聞瞿涉齋廣文之訃愴然有作

癸亥新春二首

題可廬對牀風雨圖

汪蛟門少壯三好圖爲秦敦夫太史題

白公祠喜晤述庵司寇二首

題朱竹垞明詩綜艸藁四首

題凌仲子教授校禮圖

述庵侍郎八十仍疊虎邱唱和韻八首

題小谷口讀書圖爲陳蓮谷作

稼門中丞以近藁見示郤寄

和稼門中丞見贈之作

題陸桐庵霜林秋月圖

梁山舟前輩八十

甲子元旦二首

題黃蕘圃除夕祭書圖

吳槎客七十

潛研堂詩續集 目錄

偶題

次孫師康十一歲好誦余詩喜而有作

潛研堂詩續集卷一

送沈莘田之官四川二首

天都雲海話前游。忽理征衫夢益州。
九折已輕秦棧險。六奇試借贊皇籌。
都亭出祖春方蚤。舊雨相逢別更愁。
手板支頤無俗狀。休文八詠最風流。

廿載苔岑臭味諳。西窗且共一宵譚。
蘇隄煙水它時夢。蜀道雲山此去探。
官似黃楊根較縮。詩如諫果嚼偏甘。
心摹小李將軍畫。粉本天然在劍南。

與曹慕堂光祿入城南僧舍小坐

何處消長夏。空亭遠眺宜。
山光來不速。月影出如期。
白鳥飛成隊。青蟲網作絲。
吾儕機事息。話久竟忘疲。

送熊學橋前輩請假歸江西

聲望清華第一流。遂初真好御風游。
卅年世味某更局。十幅征飄箭脫轄。
人似秋雲空眼底。天將山色到船頭。
莫言壓載無多物。萬卷書歸宋敏求。

七夕公餞紀心齋太僕分韻得如字

細葛單衣暑未除。盈盈七夕上弦初。
人因遠別情多感。我說歸田計未疏。
書畫偶攜爲長物。雲山最好可

幽居探梅異日容相訪不是茅浮卽娜如。

心齋太僕將卜居吳中與錢蘀石詹事程魚門文選翁覃谿學士陸耳山西曹羅兩峯山人分賦

吳中故事送之予得石湖

范公四十六卜居在石湖五十九乞祠始歸田園居請息殊不惡石湖二齋名開荒分手鉏間價買癢獸欲與社櫟徒梅菊手自譜雜花姑舍諸人稱石湖僊鬚眉入畫圖先生豈其侶宦成亦遂初丙舍近楞伽弋釣昔所娛具區峯八九偃蹇若可呼中秋夜泛月一串牟尼珠雖乏范邨田雲露脣略濡南潯百里外分野同三吳擇里矧在茲雋士龔滕俱請續吳郡志脫稿付小胥

題吳鑑南蘇門聽泉圖

我所思兮在蘇門太行之東雲氣屯清泉散落珍珠迸千潭萬派同一源列僊飛行控鸞鳳長嘯偶然寄嘲弄竹林嵇阮真小兒魏晉區區一短夢空山琴筑響不停響入人耳心自清桑苧當年曾未到中泠三疊浪得名吳君生長山水窟詩人情性僊人骨爲話曩游秋雨中天籟泠泠激清越非絲非竹宮徵諧喧中得靜良復佳題詩不減高叔嗣講學將師許魯齋

送王性之赴官淮南

桃花水初暖送子度蘆溝春風三千里直達清淮流才名重入洛五試不見收折腰就簿領龌龊豈自由

先師讀水經丹鉛手校讐補注極精核功與桑酈侔子今到河干三策當借籌家學尋墜緒吏治宏遠猷
會看囊脫穎詎有杯膠舟河鯉書尺半莫忘寄輕郵

趙璞庵自永昌寄詩用東坡除夕倡和韻次韻答之

香象善渡河馬浮但及半聲聞限小乘望洋只自歎三復君寄詩珍爲掌上玩一洗淫哇音而投清涼散
伯仲玉局翁餘子諒非伴憶昨別君初仰首畢中旦塞北君跨鞍廡下我輟案參辰三四載萬緒如絲亂
聞君南從軍蚤起常不盥檄借相如文帶許叔子緩三窟免自藏欲以一矢貫此手可辨賊誰云文士懦
天生百鍊剛扇用陰陽炭文通兼武達斯稱翹材館歲宴當言旋竝坐圍爐暖萬里釋負擔居息尼粲粲

疊前韻寄王琴德

小小好讀書未有袁豹半中年精銷亡炳燭吁可歎狗馬子弟習珠玉兒女玩樂極恐生悲聚多終或散
元忙以爲門法喜可作伴自從悟如如何暇伐旦旦惟餘文字癖欲療醫無案語辨宋魯訛文證豕亥亂
吟詩鼻長擁牒易手先盥鄉人憎怪迂古調嗤嘆緩賞音獨吾子嗜好同一貫深入賈君勇助登激予懦
如何久別離夜雪誰送炭當年劇譚地蒲褐闕空館萍開必終合井冷行復暖懷哉曷月歸願言見此粲

王樓邨先生十三本梅花書屋圖其曾孫少林進士屬題

南人多種梅公乃得梅味天然清瘦格獨往傲凡卉心定夢亦真老屋見鬢髮東西列十三知足不外乞

嚼之以療飢。香冷入腸胃。可代索米勞。兼省買山費。醒來竟何有。曰歸詎無謂。風流六十年。懷想但增憮。文孫寶手澤。紙墨餘芳氣。鄉園宛在眼。止渴借自慰。

秋日集城南分賦得集字

無事且出游。有朋宜小集。城南我最近。僧寮款門入。壺榼各自攜。相見不暇揖。久坐無別譚。文字耽結習。碑尋竹葉紋。翁覃谿攜漢中部督郵口尙

等題名俗稱爲竹葉碑者。詩擬松陵輯。仰視天宇澹。百里無塵泥。山雲濃若洗。岸蘆直而立。向晦雞爭棲。感秋蟲欲蟄。今茲不爲樂。逝節駟莫及。願言崇令名。相於良箴戢。

嚴冬友扁寓舍曰散木庵乞予賦詩

伊余木散人。適來散木庵。庵前木半枯。了不施斧斧。支離性所受。裁剗無一堪。漆割以汁美。井竭以泉甘。持是表戶冊。理契莊與聃。主人金闕彥。天花見優曇。讀禮暫言歸。林壑非久耽。峨峨五鳳樓。棟梁千石擔。擁鼻恐不免。買山聊戲譚。僦居倘見許。習嬾吾已諳。

覃谿學士視學嶺南還摹東坡英德南山石壁題名及米元章藥洲題字嵌齋壁顏曰蘇米齋招同賦詩

先生使嶺南。日與藥洲對。九曜石磊磊。題識辨茫昧。所惜老米書。久移方伯廨。手摹神與似。刷字風雨灑。一石置西齋。歸裝載其倅。藥洲在學使署中。有九曜石。相傳南漢時物。宋元人題字幾滿其上。惟米元章題藥洲一石。獨在布政司公廨。覃谿欲移之學使署。不果。乃手摹兩石。一置齋

中西壁一載悅惚滄江船。虹月夜吐怪。坡公遷惠時筆染南山黛。邂逅隱君子。一夕羅浮話。于英德南山刻
歸嵌齊壁。後石壁凡七行文云蜀人蘇軾子瞻南遷惠州艤舟巖下與幼子過同游聖壽寺遇隱者石君汝礪器之話羅浮之勝至莫乃去紹聖元年九月十二日書後有紹興七年九月傅雱跋妙迹亦銘心風流若相配嵌之齊左右貞珉永不壞雪堂墨氣濃寶晉英光在未妨四壁空欲下兩公拜移居正秋晴招客及我輩尙友有同心集古亦兼愛長安人海中到此洗塵埃。苦對切拜石欲師顛撫掌但稱快。

十月六日覃谿學士招同擣石宮詹裕軒學士兩峯山人城西訪菊兩峯出所買杜瓊畫卷贈裕軒擣石謂是己所藏頃爲偷兒攫去者乃以此卷歸擣石仍請擣石別作一幅以償裕軒覃谿作

詩記之用東坡集中王晉卿欲奪海石軾欲以韓幹馬易畫詩韻予亦繼作

羅含今畫師日餐畫中綠買得一卷佳償之百錢足大似艸堂圖菜香味滿腹菜香艸堂裕軒城西別業名持贈意交厭旁觀頰忽蹙通神詫顧愷拊髀得李牧本爲什襲珍何辭再三瀆過眼已雲煙到手若珠玉慢藏或自悔豪奪僉未伏仍以畫相易此不疑何卜公案卽時增妙手競相逐爲補有漏緣非填無底谷好事翁靈舒訪秋招同欲戲舉仇池例兼徵下里曲遺弓吾弗知所愁和詩速

裕軒前輩題詩薜荔葉上招飲次韻奉酬

大可敲詩來筆底肯隨病葉委牆東從今更乞先生諾歲一回聽薜荔風

兩峯將訪魚門爲馬蹄傷右手魚門疊仇池石韻嘲之予亦繼作

靈犀能分水。不損到底綠。大患由有身。譬之蛇晝足。多言累以口。苦飢枵在腹。柳肘倘可忘。山眉亦何蹙。羅生人中騮。神駿不受牧。舌耕禾滿篝。心通川注瀆。腕底生雲嵐。掌閒散珠玉。此手天所假。何意皆偶伏。適爾掉臂前。險且折肱卜塞翁。卽無傷良馬。後勿逐。觸豈訝虛舟。慎宜繫空谷。新詩迭相嘲。穩臥愜所欲。無相則無痛。烏足擾心曲。亡羊補未遲。害馬去自速。

擇石詹事招同覃谿學士白華侍讀習庵中允魚門吏部夢穀耳山兩刑部集木雞齋觀元延祐
甲寅鄉試石鼓賦卷真迹

延祐甲寅設科始初場經義主朱氏二場古賦兼詞章左榜例殊右榜士豫章行省方翹材主文禮致艸
廬子通微待制亦巨手吳澄楊剛中爲考試官如驟之斬臭味似是時石鼓徙成均戟門東西甲至癸韓公有志事
果成試官出題良有以英才入彀廿二人今之存者八篇爾李炳奎徐汝士王興玉陳祖義李路羅曾吳
舜凱蘇宏度凡八人合一卷皆蘇所書也撰羅君墓誌
詞翰翩翩機杼殊徐王陳羅吳二李誰與殿之以己作永豐蘇生筆蹤美南宮擢第二人先可惜鹽車困
驟李路羅曾皆登乙卯進士李
官新昌判官羅終臨江錄事臨江錄事行誼敦親老棄官竟不仕見歐陽圭齋所撰羅君墓誌惜哉志乘多闕遺
姓氏茫昧況爵里西江志選舉表失載李丙奎李路陳祖義三人重出羅曾一人五百春秋彈指過風流未沫賴有此當年四路兩宣慰
完可喜昔人立言蘄不朽科舉得失何足齒祇因古物重摩挲三代鼎彝伴軒几才薄誰能石鼓吟賦成
十一行省各大比太極渾淪天馬驤是科江浙省試太極賦湖廣省試天馬賦傳鈔定貴東南紙落落晨星世少傳此卷巋然

想見風簷駛吾儕真有翰墨緣撫卷忻然日移晷

題劉屏山集

幼讀紫陽書先河泝原本韋哉執友三屬續戒繢屏山忠義家恤孤見誠悃冠而字以詞內腴外勿烜曾顏子可師友道尚饗譽作論述聖傳正學啓關楗平生三字符元吉復不遠四十稱病翁覃谿自息偃遺文二十卷精光出球琬弈棋爭邊角利小衆口嘵妍議復荆襄高屋瓴水建方知開濟心匪必樂飛遯招劍詩徒吟掀髯日未晚閒境吾熟游何爲自厓反出處綽有餘公真立腳穩史家傳道學意恐多岐溷知弟莫若師一山豈分巘區界鴻溝盍念先一飯

祝芷塘編修屬題接葉亭唱和詩卷

此亭得名自前輩湯西星侍郎張南華詹事皆嘗寓此文酒壇場各分隊百年傳舍閱人忙只有詩名久不晦鹽官才子瀛洲憊僦屋多年理荒穢一庭風月樹數株不道門前塵堦堦三秋剝啄得良朋浮邱洪厓參相對唱和俄然京洛傳畫圖偶寄風流在畢宏秋颸擁傳久西行計日王郎蓬心亦郡倅此亭君又讓它人俛仰之間會難再況復留題十數公去住存沒非一概彈指茫茫我亦愁皓月當空幾悵惘誰能留爪計飛鴻不若支頤對翠黛過去見未平等觀痛飲相從益一溉

哭趙損之二首

連營侵曉黑雲積才子英靈地下埋直欲裹尸輕馬革竟教髽婦泣狐駘玉將抵鵠驚先碎蘭爲當門便易摧可惜文章真滿腹不曾四庫校書來

別後風流想像閒有兒萬里省親還橐中詩藁千篇得鏡裏顛毛幾處班彈指淒涼成浩劫招魂慘澹隔重關空餘老友懸河淚灑到天西木果山

覃谿購得宋槩施元之注蘇詩屬賦

先生招我蘇米齋示我蘇詩嘉秦本漢孺楷法逼率更波點分明刻瑤琬惜哉十二卷久闕存者光芒猶未損峨眉僊人去莫追人間爭注東坡詩堯卿次公夔縝厚後來絕出吳興施會稽通守寶手澤老學庵主交歎咨廣徵良工棗木刪滄桑浩劫今存斯商邱撫吳善價購朱砂小印孫子貽杜陵鳥過僅一字衆賢欲補還遲疑青門何人強解事續鳬斷鶴識者嗤流傳世上誤後學誰信子都殊靡靡歸然此本幸無恙廬山真面乃在茲嘗鼎一巒良已足鑿傭七竅何其癡先生嗜古如昌歎一日摩挲百不厭河東三篋或未亡神物終合延平劍

羅兩峯畫醉鍾馗圖

說鬼太可憎噉鬼亦何味善哉中山翁逢場聊一醉詩書爲麌羹蕩滌俗腸胃五窮吾素父虛耗何足計拍手任揶揄扶持到此輩似聞羣鬼語欲報不殺惠羅生鬼董狐墨戲出新意非僧非學究面目得髣髴

生云姑妄言。吾請以臆對。六道趣各殊。善根豈有異。我無分別想。彼亦不爲祟。嗔惱兩都忘。緩急翻可倚。
冷手馨可捉。神椎力勿試。且飲菖蒲尊。日長了無事。宋人有醉僧及醉學究圖

潛研堂詩續集卷二

奉命典試河南出都作

我馬皇華使。云秋落實繁。心仍依魏闕。夢偶到梁園。灰嶺晴餘澗。盧溝漲後渾。主文頻忝竊。四出郭西門。

琉璃河

到處飛鴻指爪移。往還幾度又今茲。琉璃河水仍如鏡。十六年前鬢未絲。

曉行

殘漏五六點。稀星三四勻。岸崩枯似臘。樹禿立如人。估客郎當鐸。征夫轆轤輪。趁涼同起蚤。露氣濕衣巾。

樓桑邨和西厓侍讀韻

小市流傳帝子居。鬱蔥佳氣詎云虛。依袁偶作投林鳥。入蜀居然縱壑魚。錦里築壇非故土。樓桑成蓋憶當初。英雄魂魄知餘恨。未得歸乘左纛車。

趙州道中

一日馳兩驛。恆州又趙州。樹濃知有市。山澹却宜秋。乾鵠鳴占喜。涼蟬語帶愁。自從前夜雨。禾黍望油油。

雨花庵

驀直一條路。清涼三椀茶。勺泉分耨達初地。卽著閣我亦津梁倦。兼之癡鈍加化城。真可住妙法問蓮華。
豫讓橋

有死讐當報。無成志亦雄。誰能知國士。元在衆人中。

磁州

蘭相如里野花秋。崔府君祠落日愁。一路重岡連復斷。水清土沃是磁州。

韓魏公祠

兩朝定策數安陽。晚節黃花獨自香。何事裕陵親政日。翻將國事付獾郎。

過安陽有感韓平原事四首相傳金人得韓侂胄首葬之安陽祖墓。謚曰忠繆。謂其忠于謀國。繆于謀身也。

十年富貴老平原。一著殘棋一局翻。畢竟未忘青蓋辱。九京不媿魏公孫。
胸無成算擲千鈞。壯志區區那得伸。一樣北征師挫衄。符離未戮主謀人。
匆匆函首議和親。昭雪何心及老秦。朝局是非堪齒冷。千秋公論在金人。
成敗論人亦可嗤。誰持秦鏡照鬚眉。如何一卷姦臣傳。卻漏吞舟史太師。

黃粱祠

椿菌同朝暮。荆凡孰在亡。古今更代謝。幾度熟黃粱。

汴中詠古

香孩營裏氣葱蘢。宅汴何如卜洛雄。興地全收十國舊。寬仁已變五朝風。斧聲終訝喧鐙下。禪話虛傳出袖中。一代韓王稱佐命。誓書金匱負匆匆。

龍行虎步儼居尊。桴鼓親提定太原。酒賜牽機終有毒。鋟炊熱餅竟難翻。圖書館閣徒誇富。骨肉參商卻少恩。一弟房陵猶藁葬。燃萁那不憶同根。

天書夜半授真符。西祀東封禮各殊。黃蓋竟因孤注勝。青壇想見萬靈趨。一釘未拔多瘡痏。五鬼紛來欲嘯呼。終賴朝端有君子。未妨小事偶糊塗。

金芝御榻葉連縣。冊載深仁浹八埏。直士同升能受諫。和戎有利不開邊。文章都改西峴體。將相爭誇慶歷年。若使神孫仍舊貫。汴京九鼎豈能遷。

妙選金枝得定儲。元臣匡輔事何如。空頭署敕機先決。雪涕陳言病亦舒。四載憂勤憑几日。兩宮慈孝撤簾初。一篇漢議堪千古。歐九何曾不讀書。

青苗手實算增緝。條例三司次第新。只喜善神常護法。那知安上有流民。秀才盡變空疏學。宰相何堪執拗人。笑煞佳兒能紹述。霎時斷送汴城春。

山寺歸來好語聞。宮中堯舜輔新君。活民已任溫公相。艸制爭傳內翰文。豈意蛟龍纔得水。便教狐兔倏

成羣原陵社飯匆匆過黑白青蠅了不分。

親書黨籍姓名留符祐忠良一網收。遂使舒王躋配享。何妨隱相廁。清流東南花石民膏竭。西北戈鋌戰骨愁。轉眼青城纔夢覺。燕山亭外望皇州。

積薪厝火久相仍。頃刻中原便土崩。幾見三衡衝矢石。空勞四出括金縉。北轍此去嗟何及。南爐遺聞事莫憑。獨有幽蘭孟居士。白頭話舊恨填膺。

中都纔幸又南京。冷笑狂王貫已盈。隋煬窮兵知不返。苻堅獨斷竟何成。空勞采石投鞭渡。那許吳山掉臂行。多少牆茨中聾刺史家真屢總難明。

金甌半壁漸摧殘。且倚黃河作塹看。北望幾時銷戰壘。南侵多事啓兵端。豈能方面皆胥鼎。可有忠言繼素蘭。賴是和林勤遠略。幕巢偷得十年安。

親征決戰本兒嬉。寂寥空城那可支。將相備員霜後擣。河山滿眼局終棋。歸潛空贊劉祁志。都省新刊崔立碑。紅粉青娥驅北去。仳離略似靖康時。

渡河

南來清口北榮陽。又自陳橋汎汴梁。終古河流仍浩浩。此生歲月感堂堂。使星天上重輝暝。新婦車中自閉藏。敢詡涉川忠信在。國恩思報只文章。

到開封作

灌輸南北據通津。民物依然舊俗淳。
月落長河浮浩蕩。雲開二室見嶙峋。
梁園風雅應猶昔。伊洛淵源想未湮。
測景天中分判正。要將圭臬示文人。

訪艮嶽故址復成詠古十絕句

黑白分明詎可欺。熙豐流毒靖康時。
蚤知紹述元非孝。端禮門前悔立碑。
蔡家廿載執朝權。猶是荆舒一脈傳。
父領三師兒尙主。等閒斷送宋山川。
博古殷周法物收。宣和書畫重千秋。
科名也妒寒儒占。特放嘉王作狀頭。
新聲樂府手親裁。曲院調笙教主來。
太息章惇真具眼。端王當璧果非才。
稽首神霄達紫闈。上清司命有曾孫。
天尊大有降魔力。不爲君王挽北轍。
玉真天遣下蓬瀛。黃籙齋餘未析醒。
畢竟安妃有僊骨。不會流落到青城。
國論誰能別正邪。四時仕宦到清華。
昨宵聞說黃麻下。宰相新除花木瓜。
神運奇峯自太湖。伏犀抱犢態全殊。
不知五國城頭去。曾帶華陽片石無。
榛蓬蓬曲聽來真。厝火方然又益薪。
買得燕山竟何用。卻拋艮嶽與它人。
海上空勞使節過。夾攻廟算竟如何。
燕城歲幣纔輸畢。已報金兵犯兩河。

贈何謙之制府卽留別

維嶽天中貴。洪河地脈長。三川歸統制。百姓待平章。文武通而達。精神壽且康。黃花開九日。晚節獨芬芳。理數探河洛。動名繼召郇。識因更事練。品以讀書醇。量可涵千頃。功真活萬人。公餘陪笑語。一室盎然春。已聽驪歌唱。重爲三日留。戒途方北上。乘傳又南游。愛我情何摯。從公願未酬。異時嶺海夢。猶戀汴城秋。

歸德道中

九月潦盡淺水枯。斜陽欲下鳥羣呼。葦花平鋪白蠶繭。柿實疊綴紅珊瑚。里嫗提棉攜籠出。鄰翁拾柴換酒沽。分明秋田行看子。安得好手爲我圖。

會亭道中

雜樹秋猶密。茅齋小不斜。兒童分柿子。郵市賣棉花。已覺塵沙少。兼無僕馬諱。郵亭留一餉。風景似吾家。

宿州城外

符離城邊大道直。名隸江南實淮北。今秋河水溢茅城。水及半扉屋敲仄。禾黍盈疇不一收。曳杖郵甿面猶墨。竭來潦盡水轉清。往往空潭涵碧色。鳬鷺拍拍城東西。漁子承梁網九罝。行人不識居者艱。翻愛煙波渺無極。

臨淮

我行渡淮抵濠上。一綫官道夾碧波。雨後泥融猶未燥。馬蹄留印千蜂窠。鍾離自古稱壯縣。雉堞三板存無多。空桑臼中夜出水。城市半窟蛟與蜃。行人指點遺址在。廿年浩劫須臾過。臨淮之鯽長尺半。過客食指動則那。兼聞今年夏苦旱。一半枯槁田中禾。貧民容易去鄉里。乞食四出爭唱歌。女郎赤腳頭裹布。呱呱弱子背上馱。細腰打鼓音嘈雜。攬身上索行婆娑。小兒穿梯矯如鶴。中婦弄甓輕于梭。窮人雖能出百巧。風俗皆窳云如何。傳聞此風昉明季。徭役繁重民薦嗟。由來採擣當以漸。先富後教理不訛。男耕女織各有業。導之禮法毋煩苛。芻蕘罪言或可采。長吏勿漫誇催科。

包孝肅祠

孝肅祠無恙。鬚眉凜若秋。河清猶可俟。鋼直肯爲釣。公豈儕擒虎。用韓擒虎事。公有閻羅老之謠。俚俗傳會實之。包人休詫奪牛。兒童知姓字。肥水共長流。

道旁

逃荒人戶官道旁。十十五五紛成行。肩馱背負去故鄉。兒與釜甌同一筐。日食溢米纔充腸。晝無廬舍夜不牀。幕天席地無周防。人離鄉賤計非臧。吳諺云：人離鄉貴，物離鄉賤。食驅奚暇慮久長。但願盎有斗粟藏。生生世世無逃荒。

舒城山行

岡嶺四圍合。我行將安之。自崖勿遽返。曲折境益奇。讀書能得閒。進步乃無厓。不知身已高。但訝城市卑。徐行毋使困。踐實斯不危。涑水有遺誠。三復真吾師。

宿武峽關驛舍壁閒見香樹先生山行詩追次其韻

好山如良朋。不速亦旣覩。洪厓與浮邱。拱揖列左右。初從南獎入。平遠一波皺。漸進乃益佳。繚曲往而復。一峯間一峰。青翠若相關。水邊俛啄鶴。雲外孤飛鷺。石骨藏不露。自矜肥勝瘦。密樹覆肩胛。清泉任膚腠。邨居儼桃源。水竹繞前後。中通南北郵。旁置雙隻堠。舍館得我所。此樂敢多又。前途聞更奇。靈祕不予固。諷詠文端詩。名與斯山壽。繼聲病未能。孤負東南秀。

曉過北山嶺至桐城

決漭曉雲橫。雲深不礙行。四圍皆疊嶂。五雉見孤城。老柳行行禿。疏篁個個清。龍眠如有約。十里送兼迎。入潛山境行。亂山中山甚高。而平坦易上。不露蘄絕之迹。賦詩美之。

遙望白雲封。盤旋路幾重。崇高君子德。坦易達人胸。淺水千頭鴨。連岡五蠶松。畬田如可買。此地作山農。

寄題山谷寺

夢游山谷已多年。咫尺眞源又邈然。詩慕涪翁全未似。衣傳三祖想無緣。暝牛石上蹄痕印。洗墨池頭紺影圓。輸與嘉禾老學士。扶筇到處有新篇。謂蘿石閣學

潛山城外

邑小城初築民淳吏得閒人家篁竹裏客路柳松間紅入秋深樹青排曉後山靈僊知不遠怊悵未躋攀

太湖縣

碧澗城南壯青巒縣北高編籬多竹篠蓋屋有松毛水牯翻犁健山禽上屋號肩輿聊縱目未厭客途勞

過楓香驛

乍過楓香驛遙瞻五祖壇澗流清溢禾沙路赤蒸丹江近山容潤冬來樹意寒邨邨巫賽社童稚亦知歡

黃梅東山禮五祖真身

五葉從來汎一花一花還自有根牙講經臺下瞻殊相破額山頭指故家人說黃梅真淨土誰修白業證
毗耶傳衣公案休分別祇恐塵埃把鏡遮

題五祖塔

老少元平等誰非廣化才栽松衣可付多事約重來

明鏡時勤拭人推慧絕倫誰知春米熟偏待嶺南人

行廬山下

香爐縹渺紫煙浮一朶芙蓉翠欲流畢竟江南異江北江州山又勝黃州

前峰翠淺後峰深。正面晴嵐側面陰。一步一回看又別。此中脈絡了難尋。

九天使者降靈驂。灔澦嶽青城鼎足三。倘作匡廬老提舉。二十平

太平宮祀九天采訪使者宋時謬提舉官

三笑流傳過虎谿。遠公遺跡未全迷。高賢十八今何在。只有長松翠鬱齊。
澗底泉聲殷若雷。嶺頭雲氣絮成堆。入山它日非生客。會識匡君半面來。

烏石門

烏石門開類削成。清流一線瀉淙琤。小松戢戢多于薈。人在王蒙畫裏行。

安義邨行

有樹邨皆秀。依山水便清沙。岡排箬笠田陌劃葵枰。寒意江南緩。冬前半月晴。元規塵不到。自在客中行。

曉行

曉行亂山中。前望百頃湖。湖中青數朵。有似小姑孤。了知本非水。雲煙幻斯須。初日忽回照。金色魚鱗鋪。
三竿日漸高。雲水兩已無。惟有峭蒨峰。縹紗芙蓉敷。黃山吾未到。斯理可舉隅。忽疑大瀛海。時作桑田枯。
得非和合成。雲霧氣所噓。千刼一旦暮。鯤鵬笑蠭蛇。我言豈謬悠。試問蒙莊徒。

高安

一水貫城流。連邨草樹稠。琅玕千萬箇。不枉喚筠州。

清江城外

背郭邨偏密。穿岡路半斜。殷紅殘柏葉。小白簇茶花。浴鴨非無沼。歸牛各識家。趁虛成聚落。未覺市人譁。

文信國祠

顛沛求仁得。從容取義真。浚儀元具眼。科第得斯人。生祭詞徒壯。知音世果稀。黃冠倘南返。何減首陽薇。

憩萬安邨舍有老叟年八十三矣足跡未嘗入城市爲賦詩

四面崇山翠錯連。中央容爾屋三椽。秧松徧向峰腰插。鞭筍多從石罅穿。瓦盞繩牀留客住。耘瓜鉏菜教兒專。老來久厭風波惡。十八灘頭不上船。

曉霧行萬安城南二首

曉入煙雲窟裏行。漫漫對面不分明。青山想厭紅塵客。不肯隨人出送迎。四望茫茫一概同。時聞雞犬白雲中。江山清福難消受。咫尺翻教眼界窮。

霧

霧重了無山。衣霑若有雨。遙見三板船。搖艤雲中去。

山行

瀛瀛原泉瀉。重重秀嶂包。崎嶇緣石骨。曲折就山坳。紅醉楓辭葉。青攢竹放梢。停輿屢回顧。安穩是衡茅。

贛州

繞郭青流碧玉函。風飄駐泊尾交銜。灘聲夜落儲潭廟。雲氣晴升馬祖巖。地近炎州無瘴癘。路穿絕磴自嶄嵒。南來真訝暄寒別。脫卻羊裘換夾衫。

山中

山中仄出縣出泉。道旁一叢兩叢竹。泊然無語自清甘。與我周旋觀不足。人言竹泉俗可醫。俗子遇之了不知。愍孫不狂誰會得。孟嘉小異空爾爲。

庚嶺謁張曲江祠次壁間德定圃前輩韻

金鑑言終驗。黃虯禍蚤知。宋姚功可繼。伊呂道爲師。此地關山險。猶傳鏟鑿遺。澗毛塞欲薦。風度至今思。過嶺口占

病鶴乘軒只自慚。九方相馬敢云譖。三千紅樹青山路。直送行人到嶺南。

南雄舟行

水淺沙停一綫灘。十夫推挽力空殫。誰知咫尺凌江路。下水翻同上水難。

忽忽

忽忽悠悠土木形。領懿時見一星星。逃名久怕囊抽穎。學道終憂穀食螟。未得睡心聊就枕。只圖遮眼略繙經。平生賸欠游山債。天許來看五嶺青。

得李南澗書知于廣州相待卻寄

不見李生今五年。南行萬里一欣然。新詩想得江山助。名士仍兼政事傳。憶舊多通烹鯉字。養廉半付刻書錢。藥洲計日同吟嘯。窺鏡慚予巽髮宣。

湞陽峽

韶山皆骨立。可望不可攀。尤奇在臨水。清鏡洗鬢鬟。竭來湞陽峽。激泓一水彎。輕駛捷于鳥。飛入皺瘦閒。石丈各磊落。對立堅不頑。雲中老浮屠。揖我傲我閑。前望路已斷。呀然闖元關。詎敢高聲嘯。恐驚長蛟跔。舟師但袖手。目送青屏顏。貪天汝爲功。不見來者艱。

大廟峽

一峽異一峽。奇詭各逸羣。大廟當其中。遙挹香爐芬。青翠望不了。莫辨山與雲。尋雲卻有路。九曲旋螺紋。櫂歌纏欸乃。答響隔谷聞。波面卽山腳。漱齧流沄沄。濕濕牛腹蟠。戢戢魚首頌。軒然老鶴立。俛者羣鳥耘。背陰受晚風。就陽延夕曛。何哉一剎那。便有炎涼分。

初到藥洲用石上宋人詩韻

彷彿前生住藥洲。入門幾步卽清流。嶽奇石丈如相待。涉地何嫌風馬牛。
載酒拏舟舊石洲。只今清淺一池流。齋前九曜芒無損。半似蟠蛟半伏牛。
一勺居然小十洲。僊人掌迹印波流。南宮詩句從何索。懊惱榕陰大蔽牛。

題仇十洲桃花源圖用陶靖節韻

生當晉宋交。夢到殷周世。心清自太古。未覺懷葛逝。桃源宜臥游。松徑任蕪廢。肯爲督郵留。欲就漁人憩。
先民聊寓言。畫師煩絕蓺。石洞若可尋。秫田了無稅。只有家雞棲。不逢邑犬吠。人物儼儼流衣冠。異唐製。
異境悅在斯。徑思一葦詣。清淺捕魚谿。可揭兼可厲。墨林昔藏弄。流轉閱百歲。轉運今詞宗。秦果亭都識運所藏
畫誇眼慧偶。披咫尺圖。疑到清淨界。一念卽去來。獨往無障蔽。東坡已箇中。南陽自門外。區區欲問津。詎能參冥契。

王石谷仿惠崇江南春色卷

平生未見惠崇迹。耕煙臨本已難得。吳裝渲染劇清佳。貌出江南好春色。東風催人蚤出耕。水田幾棱基。
分枰栗留布穀。鴟鴞鳴或飛或集各有情。綠楊窈窕千萬縷。小橋曲折通蔬圃。煙江不數王晉卿。水邨絕似趙孟頫。山人本家尙湖湄。湖山深處容茅茨。眼前好景寫不盡。直以造物爲吾師。斯圖著色澹更老。名

彷惠崇實過之。畫舫齋中好風日。神品銘心此第一。從公乞借十日看。臥游宛在煙波間。

頂湖山慶雲寺

未入羚羊峽。先攀鸕鷀巢。清流出雲外。古寺挂林梢。石瘦森奇鬼。泉飛散薄紺。偷閒成獨往。私署次山聲。

齋中無事興到輒書數字

人皆可忠義。不皆可儒林。慷慨一時事。著述千秋心。天不生竹帛。善惡同埋沈。夷齊與龍比。安能傳到今。裸葬楊王孫。單產折伯式。一事小異人。名已動鄉國。史家爲立傳。母乃太無識。丈夫稍有志。動希身後名。亦復有僥倖。此理誰能明。不如讀吾書。不如養吾生日。與造物游。且尋古人盟。彭殤孰爲天。由蹻兩無爭。吾自有千古。何必待管城。

臧紇信要君。不妨取其智。大哉造化心。溫肅兩相濟。奈何後代儒。吹毛好論議。妄引春秋法。務責賢者備。善人不可爲。大姦翻得志。入芷枉見招。放手更無忌。不如桑門教。苦海回頭易。歐儒俾入禪。夫豈古聖意。木堇自有花。天豔若美女。蜉蝣自有翼。衣裳亦楚楚。么麼爾何知。風流太自詡。造物偶吹噓。豈其長祐汝。可憐轉瞬間。消滅入糞土。世豈無大年。誰信蒙莊語。

大學戒聚財。孟氏闢言利。詎有桑孔徒。可贊唐虞治。介甫好大言。藉以售詐僞。卵翼諸少年。傾險敗國事。公然配尼山。俛視游夏輩。非據那可常。增我千載喟。

朱游一介士。狂氣壓九州。和藥進蕭傅。肯作繅繼囚。安昌齶齧輩。何足汚蒯緝。曷不請尙方。徑斷五侯頭。大易言天地。其道最恆久。覆載靡不周。高明而博厚。隸首善布算。莫測天地壽異哉。安樂翁弔詭惑黔首。十二萬爲期。混沌歸无有。消耗終戌亥。開闢啓子丑。唐虞當午運。民物故繁阜。更歷三萬年。人縮如雞狗。我欲問安樂。此語誰所受。太空了無言。紀述自誰某。誰從混沌前。親見混沌後。瞿曇譚刼數。謬悠本無取。奈何拾餘唾。欲與羲文耦。

管子天下才。四維重廉恥。廉恥苟不張。緩急那可恃。夸馳體本柔。圓轉俗所喜。五斗甘折腰。百鍊化繞指。朱門蒼頭兒。把臂稱知己。豈徒敍主賓。逝將寄妻子。東郭乞膳餘。旁觀笑冷齒。丈夫自有真。誰爲中流砥。

潛研堂詩續集卷二

門神

凜凜萬夫雄。旁求審象同。蕭曹刀筆進。襄鄂畫圖工。粗識宮牆富。兼收鎖鑰功。阿家翁可作。側箇切 鎮日但癡聾。已作宣明面。全無叔寶肝。東關元有耦。左戶亦高官。要路矜通籍。終年免素餐。傍人籬下穩。未覺仕途難。

紙上功名易。街頭鼓吹新。休官愁及臘。到任便行春。保障才非細。樞機地自親。翻嗤門外漢。神武挂冠人。落度衣冠古。崢嶸面目留。四門唐博士。萬戶漢通侯。剝啄徒相苦。推敲不自由。蕭生徒伉直。碌碌抱關流。

題施荃漁三臺子役圖

冷井蒼涼銅爵墜。漳河依舊流澎湃。西陵疑冢杳難尋。猶指荒臺話吉利。魏武帝小名吉利 建安人物聚鄴中。應劉陳阮文爭雄。季龍區區蛙入井。海鷗日玩惟濶公。河邊狡獪亦健者。金鳳崇光卅丈跨。當時漫戀石室居。只今空剩興和瓦。往事茫茫覆局棋。騷人經過輒留詩。涉獵史傳聊復爾。要以吐出胸功奇。武安僂令本詩伯。作吏漳濱耐繁劇。短後能騎冀北駒。長篇欲刻韓陵石。太行西來紫翠橫。馬頭雲霧相送迎。邢洺相衛方罝列。過眼陳迹增詩情。我亦安陽數來往。閉置車中徒悵惘。羨君豪氣雄萬夫。快馬西風乍脫鞅。

偶披圖畫追昔游。風塵彈指歲月逝。雪中鴻爪宛在眼。青山如浪入漳州。

王荊公句

次韻鶴谿見寄

別多作惡輒經旬。羨爾吟詩筆有神。徑鑿蠶叢全避熟。樣裁魚纈要生新。鈔書那惜霜毫秃。臨畫聊成雨點皴。見說歸期真不遠。南郵只待素心人。

莫釐峯

浮空遙見翠芙蓉。磴道盤旋上幾重。橘社菱田長有歲。春雲秋月若爲容。僧寮處處藏深隱。邨市家家占一峯。直到莫釐最高頂。洪濤萬頃盪吾胸。

林屋洞

左神洞府守真官。路隔僊凡鑿空難。地肺傳聞通水底。天梯或可陟雲端。書藏玉字千年闕。乳滴珍珠六月寒。懊惱泥深行不得。靈蹤留待後游看。

縹缈峯

天風浩浩卷秋濤。四顧方知地最高。目送三州分鼎足。手捫列嶂似兒曹。舟船來往輕浮芥。竹樹周圍細擢毛。山上日晴山下雨。山靈許我此游遨。

包山寺

一寺中藏縹渺間。門臨澗水響潺湲。客來問法元非俗。人到看山暫作閒。松影入雲彌自瘦。竹陰障月不教刪。會昌石刻依然在。百偏摩挲未忍還。

龍渚

洞庭龍渚夙曾聞。斗入湖心一朶雲。怪石嶙峋排作隊。驚濤衝齧皺多紋。天陰或有鼉鼈護。地迴應容鶴鶩羣。西望毗壇山幾疊。風煙離合杳難分。

石公

林屋諸峯秀。尤奇是石公。濤聲來枕上。山腳插波中。突兀皆人立。雕鑿或鬼工。臨流羨翁媼。相對與賓同。

橫塘

碧水澹如油。橫塘八月秋。網魚收細碎。浴鴨任沈浮。紅蓼花垂粟。青菱角中釣。具區三萬頃。泛宅亦風流。

游慧聚寺用張祜韻

山勢孤偏聳。湖光遠可吞。塔頽全禿頂。樹伐不留根。誰道千年刹。今如半郭邨。西峯仍秀絕。一綫啓天門。

筱飲造一船于湖上。顏曰自度航製極精雅。卽用其韻。

批風抹月自由身。穩住湖心一隻船。書畫久知倪瓈富。食鮭誰道庾郎貧。獻嘲且任無名子。行樂終歸我輩人。載酒拍浮日來往。頭銜同署葛天民。

手著書成已等身。卻收蹤迹付輕輪。壺中日月真容醉。畫裏田園未患貧。白眼不妨看俗客。青山只合著閒人。露荷珠綴天然景。可有新詞繼澤民。

詠史

君不見申屠起蹶張。不讀一字書。檄呼弄臣伏階下。免冠頓首血出俱。博山世儒宗。不譚溫室樹。董公婉變肖幸臨。迎謁車前久延佇。平津六十擢上第。淮南視之若兒戲。丞相蔡侯人主師。貌如老嫗無鬚眉。五鹿嶽嶽能講易。印纍綬若黨牢石尙方。不斷佞臣頭。買田問舍求肥牛。給事小史本遲頓。後來乃以經術進。監臨自盜租千鍾。當時經明卻少雙。經亦不必明。策亦不須射。愚儒但可居鄴閒。大將從來出跨下。吁嗟乎。士風沮喪秦坑餘。稷嗣面諛非丈夫。解冠溺中踞洗罵。莫怪高皇不喜儒。

游三茅觀同王方川邵二雲陸筱飲作

香火三茅舊。樓臺七寶傳。牒存丞相押。額賜紹興年。題字苔全蝕。頽垣鼠欲穿。洪厓相挹袂。真有列僊緣。

梅市

巫山出外市門前。誰識監門有列僊。不是冥鴻辭弋者。襲生那免天天年。

岳忠武墓

唾手燕雲願力堅。長城何忍一朝捐。小邦誓表和親日。大將圓屏絕命年。雪窖生還虛壯志。金陀論定剩

遺編君王自戀餘杭樂不獨文臣解愛錢。

宗陽宮

即宋德壽故址

宿世漫傳錢具美今生已勝李從嘉金爐一觸知天意此座當歸葬祖家恬憺希夷性自然高居德壽儼神僊中年便釋蒼生擔安富尊榮又卅年

越王臺

廿載陰謀國士參臥薪采蘋想難堪背城尙有五千楯奉匜可憐一介男鹿走異時真算失狐狸當日太言甘南陽七術都堪試何事藏弓理未諳

齋西老梅一株盛開

雪後梅初放牆陰枝自橫色香全在澹人境兩俱清獨樂宋司馬長年商老彭和羹非我事瘦骨自天成

析薪謠

伐木析作薪盡日聲所所可惜棟梁材斧斤不赦汝

炊薪利在燥析薪利在濕薪濕火不然薪燥刀難入析薪刀不傷要在尋其理庖丁解牛方聞之蒙莊子析薪日有程多寡量汝力貪多力不任欲速竟何得

假榻郡齋偶成四首東石公太守

憊居真箇似蓬萊碧磴層層眼界開。南鎮數峯排闥至。東谿幾派入城來。青山都學王蒙畫。奇石疑經懶
瓊堆。恰稱風流賢太守。詩題側理紙千枚。

越州城內八芙蓉。獨占玲瓏第一峯。紺塔當前尖似筆。青山回抱矯如龍。茂林修竹應猶昔。玉室金堂或
可逢。許邁遺王右軍書。自山陰南至臨安。多有金堂玉室。僕人芝艸。階下石泉清更白。酌來試點建茶濃。

高閣嶧嶢邈莫追。嘉名猶記自微之。風雲指顧仍千里。秦少游蓬萊閣詩。席上指顧風雲生。金翠橫斜想昔時。張伯玉詩。人橫在月中。金翠
橫訪古久迷希銑碣。康希銑碑。顏魯公撰。并書。舊在府治廳壁。今不存。述懷祇剩篤齋詩。恩述懷詩。自署篤齋而不名。翠微不
憚經行徧。或有鴻都漢刻遺。洪文惠公守越日。以所藏漢石經殘字。翻刻蓬萊閣上。

雲霞四面翠屏張。雪後春風入座涼。瑞室擬營何子季。丹經欲受賀知章。平生濟勝非無具。此度尋詩不
厭忙。便合烏篷呼小艇。若邪谿水縠紋光。

顯寧廟

俗稱城隍廟。

龐公有遺廟。來訪臥龍西。剖竹功堪紀。披榛迹未迷。爐存文懿款。殿前銅香爐。明萬歷中鑄。有東閣大學士朱賡名。額認顯寧題。
千載牆隍古。椒漿父老攜。

登望海亭

孤亭直上與雲平。北望蒼茫接大瀛。曉岫參差堆衆皝。春田衍沃散千坪。
休譚霸越吞吳迹。大有奇莊逸許情。孫嗣蘭亭會詩望巖懷逸許臨流想奇莊

石竇棲神無恙否。詰朝便請入山行。

鑑湖

賀公善吳語。兩命登近列。一夢游鈞天。翻然謝朝謁。黃冠返故居。遂得不死訣。供奉詩酒僂。司戶書畫絕。
天台與夜郎。流離淚空咽。誰能洞先幾。惟公全晚節。賣藥戲人閒。鴻爪試泥雪。如鑑一曲湖。于今水猶活。

禹廟二十四韻

天改傳賢局。人成幹父名。羽淵終有後。石紐記初生。道與勳華大。躬仍節儉并。二渠能股引。四載半泥行。
手障江河漢。身經岱華衡。蛇龍三舍避。穂秸萬夫耕。土任金銀貢。心忘黼冕榮。重瞳歸大寶。肆覲到陽城。
盡日卑宮坐。終朝諫鼓鳴。鉤鈴頭自戴。參漏耳偏明。石訢元妃剖。觴辭帝女擎。九疇曾載錫。一沐亦頻更。
玉帛諸方會。珠魚厥棐迎。以休羣作頌。不伐本無爭。越嶠攀黃屋。稽山寄葛繡。聖周難返葬。化益未陪塋。
學步巫如見。深耘鳥有情。汪芒魂尚響。鐘鐸響猶清。廟食垂千載。神功在八紘。雖經履癸暴訖。改建寅正。
泣罪當年淚。分陰後學程。風雲長擁護。軫蓋想平成。古壁岣嵝字。空庭竹箭萌。偏枯容髮鬚。試聽慕歌聲。

石公以過南鎮詩索和卽次韻

雪後春山氣倍激。逶迤五馬度連塍。職方第一揚州鎮。文命千秋會計陵。梅逗疏花香細細。艸抽新甲碧

層層使君守土修禋事不比王猷興偶乘。

雲林寺借秋閣

山水閒何闊。登臨洵有情。踏雲知腳健。冒雨倍神清。
梵宇蠅頭細。宋咸平中西域進貝葉經今藏谷中茶芽雀舌萌。團蒲容
小住彷彿記前生。

讀綦譜偶成

一覩矜夸甚。紛紛舊譜評。古人嗟不作。豎子偶成名。巫訝壺邱死。醫逢扁鵲生。倘非三日臥。索靖亦平平。
雨後抵麒麟門

六代繁華地。重城指顧間。雲封靈谷寺。雨失覆舟山。入夏衣猶袷。中年鬢已斑。秦淮清淺水。曾照舊朱顏。

誌公像

杖挑鏡鑑語無倫。誰識風塵有至人。卻怪名心猶未斷。蚤將身後付王筠。

贈澹懷相國四首

山水昇州秀。子公有夙緣。門開天印對。樓迴石城連。桃李栽培久。農桑勸課專。江南與江北。卅載沐恩偏。
地控三江遠。天教一佛臨。活人傳祕術。練事本虛心。赤鳥巡初徧。青油暑不侵。今朝齊額手。果沃相公霖。
清曠西園地。公餘習靜良。圖書參制作。花木變陰陽。壽世心無量。尊生道有方。區區矜獨樂。應笑午橋莊。

公子承家訓。青雲快著鞭。學從經術進。文久藝林傳。門第兼科第。同年最少年。詩人例工部。新製蚤朝篇。
題嚴子進春江送弟圖

罷聽對牀雨。忽乘喚渡船。從師江外去。執手柳陰邊。大被何辭冷。贏金未是賢。東南見孔雀。莫忘脊令篇。

臺城詠古

傳檄襄陽意氣雄。金甌彈指便成空。騎兵何意爲天子。掘尾偏能縛老公。揖盜閑門元自取。講經升座太無功。捨身未了先償劫。回首臺城一夢中。

蔣忠烈廟

十決蛇矛逐賊忙。黃沙埋骨路茫茫。匹夫強死猶能厲。志士成仁自不亡。可笑狂王虛出盪。尙餘野父走祈禳。獮兒枉作江山主。俎豆翻輸一尉長。

卞忠貞廟

誰能廷尉望山頭。塵起元規不自收。獨有一門萃忠孝。堪嗤舉國尙風流。襄創轉戰心如鐵。正色平生氣帶秋。塵尾犢車充九錫。巖巖得似侍中不。

劉越王廟

八公山色自嶙峋。烈士從來在壽春。獨障淮南猶苦戰。可憐江左已稱臣。帳前輿疾咨嗟久。詔下追封爵

秩新如此教忠宜共勸袖中禪詔又何人。

曹武惠祠

荆湖戰艦又凌波臥榻其如鼾睡何三世將家仍有後一城生聚幸無它只言敕幹江南事莫話親提左手戈仕宦幾人誇使相好官不過得錢多。

衛國忠肅公祠

文豹留皮死爲名金陵風憲只空城鳳凰臺下有奇計朱雀桁頭無援兵精爽依然李德裕英靈長傍卞忠貞青陽亦是河西彥江北江南一樣情史稱唐兀者皆西夏人也元時呼夏人爲唐兀歹

始興王墓碑歌

始興王民之爹荆楚思公淚常墮始興王宗之英孜孜爲善梁閒平三橋鳳度功初成大封同氣華鄂榮惟王最小乃英特分陝蚤領江陵兵寇恂河內立根本王尊東郡親荷畚嘉禾九穗生邴洲共羨循良出宗衰阿六愛錢標紫黃師行洛口犇僕惶若使始興作元帥何至巾幘遺蕭娘黃城邨前朔風緊一枝玉樹悲先隕豐碑廩最尙宛然不到園林作石筍貝生筆札徐公文斑駁依稀月掩雲金石未收德甫錄塚墟難認故王墳咫尺安成碑亦在摩挲沒字徒心痛不如審定此千言付與高齋學士采予審定可識者千三百餘字

普生泉歌爲陶悔軒方伯賦瞻園石井闌有宋人隸書普生泉三字旁刻淳熙丙午邵永堅建亦隸書

文登方伯癖好事。示我淳熙井闢字。星移物換六百秋。刻畫分明波磔備。名園地偏行汲少。寒泉不受人
開。渟。綆短從它抱甕回。波激怕惹臙脂膩。今年旱嘆衆泉枯。獨自涓涓流不匱。澆花養茗冽且甘。壓倒名
泉品。廿四。盛仲交記城內外泉二十各爲贊。名曰金陵泉品。仲交好奇曾未收。若譜羣芳失蘭蕙。神錐穎脫待處囊。始信閒中裕
經濟。古心一旦遇賞音。井養皆歸使君賜。公昔鑿井上艾城。山下出泉流澎湃。清白從來大吏心。灌輸要
令斯民利。普生之語豈徒然。似爲我公紀善治。休羨南陽鞠水僊。仍留東井甘泉記。方伯在平定爲嘉山書院諸生鑿井以供

鑿有東井
品泉圖

寄蔡丹徒蛟門

湖海詩名鮑謝間。鳴琴劇縣識清顏。才高正要盤根試。心遠還同姑射閒。人道循聲追兩漢。天教詞客領
三山幕。中況有朱齡石。手答函書力未辱。

慕堂同年六十寄詩壽之卽用其自壽韻

人生不如意。十常居八九。予齒奪之角。斯理本莊叟。屈指素心交。得天公獨厚。學古性所耽。登第遇亦偶。
官不必金張。卿寺回翔久。家不必朱頓。留賓樽有酒。名不必許郭。坦白信下走。學不必洛閩。檢身無大咎。
夫惟寡所營。是以易爲守。廉泉讓水閒。浮邱洪厓後。持梁刺齒肥。鄙哉蔡澤壽。

憶登進士科。座主共歐九。推排廿載餘。各成黃面叟。我懶人所憎。君獨與我厚。多生香火緣。相逢或非偶。

一別五春秋。樵斧爛應久。君今周甲子。朋輩想攜酒。路阻聊寄詩。頓首牛馬走。讀書德日休。占易履无咎。
青山亭午游。黃庭中夜守。方朔詎非僊。蘇瓌況有後。從此到百齡。五度詩以壽。

送傅雨窗明府還南豐

縹渺僊鳴去莫追。丹楓黃菊暮秋時。兒童爭識神明宰。父老扶看德政碑。理縣傳岐元有譜。送行錢起可無詩。盱江一水三千里。飄引清風自練祁。

江寧城外作

艸屨金鉤綠意新。平橋碧水尙粼粼。天公也念民無褐。三九居然似小春。

東陽盧府君廟

南唐
盧絳

海石填難滿。家山破不收。未裹僊珪節。翻快酈商讐。賣犢身難贖。傳芭祀略酬。雲鬟相配食。或是玉真流。
題隨園雅集圖

萍池竹里輞川同。如此園林屬寓公。偶爾數人成小集。德星指點聚江東。
才名蚤歲玉堂傳。穩臥山中又卅年。手撫陶潛琴一隻。算來得趣在無絃。
鍾乳金釵膽太狹。十眉往往學春山。如何不仿西園例。添箇紅羞翠竹閒。
背郭依山只數椽。紅渠冉冉篠娟娟。洛陽不乏名園記。誰似蘭成一賦傳。

渤海相國挽詩二首

星芒一夕掩中台。望斷沙隄竟不回。萬衆輟春爲起社。九重雪涕念調梅。身如砥柱功能立。心是菩提福大來。半壁東南兼保障。忍看處處召棠栽。

恬侯純謹穆侯忠。養福多于長厚中。將相時來須重望。功名論定要全終。上池莫效靈蘭藥。遠道空回翠柳風。校士鍾山碑尙在。諸生墮淚想無窮。

牌灣記所見

春風火迫到山家。麥穗離離竹迸芽。樵子斫薪挑入市。擔頭各插碧桃花。

悼陳翠月

姑蘇女子能詩爲武夫妾抑鬱而死

飛花落溷怪春風。靈藥難醫宿命窮。心枕卷施惟有死。淚枯蠟炬那離紅。聰明准折生前福。恩怨分明悟後空。自古才人多侘傺。男兒亦號可憐蟲。

牛首山觀辟支佛塔

牛首古天闕。初日射金榜。卅年未身到。南望徒心賞。久要詎可忘。亟宜蠟屐兩。春風若招人。艸綠已如繩。言訪古招提。果得大方廣。梵唄寂無聲。時有鈴語響。丹梯陟峻嶒。紺宇倚虛敞。長江樹杪流。羣峯煙際朗。由來佛窟宅。自然去塵埃。目窮飛鳥外。身到輕霞上。山靈方待幸。灑掃出官帑。樹色與谿光。都含太平象。

時清地益佳。心閒氣逾爽。于焉共登臨。且以寄澹蕩。卻尋辟支迦。洞口不盈丈。夾苧像宛然。只欠碧紗幌。所嗟保大碑。妙迹埋叢莽。覺性自妙明。無來亦無往。休生執著心。聊作安穩想。庶可見文殊恭敬一合掌。

游靈谷寺

五里松陰合。三叉石徑微。客情和水澹。詩思趁花飛。是處聞天籟。何心拾地肥。寶公應許我。趺坐暫忘機。

登翠微亭

偶訪清涼寺。重登縹緲亭。檐端容鳥入。樹杪見舟停。煙送遙邨碧。山來隔岸青。都忘城市鬧。鐘鳴靜中聽。

隨園鐙詞

怪來千鵠噪連朝。果有詩僊折簡招。院院燒燈全不夜。小春天氣當元宵。

檀板新歌試幾番。觀鐙齊上曲闌干。天公似助詩人興。半夜無風又不寒。

珊瑚紅楓白琉璃。此是人間第一奇。山上重樓樓下水。一枝鐙作兩三枝。

星光鐙影幻邪真。彈指俄成百億身。波面撒勻珠萬斛。祇應忙煞弄珠人。

掣電犇霆變幻工。漫空百道挂長虹。華嚴樓閣登時見。只在機關一線中。

萬點流星替月行。殷雷山外響訇訇。主人身住光明頂。不羨東華簇火城。

絕^法驚才錦繡腸玲瓏。點綴卽文章。尋常鐙火休相比。李杜光芒萬丈長。

十分色相百分杯眼福人生得幾回不枉金陵三載住小倉山館看燈來

湯婆子

鄉以溫柔好時當冷澹親火攻元下策水懦頗宜人恰稱衰翁伴須防少婦嗔熱腸誰似汝襆被頓生春

題李義山詩

楮葉成來不見收柳枝挽得且銷憂紛紛牛李干何事身是忘機一海鷗

區區門戶校炎涼紈袴郎君太薄腸綠水芙蓉任南北此心初不負彭陽

玉山碧瓦語清腴留枕窺簾事有無百寶流蘇隨處挂不應全是爲令狐
郢書燕說解難真各道探驪領下珍不識玉谿生可作知音端的屬何人

舟行

順水颶輕舟安行當臥游嘵嫌人道我夢悟蟬爲周遠嶂招將至孤雲挽不留吳歌聽隔舫月子照儂愁
多病

肉緩增秦痔精枯歎宋聾百年身過半多病藥無功戴笠嫌詩瘦燒車任學窮生憎門有客喚我白鬚翁
游茅山三首

生無僊骨有僊緣真到華陽古洞天木落山疑施澹赭巖深雲似擘重縣道人教煮青精飯童子同尋丹

竈泉半夜松濤聲撼戶三層閣上自安眠。

神僊得者自茅君口訣傳留幾派分那有真人須玉印

世傳茅君玉印驗其文云九老僊都君印乃宋徽宗刻以賜道士劉混康者其文九疊非漢篆也

別無要道在靈文誰來入室唯明月聊可怡情只白雲上界何難清淨理三官考事太紛紛

三峯迤邐翠屏張福地從來占此鄉俛視蔣山爲後輩遠招灔嶽作同行路無毒獸宜營宅艸有靈根可
製方傳說元君曾下降道門洙泗在華陽

過常州不見馮康齋留寄

康齋時署常守

已作三秋別難逢一晌緣官齋仍咫尺舊雨欠纏綿直榦茶山樹清流惠麓泉偶舒經濟手便有頌聲傳

淮北行帳喜晤王副都蘭泉因懷吳舍人竹嶼曹中允習庵并追感趙少卿損之張舍人策時用

昌黎郾城夜會聯句韻

今日樂莫樂素交聚列幕結歡連吳語記里近魯柝鳴盛執憲秩逾高歸田宅久泊半年別又并三影坐復作大昕顏鬢各已蒼精力詎遽弱稍留僕屢更入座客非惡鳴盛夙同白雪歌晚重黃金諾幸遇大有亨均受中孚爵大昕憶子昔從戎彼醜方蠭蟲廟謨運龍韜軍府開麟閣鳴盛谿深見墮鳶樹枯少依鵠慷慨贊六奇荏苒經八約大昕儒衣抱壯膽短韁攀叢薄艸檄筆如飛馳書墨未涸鳴盛平蠻韋碑遜諭蜀馬文祚溫禹血釁鼓貳負頭繫鑰大昕露布修期工凱歌仲宣若負弩長吏迎昨舌小夫卻鳴盛頭鵝

大宴排孔雀高冠著家慶慰北堂朋樽邀南郭大听不圖鄒枚流乃具孫吳略行程志朱波方語紀邛筭鳴盛九遷榮不次三司望有鑠鄴侯標櫂骨房相解禪縛大听嗜書還蠹蟫游山仍健獮名下信無虛寵受翻如愕鳴盛請急卜青烏營兆翔白鶴惠均鈴下驕賀謝門前雀大听獨子車笠交不改苔岑託襟擬漢上題戲效鄱陽虐鳴盛文心共研覃經義互讐錯清言微乎微麤飯嚼復嚼大听肯爲翕翕熱宛爾讐讐鄂名譽重錢劉先後忘王駱鳴盛子仍入臺省我自親釣繳離別乍乖張意味恍疚瘡大听惟有袖中札不憚手頻削今春詔時巡扈蹕事有恪鳴盛靈固物禽魚帳殿包林壑省耕課敷蓄望歲占豐穰大听舉趾勉于耜薅荼利其鋤解澤何汪洋巽風被寥廓鳴盛隄邊柳眼吐波際燕梢掠熙臺快共登陽和來有腳大听考禮更陳詩觀方爲求瘼從臣盡才俊之子尤灑落鳴盛迎鑾欣隨班握手情猶昨黃色上天庭清姿照鏡箔大听遂初忽思頴撫景溯入洛同簪曲江花齊聽圓橋鐸鳴盛師門誇桃李蓀苑奉丹艤蓬山余先登薇垣子繼躍大听湛露恩濃濃條冰衡崿崿出處漸殊塗撰述俱盈橐鳴盛追維識面初壇場幾輩拓流光疾箭激舊事驚夢噩大听吳融劇風流曹唐方落魄趙嘏句清新張祜居索漠鳴盛當杯歌必和拔劍地欲斫校戶中聖賢及鋒試干莫大听亭愛春風和池想滄浪鑿賞奇恆亹亹攻短每諤諤鳴盛拍肩誼纏綿掉臂氣揮霍松陵集成編月泉社踐約大听乳虎堪食牛老熊寧憚貉妙契入斲輪精思期斂鷁鳴盛萍梗悵分攜鷹隼逐騰搏給札賦上林翻階咏紅藥大听楩楠匠石探騏驥孫陽絡次第

升雲霄顯融謝藜藿鳴盛。升沈閱河沙聚散換歲籥。紛紛異軌躅寂寂鮮諸諠。大昕吳子本豪華。金盡太落寢遠覓束脩羊。恨乏點砂藥鳴盛。中允久聲名。雅奏調鐘鑄米馨。方朔囊牀空孟光。弱大昕秦游苦無車薊飲腴少朦清階漫回翔。遠道愁落棲鳴盛。何由鉢再敲。安得枰對著武邱七尺筠。鄧尉一雙屬大昕。前塵成泡影。幻化感蛇蠻。春露敗芳蘭。秋霜失鶯鶠。鳴盛趙卿賦西征。辭家甚歡噱。一朝馬革裏。萬里碧血灼大昕。張侯學中隱。依人相勸醉。空傷唏雍露。竟虛憶尊酩。鳴盛歎逝隔山邱。恨別罷合釀。惟子衢歷亨于今弩滿彊。大昕得雋下雙鵠。成梟雄六博子。來余幸逢余心子能度。鳴盛巢林選半枝。飲河饜一勺。艸元晝懷鉛。述騷時求驥。大昕傳注纂紛綸。疏義偏斟酌。辨妄塞童稂。訂訛掃秋籜。鳴盛考史水分犀。程功火改柞。要期大義申。務令裨說格。大昕論心正款洽。彈指怕離索。同門邈良箴。獨學類徒嘒。鳴盛譚深已移晷。坐久重舉爝。勗哉千古事。存液庶遺粕。大昕

虎邱寺題壁

易退非關勇。傷廉獨占閒。鄉情猶未免。愛說虎邱山。

題畢秋飄中丞靈巖讀書圖

三閒書閣占高寒。香水琴臺秀可餐。七十二峯青不斷。放它檻外作衙官。三萬牙籤縱目勞。天教此地住人豪。碣山莫說峯巒小。不讓終南太華高。

青松窈窕白雲閒。高唱真疑出世間。一洗吳宮花艸俗。嘉名新喚讀書山。
著述名山業自珍。評花品石亦經綸。硯池只有涓涓水。散作人間霖雨春。
光福卑猶接雅宜。留題到處短筇支。山僧指點紗籠壁。道是中丞得意詩。

送王道士朴山游揚州

我愛隱僊子。山棲無世情。吹笙王子晉。沽酒許宣平。詩好何妨瘦。譚深祇覺清。揚州騎鶴地。容爾馭風行。

潛研堂詩續集卷四

秋颯中丞招游靈巖山館

四面湖山列翠屏。清虛中有快哉亭。地高合讓名公占。水靜還招冷客聽。細雨秋添谿溜白。遠峯晚借樹煙青。靈巖從此成佳話。日犧中丞書畫船。

章淮樹觀察安園落成招飲

勝游不羨入山深。但要身安趣可尋。老樹崢嶸皆古貌。虛堂屈曲似文心。一泓水淨容初月。百尺樓高俯碧岑。招引吾儕無事飲。賽它清閟老雲林。

送袁香亭之官粵東

御屏名列幾多時。粵嶠清風試一麾。美政久書江表傳。詞人例作嶺南詩。天開韶石多奇骨。春到花田有異姿。五馬經行看不盡。略憑驛使報儂知。

烈女篇

美長沙周繼聖母馬氏也。元孫克開官九江知府。述其事屬紀以詩。

我哀五尺刀出自梁州鐵。不斷凶人頭卻染烈女血。借問烈女誰。云是長沙周馬氏之淑媛。德行功容修。

亂離丁明季。盜起西南陬。郡城夜失守。殺人高于邱。或言周家兒。智勇百夫特。僞檄忽及門。逼迫令就職。母聞呼兒前。亟走勿徘徊。汝身列庠序。大義不可乖。賊怒攻其家。質母以招子。纍纍繫長繩。子來則免爾。母顧三新婦。恥與賊俱生。同日罵賊死。以全令子名。當時衣冠流。俛首求苟活。苟活亦何爲。遺臭及朽骨。堂堂周家母。獨抱松柏心。千秋血痕在。入地爲球琳。劉項共逐鹿。匪有逆順別。陵母能知興。史家贊明決。何如周母賢。舍生得所安。我亦舊史氏。請補形管編。

嚴道甫五十壽詩

棲霞千仞翠當空。江左風流屬謝公。退自急流纔算勇。力能造命不居功。朝家掌故巾箱裏。海內名賢稿紵中。只恐蒼生催又起。未容五十便稱翁。

何須極貴又長生。安穩江鄉是化城。詩卷新排成巨富。煙霞偶戀亦多情。屏風任繪香山像。走卒能知涑水名。道德指歸胸自了。僊家世系出君平。

送秋颿中丞再撫秦中

紫泥銜詔入煙岑。雲岫無心又作霖。山水尙留名士住。封疆仍要重臣臨。河聲嶽色應無恙。細柳長楊試再尋。喜動三秦諸父老。郊迎遙識八騶音。

金陵寓齋偶然作

鬱鬱長千里。蕭蕭石子岡。六朝多貴人。地下埋黃腸。風流晉王謝。威武明徐常。骨肉久已腐。姓名或未亡。何來郵學究。褒貶信口張。大義引春秋。深文用申商。九原若有知。胡盧笑千場。讚誦非我榮。詬詈不我妨。惡口而兩舌。罪難逃空王。

劉項昔未爭。同時奉義帝。入關已如約。兵端自漢始。若翁且分羹。何有一旒贅。縱然垓下成。焉肯北面事。縞素誓三軍。偶用董公說。藉劫五諸侯。以遂吞噬計。陋儒無具眼。妄謂明大義。仗順利執言。是以分成敗。請看濠梁興。亦承龍鳳制。南征溺膠舟。便是重瞳例。

人言百王融。不如一係宗。王儉預顧命。豈能及茹公。何怪任彥升。低頭謝梅蟲。梁皇起博士。手剏大業崇。卅年斷房室。分桃非意中。朱异縱云異。生犀有何功。菱花不返照。翻嗤漢鄧通。

典午昔南渡。建康當洛都。算緝佐軍國。仰給惟三吳。濟濟衣冠族。寄命江海隅。王馬共天下。江謝亦膏腴。黃口乳尚臭。公然佩銀魚。作意抑南士。謂與京洛殊。仰戴牛斗天。俛飲揚子泉。口猶學吳語。身且衣吳絲。惟有仕宦格。便若雲泥懸。一朝淮水絕。高門皆灰煙。

王謝兩安石。前後負盛名。文靖澹蕩人。擁鼻詠洛生。艸付傾國來。應之了不驚。小兒已破賊。相公局未更。制勝有要著。非以僥倖成。介甫不曉事。執拗新法行。盲人騎瞎馬。欲致萬里程。可憐天津橋。忽來杜宇鳴。退歸領外祠。鍾山啜魚羹。一墩亦何有。乃與古人爭。

北水如英雄。三伏氣乃吐。當時出人勝。衣帶策馬渡。
南水如君子。風雨不改度。窮冬水盡涸。滔滔尙如故。
紫髯孫仲謀。倚此當子桓。風借阿童利。青蓋逐北轅。
六代與南唐。傀儡各登場。江神但大笑。誰爲分短長。

吳杉亭同年輓詩

三乘八綫算虛空。九弄雙聲玉鑰通。傲骨怕交當路士。閒官不礙讀書功。
門生淚灑陰堂奧。故友心驚宿艸叢。召試六人吾最少。眼昏頭白亦成翁。

贈何南原

風流東海說三何。今代南原較更多。文本性成兼有學。句從苦得卻能和。
但求元晏先生序。不落空同七子科。指點梅岡居負郭。秋深要訪碩人阿。

自歎

誰能中夜守黃庭。檢點流光黯淚零。蒲柳已非春日翠。槿花猶有午餘馨。
眼昏久怪鐙常暗。耳聳翻疑雨不停。未敢堂前譚老景。卻難遮掩鬢星星。

自京口至江寧道中口占

不作江心汗漫游。經邱尋壑勝登舟。石尤縱欲將人阻。且放籃輿出一頭。
中沿汲水記前緣。失喜芙蓉落眼前。浮玉山靈應見誚。過門不入又多年。

下蜀東陽半日程。霏藍翕黛認分明。青山未必皆奇秀。相見多時覺有情。
鍾山一脈曲蟠龍。側嶺橫坡過幾重。怪底蒼髯曾入夢。不曾眼見一科松。地名有五科松

曲榭高臺半作灰。有人訪古拭莓苔。誰知一箇麒麟在。曾見南唐東晉來。

喜雨

天欲醫人渴。農皆得意顛。畦如葵郢布。秧學繡針穿。翠嶺頭新沐。清渠股引連。無多溝澗水。也潤幾區田。
南浦觀察署中畜鶴飛去數月頃又歸來公子慶貞有詩次韻

振翮歸乘昨夜風。何須招鶴待坡翁。長身暫立青雲外。瘦影重看皓月中。一去詎能忘故侶。再來真不羨冥鴻。主人情重方圖報。未肯飛揚到遠空。

樂土無如十畝園。舊巢安穩當乘軒。僊翁自肯低頭住。童子何勞折柳樊。細雨梳翎仍故步。曲池照影記前痕。想嫌天上罡風勁。拳足花閒寄夢魂。

送周卉含游武昌兼訊吳白華學使

桐石相投調最和。故人無那別離何。杜陵且作諸侯客。宋玉宜聽郢上歌。挂席卻勝騎馬快。擬騷定到涉江多。南皮吳質如垂問。爲報錢郎兩鬢皤。

臺城二十四韻

六代此臺城。蕭梁恨未平。金甌終古缺。棟樹昔時榮。蚤歲游王邸。同僚喚騎兵。美須真帝系。方領學書生。火屋靈符應。瑤臺罪貫盈。復讐伍員弟。隱痛伯升兄。撻武功纔定。囚堯局已成。風流兼晉代。禮樂慕周京。不尙蒼鷹摶。何曾走狗烹。才華諸子擅。富壽一身并。月滿虧容易。牆高隙漸萌。暴師人是腊。享廟麵爲牲。四大終難捨。三災那免嬰。癡心求佛助。彈指見天傾。白馬青絲繫。獮猴兀尾猙。蹊開延臥虎。索朽馭犇麁。菜少全無醬。葵疏不下枰。禪機衣帶縛。國計紙鳶輕。艸艸航頭戰。匆匆郭外盟。將軍猶自勞。餓鬼竟相迎。得鹿身旋失。焚巢悔莫更。天非亡項籍。公亦負齊明。苦樂都歸幻。冤親或有情。千秋留懺法。梵夾獨標名。

諸藹堂招同仇一鷗王心原蔣亶夫游湖上

西子湖邊柳。招人出郭行。寺先尋瑪瑙。地僅隔牛鳴。溜水聲相答。屏風削儼成。翻嗤趙承旨。行者怕留名。高嶺射初陽。深阿啓上方。丹爐僊令杳。泉味僕夫嘗。入座衣都卸。巡檐帽不妨。半閒應讓我。山水許平章。晴雨總相宜。茲游兩得之。竹含名士秀。石學老夫癡。濃澹無心畫。煙雲作意姿。天公聊薄相。撩撥幾篇詩。

六一泉

歐公晚思頴。頴上有底好。縱復有西湖。小巫安足道。豈如武林西。煙水清浩淼。孤山峙中央。疑割蓬萊島。惜哉六一翁。屐齒竟未到。賴有老門生。補天出奇巧。嘉名錫清泉。如見歸田老。西鄰林處士。握手恨不蚤。一勺到處有。此翁後難紹。飛僊或往來。稽首薦蘋藻。

寓舍偶然作

風濂濂雨漫漫泥滑滑路悠悠水行風打頭陸行石礙腳人言出門苦不如在家樂在家未全樂出門未全苦婦歎我不聞兒嘯我不睹夜投逆旅主人延客酌酒一瓢以永今夕

喜晤李匯川同年

月湖聞有地行僊小別都門十五年勇退敢希錢若水論文重就李青蓮簪花舊侶晨星少翦燭深譚夜雨縣猶怕故人巖電失郎君爲檢枕中篇公子玉亭爲予製方治目昏

賀祕監祠

賀公吳語未全狂乞取澂湖一曲涼領袖八僊游酒國招呼十友習真方黃冠偶作山人服白水猶繁佚老堂歸及開元全盛日肯聽鼙鼓破霓裳

題范氏天一閣

天一前朝閣藏書二百年丹黃經次道花木陋平泉聰聽先人訓遺留後代賢誰知旋馬地寶氣應奎躔

題竹初丈小像

買山何必付空譚獨樂園中徑闢三方丈蓬壺總凡俗風流別有竹初庵四面紅雲著色攢石邊微襯翠檀礬十分生趣誰能領春在先生彩筆端

寒梅竹外太清孤。薑韭千畦計亦迂。萬樹桃花作供養。神僊富貴總輸吾。

奉化

地是千家聚。人留一宿緣。學參已易妙。文自剗源傳。最愛風山秀。休譚雪竇禪。生憎老彌勒。坐擁滿囊錢。

山行

四面青螺簇。中分白水渠。松谿遙度犧。竹筏便拏魚。雲薄添波皺。花繁襯石疏。誅茅隨處可。真稱野人居。

海口

海口三家社。山田再熟良。連枷纔打麥。裝擔又挑秧。橫笛僮歌緩。提筐婦餚忙。一年空拮据。不見盜贏糧。

方正學祠

嘆盡常山舌。血紅讀書種。子果推公一。門都入全歸錄。五尺羞稱靖難功。煮海久知劉。湧志勞軍難得亞。夫忠長陵金椀今零落。戶祝何如老禿翁。

雨止

快雨倏然晴。將山送入城。山田金碧畫。鈎勒最分明。叢竹生石閒。不隨巖勢曲。不願干青雲。聊可醫人俗。

小谿

巖斷沙衝水刮摩。如拳如卵又如梭。只疑石丈癡頑甚。也有胸中磊塊多。
夜雨平添萬壑雷。小谿百折瀉瓊瑰。怪它瑩澈全無垢。一滴原從華頂來。

桐巖嶺下作

依巖傍澗數家邨。位置天然獨樂園。山不知名皆蘊藉。樹當入夏倍豐繁。耳邊但覺轟雷響。眼底俄驚積
雪翻。青箬綠蓑都入畫。大癡粉本此閒存。

將至台州

四面雲煙疊鬢鬟。台州何地不青山。客衣那有紅塵染。身在松風竹露間。

東黃見滄太守

籃輿行徧翠嶙峋。握手南衙爲洗塵。地近天台山總妙。郡逢賢守俗還淳。當官不改詩書味。練事終歸質
素人。送我一筇華頂去。寄情物外亦經綸。

午日同王條山登巾子山

青山招手向吾曹。乍霽天教半日遨。游興不隨年紀老。詩情要與翠微高。鶴依古塔軒昂立。竹護禪扉結
構牢。如此佳辰逢舊雨。捫蘿陟陟那辭勞。

東湖

琉璃十頃恰平鋪。此地曾名小鑑湖。身到淤泥心不滓。清風萬古屬樵夫。

台州名宦祠

與政金華彥著書譜經世。何哉好大言。嗤人不識字。文人善相輕。平地生鑿枘。部民訟長官。白簡亦常事。株連嚴蕊兒。毋乃罪文致。小唐悔自取。大儒難輕議。卻哂陳同甫。饒舌太無謂。只今名宦祠。栗主仍竝置。遺愛猶在人。俎豆兩不媿。東坡嘲伊川。永叔彈待制。大節苟未虧。何弗安同異。

自臨海西郭至百步谿

青山無數破空來。蹴踏奔騰萬馬回。屈曲沿谿一百里。引人清夢入天台。百步谿頭竹筏連。清波湍激不容船。真人羽化不知處。依舊山青月在天。一雨前谿起急湍。平沙未覺路行難。青螺洗後真容見。分付詩人著眼看。

贈天台何明府

芒屨居然行腳僧。石梁初試一枝藤。地逢賢主心花放。人到名山眼力增。紺塔精籃都涉歷。金庭石室欲飛騰。探囊不少游山句。何遜前頭敢自矜。

題張氏來復園

前代司空第。明都御史工部侍郎張文郁別業。猶存獨樂園。金魚浮水面。碧蘚染雲根。樹迴延山秀。林陰入夏繁。旅人留

一宿聊遠俗塵喧。

赤城

何年吳剛斧修此芙蓉城。青碧了不著生面。萬古賴探奇自此始。賈勇雲中行。巖洞呀然豁。鑑削皆天成。虛空本無物。安用百雉營。得非丹砂窟。古僊鍊精英。寶氣凝不散。如火如霞明。山靈特護惜。失險高崢嶸。申命六丁守。勿使愚公爭。青城丈人來。款關或相迎。鄙哉公輸子。雲梯乃敢擾。

宿國清寺

出城數里便清奇。初地開堂智者師。當面峯知十回向。低頭樹習四威儀。三乘禪教元無二。一宿津梁自不疲。聞說寒山詩偈妙。春來飛錫去何之。主僧寶林有擬寒山詩適它出不值

三賢堂

此身何意別人牛。凡眼區區笑趙州。只向空山認蹄迹。誰知五百應真游。寒山搥胸多事遇寒山。無喜無嗔付等閑。掃地偶然叉手立。不將姓氏落人間。拾得冰壺無影月。無胎騎虎松門了不猜。日對文殊渾未識。五臺行腳笑空回。豐干

一行禪師塔

門外弟子來。安能布算得。我亦涉九章。不隨人耳食。

三百六十度防自九執術。一公初未寫。衣珠當面失。

高明寺

百折羊腸下碧岑。四圍螺髻護縑林。梵書不蠹千年字。古鉢猶疑大海音。石氣靜如僧入定。泉聲清似客長吟。一鐙止觀須牢守。休負當年演教心。

題高明寺壁贈實雲上人

十二招提智者遺。天台止觀一宗持。啞羊只把精藍占。忘卻開山老祖師。口頭播弄鬪鋒鍼。訶佛居然智慧林。也似儒家南渡後。不譚經義學觀心。貝多經葉滑于繪。佛鉢當年乞食曾。獨有幽谿雲長老。教宗猶守一孤燈。

幽谿

翠嶺列如屏。幽谿響不停。天風忽吹墮。一卷淨名經。

圓通洞

有漏雲生牖。無噴樹礙衣。祇容曼殊坐。不許僊鼠飛。此石大方廣。中有不二門。破除昏暗鎖。成就智慧根。

金地嶺

隱約青螺八字舒。雲中招手意何如。世人錯認真身佛。也戀金銀地上居。

宿華頂寺

一昔安居旅夢清。夢中猶是御風行。老僧不設蓮花漏。自有山禽夜打更。
竹瘦藤枯古石斜。白雲留護法王家。深山氣候元來別。五月初開芍藥花。
紙閣繩牀土木骸。本無一物惹塵埃。故知白鳥趨炎客。不到清涼佛地來。
眼食山光耳食泉。青雲爲佩月爲船。人閒此福輕消受。要抵黃金肘後懸。

右軍墨池

此水何年黑。傳聞筆陣揮。至今池畔石。猶是墨豬肥。

太白書堂

自是天僊謫孤高。絕四鄰。詩成鬼神泣。入室更何人。

華頂峯

洞府煙嵐鎖幾重。中央結頂翠芙蓉。風高不放松杉古。氣暖欣無雪霰封。八郡排連紛可數。羣山拱伏貌逾恭。此行未負隨身腳。已踏天台第一峯。

登華頂作歌

台山性蘊藉弗矜峭削名中藏石棱外不露元氣渾厚由天成窮子骨立袒肩背何如僊人雲衣霞佩朝玉京高居愍下界接引登紫清後來或居上天衢道自亨不然卓立一萬八千丈身無六翮安得凌空行淺人不解事妄謂累土殊平平請看瓊臺夾雙闕娟娟玉筍抽新萌請看銅壺注片練磊磊澗底排瑤瓊兒孫偶爾作狡獪已令觀者咋舌悚息并而況水源木本尊無對一蠡詎可量滄瀛道高望重邈獨立文章不露世自驚鵬游萬里蜩學笑未免饒舌蒙莊生君不見如來宴坐蓮華頂無香味亦無色聲已經成就最上果底須屈強磊塊更與人閒爭

茅篷

茅篷一百四十八多在白雲縹緲中有時清磬天外響欲往尋之無路通
清泉白石兩無猜雲爲封門風爲開掃地擔柴僧本分不曾乞食下山來
世上何人似汝閒終朝默坐掩松關莫嫌精舍瓜牛小容得須彌一座山
疾風昨夜過山凹雨點聲聲不住敲一箇團蒲身坐穩任它卷去幾重茅
攜來九節萬年藤踏到空山最上層指點團蕉如舊識前生或是打包僧

僧舍偶題

連峯八百里處處有招提魚板松閒響蜂臺樹杪棲前生嚴首座見在戒闇黎凡聖誰能別千山一鉢攜

石梁

突兀虛空兩翠屏。長虹接引入青冥。一條銀漢杯中瀉。九奏鈞天檻外聽。珠落玉盤皆照乘。龍歸金洞挾奔霆。應真飛錫重來到。不見曇花舊日亭。

蓋竹洞洞在石梁之右。臨海縣南三十里亦有蓋竹山。唐仲友詩。洞天爲我暫晴色。使我蠟屐窮冥搜者是也。

臨海奇峯簇藍橋。祕洞虛同時。兩蓋竹。若箇是僊居。

宿方廣寺

萬壑噲吟作意鳴。大音終古不虧成。老夫錯道傾盆雨。自起推窗看月明。宴坐虹梁兩足尊。眼前萬疊水瀾翻。何須更答文殊問。此是如來不二門。老去江郎百念灰。誰能擲地賦天台。石梁石澗尋常境。虛費河東八記才。

珠簾泉

終古銅壺漏。源頭日夜添。削平青玉案。倒挂水精簾。藤杖探谿曲。芒屨鬪石尖。此閒人迹少。或許老夫潛。

斷橋

斷橋本非橋。積雪亦無雪。銀濤瀉一門。六時流不歇。

萬年寺

我攜萬年藤去訪萬年寺。夾道皆松櫟。滿衣染蒼翠。應真所往來。八峯自環衛。泉響雜風聲。如是西來意。

羅漢嶺

佛有千萬名。羅漢但五百。非少亦非多。雲過本無迹。

寒風闕

獨上寒風闕。身輕氣亦清。自非列禦寇。誰到化人城。

桐柏宮

桐柏僊人地。琳房儼玉京。璫臺如可接。月屋此經行。導引張無夢。棲真杜廣成。乘雲倘來下。我欲問長生。

夷齊廟

星作珠旒霞作繆。黃冠自古傲朝衫。誰知采蕨西山老。卻換天曹僕射銜。

古貌棱棱白石身。清風百世不縕磷。山中蕨粉明于雪。攜到空祠禮聖人。蕨中有雞粉

訪崇道古迹得二絕句

擇木開元數八分。金庭妙迹劫灰焚。祇餘乾道尙書牒。留鎮山門認白雲。
桐柏宮前有乾道四年五月桐柏碑。其略云：崇道觀西白雲庵。以崇奉皇帝本命香火，賜額白雲昌壽觀牒。尾署銜者二人，其一參知政事陳其一，尙書左僕射同中書門下事不書姓，皆有押。以史考之，蓋蔣芾陳俊卿也。又尙書省劄付二道，一爲乾道四年五月一爲同爲乾道六年十一月，皆刻于碑之下方。碑陰刻乾道二年七月行在尙書戶部帖，帖後列銜者五人，秘書省秘書郎沈押員外郎韓差侍郎曾押侍郎方押，尙書闕府縣志皆失載。銜

宮觀名賢迭主持。考亭道學劍南詩。千年姓氏人爭羨。卻笑從無提舉祠。

瓊臺

中天積翠自亭苕。壁立雲端若可招。鷲嶺移來藏地肺。羊腸穿入達山腰。誰能絕粒棲靈府。或許吹笙度子喬。未到上頭吾已足。似曾摩頂向層霄。

桃源

灼灼桃花逐水流。僊人采藥漫勾留。山中半載當千歲。如此長生我欲愁。幾生修到洞門開。春鳥如何喚便回。冷笑神人亦凡眼。劉晨元不是僊才。艸露風燈景不留。鬼詩多事涴丹邱。曹唐豈是驂鸞客。且伴干頭壯水牛。

護國寺

韶公飛錫地。忠懿布金緣。路入桃源近。鐙猶法眼傳。碑存天聖字。塔認建隆甄。一掬門生淚。憑闌獨黯然。

公壁閒有武進錢文敏
手書予座主也。

潛研堂詩續集卷五

出山口占

入夏頗多雨。游山偏得晴。石梁東道主。特地作人情。
橫仄非一形。旦暮亦千變。莫嘲兩眼昏。尙認台山面。
立腳先須穩。寬心乃得安。高峯不敢上。爲怕下來難。
鴈蕩不多程。欲行又復止。寄語主山神。我非襪襪子。

石梁觀瀑圖爲華秋槎賦

石梁之瀑天下奇。昔曾夢到今見之。白龍兩條半空下。勢均力敵誰雄雌。盤盤囷囷忽會合。一瀉千里駟
莫追。天公手筆不平行。中流一束匪夷思。巨靈擘開未全斷。奔雷掣電趨雙屏。長虹宛宛只盈尺。雲端宴
坐人天師。波濤噴薄腳底過。挂下百道銀琉璃。將落未落自衝激。化作雪絮漫天飛。兜羅縣見世尊面。冰
絳蠻纖鮫人絲。匡廬鴈蕩小弱弟。其餘俛視如嬰兒。徘徊欲去不忍去。小別又落塵寰卑。秋槎好事乃過
我。前年觀瀑留新詩。丹青聊爾存彷彿。泠泠寒意生鬚眉。永嘉前生嚴首座。安知吾輩非同時。置身要在
僊佛國。應真五百相游嬉。原泉萬斛一口便吸盡。咳唾散落皆珠璣。

題黃雲門先生傳真圖

昔聞東坡語。山色清淨身四大。本和合。百歲如轉輪。獨有名不朽。終古長嶙峋。黃公人中俊。量與叔度倫。
降靈良非偶。維嶽生甫申。先公方持節。官舍懸弧辰。雲門翠當戶。肇錫名有因。宣聖禱尼山。表德義則均。
果應山水秀。爽氣摩秋旻。致身青雲上。風采傾搢紳。奉常掌邦禮。司農筦天囷。開府督八州。漕轉河淮濱。
三臺更八座。數歷四十春。晚歲出視學。玉尺臨東秦。人稱大小馮。校士同清勤。按部到青社。星移迹已陳。
高峯宛無恙。葱蒨若可親。天門聳百仞。不染元規塵。一笑爲指點。卽吾面目真。是一本非二肖。形兼肖神。
騎箕倏歸去。住世纔七旬。永叔神清洞魯直。山谷民人間偶游戲。不昧來去津。山兮人斯在。非主亦非賓。
奇石筋骨露。清泉咳唾匀。絳霞爲公裳。白雲爲公巾。岱宗公舊識。岷崕公新鄰。恆幹有解脫。真性無沈淪。
皓月光未減。清風久逾新。此是不壞相。孚澤宜永珍。

重過桐巖嶺

石疑斧劈痕猶在。泉似簾垂疊更奇。可怪世人惟耳食。好山如此不留詩。
漫山青翠不霑衣。邨舍多依石作扉。一路谿聲琴筑韻。替將鼓吹送儂歸。

麻譽

麻譽桑洲地錯連。依山高下半秧田。漚管午曬垂垂線。引筭家分活活泉。烏臼綠杉皆本業。橫峯側嶺與

因緣堯夫元有行窩例合置黃茅屋數椽。

雨宿止觀庵

一陣淋頭雨放顛。前途泥滑怕爭先。何人特置阿蘭若。準備先生自在眠。

脫了菅衫卻換緜。黃梅雨後峭寒天。羊裘五月尋常事。漫認嚴光作地僊。

海口南五里地名缸窖當是江瑤之譌也予游明州不及啖江瑤柱今日過此戲留一絕句

張融食指竟虛搖。未趁春風三月潮。一笑梅林堪解渴。柵墟海口有江瑤。

奉化谿漲

一滴涓涓可濫觴。分流石鱸響笙簧。無端借與風沙力。纔出山來便作狂。

水碓高低趁急湍。平橋沒水漲痕寬。漁翁赤腳當谿立。可有嘉魚上釣竿。

登舟

雨後潮猶急。天陰夏轉寒。孤舟如竹葉。上壩度危湍。伸腳安眠便。低頭得句難。推篷時一快。青翠數峯攢。

王陽明祠

半壁南天一戰收。蠻中更借伏波籌。功名已上麒麟閣。德望真懸泰華旒。信有文章兼道學。漫因門戶快恩讐。此蜉撼樹嗟何益。試看姚江萬古流。

雨過上虞

樹影山光自接連。秧田活活瀉清泉。小舟上壩如人立。急雨生泡似的圓。六月披裘非意料。三江放櫂有前緣。計程一舍梁湖近。問渡先尋幼婦篇。

偶作

樹瘦翻稱古。巖敲卻有姿。便如尸沁玉。臭腐作神奇。

積雨

積雨谿全漲。深邨戶不闔。郊墟都沒路。池沼已平階。赤腳牽船上。蒼落染壁皆。青山空在眼。不敢試芒屨。
自題天台游艸

莫欺潦倒白鬚翁。雙闕璫臺在眼中。編就紀行詩百首。卻拋兩月著書功。

一賦興公萬古傳。幾曾屐齒到山前。契舟求劍嗤吾輩。已落禪家第二詮。

斗酒雙柑便足奇。詒癡耗紙亦奚爲。故人曾授便宜訣。只愛游山不作詩。
竹嶼嘗語予游山是樂事。若作詩乃自尋煩惱也。予深服其言。

豆腐

殷殷雷車響。乍收勞薪夜。煮氣洩洩凝脂點處吳鹽細。練布包來卞玉柔。冰雪心腸原不俗。酸鹹滋味任相投。天公留與飧霞訣。供養先生六十秋。

題金丈月泉弄孫圖

江鄉尊宿魯靈光。解組歸來又卅霜。
絲竹東山何足慕。愛它珠樹列成行。
含香粉署鱣堂師。二妙凌寒翠竹姿。
謂荅坡駕部子。又生孫相接武梧桐百尺出新枝。

贈寶應吳明府閩林

千里相思命駕時。官衙握手慰心期。
湖光都入詩人句。輿誦將刊德政碑。
紫蟹過秋還有味。黃花垂老更
多姿。樽前吳語皆知舊。潦倒何辭泛一卮。

閩林以藕粉詩見示爲賦一律

重湖新藕載連船。九轉還丹至味全。
曝向庭中冰葉脆。激將瓮底鏡紋圓。
色香自信身無垢。磨鍊方成質。
最妍貢篚親題僊。令製要呈清白聖人前。

題侯大年先生鳳阿山房圖

朱查竹垞初白題句吳梅漁山長畫。前輩風流若可攀。
突兀山房疑在眼。勝它廣廈萬千間。
買山畢竟付空譚。留得詩書一味甘。
忠義文章有嗣響。故家喬木重東南。

小唐頤偶題

逃名何必更逃虛。一室蕭然自掃除。
公有私乎偏愛竹。客無能也且觀書。
花心午聚娟娟蝶。池面晴浮策策。

策魚誰是王筠多識字老夫還擬賦郊居

敬修上人招集江心寺卽席口占

香林背郭隔牛鳴森森江流可濯纓人到譚禪心自定節當浴佛雨初晴撚鬚不爲吟來斷撒手須從悟處行半日化城容小住品茶煮筍味都清

次韻范孝廉莪亭

心似冰壺萬里清牙籤一一鑒來精著書已勝金樓子汲古常攜玉帶生嗜好未除終遠俗文章愈老并忘名客中差喜陪游屐松島蓉洲寄遠情

題乞食圖傳奇

雲山舊衲話風流竿木逢場作戲游肉眼料應無識者卻煩紅粉一回頭
雪中鴻爪偶留痕妙句新題悟石軒難得傾城悅名士偏從乞食識王孫
叔寶清兼昭略狂玉山醉後易頽唐青衫一領判拋卻洗滌從來搘鞶腸
游絲一縷本無因香雪輕埋玉樹春不是楊枝沾法雨崔徽爭見卷中人
中山千日只匆匆喚醒三生泡影同但願有情總圓滿不教人怨可憐蟲
騷人骨相自清寒碧落黃泉見面難誰道返魂真有術春回江令彩豪端

題文敏公書井序

此先師武進尙書文敏公所書以當座右銘者大昕在京師晨夕造謁諷誦略皆上口公歸道山十有五年門下士亦落落如晨星每憶槐蔭書屋從游之樂杳如隔世今夏過竹初丈小林棲忽復見之則已裝界成冊矣泫然感愴情見乎辭

十年不見老僊翁坡公句筆力依然玉局同誰續晦庵言行錄平生心迹數行中

虛堂猶記鶴翔名回首西州淚暗傾萬斛原泉文格壯瓣香一縷在欒城

題印松汀觀察隱几觀書圖

胸中不讀萬卷書軀幹雖偉精神枯詎有伏獵杖杜輩而能致治如唐虞中令論語纔半部惠施多方且五車醞釀搢紳功不淺漱芳傾液樂有餘先生本是文章伯東方文史三冬儲柏臺梧掖久歛歷帝命持節來海隅天台四明高萬丈前身僊佛無差殊五花判牘公事了心清已到太古初天然棐几滑可鑑丙丁甲乙紺囊舒詞章襞積猶小技經濟要使仁風敷伊余衰病文思涸隱几自笑非故吾亟欲相從析疑義源泉萬斛相灌輸

題座主文敏公仿元四家長卷

茶山本天人游戲爲畫師胸中磊落有五嶽天機活潑出怪奇蓬山侍直廿餘載絕蓺不許人寰知我聞

論畫如論禪。宗派亦以南北岐。摩詰一翁作初祖。吳黃倪王四葉。垂曹谿法乳。出龍象。煙翁妙手孫謀貽。
麓臺已往誰嗣響。惟公心摹手獨追。試觀此圖和合四家法。驅使前喆如嬰兒。五日一水十日石。松杉栝
柏點綴位置皆得宜。蒼茫浩瀚一氣合。筆墨斷處神猶隨。畫成付令弟。知音今鍾期。自言倣麓臺魄力實
過之。西堂春艸冷。昔夢撫卷老淚雙漣漸。立功立言已不朽。餘技亦復疇能爲。鯁生一見但下拜。曾記解
衣盤礴揮豪時。

英公夢堂藏文敏公詩卷羣公題詠甚多。未幾夢堂下世。此卷流落市肆。竹初丈于京邸得之。屬
題其後。

竹井收藏物。竹井夢堂號 茶山絕妙詞。朗吟挂蘭句。何減浣花詩。過眼幾相失。對牀慰所思。還如蘇玉局。寄贈
卯君時。

題王定山所藏秦漢瓦當拓本

番易釋漢隸。甄鑿塵四五。五鳳出孔林。西京製猶古。瓦當昔未聞。奇文祕榛莽。烏傷偶收四。目眩詫始睹。
今又數百年。靈怪忽盡吐。外圓中藏棱。四出恰交午。奇哉陶瓶工。能繼籀斯武。金薤忽倒垂。玉筋競雙舉。
團團蠻旋磨。滿滿箭注弩。長生及長樂。頌壽多吉語。文同形或殊。百變不踰矩。上林都司空。異名復幾許。
汲古趙晉齋。與俞竹居爬搜入藏弆。吾家篆秋生。獻之臭味亦其伍。各有芟痴癖。寶此若璜琥。用以代陶

泓不惜錦囊貯。王君今名儒。好事薛翟侶。頻年游三秦。古物徧摩撫。一一拓其文。裝池甲乙序。如捫列星垣。如啓羣玉府。銅雀并香姜。俯視等爾汝。珍重什襲儲。勿使六丁取。

題趙文叔水墨花鳥冊

謝女題詩筆最神。綠窗輕染墨痕匀。四時花鳥隨心造。腕底元來別有春。
暈碧殷紅著色酣。黃徐舊譜擅江南。誰知林下空空手。生意都從水墨含。
石上靈芝竹外梅。離奇疏瘦了無埃。天然一種煙霞秀。似帶寒山面目來。
香茗才華絕代誇。停雲指訣付兒家。孤芳自有幽人賞。不羨裝堂富貴花。

閔峙庭中丞七十

開府東南渥澤敷。福星十載在三吳。風裁峻潔凌霜柏。心地光明照乘珠。處事無疑由定力。素風不改見真儒。七旬饗鑠今希有。精鍊猶能敵萬夫。

卅年北闕荷恩光。德望中朝孰鴈行。岳牧半曹爲屬吏。俊髦誰不列門牆。曲江金鑑春常朗。魏國黃花晚益香。卻喜懸弧逢夏仲。銅壺晷景最絲長。

籜石侍郎以新刻詩集見貽卽次集中寄懷之韻報之

誰能八座更抽簪。況有鄉園近墨林。沈率郊居初願遂。杜公詩律晚年深。谿山眼底皆殊相。花艸豪端見

素心清望高文兼第一。評量合向古人尋。

如公斯稱文章伯。媿我曾陪著作林。蠹食青編身恨弱。鯨游碧海力方深。廿年以長常低首。千載相期可證心。記否宣南坊裏住。雞棲車小數追尋。

附原作

錢載

困學前惟王伯厚。日知近有顧亭林。儒家獨起山川秀。史籍旁搜歲月深。但乞遠書長隔面。勿言多病突驚心。鳳城是事難忘處。蘭臭如君數往尋。

三月十九日蔣香洲立厓招集復園送春席間次潘榕皋戶部韻

太平時節自由身。折簡招邀爲送春。張丈殷兄皆老宿。盧前王後總詩人。小橋宛轉因波曲。新柳芊絲著絮匀。九十風光休錯過。禊游纔了又茲辰。

聞溉亭姪金陵之訃

讀書種子汝墳瘞。謂獻之弱族何堪一个萎。拾芥科名虛到手。寒穀仕宦未伸眉。二篇注補龍駒闕。六律元從鳳管推。著有史記三書釋疑及律呂正義諸書嘔盡心肝搜奧窓。千秋絕業欲傳誰。頻年書報欲歸休。恆幹誰知不少留。寡婦忍聽王粲賦。遺孤憤保叔敖邱。瓣香猶記先人授。溉亭從君子授業某水都同曩日游。後我成名先我死。阮生那禁淚交流。

絕句

焉用胡椒八百可憐鍾乳三千冰山彈指銷卻劍樹轉眼淒然
阮何一雙風貌王謝累葉華腴當日登場傀儡有人掩口胡盧
甲煎元知淺俗三葛況復麤疏墜花偶然上席醫痔常得多車

閱人朦朧有味用山谷詩見事鵠突無妨且過三平二滿不管五角六張

讀書漢魏而上置身木鴈之間不解學僊學佛但記某水某山
靈鵠不如拙鳩快馬不如鈍牛記得黃涪翁語真富貴在千秋

過將軍教場衙衙舊寓庭前槐大半已枯感賦

廿六年前憊此塵槐陰如繖一庭圓植非晉國根難久夢作淳于晝暫眠磊落長身猶老輩支離半體笑
枯禪恆河我亦羞窺影搔首西風獨黯然

題邵二雲編修所藏王文成公詩卷正德庚辰八月望爲惟賢憲副書
元日霧二日雨再游九華三詩

一掬憂時淚千秋講道心淋漓四百字鄭重短長吟理直詞無飾文雄學更深青門勤什襲寶此當南琛

程易疇臨董文敏書王文肅祠記長卷付其幼孫屬予題之

文肅家聲舊香光墨妙存臨櫟推老子鄭重付童孫益壽言多驗易疇得漢印文云
易疇因鈴卷末傳經道獨尊黃金何

足羨樸學在韋門。

何處期頤叟。來言逢吉占。題幘首者郭檢討閩人年一百五歲。銀鉤留甲觀。瑜珥愛丁添。豐芑詒三世。裝池重百縑。自慚無長物。付與阿同拈。予長孫與予同甲子生小名阿同。

荆軻里

匕首懷中出。諸郎殿上看。燕丹心未死。趙政膽先寒。成敗論人易。從容舍命難。千秋猶灑淚。易水共汎瀾。

郭隗故里

郭隗能陳義。燕昭自愛才。唯嫌枯朽骨。不稱住金臺。

中山靖王墓

煮豆煎何急。懲羹勢自成。慨慷聞樂日。怨恨聚蟲聲。百廿枝繁衍。春秋祭薦誠。樓桑留一脈。正統續東京。

曲陽道中

向禽山水有前期。投老全無濟勝資。五嶽平生唯到一。此來又拜曲陽祠。

謁北嶽廟

昔年住阜平。擬整曲陽轡。泥淖不果前。蹉跎竟卅歲。南北漫奔波。向禽志未遂。竭來訪故人。定州牧郭秋士得中山十日醉。爲言安天祠。近在兩舍內。扶病賈餘勇。哺行暮已至。詰朝叩元關。摵衣升瑤陛。冕旒儼

中央羣神旁拱衛。祠宮彷宸居。想自唐宋制。左城及右平。廊廡極壯麗。禹貢表山川。志大不舉細。太行與
碣石。中有恆山峙。飛狐紫荆險。聯縣只一氣。大茂當其脊。巍然特蒼翠。古聖崇明禋。皮縣稱望祭。虞巡十
一月。秩祀卽此地。三代洎漢晉。馨香儀勿替。孔鄭經師宗。固彪史學最。箋注迭相承。千秋靡異議。豐碑列
如林。周覽拭目眴。最古稱開元。三碑承最夙。丞相張嘉貞。郡僚陳懷志。復有鄭子春。波磔近漢隸。天寶戴
千齡。隸法亦髣髴。天祐碑已殘。猶存處直字。神物想護持。風沙未晦昧。孤亭聳其西。汁宋鉅公製。安陽將
相材修廟手自記。書法逼平原。過者正襟視。元之文章伯。黃書亦秀媚。區區五鬼徒。鼎立有餘媿。祥符醮
告文。中斷瓦礫棄。損者已可傷。完者逾可貴。其餘元明刻。凡俗不足計。異哉飛來石。明人妄題識。菌蠧斷
碣材。輒云舜所致。紛紛耳食流。皐白倏倒置。空令好古士。到茲三歎喟。渾源自言高。吾游姑舍是。淋漓翠
墨鮮目驗。亟藏笥。

雪浪石

瘦削真宜袖裏攜。一拳價已抵懸黎。山中大有纍纍石。不得坡公一品題。
松醪手製滑如油。石丈相邀共勸酬。若準仇池韓幹例。也應換得幾驛驅。

卽事

一宵供頓酒如池。破費貧家萬戶貲。莫怪茂宏頻障扇。汚人塵自庾元規。

真定道中

偶趁雞鳴起。衰遲意已闌。日高風力緩。霜重樹心寒。一水滹沱繞。羣峯紫翠蟠。前游宛在眼。泥爪忍重看。
客有言蘇味道不當昌其後者賦此解之。

四時鬼朴換匆匆。羅緘爭誇告密工。此際模棱已難得。不矜獮豸觸邪功。

肥鄉道中

漳水南遷後。孤城百堵新。肥鄉仍瘠土。行客本閒人。厭聽丁冬鐸。難障堦堦塵。泥塗知免辱。不雨已兼旬。

車中口占

金波穆穆恰當頭。露重沙平不礙輶。只似圈篷船一葉。夜乘明月泛汀洲。
百里行程未算遙。老來筋骨怕翻搖。生平腰恥爲人折。簸蕩誰知亦折腰。
欠伸休道打頭低。也有障塵布幔齊。最喜深秋連日霽。不煩泥滑竹雞啼。
堯山紫翠若爲容。乘興居然欲往從。從此南行八百里。更無峭蒨道旁峯。
漳水秋枯一綫平。廣平南去卽元城。天教此老添詩料。略補生平未歷程。

題徐雲樵石鐘山圖

我昔揚帆左蠡過。石鐘對面鬱嵯峨。三更未聽噌吰響。披卷無端觸緒多。

一記坡僊萬古傳。清宵悅忽奏鈞天。重開生面徐熙筆。山月湖風落眼前。

潛研堂詩續集卷六

哭褚宗鄭同年

六經家法溯東京。鄉壁紛紛笑俗生。禮有專師宗北海。傳尋九旨演任城。品高便覺官常冷。學邃多應老更成。屈指中吳耆舊少。靈光何意又先傾。

給札當時到鳳池。青綾襍被數追隨。僦居恰占東西屋。布算同拈黑白棋。幾輩升沈萍各散。冊年邂逅鬢成絲。只期二老長來往。忍聽寒風楚些詞。

題顧樵水落花詩意畫卷

童時曾賦落花篇。每向東風意惘然。今日任它開又謝。此心已悟色空禪。畫意詩情想象閒。底須粉本仿荆關。雲煙它日重編錄。記取山人著色山。

題徐友竹倣吳漁山湖山秋曉卷

絕妙漁山卷。精摹友竹翁。樹深宜結屋。船小易颯風。曠蕩天機得。經營意匠工。留題多鉅手。搖落感秋蓬。
謂沈彭雨尚書秦學士澗泉
程編修魚門盛明府秦川

嚴豹人移居城東次西莊韻

一枝隨處寄壺公。塔影雙浮老屋東。休詫借車無長物。祇因入戶有清風。
滄浪譚蘀源流別。彭祖傳經志趣同。袞袞書囊探未了。懸河直下瀉長洪。

松陵唱和句爭誇。小住圓橋水一涯。臨頓自來高士里。蜀嚴本是讀書家。
筆牀茶竈閒俱適。掃地焚香靜不譁。生怕金闕太煩鬧。此間風土最清嘉。

題黃小松看碑圖

判牘有餘功。訪碑無停晷。尙友到古人。翠墨雲煙委。歐曾趙洪後。立幟江夏子。
古物聚所好。不胫走千里。金薤文琳琅。收拾斗室裏。憶昨造高齋。清闕爲我啓。香廚一縱觀。如入五都市。
畫手數顧陸。絹素那足恃。何期東京刻。眞面歷可指。法服儼冠劍。禮器陳匡枕。銀碧流離甘露木。連理靈祕不能藏。
一朝列棐几。奇怪驟難讀。過眼聊復喜。合併知何年。癖嗜略相似。披圖宛唔對。慚我聞屢咫。想見手摩挲。
比鄰招短李。片石如能言。風塵感知已。謂李鐵橋

錢叔寶謝湖艸堂圖

爲袁尚之作。今爲

又愷上舍所得

汝南有畸人。布衣起雄霸。七賢黜山王。百篇追陶謝。躬耕湖上田。手闢竹閒舍。著書石磬齋。歲月自清暇。
吾家罄室翁。游戲點筆乍。復有龍池生。辯舌懸河瀉。彭山人作記。三絕競流傳。水邨此流亞。何年壑舟移。神物疑久化。昨過三硯居。展卷精采射。爲言購自浙。不惜兼金價。魯弓幸已得。鄭璧無待假。四座各歡咍。浮白。

傾酒管翰墨千載緣合并天所借回首金昌亭虹月照深夜。

和榕皋齋中雜詠

撥鎧元小技指授要良師心正纔能妙鋒偏枉逞奇剝藤搥幅霜影禿枝枝最羨襄陽米承家有虎兒書

活潑墨縱橫煙雲眼底明山從心坎結花向筆端生奇秀神僊骨枯寒逸客情右丞本詩老遊戲得傳名畫

何處移情去蒼茫海水深七絃調玉軫一鴈落遙岑且洗箏琶耳誰爲唱和吟昭文今不鼓寂寞待知音琴

覆郢評前史推枰記昔塵角爭蠻觸地刦換古今人布置須求穩翻騰要出新旁觀徒袖手任爾局中身棋

題馮巽泉太守秋缸補讀圖

儒林經濟非兩事根柢深厚枝葉榮秀才已辦作宰相節度卽是前書生一行作吏便廢此何異得飽忘耘耕昌黎仕宦已顯達白頭猶復親鐙檠書囊無底探不竭深造自得匪求名三山馮公古儒者閩學傳授先周程蚤年拾芥取科第親民歷試多循聲翩然五馬到江左風行令肅嚴百城三吳首郡特借寇黃

堂燕寢凝香清盤根錯節人棘手公獨游刃觀其成才全學富心益細一嘵四益無驕盈仕優而學詎虛語籌鐙猶記蘿粥盛珠墳笙典列左右吐棄糟粕攀精英許鄭韓蘇互嘲弄一笑任爾蠻觸爭中令讀書半部少鄰侯插架三萬贏文章須有裨名教經史自可致治平嗟予寡昧晚炳燭仰屋自作秋蟲鳴願公恢宏經世學補衰三殿澤八紘

題費玉衡窺園圖

三載園林竟不窺廣川精詣果堪師由來艸木須多識可是先生未學詩
生意窗前驗寸荄心田衍沃好栽培蘭成詞賦非吾事且住園中撰玉杯

題陳樹齋提督聽雨圖

生長忠孝門撫染詩書味三十登壇驚一軍緩帶輕裘靜無事英衛之武虞褚文威名儒雅兼一身朝挽強弓午揮翰腕力勁欲回千鈞金貂侍從三殿裏旌節輝光又南指亞夫詔許真將軍諸葛人推名下士偶然寫意濠濮間濕雲半掩青翠山茅齋淅瀝響疏雨主人宴坐冰雪顏笙歌鼎沸世所好不如倚竹一清嘯琅玕個個無俗聲唯有靜者觀其妙我似青藤磊塊人曾邀幕府醉芳樽月湖記得同聽雨翦燭何時重細論

題汪大紳摹鼻圖

佛海藏身已卅年。蒲團宴坐夜忘眠。吾廬畢竟空何有。冷笑區區戀愛緣。大紳自號愛廬。因以調之。

久從初祖安心境。戲寫鴻山驀鼻圖。多事人牛強分別。要知佛性本無殊。
夢泡露電任前因。古佛居然見在身。猶怕臨岐無把鼻。三生一念作文人。

公案重重窠臼翻。口頭容易擔肩難。何當更貌知歸子。謂彭四尺木便當寒山拾得看。

簡齋小疾作詩自挽并徧索同人輓章依韻戲答

楚客旁招計太遲。符頭未到若先知。小生近亦頻病作循例。從公乞一詩。
一朶青蓮舌尙存。石城虎踞獨稱尊。嗤它癡臥希夷叟。虛擲光陰養夢魂。
浮休莫把世緣空。天意留公要惱公。未肯便宜放歸去。雞窠製就待詩翁。
小園有菊有松梅。輓住飈輪不得回。天上文星例相妒。此人肯放出頭來。

題程易疇說劍圖卽用自題元韻

葺翁先生說攷工臘廣手題桃氏劍。平生所見七純鉤。規製盡同無少欠。季子之子問阿誰。未許徐君墓。
上占孫退谷所藏劍。朱竹垞定爲吳季子劍。易疇辨其文爲季子之子。古人字季子者甚多。不獨季札也。攻金良工久失傳。耳食何如取目驗。俠客徒誇膽氣麤。經師但覺精神斂。莫言一吷偶然吹。斗牛中夜光芒爛。蓬心作圖但寫意。前圖王永州宸所作圖中無劍。非指非馬夫何玷。宋生爲補第二圖。後圖宋學博淳所作則有劍矣。譚柄它時留鉛槧。三年苜蓿賦歸與。留行無力予心忝膏肓。

墨守待君箴。欲覺何由聽鐘梵。願持通鑑釋劍篇。呼兒且作張文念。

題竹柏樓居圖

韓孺人作
爲袁節母

冉冉孤生竹。蒼蒼歲寒柏。小樓當其閒。清陰照几席。中有高義女。盛年守潔白。十三能誦詩。十五工織帛。十九相夫子。家事佐繁劇。洗手作羹湯。和灰澆襦襪。事嫡如事姑。相得心莫逆。一朝喪所天。挽髽榛笄尺。坐臥只此樓。誓與人世隔。有兒纔六齡。足未出阡陌。有女襁褓中。學語但啞啞。保抱更攜持。拮据手駁坼。兒病母矜憐。兒慧母護惜。衣綫皆親縫。荻筆常自畫。伶仃一老嫗。衰髮委半額。相將蛩螢依。誰與訴肝鬲。有衣但麤疏。有食但糠覈。膏沐誰爲容。簪珥久已釋。寒風吼檐牙。凍雪入窗隙。不知桃李華。那識春秋易。唯將淚洗面。長此痛在嗌。竹柏倘有知。或能鑒疇昔。荏苒十五年。冬縣換夏給。兒長室已授。女大對亦擇。慈母設帨辰。張樂將會客。母曰亟止止。戲綵吾弗憚。古稱未亡人。豈宜絢金碧。撫孤幸有成。行將返大宅。其秋果示疾。屬纊去來適。乃知冰蘖心。已證人天籍。哀哀純孝子。涕泣念先澤。繪茲竹柏圖。音容永無斁。所傷左女亡。孺人女素貞未嫁卒于室回首增擣搘。屬我紀以文。彤管示規讞。我讀劉向傳。淑懿輝簡策。我瞻武梁祠。高行刻貞石。絡秀興周宗。宣文著秦冊。敬陳竹柏篇。以續詩三百。

題程易疇讓堂友教圖卽和其還山吟韻

黃菊正秋色。先生賦言歸。三徑想無恙。肯與羊求違。天都高萬仞。孤鶴任自飛。九皋鳴已倦。故巢聊可依。

登山須登岱。勿爲自厓反。讀書訶玩物。一笑丈夫淺。有書藏名山。何用愁往塞。引疾辭一官。心與白雲遠。
我衰筆力鈍。鉛刀割不任。君如百鍊鋼。純鈞初出鐸。苔岑臭相投。共此千秋心。一別會何期。嚶嚶羨春禽。
本是經人師。元無溫飽志。去住如浮雲。恢恢有餘地。儒林今辯才。文陳昔雄帥。誰與登韓門。庶幾續鄭記。

同方坳堂觀察訪彭尺木居士

寒氳風味冷于冰。故紙窗中一凍蠅。偶被宰官引將去。路人也認在家僧。

題王秋史二十四泉艸堂圖

方觀察所藏

東秦名泉七十二。就中最勝稱廿四。琅琊王生昔卜居。傳是前朝閣老第。艸堂已廢只圖存。點染依稀作雪意。四時皆好獨畫雪。冷澹家風與誰說。黃葉詩名海內傳。刻谿游興心中結。一官蕉萃坐無氳。長物惟餘書畫船。此圖流傳換幾氏。藏弃今歸方萬里。名流題詠尚宛然。鬚眉如見王郎子。歷下亭白雪樓。文章但足垂千秋。其人雖逝神長留。卽今沂南名士有公在。珍珠泉水終古無盡流。

題金二雅禊游圖

重三禊飲尋常事。一序能令萬古傳。舊日山陰今笠澤。鱸魚鄉裏住神僊。

誓墓區區憾未忘。那能泡影任彭殤。後賢見道勝前輩。天朗風和趣更長。

題袁實堂載書圖

不載黃金只載書。秋風未到賦歸與。南湖煙水遙相待。詩老今年合遂初。

題唐立方進士遺像

好潔倪元鎮。工文柳道傳。嫋成名士癖。悟得小乘禪。謐賞猶前度。儀容邈昔年。空餘故交淚。灑不到重泉。名已登千佛。心還薄。一官腰圍憐沈瘦。詩格得郊寒。柳意垂垂禿。荷香冉冉殘。池塘留小影。那忍更重看。

范莪亭自題甕天室集禊帖字索和

每于禊日集清流。觴詠當知此。室幽山氣有無觀。一一竹林長少盡脩脩。惠生取樂能同物。向老隨時作暢游。曾與春風羣列坐。流年俛仰感因由。

天一風流有後賢。放懷觀物自欣然。臨風會豈殊稽向。仰古文期述固遷。視聽之間咸快事。山林以外得長年。人生樂地隨時足。和曲同時當管弦。

題籜石宗伯仿沈石田花卉冊

九秩地行儂。揮豪妙自然。竹含太古節。花悟見前緣。運腕青松勁。銘心白石傳。區區工設色。冷笑老黃筌。

得畢秋颯尙書札卻寄

曳履星辰一品崇。南條萬里建牙雄。文章遠溯周秦漢。助望真侔衡華嵩。勒石楚江傳杜預。編年宋史續溫公。畫披案牘胥鉛槧。總在精神籠罩中。

車笠窮交分已懸。手書慰勞荷年年。時晴乍展義之帖。肆好先吟吉甫篇。每爲著書商義例。偶因考史借陳編。謝公羣從多才子。負笈慙無腹笥便。令姪曉山孝廉從予游。

選吳竹嶼舍人遺詩畢感舊有作

身到絲綸閣上頭。煙霞痼疾未全瘳。輞川園好留人住。白傅詩成放客偷。青紫那如名士貴。漆膠獨與素心投。篋中遺藁新排就。寂寞黃爐尙憶不。

白桃花和張止原韻

洗卻燕支換素襟。元都重到客沈吟。號家小妹朝天面。姑射僊人出世心。囁雪怕教千日醉。施朱何取十分深。當年坡老如相識。不道漫山谷到今。

題吳竹堂墨蘭

湘中九畹託根深。移到閒窗伴苦吟。領略此中真臭味。天涯難得是同心。

王西林秀才丁堰覆舟戲爲絕句

波瀾翻覆訝匆匆。吸盡西江一口中。寄語王郎休斫地。從來落水有三公。始信陽侯亦愛才。得君詩藁放君回。當年真悔王文考。不把靈光擲水來。茅檐暫換野人裝。豆粥居然續命湯。百甕黃蠶消未了。寒泉肯伴水僊王。

題潘榕皋水雲圖榕皋嘗夢見董思翁舟中作書并舉彌陀經語二林夢樓題詩因有援以入佛之意作此解之

三絕香光有替人。夢中口授幻耶真。要知文苑儒林客。總是千年不壞身。
復性三篇繼孟荀。習之文與退之倫。偶題雲水天瓶句。認作傳燈錄上人。

送汪稼門方伯之任甘肅

旬宣分陝控伊涼。南國人攀召伯棠。土脈高寒甘雨潤。河流環抱溯源長。立身峻壁臨千仞。愛物慈雲庇
十方。清徹玉壺心迹似。略攜琴鶴當行裝。

九遷稠疊奉恩綸。未改書生面目真。敵菜根中尋臭味。燃藜燭下見精神。關西清白堪貽後。涑水勛名豈
異人。話別匆匆重折柳。送公遙踏灞橋春。

邵松阿舍人七十

吾谷二峯翠黛聯。此中合住地行儂。紫薇詔艸三千字。紅藥詩名四十年。試舍人院詩題也

領袖詩書有後付覃研。吳都文粹誰人續。試載先生卻壽篇。松阿辭長啓甚工

同出南豐一瓣真。君鄉試出長清曾公房予亦曾公薦爲試官所黜。白頭感舊話酸辛。墳篋共羨洪文敏。圖畫今歸白舍人。老尙
著書元是癖。性非諧俗偶忘嗔。蘭亭合準義之例。觴詠重逢癸丑春。

盧召弓前輩寄重游泮宮詩索和

泮水寥芹日低回六十年歐陽真學士鴻一老神仙。室記循牆入鞭驚著手先薇垣芸館彥若箇敢差肩。五色雲開榜三輒日暝階官清貧亦樂名重退逾佳。長物青氊在殘年縹帙排然藜聞太乙曾到讀書齋。教衍河汾緒文探洙泗源素心爭柏勁和氣得春溫不朽文章貴常惺道德尊白頭顧衾影不負聖人門。

和潘榕皋移居

列僊儒本愛林棲鼓吹何曾羨竹西獨樂一園開涑水游山八記擬愚谿濠魚共識人心樂指馬都忘物論齊青翠支硎知不遠紀行處處姓名題。

題熊謙山曠然有我圖

高人戲問形神影古佛都忘來去今一笑掀髯成獨往曠然如見自家心聲聞緣覺強爭論萬法都歸不二門爲問如來無我相云何也指我爲尊

聞述庵致政南還之信

溫詔欣聞下九天歐陽真箇許歸田遂初久識心如水勇退方知骨本僊綠野課耕此去穩青門祖餞異時傳十年宰相何須羨煨芋山中自在禪

秋晚訪述庵司寇三泖漁莊因同訪圓津禪院慧照上人卽放舟游余山適雲閒汪西邨張坤厚

金治昆仲亦至偕入王氏園登皆山閣久之復至天馬山登周氏山舟堂還抵萬壽道院道人雪

飄留飲歸途得詩四首

石湖乍報范公歸容得谿翁畫款扉菊爲秋深香更厚蟹當霜後味偏肥文章真到歐曾壘經術還傳鄭
服衣一榻高齋留小住翦燈話雨重依依

滄江共載米家船咫尺東奈一宿緣萸汎椒園粗結構櫻軒竹杖小留連銀鉤猶榜尙書字祕笈誰探處
士編頗喜參寥偕入座聞香且證木犀禪

客來不速恰三人天馬峯前共泛艤杜老酒徒招旭白蘇門文字得黃陳山如秋意含冲澹詩有天機到
朴淳重過山舟舊池館雪鴻指爪話前因

行窩隨處足裴回鳥語鈴聲次第催丈室靜繙經貝葉羽庭留酌酒螺杯誰能榮世兼名世公是僊才又
佛才涑水縱題園獨樂不妨真率故人陪

題獨立圖

獨坐近于傲獨行過于勞不如楚騷人獨立雲中高東坡本謫僊少陵亦詩豪尙友千載上招手同游敖

題吳玉松除夕游山圖

閱世恆河沙俛仰無盡意四時一刹那迭周孟中季浮生有底忙達人澹無事款門得素心游山聊興寄

虎邱脂粉場忽露本色翠寒風送松響勝聽兩部吹無營亦無著僊佛豈異類是爲安樂窩見在了非僞物勞我自閒人欲天許遂東坡臘日游千載風流嗣

趙文毅兜觥詩爲者庭明府賦

元老不作孝詞臣偏上章千官慙仗馬一角儼神羊魏笏驚无恙荆弓自不亡忠貞留口澤什襲有輝光宗器陳非偶文孫淚暗濟題詩徵秀水懷寶自尼山白璧仍歸趙黃金欲鑄顏紛紛炫青綠屢鼎重人間

題熊謙山紅鵝香稻圖

天冠山高幾千丈紅鵝下洛湖水香金谿一脈演江右巒堂俎豆生輝光有巖嵌空出石井神瀵自溢天流漿真源不從穿鑿得深洞疑有蛟螭藏決渠股引灌溉利百頃櫂種秋雲黃雞棲豚柵趁墟集考亭詩句今猶芳先生蚤年讀書地河洛太極探津梁蘆粥僅給范文正秫田自穫陶柴桑一朝成名登省闈經奮儼獲千斯倉守郡歸裝載廉石板輿奉親客豫章粉榆故社宛在眼彈指十二更星霜畫圖彷彿記昔夢某邱某水游釣鄉三吳人望作霖雨真儒志豈謀稻粱講學詎生分別相濟世要儲和劑方名山鍾秀定非偶鵝湖紫翠長蒼蒼

潛研堂詩續集卷七

題江南名勝畫卷十二首爲熊謙山臬使作

繖嶺棲霞

一峯如紫蓋，秀甲江之南。巖石自峭蒨，雲木相參覃。捨宅記僧紹，勝地開精藍。鐘魚相應答，禪悟無俗譚。傑閣占絕頂，攀藤試窮探。羣峯旁羅列，一一蓮菂含。傳聞攝生艸，偶見優鉢曇。三秀如可采，持以貽彭聃。

玉冠萬松

亭亭玉冠峯，卓爾聳萬丈。江流畫檻前，人行飛鳥上。十里蒼松陰，手種何年昉。非貞白栽，曾否僧紹賞。高樓敞三層，入夜波濤響。不爭桃李榮，自受煙雲養。歲寒心自堅，直幹世共仰。茲蔭及萬夫，甘棠庶可仿。

靈巖石鼓

吳山多平衍，茲峯獨削成。卓立千花塔，百里若送迎。昔時歌舞地，花艸依然榮。洗滌脂粉俗，乃得真面呈。石鼓儼在懸，想像韶鈞鳴。具區三萬頃，一色玻瓈明。琴臺撫古調，泠泠移我情。羣真雲外揖，餐霞共長生。

鄧尉香雪

梅花如高人，可望不可卽。一枝竹外斜，清芬味無極。誰知光福里，乃有衆香國。目眩光明海，身到水精域。

多多斯益善。靈異邈難測。得非主林神。吹噓大願力。造物無盡藏。如來不住色。有鄰道不孤。可悟君子德。

石湖天鏡

昔聞范文穆。結構依激湖。樓懸天鏡榜。放眼收全吳。分明大圓鏡。簸弄牟尼珠。清磬出上方。彷彿游僊都。手編梅菊譜。述作聊自娛。薌林與盤圃。未若此地殊。政績在廊廟。詩名播海隅。榮世仍壽世。毋乃侄僑徒。

洞庭疊翠

林屋僊人居。洞天列第九。宛委祕靈文。聞有真官守。縹渺與莫釐。雲中若招手。其餘七十二。拱揖儼賓友。面面碧琉璃。洗刷了無垢。幽探穿洞壑。攀躋捫星斗。金庭若可通。石公亦有耦。置身千仞高。是以靜而壽。

九峯三泖

三泖平如鏡。九峯澹于螺。游目頗清曠。賞音在澗阿。數家成村落。意到皆行窩。煙中客雙屐。雨後漁一蓑。天風送梵響。林杪聞樵歌。俯視鷗鷺羣。拍拍浮滄波。平遠自蘊藉。奚必窮嵯峨。知仁山水樂。會心豈在多。

惠山九隴

縣延西神峯。九支勢相屬。竹樹暝便娟。半空皴衆綠。尤宜雨後看。青螺髻新沐。中有第二泉。涓涓噴珠玉。一勺清而甘。未許中冷獨。竹罐試頭綱。活水候初熟。兩腋清風生。可浣塵萬斛。何用遠求僊。武夷訪九曲。

金焦雙峙

方丈與蓬萊渺在滄海外。豈若金焦山。只隔一衣帶。兩兩青芙蓉。天然謝藻繪。古鼎文離奇。中泠水漆沛。竹徑延清風。松濤吹衆籟。指點大江心。飄檣南北會。柱石砥中流。凜然見風概。洞天一品尊。欲下元章拜。

平山高詠

平山一簣地。留題始歐陽。羣峯隔江外。放眼青茫茫。龍蛇壁上字。千秋鎮蜀岡。後來蘇玉局。持節臨維揚。醉翁翰墨在。拂拭識不忘。兩公人中豪。經濟兼文章。今識鉛山翁。眉宇真堂堂。祝公繼前哲。姓氏同芬芳。鉢池丹鼎

王喬昔學道。于茲煉黃芽。驅使風雷力。噓吸日月華。丹成得度世。輕舉乘紫霞。至今巖岡色。澹赭如蒸沙。井水日三變。光怪圖經誇。神僊迹豈幻。感應理不遐。福星照一路。生全千萬家。功德不思議。食報那有涯。雲龍放鶴

鬚蘇本天人。下界偶游戲。黃樓賦落成。臨事見經濟。天驥古逸民。雲龍此靜憩。胎禽任所如。去來了不計。兩賢契相投。一記重奔世。羽衣夜吹笛。風流若鬚翁。今大蘇文采。後先繼。請歌鶴南飛。以侑使君醉。

題陳東浦方伯詩藁

幾人學杜陵。但取優孟似。大瓠中咷然。塗飾外觀美。聲響多雷同。聊悅箏笛耳。先生冰雪心。苦吟悟至理。語言文字外。澹泊有餘旨。持比浣花翁。去膚得其髓。

桃李競穠治變滅隨春風。呢呢羅綺語惜無丈夫胸。改絃以淺俗矯枉又失中。雅頌風同源未可薄彫蟲。節性導以正清新出無窮劍南有遺言無人愛始工。

題陸豫齋蘭亭卷

蘭亭禊游人已往。畫圖千載今猶存。四十二人鬚眉古。雅尚自覺山林尊。右軍中年先墓誓脩竹。茂林性所嗜。揚州鼓角任喧闐。何異蛙聲兩部沸。賓朋子弟相招攜。曲水流觴列坐時。吟固欣然罰亦喜。胸中要有無聲詩。人生所遇皆陳迹。後視今猶今。視昔千巖萬壑秀依然。只恨眼前無此客。豫齋好古慕古賢。置身宛在稽山閒。科頭宴坐託末席。未敢便拍洪崖肩。永和至今一旦暮。觴詠留連有同趣。西谿倘續雅集圖。把臂入林記良晤。

蔣立厓以虎邱和東坡韻詩見示因次和

此山如蘭亭。清流帶峻嶺。一罅穿雲根。往來占井井。纏汲長不枯。下拜笑漢耿。或疑盤龍蚪。何處容蝦罿。
莊嚴大士像。宴坐伏癡礦。持此慈悲心。不退力。何猛摩挲熙寧書。筆陣各雄騁。姓名隱見間。剔蘚寄酸哽。
輕塵弱艸棲。千秋只俄頃。山靈閱人多。胡盧齒欲冷。石觀音像宋人所造三面刻普門品經凡九十餘行每行下刻書人姓名大率皆熙寧朝士也獨愛眉山翁。斯文日星永。鴻爪偶留題。如寫春山景。我衰久廢詩。舊游記塔影。三徑如可開。所願不敢請。塔影立

厓族父辛齋別業
予少時文識之地

鐘石侍郎輓詩

一道還鄉水清兮鑒白颺童知迂叟字客誦醉翁詩慘澹文星墜連蜷古木萎虎闌曾侍直惆悵失人師憶昔瀛洲步追隨老弟兄得書常互借置酒輒同傾一別分榮悴千秋隔死生篋中長短札檢點獨傷情

題何夢華滌碑圖

能于沒字中尋字始信今人勝昔人一斛清泉二尺帶誰知瓦礫有金銀

蘇臺柳枝詞

不與桃根鬪世妍依依長傍曲闌邊浮萍散後無消息冷落春風又一年
一縷游絲自翦裁漫天作絮豈無才偶然綰作同心結生怕東風觸撥開
張緒風姿沈約腰三眠三起鎮無憊生來不住黃金屋禁雨禁風十萬條
紅板橋頭水蔚藍攀條有客此停驂江潭蕉萃今如許曾記移根自漢南

袁簡齋八十壽詩

天與先生福慧全文章經濟又神僊蓬萊小謫三千歲湖海新詩一萬篇科第校量皆後輩雲山供養有前緣謝公墩下園居好日涉多應勝少年

乞假鸞坡得麗華白頭猶共鹿爲車兒童盡識真才子朝野多推老作家未澹名心還刻集要尋樂趣且

看花魯陽自有揮戈手未覺桑榆影欲斜。

八十依然五十翁蠅頭細字老猶工游行自在天機足怖畏全忘佛力窮許劭人人歸月旦香山處處畫屏風四朝舊事知多少總在便便腹笥中。

上已風光閏後新蒼松也喜住三春游山爲避稱觴客娶婦還添詠絮人角力狻猊無敵手遯形蝙蝠或前身攝生那要棲霞艸自把詩書鍊骨筋。

鰲滄來州牧施粥圖

東婁澤國苦秋霖忍聽噭鴻待哺音冬律乍回鳩鵠面春風如到卷施心十方佛力能兼護萬井童謠試細尋轉眼餚糜論口數屠蘇新釀再三斟偶然水早在堯年尺一溫言下九天貸粟兼叨仁者惠捐金獨荷使君賢炊煙起處烏爭集梵磬鳴時佛借緣富相功名覘異日青州荒政已先傳。

述庵侍郎招同袁春圃潘榕皋宋汝和蔣立厓周濶塘費在軒王西林張農聞袁又愷戈小蓮徐

佩雲集塔影園小飲卽席得句

謝公雅尙在巖阿蔣徑開時載酒過客以知心寬禮數天留暇日許婆娑西山真見羣僊會北郭重招十友多莫道尋常文字飲德星光已暎銀河。

綠水橋邊滑笏分。恆河照鬢白紛紛。蚤年落拓魚同隊。晚節軒昂鶴立羣。志出雲霄纔作達。味歸菽粟始成文。一宵衰衰諸公語。借與中吳續紀聞。

送方坳堂觀察之申浦

又攜騶從向江鄉。申浦潮聲接渺茫。道在可忘軒冕貴。心閒那覺算緝忙。五茸雲起迎征旆。三泖風平趁急裝。話別不知三伏熱。使君胸次本清涼。

扁舟載雪訪枯禪。彈指前塵又幾年。芟黍喜霑郇伯雨。冰心欲酌隱之泉。吟詩深夜髭應斷。學道平生骨本憊。想到官齋初月滿。玉壺清澈靜中緣。

到家偶成

娟娟玉雪有童孫。聽說翁歸競候門。檢點書籤蛛網結。安排茶竈蟹波翻。牽船差勝張融屋。妨帽聊行庾信園。鄰里盡知吾習嬾。更無剝啄耳根喧。

澹泊從人喚老慳。一簞有味亦皤顏。吟髭未斷無佳句。游腳先攀負好山。頗愛雲霞多別_豔。但求歲月得優閒。門前五柳枯成腊。曾見先生倦蚤還。

耳聾

無端曠曠學聾丞。對面招呼輒不聾。萬籟都空唯有我。六根漸斷已如僧。蟻牀牛關干誰事。蚓竅蠅聲任

爾矜除卻加餐酣睡外商量此老更何能。

春日

寂寞三家市婆拖一老藤訪花先約伴問渡或逢僧獺欲陳魚富狸無捕鼠能稍欣春雨足宿麥潤千塍。
題陸生學錦幽篁獨坐圖

簣管千个影離披抱鄰長吟有所思穠李天桃皆俗物素心只許此君知。

丙辰孟冬朔本縣舉鄉飲禮忝預賓席口占呈當事暨同飲諸君

僊令采風修古禮

李明府綏齋

師儒諭日啓初筵

劉廣文南谿

衰翁本乏專門學親演高堂第四篇

每曲當碑聯櫛行勝它洛社會耆英相逢不用寒暄話竹馬兒時好弟兄

謂沈席之表兄

九十年公老學專冊年曾此領羣僊白頭鄰叟誇人說再見渠孫揖讓年

先大父奉政公于乾隆戊寅舉鄉飲大賓時年九十有一見祭義

眼昏齒脫竟何裨難向恆河認鬢絲未老幸從大夫後來春已是杖朝期七十杖朝

見同人枉和拙詩幾及百首疊韻答之

歸田倏又廿二載設席叨居西北筵七字偶然鳴蚓竅嘉魚引得若干篇

泮水當時采藻行成童何幸踵羣英

余年十
五入學

而今衰鬢渾如雪先酌居然占伯兄

介賓王榮曜
齒長于余

蠹簡研尋枉自專鈍根何分食神僊杜韓兩集從頭讀恰喜相同本命年

以杜韓兩公俱
以戊申歲生

豪筆登朝那有裨。枯楊已老不成絲。喜聽擊壤鄰人語。大好耕田鑿井期。

丁巳人日七十生辰漫成四首

人日生朝恰立春。歡生七十白頭人身如散木。何妨病家有奇書。未算貧。嬾志夷堅排甲乙。怕繙雲笈守庚申。桑榆莫道垂垂暮。也被東風拂面匀。

脫卻青衿入紫薇。詞人異數古來稀。五雲多處身曾到。三徑開時客蚤歸。鶴禁鸞坡天上夢。秋菘春韭眼前肥。生平所遇無荆棘。想爲心中不設機。

屈指田園樂事偏了無。絲竹到堂前。歐陽集古一千卷。洛社閒居二十年。貧戀脩羊人。問字書慚紅蚓客。攜箋本來面目粗能記。不向曹谿學坐禪。

新春羅列五辛盤。兒女殷勤勸一餐。彈指卻驚前輩少。側身想到古人難。吹簫兄弟眠牀對。載酒生徒立。雪寒生長太平全。盛日巢林小鳥亦知安。

探梅

古瘦曾誇第一流。冰霜過後弄和柔。梅花也學嬌桃杏。不肯衝寒更出頭。

題吳香巖詩藁

季重才名久。宗元隱遜高。論詩守圭臬。寓興近風騷。澹若雲生岫。清如水翦刀。試看篋中作。心折次山聲。

還家

且飽家常飯聊爲遺興吟。菜莖都似劍茅秀欲成針。添線風鳶健。巡檐鐵馬音。兒童纔散學。上樹捉巢禽。東浦方伯枉過寓齋卽用集中見贈元韻。

憂樂希文志。精深子美詩。心如漱玉潔。名與落星垂。屢辱高軒過。常聆妙德辭。義門清望遠。親炙又今茲。

洞庭雜詠

三江百瀆水趨東。咫尺神山路可通。莫信道書標第九。靈奇直欲冠寰中。
地肺爭傳宛委名。深冬不憚攝衣行。靈威與我曾相識。先遣白雲洞口迎。
三洞玲瓏一竅分。天留石室護靈文。羅浮東武何由到。除是當年墨佐君。
皓月當頭洞不穢。曲肩曳足入空嵌。少年濟勝真堪羨。秉燭公然到隔凡。
謂瞿塘澗濤次兒東塾輩
白家宦況太蕭然。怪石區區寶一拳。若得此山作提舉。也應鐘乳聚三千。
林屋洞中多鐘乳

道隱園中竹樹疏。石湖伯仲鴈行如擬鈔。陽谷題名字。補入東王西蔡書。
爲愛名山最上層。非關投老欲依僧。上人倘肯招房客。我豈不如麴信陵。
東鳴西鳴聚湖尾。南烏北烏落湖心。翠螺八九若離合。中有僊人何處尋。
磊落嶽崎第一流。森如鸞鵠聚沙洲。石公自愛波心立。不慕人間盤固侯。

思黯園中甲乙陳仇池孤絕自言珍雲根鑿斷天機損此是長生不壞身
山青月白水冥冥大士潮音儼見形卻笑中吳小兒女三春只解禮文硎
身如猿狹綠毛攢三百行年一指彈冷笑門人七十二石壇欲當杏壇看
蔡僊鄉下小徘徊曾記方平絳節催未得麻姑一搔背可憐鞭已着身來
肌骨都消五藏存六年重換玉顏溫神僊似此誠堪樂角里先生幾葉孫
霧鬢風鬟別樣姿十年重見涕漣漣秀才縱使心如鐵肯伴尋常濯錦兒
綠蓑青箬樂如何一葉中流快似梭欲乞蘭香三薯蕷此生全不怕風波

玉樹詞人此地埋南楊銘誌刻山厓須城學士登科蚤世上人偏信遜齋遜
齊聞覽載梁顥八十二中狀元狀元也今傳奇言施狀元晚達亦此類

綸閣歸來筆未枯搜羅長語志姑蘇十年宰相山中住嗜學依然是老儒
桑畦橘市水周環人在山中不見山婚嫁自來多近局朱陳風俗在人間
小鼈東下卽長圻野鶩驚人拍拍飛休道寶山空手返載將夜雪一船歸

冬日山行

寒林亦何有葉禿剩空枝頗似江淹筆頽唐才盡時道門先去泰禪律蚤除癡安得營邱子丹青一寫之

靈祐觀

神景三唐舊。天禧榜特更。書藏雲笈富。境想玉虛清。香火今非昔。湖山澹有情。眼中釘未拔。太息認銜名。
石刻中書門下牒題銜云守司空兼
門下侍郎平章事而不名者丁謂也。

石公山

磊礧雲根露。紆回蘚徑長。真形從古聳。靈氣到今蒼。未列奇章品。終逃艮嶽綱。莫輕艸蛀石。積厚久流光。
一片雲垂幙。千年石作閭。至人觀自在。妙理契真如。聽法靈鼴拱。心怖鵠居應。聲隨感是何。待叩鐘魚小。
石洞旁有石凸起以小石叩之聲如木魚

潛研堂詩續集卷八

范文正公祠

義田遺澤尙如新。古貌依稀佛地人。
老子詎矜兵甲富。秀才曾耐粥鹽貧。
未登宰相輸琦弼。已到真儒繼
孟荀。詩禮趨庭多濟美。勒名黨籍又嶙峋。

西沚光祿輓詩

海內知心有幾人。垂髫直到白頭新。
經傳馬鄭專門古。文溯歐曾客氣馴。
勇退較予先十載。立言垂世已千鈞。
謂月二日下世去。蛇年難輓名賢厄。腸斷新春只兩旬。
立春僅十有七日。

館閣才名第一流。再遷已到鳳麟洲。
未登人爵公孤列。自愛儒林姓氏留。
文社廉夫評甲乙。史編孫盛續。
陽秋孝先溫飽知非願。卅載煙波汗漫游。

四座高譚贍太獮。東方玩世住人間。
蚤年說佛希摩詰。晚歲譚詩重義山。
天借金篦完老眼。人誇玉骨尙童顏。
誰知蛾術編鈔畢。不得深寧手自刪。

肩隨游釣夙齊名。秦贅相依倍有情。
已慟人琴亡子敬。謂鶴 何堪桑海失方平。
潘楊密戚無同輩。嵇阮偕游付隔生。
重到艸元亭上住。懸河那制淚珠傾。

用東坡涵星硯詩韻題潘榕皋易硯圖

我昔游端谿。古洞捫七星。又嘗飲鄴下。太行削翠屏。寶山來往但空手。不見鸚鵡活眼睛。老來蛇蚓任塗抹。師曠強學離婁明。安仁好硯有硯癖。石交能作月旦評。以硯易硯出新例。睨柱向壁毋交爭。一方蕉葉忽入手。亟拓四面紅牕櫺。撥燈大字腕力勁。解衣盤礴人皆驚。東畬今僧繇。廿年以畫鳴。潑墨寫其事。林壑紛縱橫。寓意不留意。豈獨雙陶泓。花橋水閣且痛飲。銷寒一斗何辭傾。

題吳蘭雪新田十憶圖

莫問千年蟠桃且提一壺春酒許。掾全家神僊大人毋乃金母花院奉觴。

西江詩派奇古東鄉山色清嘉獨立蒼茫自詠主人疑是浣花艸堂尋句

遙山一朶浮青方塘四圍浸綠偶然信步忘歸春意眼前自足柘塘春步

誰道秋容冷澹渲染紅樹青山寄情懷葛以上置身廉讓之閒蘇山秋望

生憎戲蝶窺人頗喜閒鷗伴我相親相近何嫌獨往獨來皆可石谿鷗伴

紫蕉葉底對酌碧桃花下聯吟記取花深深曲海棠開後如今蕉葉茗話

人望元方季方天才原甫貢甫無端一翼先摧孤負對牀風雨桐屋讀書

竹外一枝大好隴頭千樹無雙白下吳中看徧清香卻在西江煙靄探梅

且脫王鞅裘。纏那問郭椒丁。犖橫笛自吹。自吟生來不識徵角牛。坳吹笛分秧先須種。秫戴月偶出荷鉏枉卻餓驅乞米下。灤自有田居稻田聽水

題熊謙山臬使江春曉鏡圖

春城澹蕩翠有無。春水活潑雲模糊。桃李願依狄仁傑。風月獨占楊廉夫。公心如鏡含春色。生意滿前逗消息。物來自應去不留。紅紫紛紛無著迹。姑胥城邊民物恬。新聲不唱阿鵠鹽。但見曉山爽入戶。朝天萬笏青排尖石湖。四面春演漾。菱花乍放光一盃。此鏡分明照今古。與物皆春游樂土。晴雲出岫本無心。吹到三吳作霖雨。此心但如不繫舟。鏡中來往皆安流。

王拙庵太守大字千字文真迹其家人珍祕之後忽失去元孫柏厓縣尉多方購得之屬賦詩紀其事

前賢手澤擘窠書。過眼雲煙百載餘。偶借呼盧哀彥道。居然完璧蘭相如。寶章想有六丁護。翠墨仍爲什襲儲。更羨文孫守家法。筆蹤彷彿撥燈初。

題袁介隱遺像

胸中本無城府。眼底自有雲山。風流嵇阮以上。聲望廚顧之間。飯顆山頭老杜。白鶴峯下大蘇。展卷依然古貌。問名知是潛夫。

開徑且栽五柳。卜居恰在半邱中。吳有此耆舊。不媿臥雪之孫。
謂介何妨漱石。謂隱不礙讀書。屈指汝南世澤清風三百年餘。

題沈石田碧山吟社圖爲秦小峴觀察作

九龍山前有吟社。十友題襟杯共把。風流直欲繼南皮。真率依然學司馬。吳中高士白石翁。人物點染意
匠工。耄年展卷再題字。雪泥指爪驚飛鴻。碧山回首已陳迹。豈獨尊前無此客。能史閣中蒼峴詩珍重斯
圖等球璧。楚弓偶失今得之。延平劍合洵有期。主人快意浮太白。縱筆自記瓊琚詞。粉墨流傳三百載。寒
具纖塵不曾浼。手澤重歸淮海家。雙孝門風今尚在。西園摹本多失真。斯圖清勁妙入神。衰齡一見氣便
旺。直欲尙友當年掃石題詩白髮人。

題唐陶山明府岱覽圖

岱畎寰中秀。圖經手自編。君曾編岱羣山收一覽。五岳獨居先。指點寅賓日。心依丙舍田。太夫人墓在吳門天咫尺。白馬望依然。

憶昔乘輶日。鴻泥倏卅秋。予于乙酉同曹地山祭酒典試浙江有登岱之作唐碑曾暗讀。酈注亦旁搜。鬢髮驚非昨。雲煙不少留。
盪胸豪氣在。讓爾畫圖收。

題唐陶山松陵十二景冊子

手譜圖經又擘箋誰言墨綬不神僊畫簾判牘無它事釣雪灘頭一放船
鱸鄉一望水盈盈訪古懷人各有情寫入圖中全不俗谿流都學長官清

題黃小松郡丞得碑十二圖

平生未有和嶠癖作吏偏于孟母鄰一轍芒屨一雙眼天將金石付斯人
石室遺文甲乙題紫雲山迴吐虹霓笑它嗜古洪丞相足迹何曾到濟西
奇文每出歐洪外正史能搜馬范遺它日續圖知不少相逢還擬再題詩

謝金圃侍郎輓詩

一衿直受九重知岑賈揮豪到鳳池丹地回翔雄史席青宮講讀得經師主司眼力今深甫吏部文心昔
退之太息黃楊逢閨厄單闕於庚孟夏日斜時

五色何曾眼眩明手栽桃李半公卿摩登有障難成佛春夢纔過似隔生著述名山爲老計菟枯末路見
人情修文天上應留恨不得桓榮作五更

送熊謙山方伯之任滇南

滇南行省待平章吳下攀轅夾道旁卿月在天元共照光風漸遠意難忘驪駒將唱邀浮白竹馬爭迎入
點蒼萬里旬宣功不細試教蠻徼樂耕桑

盧抱經學士輓詩

抱經古君子貌古如其心通籍五十年依然雒生吟大廷陳時政一鳴驚朝簪虎闈詔勸學日獻邪蒿箴
永叔真學士子幹今儒林歸田更無事抗顏集青衿文探蒼雅始理悟紅爐深撼樹羣兒謗問字弟子尋
藏書數萬卷手校細酌斟汗青竟可寫落葉掃勿侵老矣生事窘炊煙冷竈突唯有觀書眼了了分棘鍼
忘年與我交謂若苔同岑公如老曹憲公有廣雅疏我慚盲杜欽何期單闕歲遽聞服鳥音秣陵書未答臘月
金陵札是少微星倏沈公歸自脫屣我淚徒沾襟西望檣舟亭浩劫感古今
公卒于毗陵旅次與東坡先生同日訃至

題關山雪騎圖扇

老矣登山怯山居但掩關看人騎瘦馬踏雪度重山

題唐陶山荆南十二景冊

荆南吾舊游蒼翠常在目善卷數疊雲巒畫一谿漾孝侯橋尙傳華覈碑可讀把釣記任公買田羨玉局
僊令唐公房于茲聘遐躅三年輓不留口碑在巖谷松陵今劇邑抱案無留牘暇烹陽羨茶仍續平園錄
兩地共謳吟來去皆吾欲何以寫清風臥游十二幅

和范芝巖編修移居元韻

久辭芸署托巖棲拄笏長看爽氣西卜宅恰鄰任晦里尋山暫上白家隄從游載酒斟雲液舊友敲門話

雪泥茅舍玉堂皆足樂。南華物論本來齊。

題法時驥大司成詩龕圖

丈室蕭然絕點塵。渾疑金粟卽前身。春風桃李新栽徧。誰是傳衣得髓人。
白傅匡廬曾入藏。褚公彌勒亦同龕。先生勘破詩三昧。挂角羚羊妙獨參。

題法時驥梧門圖

歐九文章冠列僊。寒鐙畫荻憶當年。碧梧幾樹亭亭影。不讓三槐植屋邊。
太學三年誨俊髦。登龍濟濟立青袍。棘門兒戲蓬門陋。爭似梧門百尺高。

題織雲樓詩集

霓裳同詠大羅天。子與丹頴方伯甲戌同舉進士傳誦秦嘉唱和篇。留得管彤相授受。一家兒女總詩僊。

八病雙聲析繭絲。深閨亦復有嚴師。左家嬌女王家婦。黃絹爭題絕妙辭。

頻年詩社結吳闈。得見君家最小郎。謂笠人文學卻笑瑯邪王子敬。尙煩道蘊解圍忙。

題宋汝和觀察竹梧清嘯圖

圖係少年時所繪

一賦梅花記廣平。人如玉樹謝庭榮。冊年重照波斯影。心地依然水石清。
蚤歲牽絲秩九遷。甘棠到處頌聲傳。心紅官印紛羅列。留待門生譜記年。

白雲出岫暫時還。冰雪重窺鏡裏顏。紅杏天然賞真色。不將絲竹鬧東山。
平泉門第本清佳。絕妙新詩手自排。官樣些兒全不帶。竹梧影裏舊圭齋。

文綱庵荷笠圖

衡山文獻後石隱想清風。譚借松枝拂。詩吟飯顆工。一筇青箬笠。幾盞碧荷筍。身世何須計。江湖喚長翁。
題王秋塍明府龍門攬古圖卷

緜氏有僊令。家世出子喬。詩名鮑謝伍。政績邱何高。山水耽奇癖。金石敦素交。嵩嶽兩室峙。伊闢百仞標。
北顧探王屋。西行窮二崤。昔賢登覽地。往往回鞭梢。龍門況不遠。紫翠如相招。嗜古黃叔度。松千里來游
翹。廿載車笠舊。合併倏今朝。折簡迓儒衡。武虛聯騎崇山椒。秋高石骨露。葉脫風刀刀。深洞穿地肺。孤亭
聳巖腰。奇絕丈八像。鑄鑿齊隋朝。字體雜隸楷。筆蹤辨分豪。歐趙所未錄。一一歸檀包。石丈倘解語。邂逅
慶所遭。茲圖洵可傳。潑墨裝生綃。郵筒忽遠寄。快若背癢搔。安得生六翮。相隨陟岩峩。

汪杏江編修五十

廿載才名館閣傳。宮師踵武引斜川。心超卿棘公槐外。悟到天雲餅水前。一室化城游自在。全家福地住
神僊。昨非今是休分別。指月何曾兩樣圓。

湯雪樵五十

五柳門前綠意舒。筆牀茶竈久相於。碧雲閒擬休公句。玉筯爭傳李監書。大布衣輕侯萬戶。小蒲團坐歲三餘。程婁老輩皆多壽。瀟灑輸君半百初。

費筠浦中丞移節閩中詩以送之

賈董文章召杜助。東南開府頌聲聞。波涵笠澤清激底。笏立天平峻絕羣。卿月當前人共仰。慈雲漸遠望偏勤。如來倘有分身法。一住三吳一向閩。

三衢行館暫停旌。天許安陽晝錦榮。秔稻香中驕騎過。芙蓉巖下駕驂迎。政先儒術元由學。清畏人知不近名。欲援儀封當日例。重瞻棨戟到吳城。張清恪公先撫閩後移吳

和袁又愷移居

名山何必占匡廬。竹柏依然舊日居。門對招提非學佛。家鄰宛委好收書。春雲澹送千巖黛。夜月閒吟一笛漁載酒。往來無熟客。不妨薄笨當安車。

峭蒨支硎近可游。瀑泉如布石如蚪。探奇欲到最高頂。結伴都尋第一流。安定醉鄉多日月。立方韻語卽陽秋。誰言五硯無多物。大勝人閒百尺樓。

倚樓長嘯老孫登。甲乙圖書啓繡縢。學海量收波萬頃。心田腴穫麥千塍。曉窗注易重研露。夜雨留賓共翦鎧。我欲相從鈔善本。借君棐几一閒凭。

掃地焚香暑景遲。移居傳誦靜春詞。朝川曾入王維畫塘艸重增謝客思。入戶山禽招作友。參天巖柏近堪師。半邨半郭真宜隱。開徑無忘二仲期。

虎邱剏建白香山祠落成用白公武邱寺路韻四首

五馬香山叟。來游羽蓋頻。出城無俗地。開路便行人。尸祝輿情舊。蘋蘩祀典新。詩僊長住世。想戀武邱春。
掌制敷陳切。憂時諷諭頻。有詩當淨業。無黨是完人。照滿空門契。元劉友誼新。楊枝晚能放。丈室自生春。
神照如滿二僧名

姑蘇佳麗郡。蚤歲夢游頻。用吳郡詩石記意 燕寢宜名士。詩壇得替人。影泡緣不淺。廣大教重新。一院天香滿秋

花澹勝春

彥升風雅主。公擇唱酬頻。李松雲太守 折簡招閒客。盟心友古人。白隄名不朽。蔣徑話重新。小戶慙先醉。難勝

竹葉春

短簿祠

金印纍纍掩綠苔。叢祠鐙火寄山隈。鄉人不識尙書令。只認當年主簿來。

真娘墓

一枝先折獨流芳。休怨紅顏命不長。若待門前車冷落。雞皮誰復問真娘。

中秋前四日袁綬階招飲漁隱小圃卽席分韻得蕭字

小園依楓水出郭十里遙。主人勤著書。自比漁隱苦。良辰秋氣爽。折簡朋儕招。衣冠佐僑古。譚笑嵇呂超。少長三十輩。不鏤各自彫。言登畏壘亭。共坐猗覺寮。西山恰當樓。卓立青翠標。有若不速客。引我凌九霄。木犀十數本。雲外天香飄。黃中色獨正。不借燕支描。人因素心洽。地異紅塵囂。金谷徵故事。相於歌且謠。我老才思涸。白髮徒蕭蕭。聊學擊轅響。徐引釣天韶。

題法梧門梅石小照

昔讀梧門詩。高唱繼韓白。今披梅石圖。清標映履鳥。先生詩味似寒梅。不學穠華桃李格。素心相對石丈人。磊落不減米家癖。廿載神交未合併。開函忽見文章伯。紫芝眉宇洪崖肩。宛到詩龕共晨夕。燕許文章公主盟。向禽山水吾衰劇。鄧尉橫斜千萬枝。洞庭空嵌幾朵石。空王香火倘有緣。尙擬譚詩圖主客。

鮑臥雲招同邵晴巖馮補亭陳秋嘯游虎邱白公祠和臥雲韻

近游天借好秋光。小泊吳闔七里塘。紫蟹正肥霜後曆。黃花纔送晚來芳。波濤活水安茶竈。海湧晴嵐入酒觴。卻笑香山修淨業。花船猶復載紅妝。

白傅祠堂結構新。濯纓臨水了無塵。虎邱猶記初開路。鶴石重依舊。主人勤靜兩言留治譜。救煩無若靜，補拙莫如勤。文章異代作比鄰。海山兜率休分別。花落何須認溷茵。

公在蘇
都齋句

潛研堂詩續集卷九

題宋牧仲法螺秋色卷

訪秋小隊記當時。羣屐翩翩玉樹枝。卻笑烏衣王大令。蘭亭會上竟無詩。

翰墨助名兩不磨。詩情翻比簿書多。朱門棨戟今猶昔。誰肯偷閒到法螺。

題秦繹山碑拓本

樂石年年刻。程書旦旦勤。頌功猶未了。已有揭竿人。

博浪人狙擊。空勞大索忙。始知嚴督責。不及法三章。

上蔡牽黃狗。沙邱進鮑魚。孫卿門下士。何忍便焚書。

誰奉牛毛法。唯餘蝸扁文。一長矜絕妙。野火不能焚。

袁簡齋前輩輓詩

幾載相逢索輓詩。今朝真赴玉樓期。篇章最有公卿賞。姓氏居然婦孺知。世上無方求藥艸。人間猶戀爲花枝。六朝山色俄蕉萃。此後誰舉大將旗。

掉頭肯作玉堂僊。江左牽絲政事傳。自詡好名還好色。何曾求道更求禪。東方玩世三千牘。榮起行歌八

十年至竟九泉留一憾不教重賦鹿鳴篇。
踏徧天涯一瘦藤汝南月旦逐年增風雲出吻梁任昉履屣登門漢李膺說鬼搜神多漫錄評詩品石總良朋只今總帳依然在誰與西窗夜翦鐙。

和謝錯山明府當湖書院紀事詩元韻

當湖學脈在婁淞桃李年來秀更鍾筆陣萬言須倚馬文心一縷要探龍諸生幸接絃歌響賢宰深籌蠶粥供計日毛錐先脫穎逢年誰道不如農。

東浦方伯奉命監臨武闈詩以志賀

玉尺評量頗牧才儒生憑軾氣雄哉六韜熊豹符親授八駿驛路特開蕭相薦賢韓信出范公校武狄青來彎弓也似論詩密驗取穿楊一百回。

自適

自適田園興兼無燕雀喧耐貧緣省事避謗獨忘言竹任鄰家醉花嫌洞口繁屠麻容十笏無佛且稱尊
生來伏不鬪自許董無心某覆前賢局絃尋大雅音客休誇劍俠我欲託書淫新句隨時得撲鬚怕苦吟，

獻之以霸陵圖求詩得二絕句

黃屋當年竊自娛十行手札出西都漢皇別有攻心策細柳何曾遣亞夫。

百金未肯露臺捐。三尺能伸廷尉權。容得賈生長太息。不妨厝火自安眠。

尺

中和拜賜百僚同。終歲誰酬一寸功。紅女持來裁作樣。梓人算定畫爲宮。測圭莫把分豪誤。烹鯉時聞絹素通。安得叔和勤切脈。吹將暖律換春融。

題蠟磯靈澤夫人像

油口初屯貔虎師。明珠步障記當時。二喬得壻皆人傑。正統終輸大耳兒。一隊新添娘子軍。弓刀侍女總如雲。紅顏亦有三分略。不獨英雄是使君。湘竹斑斑淚暗揮。蠟磯絕命是邪非。永安宮闕知何處。不忍游魂過秭歸。

古廟松杉水鶴鳴。畫圖彷彿見皇英。蛾眉亭下如珪月。想與冰心一樣清。

題筠浦中丞甘雨應祈圖卷

少讀三百篇。兩歌陰雨膏。黍苗慶有秋。功歸郇與召。東南土宜禾。歲轉百萬漕。總秸輸神倉。秉穗入私窖。今秋偶亢陽。日炙風亦燥。安得輓天河。澆此憂心燎。賢哉中丞公。不待閭左告。親禱鬱羅臺。盡卻八騶導。果然有腳春。頃刻通大造。鞭起龍公癢。戰退蛟女驚。一出涼飈興。再出墨雲罩。三日遂成霖。額手非意料。江北與江南。灑渥先後報。何須剗雞卜。不藉刑鵝禱。起看四野閒。耄穉共欣笑。戴笠出耘鉏。著屐踏泥淖。

邨邨歸犧臥處處鳴蛙鬧饋黍趁晴初提壺或醉倒一幅幽風圖神理都曲肖商巖爲霖久鮮于福星照先民有遺言愷悌神所勞

河豚歌

海鄉多河豚腴美勝梁肉先春舉網得不待垂楊綠清晨招客盛滿盤有客頭搖眉卽蹙忍將性命付兒嬉頃刻人身近鬼錄主人語客箸勿停嚴龜食經君未讀抉眼剗腸血出瀘洗之滌之真味足吾鄉朵頤千百輩飽啖人人饜所欲醉歸兒女話團圓阿誰獨脹彭亨腹鴛鴦繡被朱輪車人生何往非鳩毒一味當筵且莫憂勸君休戀容容福

冰鐙

莫笑伊空腹誰知汝熱腸金波窺素抱燭火借餘光坎陷離堪麗心炎性自涼然鐙無我相泡電兩相忘

十月八日汎舟山塘登千人石次兒東塾從行口占絕句

拾級重尋舊講臺石頭路滑怕莓苔真嬾道上遙相訝今歲游山第一回
初冬洋菊尚嬋娟野卉偏呼老少年天爲詩翁無腳力送將紅葉到船邊

東浦方伯寄示立春見懷詩依韻答之

新春纔一日特寄艸堂詩散櫟人都棄分甘意獨垂下交通款曲陳謝拙言辭佛地公兼占慈雲蔭在茲

政簡緣聞道官高不廢詩詞華冊載舊經濟大名垂敢附苦岑契都忘寒燠辭慙非徐孺子下榻得于茲

原作

陳奉茲

茲著書尤究史集古併工詩學盡通儒伏名非一技垂得交嗟已老數見喜無辭小別流年換春風復在

題李松雲太守虎山看月圖

海湧峯頭月金波萬古圓澹無脂粉相閒悟夢泡綠壯氣池涵劍文心綆引泉夜游茲地好應讓李青蓮盤石千人共深宵卻獨看靜中偏有色高處未妨寒初地棲心穩平坡著腳寬何須更秉燭皓魄挂雲端

題顧秀才抱沖小讀書堆圖時抱沖已歿

東吳顧文學坐擁百城書意適思河豕心閒逐蠹魚遺聞搜越絕小說屏虞初欲訪黃門跡空山自結廬小松瀟灑客爲畫讀書堆泉石緣非俗風流盡可哀篋留前度札階掩舊時苦辛苦丹黃在遺編忍數開題晦之弟水流雲在圖

小齋得自怡弟所居名曰得自怡齋日誦少陵詩世味雞蟲外天懷雲水期江亭聊可憩飯顆莫相嗤出岫非吾願虛舟任所之

性癖無它嗜終年汲古勤盈科從不竭過眼自成文澹遠江南水蒼茫淵石雲盡收行橐裏應許對床聞

三月十一日袁又愷招同王述庵潘榕皋段懋堂蔣立厓諸君集漁隱小圃賞牡丹分韻得惠字
名花如佳人外秀中更惠天然富貴姿禮義常自衛先開讓桃李後進引蓮蕙金屋嚴深藏呈身嗤姪姊
暮春天氣佳漁莊臨水澨主人約看花上客此停軾一詠閒一觴聊舉永和例今者不爲樂桑榆景易逝
南華尙達生右軍未忘世且汎梓澤尊欲制雍門涕

十六日戈小蓮招集范邨別墅賞牡丹分韻得酒字

晨聞折簡招梵邨會僊友籃輿十里遙山光忽落手石湖游賞地一水繞清濶已遠城市囂更謝剝啄叩
居然竹林游拍肩嵇阮耦賞花到十分滿酌且一斗客醉已二參春去將八九羣公各擊鉢老我繼鼓缶
雖少倚馬才尙有譚天口願盡今日歡莫負盈尊酒

錢生宗穎攜陳孝廉詩庭所畫秋窗聽雨圖屬題

鼓瑟湘江格最清五言今日得長城梧桐葉底蕭蕭響似助騷人落筆聲
畫生六法擅寥江寫出雲泉瀉碧淙它日翦燈來話舊攜筇訪爾讀書窗

戊午除夕立春

新春猶舊歲元日是來朝老望而今健寒知此後銷林泉增我慢杯醕謝人招回首鈞天夢依稀卅載遙
西抹東塗日于今又廿科繫鞅前輩少避席後生多未厭屠蘇晚生憎剝啄過兒曹太平鼓信口亦成歌

庚申元日

七十又加三春風到艸庵客猶誇我健筆欲與儂譚眼耳根全滅詩書味自甘生來強項骨不肯拜瞿曇
生朝偶作

六十不借債七十不過夜二句吾鄉諺我今七十三風燭須臾化有眼視不審黑白昧真假有耳聽不聰鐘聲皆喑啞唯餘一寸心了然完無罅此心豈可恃形滅神亦謝譬之已死蠶安有遺絲藉聖賢同一身夢奠本無怕云何近世英誤聽異端詐不死乞僊方有罪望佛赦往生極樂鄉依託彌陀舍是真貪癡想僨倒堪歎吒昔賢重令終易簣意閒暇冷笑讀書人乃爲三塗嚇

吳江夜泊

但覺雲頭聚何時雨腳收舟如萍一葉身似海孤鷗歲月驚虛擲湖山憶舊游垂虹亭外泊春夜斗成秋

題三高祠三首

嘗膽成功後顰心共載還君臣兩烏喙家國一紅顏未齒南陽劍終辭角里山晚年逃貨殖始信立身艱
典午論人物江東數步兵偶隨游洛侶不博曳裾名白璧曾何玷青山若有情秋風波浪惡安穩喫葷羹
我慕天隨子浮家當卜居牛宮春水活鶴市暮雲舒詩改元和樣人傳笠澤書古來名不朽豈必著絳魚

歸安道中

小艇低于屋。乘風任簸軒。波平知雨足。日出覺春暄。兌酒三家店。柔桑十畝園。一峯青似繖。無佛欲稱尊。

雨後攜東塾游吳山入紫陽洞

城市千家會江湖。一覽閒盤困米老石。渲染李唐山。雨霽桃初放。雲昏鳥自還。堂堂峯第一。不許海陵攀。

西湖

一碧分來裏外勻。乍晴乍雨總宜春。比將西子嫌唐突。姑射山頭綽約人。

菜花

近覺桃花嬾翻輸。菜蚤開天公太豪富。徧地布金來。

喜晤山舟前輩卽以留別

八年重見古鬚眉。譚笑依然卻老熊。翰墨千秋無敵手。文章五代又連枝。長源偃骨天生獨。徐邈清風世所師。杖唾自憐衰已甚。未知挹袂更何期。

同作

東塾

一代傳人翰墨雄。元和有腳溯家風。逍遙肯作游僊夢。公有反游十三首。咳唾居然玉局翁。同館序來前輩少。

新詩格比極元工。此行不負平生願。得識西湖又識公。

武林歸舟

雨阻尋山興風留送客情。桃花開兩岸如伴老人行。
已分模糊眼。慙看豔冶花。黑甜忽驚起。當面赤城霞。

題開元寺古佛

天堂聞說卽蘇杭。古佛何曾返故鄉。冷笑南人爲佛誑。卻貪極樂住西方。

可廬舉孝廉方正志喜

予季東南美。賢良應大科。遠勞一封傳。勝取百困禾。稽古榮圭組。辭官戀薜蘿。爭誇黃叔度。天祿著書多。

世味

世味如雞肋。浮生笑鼠肝。自甘顏巷陋。未厭范袍單。冷暖閒來覺。雲煙靜裏看。問翁何所樂。今日幸平安。

苦雨

容鄰三間屋。支頤一老翁。欲尋榮啓樂。難送退之窮。苦長偏矜綠。花殘不見紅。三春好天氣。半在雨聲中。

王夢樓贈東塾詩兼及京華舊事不勝今昔之感依韻答之

城南聽雨共春醠。聽雨樓在京師半截衚衕。畢秋颯寓齋也。昔時觴詠之地。紅燭當筵喚夜來。回首已成分鹿夢。論心終讓掞天才。青山供養芒鞚穩。白業精修忍艸裁。十日胥江留小住。優曇花忽眼前開。

題王叔華教授笠屐圖

與君同里又同庚。五十年前訂舊盟。今日南鄰還往熟。不嫌倒屣數逢迎。
蓬瀛兜率夢空游。大海中央認一漚。只要新排詩卷了。醉吟面目自千秋。
十載彭城苜蓿香。閉門覓句興偏長。前身想是陳無己。親見東坡笠屐裝。

潛研堂詩續集卷十

辛酉新年作

新年偏病足。謝客且關門。酒任鄰家醉。某從局外論。小時曾了了。此去益昏昏。誰送衰翁喜。圍爐一餉溫。僊佛都虛幻。休尋不死方。守謙終受益。作善即爲祥。智小蜩鳩樂。材高栝柏戕。靜中參至理。說與小兒郎。

讀史記二首

子長史筆獨嶙峋。一字何曾獎暴秦。月表區區敲石火。祖龍豈異沐猴人。
人代茫茫遠古前。共和以上阿誰傳。笑它安樂窩中叟。杜撰堪與混沌年。

爲秦照若題其曾大父雲津先生遺像

洙泗師承六蓺通。蟠龍近派衍江東。一經獨抱休嫌拙。自有名垂野史中。

先生著有練川野錄及涇南志等書

生晚無由御李膺。楹畫三復感偏增。名儒有後良堪羨。折几家兒想未能。

上元夜

春晴幾日聽農謠。四氣和于玉燭調。老幼團園羹骨董。菜根香裏過元宵。
生來無愛亦無憎。竹石禽魚即我朋。一室誰非行樂地。十年不看上元燈。

絳老

絳老人疑甲。波斯水認痕。蚤知神欲滅。難恃舌猶存。楓炫秋前葉。葵依午後暄。唯餘菜根味。珍重付兒孫。

滄浪亭柳寄都門舊同學

上林桃李各爭妍。盡讓三吳國色先。誰道滄浪憔悴柳。相看青眼已多年。

晤邢長興侄山卽留宿官齋

扁舟偶到雉山城。徧野桑麻百室盈。三徑新開調鶴地。六時不廢讀書聲。文章政事真兼美。隴樹吳雲快合併。一榻肯容吾輩住。清風如見古人情。

題侄山松林讀書圖

松陰深處硯池開。滾滾原泉萬斛才。莫訝訟庭公事少。郵筒時有異書來。

高文真與震川倫。撫字依然舊日民。竹馬兒童走相識。不知官是讀書人。

陵傳證徙葬本末作辨一篇既確不可易矣阮芸臺秦小峴諸君皆有詩予亦繼作

一局丁丁墓子墮。指麾小兒賊已破。阿堅連牽二十年。鶴唳風聲氣先挫。平生擁鼻洛下吟。不知中有開濟心。文度手板徒倒執。茂宏故節羞重尋。當年久負蒼生望。手護金甌竟無恙。東山旣出果如何。從茲一

雪清譚謗白雞夢斷吁可憐長干梅嶺好墓田始興小子肆狂虐三鴉岡口移今阡顏公石柱張公錄表樹守冢自胡宿考證爭傳明府文祠田更得中丞續謝蘊宰相風流百世思遺民墮淚讀新碑功名盛滿保終始令人太息桓伊詩

下箬寺陳武帝故宅

烏山王氣久銷除十笏猶傳誕聖居枉費千夫鑿巖脈誰知此地有三餘涓涓井沸詫神奇旁舍驚看寧馨兒一樣寒泉榮辱異滄桑轉眼不多時

顧渚山行

羣峯踴躍似波騰陽羨東來翠幾層占取白雲最深處從來清福付癡僧焙得新芽穀雨前色香味美妙能全盛朝久卻頭綱貢一任山翁活水煎竹山聯句遠難稽小杜來游跡已迷祇有開成楊刺史賓朋羣從姓名題浮谿當日一塵雄解組曾來作寓公分隸大書波磔勁阿誰剔蘚到山中一月蠶忙判牘稀尋山留客暮忘歸城頭姑射真相似好與閒雲作伴飛

挽周少霞廣文

古湫衣鉢付周郎卅載聲名翰墨場十國遺文補歐薛中州新韻按宮商秋菘春韭山資足霽月光風教

澤長耆舊祇今零落盡尙湖回首路茫茫。

和唐陶山明府修復唐伯虎墓

淵明神游桃花源六如身住桃花塢不是人間第一流難與桃花論賓主對花須把酒對酒宜賦詩詩畫遊戲耳工拙我不知大兒漢曼倩小兒唐青蓮尸解非所好怕作懵憧僊前身桃花見花喜故應埋骨桃花裏三春紅雨落紛紛唯有此桃花不死前中丞宋公後明府封植區區三尺土異代堪聯僑札交當時恥與絳灌伍明府來自桃花源華胄遙遙本同祖出處雖殊興趣同唱和壇篪吾與汝歌新詩酌清醑僊不能言花應語。

贈胡石梁

久賞士龍妙君女婿陸孝廉學欽予妻東書院舊徒也因知彥輔清琴書堅道力湖海助詩情水闊閒鷗穩天空老鶴鳴蓬門今始啓好訂歲寒盟

題宋汝和畫花

梅花宰相賦紅杏尙書詞澹遠瀟湘畫清逸西陂詩異才不世出一手能兼之老矣興不淺卻寫三春姿蕭然丈室中忽見羣蛾眉神似形亦似卽以花爲師真花雖云好不耐封姨吹何如寶此卷奕葉長留貽

曉聞禽聲

我不辨鳥語而喜聽鳥聲。清晨啁嘈響有若鸞皇鳴。我衰久耳聾。問字鮮友生。何期不速客。過我時嚙嚙。
物微意良厚。願申歲寒盟。樂哉我與爾。勿慕喬木榮。

前蜀王鏘書妙法蓮華經殘本

我昔收金石。獨少兩蜀碑。廣政九經有殘本。搜訪未覩常懷思。東川琴泉古塔圮。法華貝葉猶無虧。六丁
刲火燒不盡。妙蹟往往人間貽。聞有朱書武成字。銀鉤想出平章爲。前顧後鄭各藏弄。一字欲直千朱提。
吾家籜石老詩伯。首賦長句何清奇。蔣士銓王治程晉宋銑盛二吳省欽趙喆屬和競放瓊琚詞。一彈指頃歲
四十。舊交落落晨星移。紺園徵君忽過我。要我染翰題新詩。神物已歸鄴侯架。楷法不減楊羲規。石刻榻
本尙難致。何況墨瀋光淋漓。延平雙劍終有合。憑君再訪虞山遺。此本乃鄭西崖所藏古湫同年久作古人其儲藏聞亦散失矣詩成自
慙格力弱。臨風空撫星星髭。

次榕皋蟄室韻

方丈虛生白。斯晨息此廬。地偏能避俗。身健樂閒居。物理寒暄外。天心闔闢初。眼前堪悟易。何事問三車。
垂簾如洞壑。揮翰卽雲煙。容駭無多地。觀心小有天。聲名四海滿。福慧一身全。冷笑瓜牛陋。焦生未是賢。
題同人姪策塞訪碑圖

我有歐曾癖。家多适遇才。低頭看臥石。不肯損莓苔。

吾鄉無蹇驢亦少晉唐蹟。惟南翔寺有咸通乾符兩石幢會須五嶽游手捫秦漢石

治隱園三友圖爲韓旭亭作

昔讀遺民傳。有懷復社賢。名高廚顧上。齒讓鄭金先。剝啄無它客。衣冠儼列僊。依依五株柳。共話義熙年。四夔猶少一。三劍竝超羣。桐木南陽舊。虹光北斗分。傳詩垂教遠。賣藥怕名聞。弃葉丹山鳳。披圖誦昔芬。此首用韓氏故事

壬戌元日

生年難滿百。已閱四之三。冷暖心無著。癡聾理久諳。靜知榆景促。貧愛菜根甘。令節吾何快。屠蘇一勺酣。久脫趨朝籍。還多問字緣。人皆憎老物。吾尙戀殘編。蠶瘦絲垂盡。魚枯泣可憐。成童宛如昨。又是采芹年。

題唐陶山海上乘槎圖卽送之海州任

三吳十載住雙鳬。東海今朝領郡符。一路清風衣帶水。送君遙渡射陽湖。胸山秀色接蓬萊。海市應爲玉局開。天與才人詩境界。乘槎直到郁洲來。石刻江南少賞音。鬱林妙迹祕東岑。憑君多榻青藤紙。寄與人間好手臨。聞道胎禽近易馴。滄溟來往翅如輪。官齋大勝乘軒樂。傲煞華亭乞鶴人。百室絃歌處處聞。一經指授便能文。年年僊館春無恙。指點桃花憶使君。

頭綿津山人詩稿新城王阮亭秀水朱竹垞批本

酒肉朱門太可嗤。何妨判牘又吟詩。
詩成就正諸名士。此段風流已足師。

蠶尾山房放鴨洲。偶然隻字亦千秋。
貪多愛好空相撼。終讓江湖兩派流。

也王阮亭朱竹垞韓慕廬諸公皆有題詠予亦作六君詠繼之

漆園吏而僂著書意有託。契舟索劍痕一笑向與郭鳩鳩。
料鵠鵬大小竟奚若。魚我但兩忘人間豈不樂。
晏倩歲星精滑稽聊玩世。大隱金馬門規諫雜諧戲。
磊落萬言書不道。神僂字一飽粟可憐三偷桃有味。
柴桑名家彥汲汲慕魯叟。桃花源久迷不如宅邊柳。
林田亦復佳肯與督郵偶三徑菊黃時豈無人送酒。
李生謫僂人低頭作供奉。清平調三章似諂亦似諷。
知心飯顆翁憐才心鄭重太息古柏行才大難爲用。
坡公不合時投老竄海外一生春夢中榮枯了無礙。
乘桴駕長風奇絕斯游最。何人品八家乃以野狐配。
遂初西堂翁神交五君子海山倘相招挹袂吾與爾。
今古只利那人代何彼此龍洲沁園春前例亦如是。

四月廿有六日重游泮宮賦贈新先輩因追懷西莊光祿

壬戌仍逢采藻年。恆河照鬢忽皤然。莘莘俎豆今猶昔。
濟濟淵騫後勝前三不朽閒當立腳。四先生往孰差肩。
磨牛陳迹重增感寂寞柴門鎖輞川。

吳竹橋禮部湖田書屋圖

我所思兮湖田春。中有著書獨樂人。青山如黛只咫尺。招邀入戶忘主賓。腹中五經皮裏史。手植桃李皆弟子。莫訝揮豪萬斛泉。先生自有源頭水。

我所思兮湖田夏。花竹便娟秀而野。少陵稷契久許身。大庇遠勝千閒廈。湖雲忽起山雨來。登樓四顧亦快哉。衝泥且卻油竹傘。消暑滿酌蕉葉杯。

我所思兮湖田秋。紅蓮蚤稻香氣浮。禮耕義耨作家計。硯田一穫豐千秋。海虞本是山水窟。載酒題襟興飛越。紅葉朝探吾谷雲。碧波夜汎昆湖月。

我所思兮湖田冬。謝家玉樹枝丰容。萬卷牙籤手自校。列宿四七咸羅胸。主人清言鋸玉屑。夏鼎周彝左右列。安得扁舟乘興游。與君共踏三峯雪。

題汪竹香孝廉詩藁

經義紛綸老孝廉。謝敷終應少微占。生平滋味餐黃蘖。莫怪詩情苦勝甜。

古巷猶傳魯望名。所居名陸家巷筆牀茶竈宛如前。生只無甫里。堪種破硯年。舌自耕。

邯鄲學步意如何。剖劙紛紛下里歌。檢點三唐箋中集。好詩畢竟抱山多。

風月吟來當解嘲。一生精力盡推敲。叢殘遺藁新排就。難得侯芭子細鈔。謂夏方米徐直卿諸君徐

蔣湘飄寫經圖

黃庭遺教墨花翻。那似羣經道更尊。莫笑老人真計拙。金瀛幾箇到兒孫。

熹平妙迹久漂零。廣政遺文曙後星。孟蜀石經訪求數十年近始得見左傳三百餘字殘本天與聖朝成盛事。白頭一手寫全經。

癸亥新春

問年周一部。獻歲又三春。久作歸田賦。猶留食粟身。有齋堪習嬾。非佛亦忘嗔。鬢髮都黃白。誰云此老貧。殘臘入新年。梅花雪後妍。僻無留客酒。案有示兒編。獺祭難言博。蟲彫亦可憐。江湖多小集。若箇姓名傳。題可廬對牀風雨圖

門內堪師友。吾家一子由。聲名梁兩到。博洽宋三劉。白髮驚相似。青燈話舊游。聯牀風雨夜。莫忘卞山秋。汪蛟門少壯三好圖爲秦敦夫太史題

我不學周公瑾。識曲顧誤研宮商。亦不學畢茂世。盜飲僵臥酒甕旁。惟儲文字五千卷。晨夕相對長無忘。六經爲翹槧。百氏如笙簧。雕蟲一任壯夫誚。食跖更比老饕忙。家徒四壁況善病。此生無分溫柔鄉。當年彥瑜華腴胄。知音豪飲工詞章。自述三好不及色。赤心戰栗神內藏。蛟門比部磊落士。直幹百尺梧桐長。畫師傳神出新意。十眉環列窈窕娘。同時名流競題詠。輸攻墨守奚低昂。百年妙蹟幸無恙。貫月夜夜虹生光。賞音今遇太虛子。珍重不異兼金黃。長城詩格出家學。木天兩世鸞皇翔。急流勇退神僊骨。竹西騎

鶴聊襄羊。檢書室有如願婢。倚聲人捧桃根觴。丈夫寓意不留意。天女下試庸何妨。蕭生寒儉太自苦。踏歌江上同汪郎。

白公祠喜晤述庵司寇

邂逅老僊翁。鬚眉白。傳同中朝留一鶚。高論卻千熊。身與文俱壽。詩因愛更工。放翁云：詩到無人愛處，工戲轉一語。樓臺無地起。想見古人風。

此地宜觴詠。回頭六十年。知章歸未晚。長慶集先傳。坐閱千人石。閒烹一勺泉。捫蘿搜古碣。會粹入新編。

時刊
石粹編
金

題朱竹垞明詩綜艸藁

朱竹垞先生編明詩綜既成。寓吳閩之慧慶寺。鳩工剗劂。始于康熙壬午之冬。斷手于乙酉秋季。時先生春秋踰七望八。精神矍鑠。遨游山水。不假人扶掖。三吳名士。載酒問奇字者。戶外屢常滿。或出錢助刻資。一時傳爲嘉話。距今百有餘年矣。予比歲假館南園。每出郭西。過白蓮涇上。訪僧雛。無有能言其遺事者。今春曉泉太史訪予春風亭。攜此卷見示。乃其及門陶松如茂才所藏。松如嘗于故書中。檢得叢殘廢紙百餘片。質諸太史。識爲竹垞手迹。令好手粘連爲長卷。雖于全書。僅千百之一。而筆墨腴潤。卽絕不經意之中。得瀟灑自在之趣。展玩數四。覺先正警歎。如在目前。

喜可知已。予今年紀與秀水同。而目眩手戰。潦艸幾不成字。因歎龍馬海鶴之姿。非跛蹩所及。不獨才望相去懸殊已也。敬題四絕句。請曉泉和之。

長蘆太史七十六。慧慶手鈔百卷詩。比似遺山才更大。瑤華南北總無遺。
鶴不乘軒老尚鳴。近游行徧八門城。白蓮涇上開書局。自信文章合有名。
安石金經碎翦裁。裝成字字迸珠胎。知音不遇陶貞白。拉雜都爲爨下灰。
僑吳我亦白頭翁。前輩遺聞想像中。多謝神僊郭功父。攜將長卷話春風。

題凌仲子教授校禮圖

我讀七戒篇。偉哉凌君學。羣言謝未能。禮經手自斟。釋例十三章。大義何卓犖。古聖重人倫。以禮啓後覺。
揖讓俛仰閒。身心日追琢。教從童卯始。要使還誠慤。莊列崇元虛。視道爲桎梏。婦姑任勃谿。一室生羿浞。
天未喪斯文。慶戴守其樸。北海集大成。文字費商榷。流傳二千年。學官閟楹桷。束閣置勿觀。張眼等眊瞽。
真儒起新安。褒然甲科擢。不嫌校官卑。說經顏頤頤。古器辨敦卣。正聲叶徵角。隻手障回瀾。功豈但一璞。
我衰耄已及。廢學衆所譏。忽枉瑤華詒。連城投和璞。敬亭雲往還。千里途未邈。安得問字緣。饗堂許剝啄。
述庵侍郎八十仍疊虎邱唱和韻

八十樂全翁。精神潞國同。西京兩司馬。東海一非熊。玉尺量才正。金針度世工。漁莊近三泖。消受快哉風。

此叟非常叟忘年得大年籌邊雙鬢換艸檄百蠻傳夜踏金川月晨炊雪嶺泉亥章曾未到都入紀行編
恥作嗫嚅翁寒松雪榦同南臺冠戴豸西省掌批熊霖雨沾濡渥絲綸潤色工踐揚三十載人識曲江風
事業雲霄上詞章漢魏年行藏真不愧福慧兩堪傳力輓千鈞鼎思探萬斛泉分陰晚猶惜樂府續新編
今古幾多翁酸鹹嗜不同道能融孔釋味欲盡魚熊許鄭淵源遠歐蘇著述工新排詩卷富肆好穆如風
曹憲張蒼侶研經壽百年千秋斯道重四海大名傳共仰星環斗誰窺綆汲泉羣英陪杖履語錄及時編
當代董思翁聲名壽樂同三車參象馬五戲卻猿熊老學心逾細詩傳選最工懸弧冬日暖入室坐春風
北郭隨肩日南宮擢第年青氊慙我倦黃絹羨公傳卓立靈光殿紓餘難老泉鶴南飛一曲欲附五羊編

題小谷口讀書圖爲陳蓮谷作

當代陳無已前身鄭子真樵風涇宛似書帶艸猶新汲古元同調虛懷想古人紫芝眉宇在彈指百餘春
稼門中丞以近藁見示卻寄

詞章經濟本同源鐘鼎山林豈異論韓子文皆從道出溫公事可對人言采風不尙千篇富養正方知六
義尊公選養三復公詩得詩法莫誇綺麗入旁門

和稼門中丞見贈之作

頽然暮齒久成翁猶在名卿拂拭中假館已叨仁者粟論詩常誦穆如風公心似鑑勝高頰我腹無書媿

郝隆願勸青衿勤嚮學。焚膏珍重寸陰功。

題陸桐庵霜林秋月圖

寒林寂寞夜迢迢。曳杖何人渡板橋。一片空明了無滓。此中妙諦問參寥。

梁山舟前輩八十

占得西湖第一峯。煙雲供養幾千重。門懸曼碩山舟字。人識坡公笠屐容。揮翰尙看奔渴驥。著書久已薄。雕龍年開九十身逾健。不爲登高借瘦筇。

甲子元旦

七十還加七。重逢甲子春。元無駐顏藥。猶作負暄人。眼暗觀書懶。神疲假寐頻。庭梅知我喜。催放衆香匀。人如都散漢。身住小屠蘇。竹聽今年響。桃更舊日符。江湖游已倦。面目醜難摹。比似香山叟。公然一歲踰。

題黃蕡圃除夕祭書圖

斗室紛羅列。今朝倍肅將。禮行祠竈後。心爲拜經忙。神智年年益。精靈字字香。一瓻曾借讀。助祭或須卬。

吳槎客七十

七十顏猶少壯如松。身鶴骨最清疏。手摹離墨前朝字。家有淳熙善本書。曹憲壽應逾百歲。蘇公味只戀三餘。海山咫尺庭前列。試辦長籌幾屋儲。

聞瞿涉齋廣文之訃愴然有作

隔宿瑤箋墨未乾。巫陽升屋太無端。乘風想到芙蓉館。題句猶傳苜蓿盤。虎阜聽泉成昨夢。鶴湖載月記同看。衰齡久覺知音少。綠綺從今忍再彈。

偶題

有月忙開眼。無魚少羨心。影形神互答。生老病相尋。宿艸年年淚。秋霜漸漸侵。在阿常獨寐。慧地一書淫。

次孫師康十一歲好誦余詩喜而有作

病來十指似懸椎。已是江淹才盡時。慙愧驚人無一句。虛勞汝誦老夫詩。